

حسن سير

حسن سير
رواية
معتز شرباش



دار الحلم للنشر والتوزيع
٤ شارع الأشراف - من شارع مؤسسة الزكاة - المرج - القاهرة
موبايل : ٠١١٤١٨٢٤٥
dar_el7elm@hotmail.com
المدير العام : د. إسلام فتحى

تصميم الغلاف : محمد عبد السلام
إخراج داخلي : الحلم للدعاية والإعلان

رقم الإيداع : ٢٠١٦/٢١٤٨
رقم التقييم الدولي : 9-031-798-977-978

إن دار الحلم للنشر والتوزيع، غير مسؤولة عن آراء المؤلف وأفكاره، وتعبّر
الآراء الواردة في هذا الكتاب عن آراء المؤلف، ولا تعبّر بالضرورة عن آراء
الدار .

معتز شرباش

حسن سير

الحلم للنشر والتوزيع

obseikan.com

إلى حبيبة روعي.. ومُلهمتي الوحيدة.. أنتِ كالشمس، ولكنك
لا تغيبين.
إلى ابني يحيى.. يظنون أن لولاي ما كنت أنت، والحقيقة أن
لولاك ما كنت أنا.

obseikan.com

ليل الثلاثاء ١١ يناير سنة ٢٠٠٥

ليلة ممطرة من ليالي شتاء القاهرة. تلمع أضواء باهتة لبعض أعمدة الإنارة على الأسفلت، بعد انطفاء مُعظمها، لتأخر صيانة، أو انعدامها. صوت ارتطام حَبّات المطر بالأرض يملأ فراغ صمت الشتاء الكئيب.

فتاة في أوائل العشرينات، تسير في خطوات أقرب إلى الجري، في محاولة للوصول للشارع الرئيسي، على أمل أن تجد ما يقلبها لمنزلها، الذي بدى لها كحلم بعيد المنال. تترك الرصيف الضيق، الممتلئ بالوحل، غير الصالح للمشبي حتى في الظروف العادية. تسير بمحاذاة السيارات المتراصة على جانبي الطريق في نظام وكأنها حرس شرف في استقبال ملكي.

تسمع صوت احتكاك عجلات سيارة مُسرِّعة بالأرض، في محاولة يائسة للتمسُّك بالأُسفل المُبتل، لتوقف اندفاع السيارة في اتجاه الفتاة، التي لم تستوعب بعد ما يحدث. يهدُّر الرعد في اللحظة التي تصدم السيارة جسد الفتاة في تواطؤٍ مُخزي، ليُغطي على صوت الاصطدام، والصرخة المذعورة التي اطلقتها. يسكُن كل شئٍ للحظات ماعدا المطر، ويهدُّر الرعد مُجدداً بصوت أعلى من صوت صرخته السابقة، وكأنه يعترف نادماً على فعلته، ويبكي الضحية.

يغادر السائق السيارة، وتفضح خطواته المُترنحة مدى سُكره، يسير في اتجاه الجثة التي همدت تماماً، على عكس أنفاسه المتسارعة. ينظر حوله في كل اتجاه مفزوعاً ليتأكد من أن أحداً لم يلاحظ ما حدث. يقف بجوار الجثة لثواني بدت له كساعات طويلة، تأكد أنها لا تراه، لم يجرؤ على لمسها للتأكد من موتها. نظر حوله مُجدداً، ولما تأكد من أن إضاءة الطريق لن تسمح لأي شاهد من أي نافذة برؤية أرقام السيارة. ركب سيارته وغادر المكان، تاركاً الجثة مكانها في وسط الطريق.

ليل الأثنين ٩ ديسمبر سنة ٢٠١٣

كعادة أي مسرح جريمة لم يُكتشف بعد، من قبل جارة متطفلة، أو مُحصل كهرباء سئ الحظ؛ السكون والهدوء يملأن المكان. وكأن الزمن وقف مأخوذاً بقُدرة البشر على خلق مثل هذه البشاعة.

الموت حاضراً بوضوح، يكاد أن يكون مرئياً. هل يتمكن حقاً الشخص الذي انتهى عمره من أن يرى الموت قبل أن يعيشه؟ هل يترك الموت أثراً منه في المكان الذي تحدث فيه عملية قتل بشعة؟ أو موت بطريقة مؤلمة؟ هل هو ذلك الشعور الذي ينتاب كل من يخطو في مكان يعلم إنه شهد جريمة قتل أو انتحار؟ وكأن الموت ترك بصمته فيه؟ وهل كان سيشعر بنفس الإنقباض لو مرّ من نفس المكان، دون أن

يعلم بالجريمة؟

كان كل شئ في مكانه، ماعدا داليا بالطبع. ففي هذا الوقت من كل يوم، تكون داليا في السرير، تقرأ، إن لم تكن نامت والكتاب قد سقط على صدرها مفتوحاً على آخر صفحة رأتها عيناها، ولم تصل كلماتها لوعيتها الغافي. ولكن الليلة داليا كانت مجرد جثة هامدة، الدم مُتجلط على بعض الكدمات والجروح في وجهها، مُلقاه دون عناية على ظهرها، في صالة شقتها المؤجرة، التي تعيش فيها وحيدة، بعد وفاة كل من يمكنها تحمُّل العيش معه.

قبل منتصف ليل الإثنين ٩ ديسمبر سنة
٢٠١٣

أسرع الرائد عصام ناجي رئيس مباحث قسم حدائق القبة، يغلق صوت هاتفه المحمول، للتخلص من رنينه المزعج، قبل أن تستيقظ زوجته. باب غرفة النوم المغلق بسبب البرد منعه من ملاحظة رنين هاتف المنزل الأرضي -الموجود في الصالة- عدة مرات بإصرار. ولكن سكون ليل الشتاء ساعد في أن يصل له صوت الرنين بعد عدة مرات، انتفض من السرير مسرعاً ليلحق بالمكاملة، التي كان واثقاً إنها تحمل له حالة طارئة خاصة بالعمل.

خرج عصام مُسرعاً على ضوء صاعق الحشرات الطائرة المُعلق أعلى باب الشقة، التقط سماعة الهاتف اللاسلكية التي تركتها زوجته في الخارج لتشحن بطايرتها، وقال وهو يجاهد حتى لا

يظهر على صوته التُّعاس الذي بدأ بالفعل في التبخر:

-الوقت؟؟!! ليه فيه أيه؟؟!!

ثم قال بعصبية وهو يعود في اتجاه الغرفة:

-هات العنوان طيب.

ثم يقول بنفاذ صبر قبل أن يغلق الخط:

-خلاص.. عارف العنوان فين.. جاي حالاً.

ألقى سماعة الهاتف بإهمال على كنبه قريبة. وعاد عصام للغرفة هادئاً، وكأنه لم يكن يصيح منذ لحظات، سحب منشفة كبيرة، وغطى بها نصفه الأسفل، وهو ينظر لزوجته التي استيقظت عندما غادر السرير كعادتها، وملامحه تنطق بالأسف لاضطراره النزول في مثل هذا الوقت. كانت رضوى هي أول من قطع الصمت، قالت بصوت مبحوح:

-عصام.. ماتقولش نازل.

التفت لها وهو يتجه للحمام المُلحق بالغرفة وقال وهو يرفع كتفيه:

-انتبي اللي اتجوزتي ظابط.. في واحدة عاقلة تعمل كده في نفسها؟

-ماشى يا عصام.. اللي يشوفك وانت بتتحايل عليّ زمان مايشوفكش النهاردة. وابتسمت بحُب.

نظر إليها وعلامات الذهول المُصطنع على ملامحه:

-مالك يا رضوى؟؟ مانتبي عارفة.. كنت بجيب رجلك وطمعان

في فلوس ابوي.

ضحكت بدلال وقالت:

-وانا كنت واثقة من كده.

ضحك بصوت عالي في طريقه للحمام وقال:

-بحبك.

ثم أضاف من الحمام بصوت عالي لتسمعه:

-ابقي اطمني على مَلَك، زمانها طَلَّعت عين أمك الغلبانة.

-زمانها نامت أصلاً.

خرج من الحمام ليجد زوجته جالسة على طرف السرير

تلف جسدها بمنشفة كبيرة استعداداً للإستحمام، وتتحادث

عبر الهاتف، وقد جهَّزت له ملابسه:

-حاضر يا ماما.. لو محتاجة حاجة تانية وانا جاية بكرة..

كلميني الصبح.. وانا كده كده هكلمك قبل مانزل.. تصبحي

على خير.

ثم قالت لعصام:

-ماتنساش بكرة عيد ميلاد ريم.. انا بقولك علشان بتقول

فاجئتيني.

قال وهو يرتدي ملابسه:

-إن شاء الله هكون موجود.

على باب الشقة، وقفت رضوى، تُقبِّل زوجها قبل خروجه،

غمزت بدلال وقالت:

-هستناك.

-لا.. نامي انتي يا رضوى.. ماعتقدش هاجي على طول.. ده
لو جيت الليلة دي.

-لولا عندك شغل.. ماكنتش سيبنتك تنزل الليلة دي.. إلا على
جُثتي.

فقال وهو يفتح باب الشقة:

-ما بلاش سيرة الجُثث.. مش كفاية الجُثة اللي رايح اشوفها
دلوقتي؟؟

ضربته في كتفه بقسوة مُصطنعة وقالت:

-فصلتني.

ضحك وأغلق الباب خلفه واتجه للمصعد.

عصام ناجي هو واحد من أصغر رؤساء المباحث في الوزارة،
كان يعلم منذ أن كان عمره عشرة سنوات إنه سيكون ضابط
مباحث مثل عمه الشهيد اللواء البطل مصطفى عزيز حلمي
الذي توفي قبل عام واحد، في تبادل لإطلاق النار مع مُلثمين،
هاجموه غدرًا كعادتهم. ذكاء عصام ساعده كثيراً في تحقيق
أحلامه، حيث تميّز بإتخاذ أقصر الطرق لتحقيق طموحاته
منذ أن كان طفلاً. استعان بعمه مُستغلاً حبه الشديد له
كثيراً في الكلية، ثم استعان به مُجدداً لمساعدته أن يتم تعيينه
في المباحث، ثم استعان بكل السحر الذي استطاع تسخيّره،
ليتمكن من الزواج من رضوى التي عشقها منذ أن وقعت

عليها عيناه. برغم من أنها ابنه رجل الأعمال الملياردير
الشهير راشد غريب، وبالرغم من معارضة أمها لزواجها منه
في البداية، إلا إنه استطاع أن يملك قلبها ويسحرها.

نظر عصام لنفسه في مرآة المصعد، بطوله الفارع، وجسده
الرياضي، وملامحه الوسيمة، التي لا تخلو من الجدية، وشعره
الأسود. كانت نظرتة لنفسه تحمل بعض القلق مما ينتظره
في حدائق القبة، وكان مُحِقاً دون أن يدري.

oboiikan.com

ساعات الثلاثاء الأولى ١٠ ديسمبر سنة ٢٠١٣

خرج عصام من باب العمارة، واضعاً يده في جيوب سترته الجلدية، شعر بلفحة برد بمجرد خروجه من الباب، وبدأت السماء تُمطر، فجأة، وبقوة، وكأنها ربة منزل تحتفي بضيف عزيز، فتخرج كل ما لديها لإسعاده.

شوارع القاهرة بعد منتصف الليل في شهر ديسمبر لها سحرها الخاص. يحاول عصام الإستمتاع بالطريق برغم البرد والمطر وبرك المياه التي بدأت تتكون على الأسفلت غير المُستوي، فلطالما أحب القاهرة في ليل الشتاء.

يقود عصام سيارته متمهلاً، بعد اتخاذ طريق جسر السويس بدلاً من صلاح سالم. يستمتع لمحمد منير يُغني بصوت خفيض، وكأنه يخشى أن يوقظ صوته القاهرة النائمة، يتفرج على الناس في الشوارع، فهم برغم قلة عددهم يملأون

الشوارع بالحياة، على عكس هؤلاء الذين يملأون الشوارع طوال ساعات النهار، فهم كالموتى الأحياء، يشعر وكأنهم أجساداً بلا أرواح.

وصل للعنوان في وقت قصير، وتجنب الدخول للشارع الضيق، لعلمه استحالة وجود مكان ليتك فيه سيارته، كعادة أحياء القاهرة كلها تقريباً. ترك سيارته -صّف تاني- على الشارع الرئيسي، وأسرع الخُطى نحو باب المنزل المقصود. لاحظ وقوف سيارة شرطة تسدّ الطريق بوقاحة، وبعض الأهالي تبدو عليهم علامات الفضول والبرد والانزعاج.

كان المنزل داخل حارة من حارات حدائق القبة، تلك الحارات التي تشعر فيها كأنك تسير داخل منزل واحد كبير. واحدة من تلك المناطق التي يمكن لأي ساكن فيها أن يعرف ما يحدث في المنازل المجاورة دون اضطراره لخفض صوت التلفزيون. لا أحد غريب، لا أحد غير معروف أصله وفصله وتفاصيل حياته الخاصة للكل. المنازل كلها متراسة بجوار بعضها البعض، وكأنها تحاول التماس بعض الدفء وسط البرد والمطر.

صعد عصام للدور الأول، وقف على باب الشقة المقصودة، اقترب منه الأمين رأفت من داخل الشقة. سأله عصام وهو

يُشعل سيجارته:

-حد لِمس حاجة؟

-لا يا عصام بيه.

-محدث من القسم وصل يعني!!

-انا بلَّغت النقيب رامي والنقيب هشام.. رامي بيه هيفوت

على هشام بيه علشان عربيته بتتصلح لسة.

-شايفك من تحت بتشرب سيجارة في الشباك.. انت اللي

فتحتة؟ ولا كان مفتوح لما جيت؟

-كان مفتوح.

نظر له عصام مُشكِكًا، فقال رأفت مؤكداً:

-قسماً بالله كان مفتوح.. دي الشقة كانت تلج لما دخلنا.

-وقعت منك طافية؟ ولا تلاقيك طفيت السيجارة جواً.

-عيب عليك يا عصام بيه.. دانا تربيتك. قالها وضحك ببلاهة.

نظر له عصام بجدية وأخفى شبح إبتسامة جاهدت لتظهر

على ملامحه، وقال بجديّة:

-ماترغيش.. مين اللي اكتشف الجثة؟

أشار رأفت للشقة الوحيدة بخلاف شقة القتيلة في الدور

الضيق، وقال:

-عم نجيب.

نظر عصام للشقة المقابلة بدون اهتمام، لمح بابها مفتوح

ورجل شبه منهار يجلس قرب الباب لا يتحرك. التفت لرأفت

وقال:

-خليك معاه.. ماينامش.. وطلّح كل اللي في الشقة برة على
ما اخلص السجارة.. عايز أَلْفَ فيها لفة.
-مش عايز تعرف معلومات عن القتيلة يا عصام بيه؟؟
قال له عصام وهو يلقي سيجارته بجوار الحائط:
-لما أخلّص

وقف عصام عند باب الشقة يدور بعينه في كل مكان فيها.
بدا وكأنه يبحث عن شئ يعلم إنه موجود، أي شئ في
غير موضعه، غلطة تساعده في تحديد القاتل. يرى الجثة
في المساحة الوحيدة الفارغة في صالة المنزل الضيقة، مُغطاه
بملاءة بيضاء. الشباك الوحيد في الصالة على يسار عصام. في
مواجهة عصام، وعند رأس الجثة، مائدة طعام. أمام الشباك
وعلى يسار عصام كنبه كبيرة قديمة، وكرسي بجوار باب
الشقة مباشرة. على يمينه في مواجهة الكنبه، توجد مكتبة
خشبية صغيرة، عليها جهاز تلفزيون، وجهاز استقبال، وبعض
الكتب. بجوار المكتبة، وعلى يمين عصام، بين المكتبة الصغيرة
وبين باب الشقة، خلف ستارة خفيفة لا تخفي ما ورائها،
يوجد ممر ضيق به بابان الى اليسار، وباب الحمام في آخره،
والمطبخ بدون باب إلى اليمين. إحدى عُرف النوم بلا أثاث ولا
إضاءة، ولاحظ على الضوء القادم من الخارج أنها لم تحظى
بالنظافة منذ زمن.

الغرفة الثانية الأقرب للحمام مُرتبة بعناية، ولا يبدو أن دار

فيها أي عراك، أو أن الضحية حتى دخلتها اليوم.

استمر عصام لعدة دقائق يدور في الشقة، وراعى استخدام مندبله عند اضطراره لمس أي شئ. ثم خرج من الشقة، أشار لرأفت أن يأتي وسأله:

-الملاية البيضاء اللي جوا دي مين الي غطى بيها الجثة؟
وجابها منين؟

-عم نجيب.. قبل ما نيجي.. بس فاتتني أسأل جابها منين.

-طب أحكي لي بسرعة أيه حكاية البنت دي.

يفرد رأفت ورقة كانت في يده، ويبدأ سرد المعلومات التي تحصل عليها في الدقائق الماضية:

-داليا محمود الجندي.. ٢٦ سنة.. عازبة.. معاها ليسانس أداب جامعة المنصورة.. كل اللي قدرت اعرفه عنها أنها بتشتغل سكرتيرة في مستشفى في مصر الجديدة.. وأنها قاعدة لوحدها من ساعة ما جت من البلد. قلب الصفحة وأكمل:

-الطب الشرعي بيقول غالباً ماتت مخنوقة النهاردة الصبح.

أنصت له عصام باهتمام ثم وقال:

-تمام.. اتصرف لي في كوباية شاي ثقيلة.. وهاتها لي عند عم نجيب.

التفت عصام وهو في طريقه لشقة عم نجيب، يلقي نظرة على رجال المعمل الجنائي، والطب الشرعي، وهم يرفعون

البصمات، ويلتقطون الصور لمسرح الجريمة، قبل نقل الجثة للمشرحة، وتشميع الشقة.

وقف على باب شقة عم نجيب، وطرق عليه بهدوء، ودخل دون أن ينتظر الإذن بالدخول:

-بعد أذنك ياعم نجيب محتاجك في كلمتين.. ومش هطوّل عليك.. تسمح لي ادخل؟
يا بني بيتك.. اتفضل.

-انت اللي لقيت داليا يا عم نجيب.. مش كده؟؟ قولي بقى.. أيه اللي دخلك شقتها متأخر كده؟؟
نظر له عم نجيب نظرة سريعة تحمل لوم واضح، ثم نظر إلى الأرض، وأشاح بيده وقال بصوت حزين:

-ولا دخلت ولا حاجة يا حضرة الظابط.. باب الشقة كان متوارب.. و دي مش عادتها.. ناديت عليها من ورا الباب محدش رد.. خبّطت على الباب محدش رد.. قلقت وقلت يكون جرالها حاجة.. زقت الباب شوية شوفتها زي مالقيتها كده.

بدا على صوته وكأنه يجاهد ألا يبكي، وأكمل:

-جريت طلبت النجدة.

-والملاية اللي عليها دي.. من عندك؟ ولا جبتها من عندها؟
لا.. من عندي.. ماجاليش قلب ادخل.. دانا عمري ما دخلت عندها وهي عايشة.. هدخل وهي... ولم يستطع

إكمال الجملة، وكأن عدم اعترافه لفظاً بمقتلها يكفي لعودتها.
نظر عصام لسلم العمارة وهو يأخذ الشاي من رأفت:

-مين ساكن تالي في البيت؟

أجاب نجيب بصوت يجاهد حتى لا تبدو عليه محاولات
منع البكاء:

-الدور اللي فوق شقتين الحاجة زينب الله يرحمها.. مقفولين
من ساعة ما ماتت.. حد من ولادها بييجي كل فين وفين
يلم الإيجار.. ماهو البيت بتاعهم.. وانا بدفع لهم فواتيرهم
لو جت.. والأوضة اللي فوق السطوح فيها كراكيها.
سأله عصام وهو يحاول أن ينظر في عينه:

-كنت راجع مينين ياعم نجيب لما لقيت داليا؟

أجاب نجيب بتلقائية، وقد بدأ يتقبل فكرة أسئلة الظابط
السخيفة:

-انا بشتغل في محطة مصر.. بخلص وريدة بالليل.. وأقعد
ع القهوة شوية أخذ حجرين زي كل ليلة.. وأرجع متأخر
على ١١.. على كده كل ليلة.. انا قاعد لوحدي زي مانت
شايف من ساعة ما ماتت المرحومة.. وابني الوحيد عايش
في السعودية.. شغال مهندس هناك عُقبال ولادك.

هز عصام رأسه شاكرًا وابتسم ثم قال بجدية:

-آخر مرة شوفت داليا فيها كانت إمتي؟

-النهاردة الصبح وانا نازل اجيب الجُرْنان.. صَبَّحت عليّ..
ونزلت في مياعداها بتاع كل يوم.. على ٧ الصبح.

قال عصام وهو يشرب آخر رشفة من الشاي:
-آخر سؤال وهسيبك تنام.. تعرف أيه عن داليا.. شغلها..
صُحابها.. صاحب.. حد كان بيجيلها؟
قال عم نجيب بصوت أنهكته الليلة التي لن ينساها:

-داليا كانت زي النسمة في البيت.. ولا تسمع لها حس.. ولا
أعرف عن صحابها ولا علاقتها مع حد أي حاجة.. وما فيش
بيننا غير صباح الخير وصباح النور.. وكلمتين كل فين وفين..
وعمري ما شوفت حد بيزورها ولا بيجيلها هنا.. اللي اعرفه
أنها مقطوعة من شجرة بعد ما ماتوا أهلها كلهم في البلد..
وأن واحدة صاحبتها شافت لها شغلانة في المستشفى.
-تعرف صاحبتها اسمها أيه؟؟ وياريت لو معاك تليفونها.
-ولا دي ولا دي يا بيه.. كل اللي أعرفه أنها هي اللي جابت
لها الشغل.

قال عصام وهو ينهض:

-شكراً يا عم نجيب.. هستناك تعدي عليّ بكرة في القسم
علشان ناخذ أقوالك وتمضي على المحضر..السلام عليكم. قالها
ثم غادر الشقة.

من على باب شقة عم نجيب رأى عصام النقيب رامى فخر
الدين، والنقيب هشام عبد النور، يصعدان السلم، وينظران
له بلامح أسف باسمة، بسبب تأخرهما. نظر لهما نظرة
لوم واضحة، وإن كانت تحمل الود في طياتها، فهُم من أكفأ

الضباط الذين عمل معهم منذ فترة.

بدون مقدمات، بدأ يتحدث عن القضية:

-البننت مضروبة جامد وغالباً مخنوقة.. فيه علبة سجائر واقعة تحت مكتبة التلفزيون في الصالة.. تحرّزوها يمكن تلاقوا عليها حاجة.. وشوفت شاحن تليفون في الكهربا.. بس مفيش تليفون.. حاولوا تلاقوه.. وشوفوا لو ليها حد يعرفها قريب في المنطقة.. علشان نسمع منهم بكرة.. مع أي أستبعد ده.. شكلها في حالها.. وياريت التقرير يكون جاهز بدري شوية الصبح علشان نبعتة المديرية.. دي جريمة قتل.. يعني فريق بحث.. والعين هتكون علينا من المديرية.. شدّوا حيلكم.

نادى عصام على رأفت، فوجده في الدور الأرضي، يُدخن ويتحدث مع أحد الأهالي الفضوليين. استوقفه قبل أن يصعد ونزل هو له، ونظر للرجل المدني الواقف مع رأفت دون أن يتحدث، فأدرك رأفت مُرادَه، طلب من الرجل المُغادرة على وعد بإعادة كوب الشاي الفارغ له. أعطى عصام كوب الشاي الفارغ لرأفت وهو يقول:

-لو لقيتوا زبالتها افحصوها يمكن تلاقوا فيها حاجة.. وقلّبوا الشقة كويس.. ومحدش يلمس حاجة بأيده.. ولا يحرك حاجة من مكانها.. يمكن نحتاج نيجي تاني.

اتجه ناحية باب العمارة، ثم توقف والتفت لرأفت قائلاً:

-انا هرّوح.. ما تمشيش إلا لما الشقة تتشمّع.. وماتكلمنيش
إلا لو فيه مصيبة.
ثم استدرّك وقال:
-قصدي غير المصيبة الي فوق يعني.

السبت ١٢ فبراير سنة ٢٠٠٥

«الحاج» المهدي عبد الغفور غانم - كما يُطلقون عليه - يجلس مُنتشياً أمام معرض غانم للسيارات، الذي يحتل الدور الأرضي كاملاً، في عمارة على ناصية كبيرة في منطقة أمبابة. يتابع حركة العمال التي تبدو وكأنها لن تنتهي أبداً، مثل الشيشة التي يُدخنها بشراهة منذ الصباح. أوراق الجرائد التي تُغطي الزجاج الذي يحتل واجهتي المعرض، تمنع العيون المتطفلة من معرفة ما يدور بالداخل، ولكن المشهد يوحي بأن عملية تجديد واسعة النطاق تجري لمعرضه.

التاريخ ٢٥ فبراير سنة ٢٠٠٥

تقرير تحقيق مدني:

بعد الإطلاع والتحقيق في معرفة سبب انهيار العقار محل الدراسة، تبين الآتي:

قيام صاحب معرض السيارات، الذي يحتل الدور الأرضي كاملاً، بإزالة أحد ركائز المبنى الرئيسية، وهو عامود خرساني مسلح ١٢٠*٥٠، مما تسبب في تركيز الإجهاد اتحول مكان الفراغ الذي تسبب من إزالة العمود كلياً، ونتج عنه تشعب الشروخ من هذا المكان لتصل الى الحوائط والبلاطة بأكملها. وعليه؛ فإن المسئول جنائياً عن هذا الإنهيار المفاجئ، الذي تسبب في مقتل ستة أشخاص تحت الأنقاض، ه وصاحب معرض السيارات أسفل العقار.

التاريخ ٢٩ فبراير سنة ٢٠٠٥

تقرير مُقدم لوكيل النيابة، من محامي المدعو مهدي عبدالغفور غانم:

نرجو من سيادة وكيل النيابة، أن ينظر بعين الحكمة والعدل، في تقرير الدفاع عن المُتهم ظلماً بإزالة عنصر رئيسي من عناصر العقار الرئيسية، وغير القابلة للتعديل أو التدخل، دون موافقة لجنة الاستشاريين المعتمدين، والمسئولة عن كافة الأمور وتطبيق شروط المواصفات الفنية، والمعتمدة لتطبيق الأمن والسلامة.

سيادة الوكيل، كلمات مذكّره، وتقديمه، من لجنة المهندسين من توضيح سبب انهيار العقار هو أمر واقعي وتم بالفعل. لكن الخطأ في اتهام موكلي.

لأن الفاعل الحقيقي، ومن يجب اتهامه، هو المالك الأول للمعرض، الذي اشتراه منه موكلي، المدعو تحسين غالي شاهين والذي قام مُتعمداً بإزالة عامود خرساني، بغرض توسيع المحل قبل بيعه، لزيادة سعره، وتوزيع الأحمال على بعض الأعمدة غير المطابقة للمواصفات، مما أدى لإنهيار العقار بعد حين. وبعد التحري والتحقيق من جانبنا، تبين أن المدعو تحسين غالي شاهين، المالك السابق للمحل، سافر خارج البلاد منذ أكثر من سنة، ولم يعود لمصر حتى تاريخه، ولم يُستدل على مكان إقامته الحالي.

مرفق طيّه قائمة بأسماء بعض من سُكان العقار، وبياناتهم كاملة، ليؤكدوا في شهادات موثقة، مسئولية المالك السابق للمعرض عن إزالة العامود، وبراءة موكلي.

oboiikan.com

الخميس ١٢ ديسمبر سنة ٢٠١٣

قبل مواعده اليومي المعتاد، يصل عصام للقسم، وتبدو عليه ملامح الضيق. يجد الأمين رأفت في انتظاره، ولامحه تحمل ابتسامة المنتصر، التي تعني غالباً إنه يحمل خبراً سعيداً لعصام. قال عصام وهو يدخل مكتبه:

-أيه يا رأفت؟ مسكتوا القاتل واعترف وانا نايم ولا أيه؟

-تشرب قهوتك الأول يا عصام بيه.. وبعدين اجيبك الشغل.

وهمم بمغادرة الغرفة، ولكن عصام استوقفه قائلاً:

-لا لا لا قول الأول.. أيه الجديد؟

-عرفنا بتشتغل فين يا عصام بيه.

نظر له عصام باهتمام وهو يُعلق سترته الجلدية على

الحامل الخشبي في ركن مكتبه، وقال:

-أخيراً؟؟ فين؟؟

-في مستشفى «الكرامة» اللي في مصر الجديدة.
جلس عصام على مقعده، وسأل وهو يُشعل سيجارته:
-وعرفتوا مين صاحبها اللي جابتها الشغل هناك؟
-لا يا عصام بيه.. زمايلها هناك علاقتها معاهم سطحية جداً..
ومدير الموارد البشرية قال أن زميل في مستشفى تانية اللي
كلمه عليها.. ولما كلمه رامي بيه.. قاله إنها قَدّمت عنده
في المستشفى.. وهو ما عندوش مكان.. فكَلّم لها زميله.. وكل
حاجة في التقرير قصاد سعادتك.
-طيب شكراً يا رأفت.
وبدأ يقرأ تقارير البحث التي أمامه.
-أوصّي على القهوة؟؟ قالها رأفت وهو يهَمّ بمغادرة العُرْفَة.
استوقفه عصام قائلاً:
-أيه أخبار أهلها في البلد صحيح؟
-المحضر وصل الصبح وعلى مكتب سعادتك.. القسم هناك
استدعى خالها.. وهو قريبها الوحيد اللي فاضل.. وعرفنا
إنه مكانش بيطبقها ولا هي بتطبيقه.. علشان كده سابت
البلد بعد ما خالتها سافرت السعودية لجوزها.. وجات على
القاهرة.. وهو ما يعرفش عنها حاجة.

بدأ عصام يُطالع المحضر الذي يحتوي على أقوال خال داليا
وتقرير البحث هناك، وسأل دون أن يرفع رأسه:
-سألوه كان فين يوم الأثنين؟

-كان في الشغل هناك لحد آخر النهار.. وكَمَل اليوم على القهوة وفي بيته.. ماخرجش من البلد يومها.

هزَّ عصام رأسه مُتفهماً، وأشار له بيده لينصرف، وهو يطفئ سيجارته، وبدأ بمراجعة التقرير قبل إرساله للمديرية.

فتح رأفت الباب، ليجد فتاة في أواخر العشرينات، تحمل ابتسامة عريضة على وجهها، وتنظر بفضول إلى الداخل وتقول:

-عصام بيه فاضي؟

سمعها عصام، فأشار لرأفت -الذي يمنعها من الدخول بجسده انتظاراً لتعليمات رئيسه- أن يسمح لها بالدخول. فتح رأفت لها الباب وتنحى جانباً ليسمح لها بالدخول، ولم يحرم نفسه من ملاحظة مفاتها لثواني.

هي فتاة جميلة ذات جاذبية ساحرة، شعرها إسود طويل، ولكنه ملفوف خلف رأسها دون عناية، عيون واسعة بُنية اللون، فم وأنف دقيقان، وجسد متناسق، يجعل منها مع جمال ملامحها، حلم يسير على قدمين. تحمل حقيبة جلدية من النوع المتعدد الأغراض. ملابسها الكاچوال لم تتمكن من إخفاء مفاتها، بالرغم من إنها كانت غير ضيقة أو مفتوحة.

أشار عصام لها أن تجلس وهو يقول:

-أيه يا غادة؟ انتي بتراقبي تليفوني؟ ولا في حد بيبيلغك باللي
بيحصل من القسم؟

-يا عصام بيه انا بشم ريحة الحوادث من بعيد.. أmaal
صحفية ازاي بس؟

ابتسم بؤدّ، ثم كست الجدية ملامحه وقال بلهجة من لا
يرغب في أي مُعارضة:

-طب اتقلي شوية وتعالِي.. ولا اقولك؛ انا هكلمك.

-يا عصام مانت قُلْت أن في حاجة.. عايزني اتقل ليه بس؟
مش بحب الأخبار بايتة.

قالتها بملامح شبه متوسلة.

لاح الضيق على ملامحه، وتنهّد وهو يشيخ بنظره بعيداً، ثم
عاد لها بنظره وقال:

-هو احنا هنعيد الكلمتين كل مرة يا غادة؟ مانت عارفة أي
مش بحب أي قضية تنزل جرايد إلا لما تخلص.. لزومه أيه

نخوّف الناس؟ وبعدين انا اديتك كلمة.. تخلص وهكلمك.

ابتسمت لتتجنب مضايقته، وقالت وهي تنهض:

-ماشي كلامك.. هستنى تليفونك بُكرة.

رفع عينه دون أن يحرك رأسه وهمّ بتذكيرها إنه سيتصل
بها، بعد حلّ القضية، «مش بُكرة»، لكنها لاحظت نظره

فأكملت:

-يا عصام بيه.. يا عصام بيه.. قضية أيه دي اللي هتاخذ

منك يومين؟ انا هكلمك بكرة وهتكون القضية خلصانة..
وابقى قول غادة قالت.. عن إذناك.
وقامت مُسرعة قبل أن يعترض.

فتح رأفت باب مكتب عصام ودخل، بعد طرقتين سريعتين،
وأسرع يفتح ملف كان يحمله معه ويضعه أمام عصام، لتظهر
صورة شخص في منتصف الثلاثينات، يحمل وجهه عدة جروح
قديمة، يصلح ليكون تجسيد للفظ «بلطجي». طالع عصام
الملف لثواني، وظهرت على ملامحه علامات التساؤل.

قال رأفت وهو يدور حول مكتب عصام ليقف بجواره:

-جمال عبد الشكور.. الشهير ب «تذاكر».. سوابق.. اتحبس في
سرقة بالإكراه.. واتمسك كذا مرة حيازة بلا أزرق.. وساعات
إتجار.. وبلطجة.

-أمممم.. والباشا هو صاحب البصمات اللي لقيتوها على
علبة السجائر في شقة داليا؟؟

-تمام يا عصام بيه.

قال عصام وهو ينهض:

-فين رامي وهشام؟؟

-بيحضروا القوة سعادتك.. علشان نروح نجيبه.

-طب استنى انت هنا.. وبلغني لو حد سأل عليّ.

قالها وهو يلتقط سترته من على الحامل في ركن الغرفة، في
طريقه للخروج.

oboiikan.com

منتصف نهار الخميس ١٢ ديسمبر سنة ٢٠١٣

ظهرت قوة عددها غير قليل من أفراد الأمن، عند أول الحارة التي يسكنها «تذاكر»، قوة تليق بسُمة بلطجي مثله. تسير بالخطوة السريعة، وتكتسي ملامح كل أفرادها بالجدية الواضحة. يتقدمهم عصام، بعد إضطرارهم لتترك سيارات الشرطة في الحارة الأكبر نسيباً التي تتفرع منها حارة «نجيبة» التي يسكنها «تذاكر»، لإستحالة بسبب ضيقها فتح أبواب أي سيارة تتمكن مُعجزة من دخولها. فالحارة بالكاد تسع لهيكل سيارة صغيرة الحجم.

أسرع كل من كان في الحارة يفسح الطريق للقوة من الأهالي، حتى الأطفال، كان تحركهم أشبه بنفور طرف المغناطيس

الموجب من مثيله. وبرغم الصمت الذي ساد الحارة، عِلِمَ تقريباً كل أهلها بصعود القوة للبيت الذي يسكن «تذاكر» سطحه. وظهرت السيدات في النوافذ المتقابلة، التي يسمح لهم ضيق الحارة بتبادل العبارات الهامسة، وأحياناً استعارة الأغراض من خلالها بسهولة، يسألن بعضهن البعض عن سبب الزيارة غير المرغوب فيها.

طلب عصام من رجاله كسر باب الغرفة، بعد عدة طرقات قوية على الباب دون استجابة. وبعد أقل من دقيقة كان عصام يقف أمام جثة المدعو «تذاكر». ولم يستطع أياً من سيئي الحظ -ممن سمحت لهم مساحة الغرفة الضيقة برؤية الجثة- الكلام. الغرفة تتكون من صالة بالكاد تكفي لكنبة ومائدة طعام صغيرتين، إلى اليمين يوجد حمام ضيق للغاية بدون باب، أمامه ستارة مفتوحة، تحل محل بابه في الغالب. وفي مواجهة باب الغرفة، مدخل غرفة النوم، بها سرير صغير عليه جثة «تذاكر». تسقط الشمس على وجهها، وكأنها مأخوذة بما تراه حالها مثل حال كل من في الغرفة.

كانت جثة «تذاكر» على ظهرها فوق السرير مفتوحة العينان، تحمل ملامحها علامات فزع شديد وشحوب من تعرض للقتل على يد مصاص دماء. على جبهتها العريضة توجد ثلاث جروح قطعية، تجلط الدم عليها لتبدو ككتابة بقلم

أحمر قاتم، سالت الدماء منها ولكنها لم تطمس الرسالة التي يبدو وأن القاتل تعمد توصيلها، وهي تشبه (٧١١). وكان كل ذراع مفرد على إمتداده ومربوط في قائم السرير برباط قوي من البلاستيك اللين. قُطعت شرايين اليدين مما تسبب في تسرب دماء الجثة كلها تقريباً على السرير والأرض بجوار السرير من الناحيتين، مما يُفسر شحوب الجثة.

لم يقطع الصمت سوى صيحات قادمة من سطح البيت، انتفض كل من كان بالغرفة -تقريباً- فزعاً، فمعظمهم كان لا يزال تحت تأثير مشهد الجثة. التفت عصام لرجاله وقال بقوة:

-محدث يلمس حاجة.. كله يطلع برة الأوضة.. دي بقت مسرح جريمة.

خرج كل من كان في الغرفة، وكأنهم كانوا ينتظرون هذا الأمر بفارغ الصبر. خرجوا مندفعين وكأنهم يهربون من الموت ذاته، الذي كان حاضراً بقوة على جبهة وملامح «تذاكر». لدرجة إنه حاز على تعاطف بعضهم بالفعل برغم سمعته السيئة، وتاريخه الطويل من البلطجة. كان عصام آخر من خرج من الغرفة، وكان يحمل هاتف محمول أحمر اللون بأطراف أصابعه، ملفوفاً في قطعة قماش التقطها مما يشبه المطبخ في ركن صالة غرفة «تذاكر». خرج ليجد أربعة من

رجاله الذين كانوا خارج الغرفة يقيّدون شخصاً ويمنعونه من التوجه للغرفة، التي أصبحت لتوها مسرحاً لجريمة بشعة. توقف الرجل عن المقاومة عندما رأى عصام قادماً نحوه، والسبب كان هيئة عصام الواضحة، ولكنها لم تمنعه من الصراخ، قائلاً:

-عملتوا أيه في «تذاكر» يا باشا؟؟ وليه مش عايزيني اشوفه؟؟

«تذاكر» عمل ايه علشان كل ده؟؟

رفع عصام يده وصفعة بقوة وصاح به:

-انت جاي تحقق معايا يا روح أمك؟؟

ثم نظر لأحد رجاله الذين يُقيدون الرجل وقال:

-فتش الحيوان ده.

ثم جذب الرجل من ياقة قميصه بقسوة، وصاح به:

-انت مين يا ض؟؟

تكلم أحد رجال عصام وقال:

-ده «كربونة» يا عصام بيه.. شهرته كده.. عيل لَبَط.. وشرف

عندنا في الحجز كتير.

تكلم «كربونة» بصوت أشبه بالنحيب:

-يا باشا انا اسمي حمدي.. «تذاكر» ده صاحب عمري يا

باشا.. أخويا.. راضع عليه.. لما سمعت أنه عنده زيارة جيت

اشوفه.. بس سمعت حد خارج من الأوضة بيقول قتيل.. مين

الي قتيل يا باشا.. وحياة ولادك يا باشا تقولي «تذاكر» ماله.

وسقط على الأرض عند قدمي عصام وانهار يبكي.

همّ أحد الرجال يلتقطه ليمثّل أمام عصام، ولكن عصام استوقفه بيده. ونظر له وقال بصبر نافذ:

-هو ده تليفون «تذاكر»؟؟ انت يا بني آدم رُد عليا وبلاش

شغل النسوان ده.. ده تليفونه؟؟ شكله تليفون ست!!

نظر له «كربونة» بعيون مليئة الدموع بعدما تيَقن أن كلمة «قتيل» التي سمعها منذ دقائق، كان المقصود بها صديق عمره بالفعل، وقال:

-لا يا بيه.. تليفون «تذاكر» سايبه عندي من أول امبارح.

كست علامات الدهشة ملامح عصام لثواني، ثم التفت لرامي وقال:

-خليك انت يا رامي.. ارفعوا البصمات.. والجثة تروح

المشرحة.. اقلبوا المخروبة دي.. عايزين أي حاجة عن القاتل..

دي كده دخلت في الجَدِّ.. المديرية هتتقلب.

ثم أشار ل«كربونة» -الذي كان لايزال يبكي على الأرض- بضيق، وقال لرجاله:

-تعالى معايا يا عفت انت ومجدي.. كلبشوا الواد ده وهاتوه معنا.

واتجه مُغادراً سطح البيت وهو ينتفض من الغضب والقلق

والتوتر، فهو كان يعلم يقيناً أن القضية تحوّلت لتوّها لقضية

من أكبر القضايا التي مرّت على المديرية في تاريخها.

oboiikan.com

عصر الخميس ١٢ ديسمبر سنة ٢٠١٣

كان القسم مُزدحمًا بالمواطنين، منهم من له حق، ومنهم من يظُن أن له حق، ومنهم من يدّعي هذا زورًا. فالمأمور يصفح سائق أتوبيس سياحي على وجهه، ليسقط أرضاً هو والكرسي الذي كان جالساً عليه، بعد رفضه تشغيل التكييف -المدفوع ثمنه ضمن ثمن التذكرة- للركاب، برغم طلب المأمور ذلك منه -بأدب- عدّة مرات، لينصاع السائق أخيراً، وكأن التكييف لا يعمل إلا بالصفح، ولكن على وجه سائقه. وفي الممر المؤدي لمكتب رئيس المباحث، سيدة لا تبدو عليها أي إصابة، تتوعد زوجها -الذي أصابته بعاهة مستديمة بالفعل- بقطع كل أطرافه إذا تجرأ و«فكّر يمدّ أيده عليها تاني»!! أما عند باب غرفة رئيس المباحث، يقف رجل وقور تخطى الستين سُرقت سيارته، وهو يعلم من سرقها، لأنه تحدث معه عبر الهاتف

عدة مرات، ليطلب منه مقابل رجوعها، وكأنه عليه أن يُعيد شراء سيارته، كل مرة ينجح أحدهم في سرقته. ونصحه أحد أمناء القسم بدفع الفدية المطلوبة، لأنها «لحُسن حظه» حسب تعبيره، لا تساوي ربع ثمن السيارة، وبقي أن يحاول الأمين إقناعه بمدى رقة قلب سارقها، ليطلب منه فقط هذا المبلغ البسيط. تخطى عصام كل هذا الزحام، بلامح جامدة، ليصل لمكتبه.

جلس على مكتبه ودق الجرس ليحضر له فوراً الأمين رأفت، الذي لم يلاحظ وصول رئيسه بسبب الزحام، اندفع رأفت للمكتب قائلاً:

-محدث سأل على سعادتك. رفع عصام سماعة هاتف مكتبه، وقال لرأفت دون أن ينظر له:

-روح هاتلي علبة سجائر.. ووَصِّي ع القهوة.. بسرعة.. دقيقة تكون هنا.. وخذ التليفون ده ارفع من عليه البصمات وهاته تاني على طول.. محدش يشغله.. والواد كرتونة ده يفضل برة لحد ما بعتله.

أخذ رأفت التليفون داخل كيسه البلاستيكي واتجه للباب وقال مُصْحِحاً:

-كربونة يا عصام بيه.

طلب عصام رقماً، وانتظر ثواني قبل أن يقول لمحدثه:

-مساء الخير يافندم.. معاك الرائد عصام ناجي رئيس مباحث
قسم حدائق القبة.. كنت محتاج...

قاطععه الصوت الآخر قائلاً:

-عصام ناجي؟؟ مش انت ابن أخو اللواء مصطفى الله
يرحمه؟؟

-بالظبط يا فندم.. مضبوط.

-ماشاء الله عليك سمعتك كويسة في الوزارة يا عصام..
مشرف عمك الله يرحمه.

-الله يخليك يافندم.. يارب نكون عند حُسن الظنّ دائماً..
كنت محتاج اكلم اللواء أشرف من فضلك.. قضية القتل اللي
عندي فتحت على قضية قديمة كبيرة.. ومحتاج ابّلع سعادته.
-أيه؟؟ خير يا عصام؟؟

-يا فندم لو تفتكر سعادتك القضية اللي اتقتل فيها تسعة
من كام سنة.. كانت الصحافة مسّمياه سفاح الأرقام؟
-فاكره طبعاً.. مش ده اللي عمك الله يرحمه كان ماسك
قضيته؟؟

-تمام يا فندم هو ده.. واضح أنه رجح يشتغل تاني.. لقينا
جثة مشتبه فيه في جريمة قتل عندنا.. مقتولة بنفس طريقته.
-يا ساتر.. هي البلد ناقصة؟؟ طب سيبيني ابّلع اللواء أشرف
وأكيد هيكلمك.. وياريت تبعتلي تقرير الجريمة بسرعة.

-تمام يا فندم.. في انتظار تليفون سعادته.. وهشتغل على
التقرير أول ما توصلني صور مسرح الجريمة.. مع السلامة يا

فندم. ويغلق الخط.

يرن هاتفه المحمول ويظهر أسم زوجته على الشاشة، يرد عليها ودون أن ينتظرها تتكلم يقول:

-أيوة يا حبيبتى.. فاكر الحفلة.. ومش هتأخر.

فقالت متفهمة:

-ماشي.. انا قلت افكرك.. سلام يا عصام.

بعدها أدركت أنه مشغول بحُكم العشرة.

-سلام.

دخل رأفت المكتب بعلبة السجائر الميريت الزرقاء، التي لا يُدخن غيرها عصام بعد إصرار زوجته أن يتوقف عن التدخين،

وموافقتها تغيير المارلبورو الحمراء لميريت كخطوة أولى. قال

لرأفت والتوتر بادياً على ملامحه:

-أول ما الرجالة توصل تجيني.. وهات لي الواد اللي برة.. هوّ

اسمه أيه؟؟

-كربونة.

أجرى عصام اتصالاً من هاتفه المحمول وقال بمجرد سماع

صوت الطرف الآخر:

-أيوة يا غادة.. لو عايزة تبقي الصحفية مُرة واحد في مصر

من بكرة.. تكوني عندي في القسم في نُص ساعة.. عندي

مواعيد مش هقدر اتأخر.
-أيوة بقى.. هوا هكون عندك.
-ماشى.. سلام.

دخل رأفت ومعه «كربونة» الذي بدا أكبر سنّاً مما كان عليه منذ ساعة واحدة. حقاً يشيخ الشخص الحزين أسرع من غيره. قال عصام لرأفت:

-محدش يدخل عليّ ولا يقاطعني إلا رامى وهشام بييه لما يرجعوا.. فُك الكلبشات وابتعلي... ونظر لكربونة سائلاً:
-شاي؟

هز كربونة رأسه أن نعم دون أن يرفع عينه عن سجادة المكتب الكثيبة باهتة اللون. أكمل عصام:
-ابتعت شاي مع حسين.. شكراً يا رأفت.

أشار عصام لكربونة أن يجلس وهو يشعل سيجارته:
-مش هعزم عليك بسجاير النسوان اللي بشرها دي.. مش هتنفعك.. لما حسين يجيب الشاي.. اطلب منه واحدة سوبر لو عايز.

أراح ظهره على الكرسي، ونظر لكربونة متفحصاً، ثم قال محاولاً تحويل تفكير كربونة عن موت صديق عمره:
-أيه حكاية اسم كربونة ده؟؟ جديد عليّ.

ظهر شبح ابتسامه على ملامح كربونة، وتنهذ بحرقه وقال:

-تذاكر الله يرحمه اللي سمّاني كربونة.. عشان وأنا صغير
كنت بقلّد الممثلين والمشاهير.

وصل الشاي وطلب كربونة من حسين سيجارة وأشعلها. قال
عصام:

-كربونة.. ركز معايا شوية بقى عشان عايز اسألك سؤالين..
لما سألتك عن تليفون تذاكر قولتلي سايبه عندك بقاله
يومين.. هو متعوّد يمشي من غيره؟؟

-لا يا بيه.. هو بقاله كام يوم مش على بعضه.. يبجي
إسبوع كده.. ومن يومين سعادتك لقيته بيقلّي هغطس
يومين وبعدها هاخذك يا كربونة ونغور من الحارة.. وساب
تليفونه مقفول عندي.. وسألته ليه.. قالي دي تعليمات البيه
صاحب الشغلانة.

ظهرت ملامح الإهتمام على عصام:

-ماقالش مين البيه ده؟؟ ولا أيه هي الشغلانة؟؟

قال كربونة بحسرة:

-لا والله يا بيه.. انا كمان خدت منه جنب ساعتها
ومامسكتش فيه عشان يقولي.. أصل عمره ما طلع طلعة
من غيري.. أخرتها يبجي يعاملني زي مراته؟؟ زعلت منه
يابيه.. ياريتني كنت مسكت فيه ولا كسرت رجله ساعتها
وماسيبتوش ينزل.

وبدا وكأنه على وشك البكاء.

-كانت إمتي آخر مرة قابلته فيها؟؟

-أول أول الصبح.. جالي ماقعدش ربع ساعة قال الكلمتين دول ومشي.. وانا عشان زعلان مسألتهش فيه من ساعتها.. لحد ما جالي خبر أن الحكومة طالعة عنده.. جيت جري.

دخل رأفت بعد طرقة سريعة على الباب، ليعلن وصول كل من النقيب رامي والنقيب هشام من مسرح الجريمة. وأعطى الهاتف المحمول الذي وجدته عصام في غرفة تذاكر لعصام داخل كيسه بعد رفع البصمات من عليه وإرسالها للفحص. صرف عصام كربونة من مكتبه وطلب منه الإنتظار في القسم لتثبت أقواله في محضر رسمي.

بمجرد جلوس عصام مع رامي وهشام، رنّ هاتف مكتبه، فالتقط السماعه بسرعة:

-ألو.. ثم ظهرت الجدية على ملامحه عندما جاءه الرد.

-معاك اللواء أشرف عثمان يا عصام.. مش عصام معايا؟؟

-أيوة يا فندم الرائد عصام ناجي مع سعادتك.

-انت متأكد يا بنني من أن اللي قتل المرة دي هو نفسه الراجل بتاع زمان زي ما وصلني؟؟

-أيوة يا فندم متأكد.. كل التفاصيل هي هي.

-طب انا هستنك السبت الصبح في مكنتي ١٠ الصبح.. ربنا معاكم.

أوما برأسه وهو يقول:

-حاضر يا فندم.. عشرة الصبح هكون عند سعادتك ومعايا فريق البحث هنا. وأغلق الخط.

فتح الكيس الشفاف وأخرج منه الهاتف المحمول الذي حصل عليه من غرفة تذاكر، وفتحه، وقال دون أن يحوّل نظره عن المحمول في يده، وهو يشير لهاتف المكتب:

-اللواء أشرف عثمان رئيس مباحث المديرية مستنينا السبت الصُّبح الساعة ١٠ في مكتبه.. حد فيكم فاكِر القضية اللي قلبت مصر كلها من كام سنة؟؟ اللي كانت مشهورة بإسم سفاِح الأرقام؟

قال هشام:

-أيوة طبعاً.

أضاف رامى:

-مش دي عمُّك اللواء مصطفى الله يرحمه كان ماسكها؟؟ اسمع أنها القضية الوحيدة اللي ماعرفش يحلُّها في مشواره كله.

قال عصام:

-مضبوط.. حد فيكم يعرف تفاصيل عن القضية دي؟؟

نظرا لبعضُهم البعض في رد صامت على سؤاله أن لا. وقبل أن يكمل عصام كلامه قال رامى:

-حضرتك شايف ربط بين جريمة النهاردة والقضية دي؟؟

تنهد عصام وقال:

-جريمة النهاردة تمّت بنفس طريقة القاتل اللي قتل بيها ٩

قبل كده في القضية دي قبل ما يختفي.. انا حافظ القضية دي.. ياما سهرت مع عمي وهو بيراجع تفاصيلها وكنت بساعده.. نفس الرباط البلاستيك اللي حوالين الأيديين.. نفس النومة.. قطع الشرايين في نفس المكان.. وأخيراً التاريخ اللي مكتوب على راس الضحية بالمقلوب.. والمرآة المكسورة.

ظهرت علامات الدهشة والإنفعال على ملامح كل من رامي وهشام. نظر عصام في ساعته وهبّ واقفاً، وقال:
-تسهروا الليلة دي.. تطلعوا تفاصيل القضية دي من الجرايد أو الأرشيف.. اتصرفوا.. تحفظوها.. عايزين السبب نكون جاهزين في الإجتماع مع سيادة اللواء في المديرية.. ولو اتزئقتوا في حاجة كلموني.. وقبل ما تمشوا من القسم خلصوا تقرير جريمة تذاكر دي.. ابعثوا هاتوا جيرانه.. وكربونة صاحبه ده.. وشوفوا البصمات اللي ع التليفون اللي لاقيته في أوضته بتاعة مين.. وحاولوا تجيبوا من على التليفون بيانات صاحبه.. كل ده يكون جاهز السبت.. وياريت نتقابل نُص ساعة بدري علشان اقرا التقارير قبل ما نقابل سيادة اللواء.. سلام علشان عندي مشوار ضروري.. وماتأخروش بكرة.
ثم أعطى الهاتف المحمول لرامي، وغادر.

فتح عصام باب سيارته ليجد من يُناديه:

-كده يا عصام بيه؟؟ بتبعطني؟؟

التفت ليجد غادة الصحفية قادمة من ناحية القسم وقال:
-انا قُلت نُص ساعة من يبجي ساعة.

قالت وهي تضحك:

-احنا اللي بيئنا اكبر من نُص ساعة تأخير.. أيه الموضوع اللي

هيركبني على راس الصحافة في مصر في يوم وليلة؟؟

نظر في ساعته، ونظر لها، وفكّر ثواني ثم قال:

-عندك اختيار واحد.. تركبي معايا.. افهمك الحكاية في

السكة.. وترجعي لوحدك في تاكسي.. ها؟؟

قالت وهي تدور حول السيارة:

-ودي عايزة سؤال.. معاك يا باشا.

ليل الثلاثاء ٢١ مارس سنة ٢٠٠٥

يجلس الشاب محمود شعبان عبد الدايم، على رمال شاطئ أبو قير، يغطي نصف وجهه بشال مُلتف حول رقبته ليقيه من البرد، ينظُر الى البحر، الذي تحول لونه للأسود تحت غطاء الليل الطويل. يطلق تنهيدة طويلة مُحمّلة بدُخان سيجارته. يكاد يرى نفسه في الجانب الآخر، في صحبة شقراء جميلة، عيناها تنطق بحبه، يتحدث معها بالإيطالية بطلاقة، التي لا يعرف منها بَعْد سوى كلمة صباح الخير، ولا يتذكرها بسهولة. يرى نفسه مُرتدياً ثياباً فاخرة، ويضحك كما لم يضحك من قبل.

يبتسم دون وعي، وهو يتخيّل حلمه الذي ظلّ يراه ليس فقط طوال رحلته من القاهرة للأسكندرية، ولكن منذ أن

علم من صديق له عن عم رفاعي غريب الصياد. لا يعلم
أحداً إن كان لقب الصياد مُكتسب بحُكم مهنته، أم هو لقب
عائلته بالفعل.

ينتزعه صديقه من حلمه ليلحق به عند الشط، حيث
تنتظرهم (غالية) وهو الإسم الذي اختاره عمّ رفاعي لمركبته،
التي لا تصلح للسفر لإيطاليا على عكس ما أقسم به عم
رفاعي مرات، وهو يقبض ثمن رحلة الموت من كل شاب.

الخميس ٢٣ مارس سنة ٢٠٠٥

خبر صغير في صفحة الحوادث:

غرق خمسة شباب ظهرت جثثهم على شواطئ أبو قير في
الأسكندرية بعد رحلة صيد انتهت بمأساة.

وقت الخروب الخميس ١٢ ديسمبر سنة ٢٠١٣

دخلت عادة مكتب مجدي كارم رئيس تحرير جريدة الملامح المصرية، دون استئذان، على غير العادة. نظر لها باستغراب، وأسرع ينهي مكالمته مع أحد العملاء، لأنه بحكم معرفته الجيدة بها، كان واثقاً أنها جاءت له بأخبار سعيدة، التي تعني بسبب طبيعة عملها؛ مصيبة.

بمجرد أن أغلق الخط، قالت له عادة بزهو:
-صفحة أولى.. واسمي ينزل على التحقيق.. ومش هتاخده
مني ولو على جُثتي.. قُوت موافق؟
نظر لها باستغراب، وتبسّم، وقبل أن يقول أي شيء، اتجهت
ناحية الباب وهي ترفع كتفيها، وتقول مُهدّدة:

-مش موافق؟ انت الخسران.. انا دالوقت ألف جرنال
يتمناني.. ها؟ قولت موافق؟
-لا طالما ألف جرنال يتمناني.. موافق.. بس والله العظيم
الموضوع لو طلع ما يستاهلش لاصمك إسبوع.. قولت
موافق؟؟ مُقلداً إيّاها.

ضحكت ومشيت في اتجاه الحائط المجاور لمكتبه من ناحية
اليسار، وقفت أمام مقالة مُعلقه على الحائط داخل إطار
خشبي بسيط ويبدو عليها القِدم. تطلّعت إليها لثواني، ثم
التفتت له، وأشارت للمقالة وقالت:
-شكلها مش هتكون آخر مقالة تكتبها عنه.

نقل مجدي نظره بين غادة والمقالة عدة مرات دون فهم،
ثم هزّ رأسه كمن يحاول أن يستفيق من غفوة:
-غادة.. واحدة واحدة عليّ.. مش فاهم حاجة.
اقتربت من مكتبه وقالت بحماس:

-الراجل بتاعك رجح يقتل تاني يا مستر مجدي.. وكمان
معيا صور مسرح الجريمة.. وأخذت الـOK من عصام بيه
أني انزلها من بكرة.

كسى الذهول ملامح مجدي كارم، وتحركت عيناه تلقائياً
صوب المقالة الوحيدة المُعلقة على الحائط في مكتبه، الحائط
المُكتظ بإطارات متعددة تحوي داخلها صور لحظات تكريمه

في عدة أماكن مُختلفة، وشهادات تقدير، وجوائز.
قال بصوت بحّه الذهول:

-مش ممكن طبعاً!!!

قالت له وهي تُخرج ملف من حقيبتها:

-نفس التكتيفة.. قطع الشرايين.. الكتابة بالمقلوب.

خطف منها الملف بلهفة وانفعال، فتحه، وبمجرد أن وقعت عيناه على أول صورة لجثة تذاكر الشاحبة، نظر لغادة وظهرت عليه ملامح تجمع ما بين الدهول والانفعال الشديد. جلس على مكتبه ونظر مرة أخرى للصورة التي كانت لاتزال في يده، ثم رفع عينه للمقالة المُعلقة على الحائط، وكأنه ينظر لصديق عائد بعد غيبة طالت.

كانت تلك المقالة التي كتبها أثناء عمله في جريدة حكومية كُبري، السبب في طرده من العمل بها، واتهامه بالتحريض على القتل، وخروجه بأعجوبة بحكم مع إيقاف التنفيذ. والسبب في تغيير حياته كلها. وكانت السبب غير المباشر في النجاح الذي وصل له، بعدما قرر أن يبدأ مشروع جريدة الملامح المصرية. كان ولا يزال يطرح يومياً على نفسه نفس السؤال، والذي اختاره عنواناً للمقالة «هل سفاح الأرقام مجرد قاتل؟» ولم يصل لإجابته بعد.

مقالة بتاريخ ٦ ديسمبر سنة ٢٠٠٥

هل سفاح الأرقام مُجرد قاتل؟

بقلم: مجدي كارم

نعم، هو ذلك الخيط الرفيع بين ما هو صواب وما هو خطأ. تلك المنطقة الرمادية، التي لن تتمكن مهما كنت واثقاً من نفسك، أن تضمها بضمير مرتاح للمنطقة البيضاء، أو السوداء.

فهو قاتل، بدم بارد، يهاجم ضحيته ليلاً، يغدُر بهم، ينتزع أرواحهم، وغالباً يقف ليُشاهد مُستمتعاً بريق الحياة ينطفئ تدريجياً في عيونهم. الآن عزيزي القارئ، انت -وبضمير مرتاح- قد وضعته في دائرة الشر، دون لحظة تفكير.

ولكن، ماذا لو كان ما فعله بهم، كان بالظبط، ما فعلوه هم بأبرياء، لم يملكو من المال، أو يتمتعوا بالجاه، أو السلطة، التي تسمح لهم أن يدافعوا عن أنفسهم؟ ماذا لو كانوا كل ضحاياه يستحقون القتل بحكم قضائي لم يُنطق؟ لعدم كفاية الأدلة، أو لثراء الجاني.. إلخ. أياً كان السبب، فالنتيجة واحدة؛ نجاة المجرم بجريمته، ليعود لحياته الطبيعية، بعد أن حرم منها أبرياء، لم ينصفهم غير هذا «القاتل».

أكاد أراك عزيزي القارئ وانت تُعيد الرُجل للدائرة الرُمادية. بل أن البعض قد يقوم بنقله مباشرة للدائرة البيضاء.

سيكرهه البعض، ويحبه آخرون. سيكون بطلاً في نظر البعض،
وخارج عن القانون في نظر غيرهم. سيوافق أحدهم على ما
يفعله ويختلف على طريقة التنفيذ. سيوافق غيره على كل
شئ، وسيرفض غيرهم كل شئ.
ولهذا سيبقى في المنطقة الرمادية، شئتم أم أبيتم.

فهو مُجرد عَرَض من أعراض مرض تفشى في جسد الدولة.
ومحاربة أعراض المرض، لا تُشفي الجسد، أما تُزيد من ألامه،
وتطيل أمد مُعاناته. حاربوا المرض، لتختفي الأعراض.

أرجوكم لا تُحمّلوا فشلكم لمن يرفض أن يتحمّل الضعفاء
وحده من تيجته.

قطع صوت غادة سيل الذكريات الذي هاجم مجدي كارم
وفصله لدقائق عن الواقع، قالت:

-تصدق يا مستر مجدي، انا ممكن اعمل معاك انت شخصياً
Interview.

وقبل أن يتمكن من استيعاب الفكرة، أكملت هي بحماسة
تدل على اقتناعها الكامل بالفكرة، وهي تُشير بيدها وكأنها
ترسم المانشت بعرض العُرْفَة:

-اقرأ في العدد القادم «حوار مع مجدي كارم.. الذي اتهمته

السُّلطات أنه على علاقة بالقاتل يتحدث بعد عودة القاتل». أراح مجدي ظهره على كُرسيه، وظهرت على وجهه علامات التفكير المتأني، ثم قال بعد دقيقة من الصمت:
-انا مش عارف افكر دالوقت في موضوع الInterview، ممكن بس ماتستعجيليش.. الموضوع مش هيّن.. ماتنسيش أنه قاتل يا غادة.. محتاجة تفكير شوية الحكاية دي. وأكمل قبل أن تعترض:
-اسمعي الكلام يا غادة.. انزلي بالموضوع زي ما طلبتي.. بس عايز اشوفه الأول قبل ما ينزل المطبعة.. أو Online.. معلى بلاش مناقشة في الموضوع ده بالذات. غادرت مكتبه وكانت في مُنتهى السعادة لسماحه لها بتويّ الموضوع، ونزوله في الصفحة الأولى.

ليل الخميس ١٢ ديسمبر سنة ٢٠١٣

يتذكر عصام وهو يقود سيارته عائداً لمنزله، جلساته الطويلة مع عمه التي كان يشاركه فيها بأخبار قضية «سفاح الأرقام»، ويناقشه، ويطلب رأيه. تذكر أول مرة قال لعمه إنه يكاد يؤيد هذا القاتل في بعض جرائمه، وتذكر ثورة الغضب التي ثارها عمه عليه، كانت كلمات عمه تدوي في رأسه:

-لو فعلاً شايف أن من حق أي مريض نفسي يقتل، لمُجرد إنه بيقتل مُجرمين، يبقى انت اخترت الطريق الغلط، والمفروض تطلع مُحامي، علشان تساعد المُجرم ده لما نقبض عليه وترجّعه الشارع يقتل تاني.

-ياعمو انا ما قصدتش أنهو صح، انا قصدت أن فيه ناس من دول يستاهلوا يتقتلوا.

-محدش يستاهل يتقتل يا عصام، انت هتكون ظابط

مباحث، مش قاضي، اللي يستاهلوه فعلاً هو القبض عليهم وتقدمهم للمحاكمة، القاضي هو اللي يقول يستاهلوا يتقتلوا أو لا. افتكر كلامي كويس يا عصام، اللحظة اللي هتبتدي تكره فيها المُشْتبه فيه، هيا اللحظة اللي هتتحول فيها من ظابط مباحث، لجلّاد، بيسخّر القانون علشان ينتقم من الناس. هتبتدي بإجبار المتهم على الاعتراف، وهتنتهي بتلبيس ناس بريئة قضايا مش عارف تحلّها. افتكر كلامي ده كويس لو بتخاف من ربنا.

أفاق من ذكرياته عندما قالت زوجته:
- كان لازم يعني تفتح سيرة الكلام في السياسة قصاد ريم وانت عارف إنها مجنونة ودماعها طاقة؟
نظر لها و قال بسخرية:
- مجنون مين ده اللي يفتح سيرة السياسة قصاد اختك؟؟ هي اللي فتحتها طبعاً.
- وانت استفزيتها يا عصام.. انت عارف هي أد أيه مُتعصبة لرأيها.. كان لازم تخرّجها عن شعورها كده؟
ثم ضحكت كطفل انتهى لتوّه من تنفيذ مقلب في زميل لا يطيقه، وقالت:
- بصراحة.. كنت هموت من الضحك لما علّت صوتها وقالت «تفضلوا طول عُمركم عناية في أيديهم.. انت عناية يا عصام» قالتها بشكل مسرحي مُقلّدة اختها.

-طب ما طبعا كانت لازم تتجن عليك.. انت مُشكلة.

أوقف عصام سيارته أمام مدخل العمارة التي يسكن بها،
وقال لزوجته:

-حبيبتي انا هتمشى شوية.. استني اطلع معاكي البنت.

-انا عارفة.. عندك قضية كبيرة.. يبقى لازم تسهر على النيل..
هتكلم شريف؟

-من ساعة ما ساب الداخلية.. مش عارف اتلمّ عليه.

-خلاص روح انت.. هي هتصحى.. ماتنزلش.. يالا يا مَلَك. ثم
نظرت له وهي تغلق باب السيارة:
-ياريت متأخرش.

تحرك عصام بسيارته في اتجاه وسط البلد، أخرج هاتفه
المحمول واتصل بصديق عمره، شريف ناجي، الذي طالما
اعتقد زملائهم إنهما توأم بسبب تشابه إسم الأب، وبسبب
قُرْبهم الشديد من بعضهما، برغم اختلاف شخصياتهما تماماً،
إلا أن صداقتهم تمكنت من بناء جسر بينهما، يصعب هدمه.
انتظر حتى توقف الهاتف عن الرنين، مُعلنًا عدم رد شريف،
فألقي الهاتف بجواره. ثم فتح درج السيارة وأخرج منه
شال صغير لقه حول رقبته، وقفاز لتدفئة يدها، وفتح زجاج
السيارة برغم البرودة القارصة. وصل لميدان عبد المنعم
رياض، ترك سيارته في ساحة انتظار تحت الكوبري، ونزل

منها والشال يخفي نصف ملامحه، يحمل في يده كوب من النوع الذي يحتفظ بحرارة ما بداخله. تحرك سيراً في اتجاه النيل، يسير بخطوات بطيئة، منكمش على نفسه من البرد، تتحرك عيناه يميناً ويساراً، يتابع حركة السهاري في الشوارع. منهم من أجبرته ظروف عمله على التواجد في الشارع للآن رغماً عنه، وهؤلاء يراهم يُسرِّعون الخُطى وينظرون أمامهم، لا يحاولون الاستمتاع بالشوارع التي تكاد ألا تستطيع أن ترى الأسفلت بها أثناء النهار بسبب الزحام. ويرى السهاري باختيارهم، مثله، معظمهم صغير السن والعقل، وشبه معدوم الوعي، قليل منهم يسير ببطء مثله، يستمتع بما لا يمكن حتى مُجرد رؤيته أثناء النهار. يصل عصام عند السور الأسود ويسير يساراً ناحية كوبري قصر النيل، يحمل النسيم البارد له رائحة حُمص الشام الدافئ.

يقف قُرب (فرشة) شاي، ينطلق من خلفها صوت محمد مُنير بأغنية «شئ من بعيد». يلمحه رجل في مثل سنه يقف خلف (الفرشة) فيبتسم، قصير القامة، مُمتلئ قليلاً، يقف خلف السور الأسود-الذي يمتد في تلك المنطقة على جانبي النيل- ظهره للنيل ووجهه للسور والشارع، أمامه مائدة مُغطاه بأكواب زُجاجية من نفس الحجم، لا يمكنك معرفة عددها من كثرتها، ومن الدُخان المتصاعد منها، ومن البراد الكبير، الذي لا يتوقف شمس عن صبّ الشاي منه

بها، فكلما يأخذ مُساعده بعضاً منها للزبائن، ويضع الأكواب
الفارغة على المائدة جانباً داخل بعضها البعض، يقوم شمس
بألية، بإفراغ ما تبقى داخلها من شاي على الأرض تحته، ثم
غسلها سريعاً بماء نظيف من برميل كبير بجواره، ثم رصّها
بجوار باقي الأكواب، وتزويدها بالشاي والسكر، ويلتقط
البراد الكبير، ويملأها بالماء المغلي، لتبدأ العملية كلها من
جديد، يتسّم له عصام، ويقول:

-ازيِّك يا شمس؟

-تمام يا عصام بيه الحمد لله.. وانت؟؟

نظر له بلوم:

-ماقولنا بلاش بيه دي هنا. قالها وهو يفتح غطاء الكوب
ويناوله إيّاه. ثم أكمل:

-الشغل كريس وعايز افصل.

وضع شمس بعض الشاي والسكر ثم صَبَّ الماء المغلي في
الكوب وهو يقول:

-وفين شريف بيه صاحبك؟؟

-مش فاضي ياعم.. من ساعة ما ساب الداخلية وهو مشغول.

-معقول؟؟ ساب الداخلية؟؟

-شُفت؟؟ شغال مدير أمن في شركات راجل أعمال كبير.

قال شمس باسمًا وهو يُعيد الكوب لعصام:

-عقبالك.

-لا ياعم.. الشغلانة دي كانت معروضة عليّ.. وانا مارضيتش..

وهو لما عرف.. شَبَط.. البلد محتاجة كل واحد فينا النهاردة..
وبعدين انا طول عمري كنت عايز اكون كده.. فَقَرِي بعيد
عنك.. شوية وجاي.

ثم دار لِيُكْمَل سيره ناحية قصر النيل.

قال شمس:

-هتلفِ طبعاً على الكوبري زي كل مرة وترجع.

هزَّ عصام رأسه مؤكداً على كلامه وهو يبتسم، ثم دار وتوجه
ناحية كوبري قصر النيل وهو يغلق غطاء الكوب. وصل
لمكانه المفضل، في منتصف الكوبري تماماً، أخرج سماعات
هاتفه المحمول، ووضعها في أذنيه، ولمس زر التشغيل لينطلق
صوت موسيقى بصوت يكاد يكفي لمنع صوت الأغاني
المزعجة التي تدخل أذنه قصراً، قادمة من المراكب التي
تنشط ليلاً فوق النيل. فَمُنذ ظهور تلك النوعية من الأغاني
وهو يكرهها ويكره من يُغنيها ومن يسمعها بصوت عالي،
ليس لإختلاف ذوقه عنهم، ولكن لأنهم اقتحموا عليه مكانه،
الذي اعتاد أن يستمتع فيه بهدوء وبرد الشتاء، بعيداً عن
ضوضاء النهار، وموتاه الأحياء.

يُشعل سيجارته بصعوبة بسبب قُفازه الذي يقيه من البرد،
ويسند مرفقيه على سور الكوبري، ويغرق في تفكير عميق
في القضية التي لم تكن في حُسابه بتاتاً، يسترجع كل تفاصيل

القضية كعادته، ومحادثة نفسه كما علّمه عمه، الذي تعود أن يسأل نفسه بصوت مسموع عن القضية ويُجيب، لأن سماع السؤال يجعل العقل في حالة انتباه، على عكس التفكير الصامت، الذي يسمح للعقل أن يسرح احياناً، كما علّمه عمّه، ولذلك استعان به كثيراً عندما كان يزوره في منزله، ليتحدث معه حول القضية. لم ينسى عصام إنه ساعد عمه بحواره معه، على حل لُغز الأرقام، التي كان يكتبها القاتل على جبهات ضحاياه. وتذكر يومها كيف كان في قمة الفخر عندما تنبأ له عمّه أن يُصبح ضابط مباحث عبقرى. ولكنه لم يتوقع أبداً أن يأتي عليه اليوم ليكون مُطالب بتحقيق ما عجز عنه عمه شخصياً. ابتسم عندما تذكر تلك الليلة، وشعوره يومها، وحماسته.

غادر عصام مكانه مُتجهاً للفرشة مرة أخرى، وصوت محمد مُنير في أذنيه:

بالظبط الشعر اللي بحبه.. الطول واللون والحرية..

ده مهفهف على وشك لعبه.. اوصف لك أيه يُغم عليّ..

مش عايز احبك مش عايز.. مش داخل سجنك مش جايز..

استوقفه مشهد غريب عليه، مع أنه دائم الحضور لتلك البقعة ولكنه لم يصادفه من قبل. رجل عجوز يبدو عليه الفقر ولكنه نظيف الملبس، يتكئ على عصاه التي تبدو

وأنها لن تحتمل ثقله كثيراً، يسير وحيداً ببطء على رصيف الكوبري قادماً من ناحية ميدان التحرير. كان الرجل يتحدث بصوت واضح دون توجيه الكلام لشخص بعينه. نزع عصام السماعة اليمنى واقترب من الرجل بفضول ليسمع ما يقول. سمع صوتاً قوياً ملئاً بالعِزَّة لا يتناسب مع هيئته الفقيرة، وظهره المحني، يقول:

ولا حد هَمَّه غيره حاله أيه..

كله يهَمَّه هوَّ هيهيش أيه..

سفينة معيوبة وليها ١٠٠ قبطان..

عايزينها توصل بالسلامة بأمانة أيه؟؟

أعجب الكلام عصام فاقترب من العجوز، وسار خلفه ببطء على بُعد ذراع منه ليسمع كلامه مُجدداً. ولكن العجوز لم يُكرِّر كلامه، ولكنه قال بنفس الصوت ولكن مع لمسة حُزن ملحوظة:

ولا ربنا غفلان ولا حكمته غايية..

لكل حاجة أوان الدنيا مش سايبية..

اعمل لربك وانسى الدنيا زائلة معاك..

واللي متبَّت فيها ماسك حبال دايبية.

توقف الرجل فجأة حتى كاد عصام أن يصطدم به وتوجه الرجل لسور الكوبري ووقف في نفس المكان الذي كان يقف

فيه عصام تقريباً ينظر للنيل. وقف عصام على بعد خطوات منه، ونظر لملامحه الطيبة، فلمح نظرة أسي وكأنه يقف في عزاء أعزّ الناس إلى قلبه.

بعد دقائق من الصمت، غادر عصام مكانه وعاد في اتجاه الفرشة التي قابل فيها شمس. ما أن لمح شمس قادماً نحوه من ناحية كوبري قصر النيل، حتى مسح يده بفوطة، وذهب لجهاز تشغيل الأغاني الموصّل بسماعات كبيرة، واختار أغنية «عنيكي تحت القمر» التي يطلبها عصام دائماً كلما يأتي هنا. ابتسم عصام وهو يسمع صوت محمد منير بمجرد أن خلع سماعات هاتفه وهو يقترب:

عنيكي تحت القمر.. كيف الكلام والخوف..
فيهم كلام للقدر.. متداري مش مكشوف..
بوّدي ازرع شجرة.. شجرة حنان وذل..
ترخي عليكي يا سمرة.. تلمّ شمل الكُل..

نظر لشمس وهزّ له رأسه شاكراً، وقفز فوق السور الأسود برشاقة، وجلس على أحد الكراسي المرصوفة خلف السور في المساحة الضيقة بينه وبين المنحدر المؤدي لمياة للنيل. أطلق تنهيدة طويلة وكأنه يحاول أن يُخرج التوتر والقلق من داخله مع هواء صدره الدافئ، الذي تحوّل لدخان أبيض بفعل البرد. ينظر للنيل وكأنه يبحث فيه عن إجابات للأسئلة

التي تَورِقُه. هل سيتمكن من القبض على السفاح وفِعل ما
عجز عنه عمه؟ لماذا توقف السفاح عن القتل؟ ولماذا عاد؟
ومن أين يبدأ؟
الكون اُصْرُه بحاله.. واجيبوه ليكي يا غالية..
ده انتي جماله ودلاله.. يا نخلة بكريه عالية..

سند رأسه على السور خلفه ونظّر للسماء، كأنه يطالبها بما
بَخَل به النيل من إجابات. أغمض عينه وترك نفسه لبرودة
الهواء التي يعشقها، والهواء النقي، وصوت مُنير.
مفيش كسوف في المحبة.. ولا للمحبة شروط..
عمرك ما تشعر بَعْرَبَة.. إلا في حنين مكبوت..
وانتي يا سامعه وشايفة.. أحلامي فوق الوصف..
من غير ما اقول انتي عارفة.. فاهمة الي فيه بالحرف..

oboeikan.com

صباح الجمعة ١٣ ديسمبر سنة ٢٠١٣

يخرج حسن الشريف من العمارة التي يسكن بها، تخطى الخامسة والثلاثين ولكنه يبدو أصغر سناً، يرتدي بنطلون من الجينز الأزرق الباهت، وقي شيرت أبيض، وسترة جلدية تبدو غالية الثمن. جسده رياضي قوي، ملامحه بشوشة، برغم الحزن الواضح عليها. العمارة لها باب كبير من الحديد، مفتوح على مصراعيه، ويبدو أنه لا يُغلق أبداً. خارج الباب، ممر واسع مرصوف ببلاط أحمر باهت، تبدو فيه تشققات كتجاعيد الشيخوخة، يمر بين حديقتين صغيرتين، في نهايته بوابة صغيرة وسط سور خرساني، يحيط بالعمارة، بطول متر واحد.

وقف حسن أمام كنبه خشبية تجلس عليها راضية، زوجة بواب العمارة، التي ورثت بوابة العمارة عن والدها الذي

توفى منذ سبعة سنوات، تتحدث مع أمل مثلتها في العمارة
المجاورة. يتسم ويقول بوذ:

-صباح الخير يا راضية.

تقوم راضية وتحمل الجرائد التي تشتريها خصيصاً له يومياً،
وتناولها له:

-صباح الخير يا بشمهندس.

-الولاد في المدرسة؟

-يووووه يا سعادة البيه.. ما خلاص.. كانت وزّة شيطان
وراحت لحالها.. والله ما حد منهم هيقعد من المدرسة تاني..
اللهي يعمر بيتك يارب ويكرم أصلك.. لولا دفعت مصاريف
المدرسة كانت راحت عليهم السنة.

-خلي بالك منهم يا راضية.. يالا.. السلام عليكم.

وتحرك سيراً في اتجاه النادي الذي يقضي فيه النهار كله
تقريباً بشكل يومي.

جلست راضية وهي تنظر له بامتنان، وتقول لأمل:

-الراجل ده جواه خير.. يكفي مصر بحالها.. ربنا يبارك له.

-مش ده يابت يا راضية اللي السفاح قتل مراته؟؟

كسى الحُزن ملامح راضية، وقالت:

-هو يا حبة عيني.. الراجل اخته ماتت في حادثة.. وبعدها

مراته جالها المرض الوحش عشان اخته كانت زي بنتها..

وماسابتش عيّل يواسيه.. ومن ساعتها عايش لوحده.. قتلها

السفاح الله يحرقه مطرح ماهو مرمي.. ماستناش أجلها
ييجي لوحده ربك رحمها من العذاب.. زي أول امبارح كانت
السنية بتاعتها.. اليوم الوحيد اللي ماينزلش فيه من البيت.
-بيقولوا أنه بيدور على اللي قتل مراته من ساعتها.. ساب
بيته اللي كان فيه وجه هنا وقعد من الشغل وبيدور عليه.
شهقت راضية في استنكار:

-الراجل في حاله.. كل يوم من النادي للبيت ومن البيت
للنادي.. حتى عربيته مش بتتعتع من مكانها غير كل فين
وفين.. هما بس ولاد الحرام اللي لسانهم مايسكتش.. قومي
يابت شوفي اللي وراكي.. وانا هدخل عشان ورايا همّ ما يتلمّ.

وصل حسن للنادي القريب من منزله، مسافة ربع ساعة
سيراً، يقطعها كل يوم بنشاط منذ ترك عمله. يجلس في مكانه
المفضل، وهو حديقة النادي التي تطل على ملاعب التنس.
حيث تعرّف أول مرة على زوجته نادية يوم ٢١ من يوليو
سنة ١٩٩٦ وحيث كان يجلس في أيام الأجازة معها، قبل
مقتلها على يد سفاح الأرقام منذ ثمان سنوات.

بعد مقتل أخته الوحيدة، التي كانت بمثابة أبنته -حيث لم
يُرزق بأطفال- سنة ٢٠٠٣ في حادثة سير، ومقتل زوجته على
يد القاتل الملقب بسفاح الأرقام سنة ٢٠٠٥. ترك عمله، وباع
شقتة التي شهدت أسوء ذكرياته، وعاد لأول شقة سكنها مع

زوجته .

جاء النادل «عم عفت» بالقهوة مباشرة، لِعِلمه بطلب «حسن»
بِيه» كما يناديه. شكره حسن باسمًا وبدأ يقرأ الجرائد في
روتين يومي لا يتغيّر إلا نادراً.

كعادته، يبدأ بقراءة مقال مجدي كارم اليومي في جريدة
الملاح المصرية، ولكنه اليوم بمجرد أن وقعت عينه على
المانشيت الرئيس أعلى الصفحة الأولى، اهتز كيانه كله، وكأن
صاعقة أصابته. تسارعت أنفاسه وهو يقرأ المانشيت مراراً
ليتأكد مما يراه، وبعد التأكد من أنه لا يتخيّل، بدأ يقرأ
الموضوع:

«عودة سفاح الأرقام بعد اختفاء ثمان سنوات»
تحقيق بقلم: غادة عثمان

بعد حل لُغز مقتل الفتاة د. م. التي عُثر على جُثتها يوم
الإثنين الماضي، عاد لُغز قديم مُجدداً للظهور. حيث عثرت
قوة مباحث قسم حدائق القبة، وعلى رأسها الرائد عصام
ناجي، على جُثة قاتل الفتاة، عندما توجهت لمنزله للقبض
عليه. فيحادثة شهدت عودة «سفاح الأرقام» لممارسة هواية
القتل بعد ثمانية عاماً من الاختفاء غير المُبرر. حيث تخلّص
من قاتل الضحية الأولى، بنفس طريقته المُعتادة في القتل.

التفاصيل في الصفحة ١٢.

انتقل للصفحة ١٢ لمتابعة القراءة، ولكنه بمجرد رؤيته لصورة جثة تذاكر، بالقطع الواضح على جبهته، الذي يكتب الرقم (١١٢) منعكساً، أغلق الجريدة، وترك حساب القهوة تحت فنجانها الذي لم يلمسه، وقام مُسرِعاً وكأنه لاعب في غرفة خلع الملابس استدعاه مدربه فجأة لإجراء تغيير اضطراري لم يكن في الحسبان.

فتح حسن باب شقته، واتجه مُسرِعاً لغرفة النوم الصغيرة غير المُستعملة. تلك الغرفة التي لم يدخلها غيره منذ أن عاد ليسكن تلك الشقة، المُغلقة دوماً بالمفتاح. ولا يسمح حتى لراضية التي تقوم إسبوعياً بتنظيف الشقة كلها أن تدخلها، تحت ادعاء أنها مليئة بالكرايب وغير مُستخدمة. ويقوم هو شخصياً بتنظيفها. يضئ النور، تظهر إضاءة قوية ولكن كلها موجهة ناحية الحائط يسار الداخل من الباب، حيث ملاءة كبيرة تُغطي مُعظم الحائط، خطى نحوها ورفع الملاءة بحذر. ظهرت لوحة كتابة كبيرة لونها أبيض، كالتي تُستخدم في المدارس، مُقسّمة بالطول بقلم أسود، لثمانية أجزاء، مكتوب في أعلى كل عامود رقم، ثم تحتها صورة مُقطّعة من الجريدة لجثة، ثم تحتها كُتبت تفاصيل كثيرة عن صاحب الجثة. كانت كل الصور تحمل نفس القطع الواضح على الجبهة،

وإن اختلفت الأرقام المكتوبة بالمقلوب، وكان الرقم المكتوب في أعلى كل عامود، هو نفس الرقم المنقوش انعكاسه على رأس الضحية في الصورة المُلصقة تحته.

فرد جريدة الملامح المصرية، وذهب لركن الغرفة المقابل للِسبورة، حيث مكتب صغير به دُرُج واحد، وضع الجريدة على المكتب، فتح الدرج وأخرج منه مقص، وبدأ في قص تحقيق غادة عن جريمة مقتل تذاكر، ثم التقط قلم أسود من الدرج، وذهب للِسبورة وكتب على يسار آخر جريمة ارتكبتها السفاح، (١١٢) ثم لصق تحتها الصور المُرفقة بالتحقيق، ثم التحقيق نفسه. نظر للتحقيق في صمت غاضب عدة دقائق، ثم كتب بالقلم تحته:

غادة عثمان؟؟

عصام ناجي؟؟

مجدي عبد الشكور او«تذاكر»؟؟

د. م ؟!

ثم رجع للوراء خطوة واحدة ووقف مكانه، لا يتحرك كالتمثال، يتأمل اللوحة وملامحه تنطق بالغضب.

الخميس ١٣ أبريل سنة ٢٠٠٥

مقالة بعنوان: «المدعو إهمال يقتل أولادنا»

بقلم: مجدي كارم

لن تعرف ابداً من المسئول عن قتل الطفل مازن السمري تحت عجلات القطار، مهما تحرّيت أو بحثت في الأمر. ببساطة لأن الحقيقة غائبة، والمتهمين هم الشهود، والبصير وسطهم اعمى.

لن تعرف أبداً مدى صدق عامل المزلقان، الذي ادّعى أن وسيلة اتصاله الوحيدة لا تعمل منذ فترة. أو إن كان قد قدّم شكوى بالفعل كما قال إنه فعلاً مل. ولن تعلم لماذا لم يُنظر لهذه الشكوى -الذي قيل إنها لم تصل للهيئة- بعين

الاعتبار. ولن تعرف إذا كانت وسيلة اتصاله لا تعمل منذ فترة كما يدعي، فكيف لا تحدث تلك المأساة يومياً.

أين الحقيقة؟ لن تصل مهما بحثت غير لحقيقة واحدة، لأن كل ما نعرفه يقيناً، هو أن الطفل مازن السمري قُتل تحت عجلات قطار وهو يعبر المزلقان المجاور لمنزله، منذ يومين. ولكن كل شيء آخر ستجد من يؤكد، وآخر ينفيه. ولو استطاعوا، لأنكروا وجود طفل بهذا الاسم في كشوف الأحياء من الأساس.

لن أتساءل عما كان سيحدث لو كان مازن هو ابن سيادة وزير النقل، لأن الطبيعي ألا يحتاج ابن سيادة الوزير لعبور مزلقان الموت هذا سيراً طوال حياته، أو إن كان يعلم معنى كلمة مزلقان. ولكن سأسأل سؤالاً أعتقد من حقي: إلى متى سينجو الفاعل بفعلته لعدم وجود رقابة؟ إلى متى سننتظر حتى يتحقق الحد الأدنى من الرقابة؟

أرجوكم، نحن لانطلب أكثر من القصاص العادل من المدعو «إهمال». إن لم يكن قريب أحد كبار المسؤولين في الدولة بالطبع.

الثلاثاء ١٨ إبريل سنة ٢٠٠٥

خبر في نفس الجريدة:

الإفراج عن سيد شعيب السيد عامل المزلقان.

oboiikan.com

ليل الجمعة ١٣ ديسمبر ٢٠١٣

يخرج شريف ناجي من الحمام المُلحَق بِغُرْفَةِ نومِه، يلف النصف الأسفل من جسده الرياضي القوي بِمشفة كبيرة، يقف أمام المرآة، وينظر لنفسه بِعجاب شديد، وكأنه يرى نفسه لأول مرة. يعيش شريف في شقته الجديدة، التي تبدو عليها مظاهر الثراء، والعزوية، والتي اشتراها ليعيش فيها بمفرده، بعد استقالته من الداخلية، وعمله كمسئول أمني في مجموعة شركات كبرى ملك رجل الأعمال الدكتور حازم البدري.

تخرج ميار من الحمام بعده بدقائق، تلف جسدها الرشيق بِمشفة بيضاء، زادت جسدها الخمري جمالاً وإثارة. أزاحتها بدلال من أمام المرآة، وجلست أمامها. وبدأت تصف

شعرها الأصفر المصبوغ خُصّلات منه بغير انتظام باللون
البني. رفعت عينها لتتنظر لشريف الواقف خلفها، الذي كان
قد بدأ يرتدي ملابسه، وقالت:

-انت مجرم يا شريف.. أيه يابني؟؟ انت ماشوفتش بنات
قبل كده؟؟

نظر لها في ثقة، وقد أعجبه تعليقها، وقال:

-انتي لسة شوفتي حاجة؟؟ دانا لولا عايز اروح مشوار مهم..
كنت طبقت معاي للصبح.

ضحكت بدلال، وقالت:

-انا كنت مبسوفة.. بس مش هكذب عليك.. انت ناشف
قوي.. واحدة واحدة بعد كده عشان احبك.

قال وهو يقفل أزرار قميصه:

-ومين الي قالك أن هيبقى في بعد كده؟؟

توقفت عن تصفيف شعرها، ورفعت حاجبيها ونظرت له في
المرآة بغضب، فقال باسمًا:

-اتقلي يابت مش كده.

ثم اقترب منها، ومد يده والتقط زجاجة عطر من أمامها،
وأغرق بها قميصه. قَبَل ميار على جانب رقبتها وهو يُعيد
زجاجة العطر، وقال هامسًا:

-انا مش نازل من البيت بكرة.. تعالي نتغدى سوا.

ثم غمز لها بعينه في المرأة، فابتسمت في غنج. توجه لباب
غرفة النوم، وقال قبل أن يخرج:

-انا نازل.. براحتك خالص بس اقفلي الباب وانتي نازلة..
سلام.

-باي يا حبيبي.

خرج شريف من باب عمارته، التي تقع في شارع من شوارع
مصر الجديدة العريقة، وأخرج هاتفه المحمول واتصل بعصام
صديق عمره:

-أيوة يا صاا.. معلش امبارح كنت غرقان.. ماشوفتش
التليفون غير الصبح.. المهم انا في الشارع وعاييز اشوفك.
-الدينا برد ياعم ومش قادر انزل.. وبعدين انت تغطس
وتطلع فجأة كده وعاييزني جاهز؟؟ انسى.

-لا ماليش فيه.. لو مانزلتش هاجيلك البيت.. كلها نص
وابقى عندك.

-يابن المجنونة.. طب أجيلك فين؟؟

-لا لا انا هجيلك اخذك وارجعك.. عاييز افرجك على العربية
الجديدة.

-يا سيدي يا سيدي.. ماشي ياعم المستشار الأمني.

-انت شكلك جاي تقرأ؟؟ ماقولتلك خد انت الشغلانة..

محدث يرفس النعمة.. عملتلي فيها رأفت الهجان.

-غور يا زفت علشان الحق اجهز.. قال رأفت الهجان قال.

-خلاص اجهز على ماجيلك.. سلام.

خرج عصام من عمارته، ليجد شريف منتظراً خارجها بجوار سيارته، سلّم عليه بشوق، واحتضنه وقال:

-شهرين يا جزمة مش عارف اتلم عليك.. بس أيه ياض العربية دي؟؟ انت بتقبض كام يخربيتك؟؟
ضحك شريف وفتح لعصام باب السيارة، وقال:

-أمال لو شوفت الشقة الجديدة هتعمل أيه؟؟ اركب اركب..
دانا هندمك على شبابك.

انطلق شريف بالسيارة، وقال:

-انا علاقتي حلوة جداً بالدكتور حازم صاحب حماك.. والراجل طلبت منه سلفة اسدها من مُرتبي ماتأخرش.. قمت جايب شقة وعربية بالقسط تبع البنك بتاع حماك.. والضامن كان دكتور حازم شخصياً.. بس كل ده كوم.. والسكرتيرة بتاعتي كوم تاني يا صااا.

ضحك عصام، وقال:

-وسكرتيرة كمان؟؟

-صاروووووخ.. اسمها ميار.. كانت بايتة معايا امبارح.. أصلاً قبل ماتكّمل شهر في الشغل كنت شاقطها.

خبط عصام كف على كف، وقال:

-يابني انت مفيش فايده فيك؟؟ هتفضل كده لحد ماتلاقي نفسك عجّزت بطولك.. اتجوّز يابني علشان تلحق تشوف عيالك وانت بصحتك.

-بقولك أيه؟؟ انت هتعمل فيها امي؟؟ انا مودي مضبوط

بلاش عكننة على المسا.. بس انت صورتك كانت منورة في
الجرنان النهاردة.. أيه يابني اللي حصل ده؟؟
تنهد عصام، وقد تذكر المسئولية التي تحملها:
-شوفت يا عم؟؟ مين يصدق أن الراجل ده يرجع تاني؟؟
-حاجة فعلاً غريبة.. وكان فين بروح امه كل ده؟؟ محترف في
برشلونة؟؟
ضحك عصام، وقال:

-بس مبروك ياض يا شريف.. شكلك مبسوط.. وده المهم.
-الله يبارك فيك يا صديقي.. بس تفتكر هتعرف تمسك
الراجل ده يا صُصّ؟؟
-بيني وبينك.. الحكاية صعبة جداً.. وبعدين انت عارف
القضية دي كويس.. موضوع أنه مالوش علاقة بالمفتولين ده
يخليك بتدور عياني.. على أمل يغلط.. بس للأسف لازم
يقتل تاني وتالت علشان يكون في أمل نمسكه.. إنما لو غطس
تاني.. هتبقى صعبة جداً.

قال شريف وهو يتوقف بالسيارة:

-بس انتوا استعجلتوا ليه كده ونزلتوا الحكاية في الجرايد؟
-انا اللي كلمت الجرنال.. الحكاية كده كده هتنزل.. الوضع
مابقاش زي الأول.. ايام ما كنا نقول مفيش نشر يبقى مفيش
نشر.. فمن مصلحتنا إننا اللي نشر بها.. علشان نختر أيه اللي
يتقال.. بدل ما المواقع تفتي.. وتبقى مش عارف تشتغل ولا
تنفي الإشاعات.

-طب يالا بينا. قالها شريف وفتح باب سيارته لينزل.
فقال عصام:

-إيه ده؟؟ رايح فين؟؟

-تعالى نقعد نشرب حاجة.. الكافية ده فشيخ.. كله ناس من
دنيا تانية.

-لا ياعم.. تعالى نروح عند شمس.

قال شريف مُستنكراً:

-شمس مين يابو شمس؟؟ انزل بس شوف الكافية من جوّا..
القمر اللي شغالة جوّا هتنسيك الشمس والمجرة كلها. قالها
ونزل من السيارة.

ضحك عصام، ونزل ليلحق بصديقه. وما أن دخل عصام المكان،
حتى شعر وكأنه داخل حلم جميل، وليس مكاناً حقيقياً في
الواقع. المكان به إضاءة خافتة كافية بالكاد لتري كل شئ،
ولكن لا تعرف من أين تأتي تحديداً. موسيقى هادئة تملأ
المكان بصوت بالكاد يكفي ليُغطي على أصوات رواده، فلا
يسمح لشخص أن يسمع ما يُقال على المائدة المُجاورة، ولكنه
لا يجبر الشخص على رفع صوته ليُحدث من يشاركه المائدة.

قابلتهم فتاة جميلة بإبتسامة لا تقل سِحراً عن المكان،
وقالت:

-مستر شريف.. نُورِت.. نفس المكان؟ ابتسم وأوما لها إيجاباً.

نظرت لعصام، ومدّت يدها لتُسلم عليه، وقالت:

-حورية.. حضرتك أول مرة تشرفنا.

نظر لها متفحصاً، وارتبك عندما ابتسمت بسبب ملاحظاتها
لابهاره، وقال مُرتبكاً:

-نعم؟؟ أيوة.. مطبوط أول مرة.

ابتسمت ومالت برأسها قليلاً لليمين، لتزيد من سحرها،
وقالت بصوت تعمّدت أن تضع فيه كل سحرها:

-واتمنى ماتكونش الأخيرة. ثم دارت لتقودهم لمائدة شريف
المفضلة.

ما أن جلسا وطلب شريف بيرة، وعصام شاي بالنعناع، حتى
سأله شريف:

-ها؟؟ أيه رأيك في المكان؟؟

-مريح لدرجة مستفزة.. حاسس كأني عايز انام.. مش ناقصه
غير صوت منير.

-منير؟؟ قوم ياض اركب تاكسي وروح لشمس.. انت مكانك
مش هنا.

ضحك عصام، وسأل:

-بس واضح إنك زبون هنا.

-أول ماستلمت الشغل.. اتلميت على واحد في الشركة علشان
اعرف منه النظام.. هو اللي عرّفني المكان هنا.. ومكانين
تانيين في وسط البلد والمعادي.. ومن ساعتها وانا باجي
هنا على طول.. علشان قريب.. وارتحت هنا.. وبعدين

انت تجيب هنا أي واحدة تثبت.. خصوصاً لو عرفت إنك معروف هنا.

-طمّني على سُغلك.. أيه أخبار الشغل الخاص؟ بتعمل أيه؟

اعتدل شريف وهو يلتقط كوب البيرة المثلجة، وقال:

-أيه؟؟ بتفكر؟؟

-انسي.

د- مكنتي تتوه فيه.. اخترت فرشته بنفسه.. مكتب السكرتيرة

بتاعتني أكبر من مكتب الوزير شخصياً.. بشتغل كل حاجة

ليها علاقة بالأمن.. بعين الBodyguards وبحُط خطط الحركة

للأفراد الي عليهم حراسة.. وبراجع تأمين المصانع والمكاتب

والمستشفيات.. بحل المشاكل الأمنية الي في المواقع.. بعلاقات

شوية.. بفلوس شوية.. يعني: حاجة كده زي رئيس عصابة..

بس قانوني وشيك شوية.

-يا خسارتك يا شريف في الخاص.. انت كنت ظابط مباحث

عبقري.

-بلا عبقري بلا قرف.. ياعم انا ماكنتش عايش.. انا أصلاً

ماكنتش مرتاح قبل نكسة يناير.. وماكنتش لاقى آكل.. ما

بالك بعدها؟؟ ولا لسة مقتنع أنها كانت ثورة وكده؟؟

-بلاش سيرة الحكاية دي.. كل واحد يشوفها زي ماهو عايز..

مش طالبة عكننة.

-قولي انت عامل أيه؟ والقمر الصُغن؟

-كله حلو الحمد لله.

-وصلتوا لحاجة في القضية؟

-خالص.. كل اللي في أيدينا أن داليا غالباً اتقتلت بدافع سرقة أو محاولة اغتصاب فاشلة.. والسفاح قتله قبل مانوصله.. والتاريخ اللي على دماغه مش موصلنا لحاجة. اعتدل شريف وسأل:

-وانت عرفت منين اللي قتل داليا؟؟

-وقعت منه سجايه في شقتها تقريباً وهي بتقاومه.. عليها بصماته.. ولقيت تليفونها في شقته لما لقيناه.

-وانت ناوي تبدأ منين في حكاية السفاح ديه؟؟

تنهّد عصام تنهيدة تنم عن حمل ثقيل، وقال:

-بكرة عندي اجتماع انا وفريق البحث في المديرية.. هنشوف هيحصل أيه.. لسة مش عارف افكر أو احدد خطة عمل.

وضع شريف يده على كتف صديقه، وقال:

-انا موجود في أي وقت يا عصام.. لو محتاج تفكر بصوت عالي زي ما عمك الله يرحمه علّمنا.. انا الفترة دي مسحول صحيح.. لكن هتصرف وألاقي وقت.. كلّمني لو محتاج حاجة.

ابتسم عصام وهو ينهي مشروبه، ثم قال:

-هو ده العشم يا شريف.. أكيد مش هكلم غيرك.. وانا لي صحاب غيرك يا ض؟؟

-صحيح هو مش عيد ميلاد ملك الشهر هه؟؟

-كويس إنك لسة فاكرك.. لازم تيجي.. يوم ٢٦.

-تمام.. لما تعرف البنوتة محتاجة تشتري أيه.. غششني عشان
مش بعرف اشترى هدايا.
-حاضر.. يالا بقى علشان الوقت اتأخر.
-يالا بينا.

صباح السبت ١٤ ديسمبر ٢٠١٣

في تمام العاشرة إلا ربع صباحاً، كان الرائد عصام ومعاونيه أمام مدير مكتب اللواء أشرف عثمان، رئيس مباحث المديرية، الذي رحّب بهم، وطلب منهم الإنتظار دقائق حتى ينضمّ لهم الرائد هادي خلف، الذي طلب منه اللواء أشرف الانضمام لفريق الرائد عصام في تلك القضية. وبعد دقيقة من الرد على بعض الإستفسارات -التي غالباً كان هدفها مرور الدقيقة- وصل الرائد هادي. هو شاب حاد الملامح، بشوش بتحفظ، اسمر البشرة، جسده ممتلئ قليلاً، وملامحه تُنم عن ذكاء واضح.

دخل فريق البحث مكتب اللواء أشرف، بعد سماح مُدير مكتبه لهم بالدخول. ترك اللواء أشرف جريدة الملامح المصرية من يده، وقام وصافح عصام بحفاوة واضحة، وقال:

-ازيِّك يا عصام؟؟ بقالي سنين ماشوفتكش.. من ساعة آخر مرة كنت عند عمك الله يرحمه.. يبجي من كام سنة.

-مضبوط يا سيادة اللواء.. ده كان من ٣ سنين تقريباً.

قال وهو يشير لمكتبه:

-القضية بتاعتك نزلت صفحة أولى.. العين هتكون عليكم.. ربنا يعينكم.

ونظر اللواء لفريق البحث، فبدأ عصام في تقديمهم:

-النقيب رامي.. النقيب هشام.. والرائد هادي لسة متعرف عليه حالاً.

دار اللواء أشرف حول مكتبه، وأشار لهم بالجلوس، وقال:

-مضبوط.. الرائد هادي يا عصام واحد من اللي سيرتهم سابقاهم.. وانا لما سمعت أن قضية عمك الله يرحمه اتفتحت تاني.. هو أول حد جه في بالي يساعدك.. انا اللي طلبته بالاسم.

قال هادي بابتسامة:

-يا فندم دي ثقة يارب اكون استحقها.

ابتسم له اللواء وقال:

-انا متأكد من كده. ثم نظر لعصام وقال:

-ها يا عصام.. أيه الحكاية؟

اعتدل عصام في جلسته، وقال بجديّة:

-الإثنين بالليل يافندم.. لقينا جثة بنت من المنصورة مقتولة

في شقتها في القاهرة.

ثم مدّ يده لرامي الذي ناوله ملف، ناوله بدوره للواء أشرف، وأكمل:

ده تقرير فريق البحث عن القضية دي يافندم.. القضية تقريباً كانت محلولة.. لأننا لقينا علبة سجائر وقعت من القاتل وهو بيخنقها غالباً.. روحنا نجيبه بعد وصول نتيجة البصمات اول امبارح الخميس.. لقيناه مقتول بقاله ٢٤ ساعة.. بنفس طريقة السفاح إيّاه.. ومكتوب على راسه انعكاس تاريخ قديم.

ثم التقط ملف آخر من رامي وسلّمه للواء أشرف، الذي تناول منه الملف ووضعه على مكتبه، وسأل:

-أيه حكاية التاريخ ده??

قال عصام:

-الحكاية ابتدت في أول سنة ٢٠٠٥ لما ظهر السفاح اللي قتل ٩ أشخاص.. كان بيخدرهم بمادة مخدرة من بخاخة مؤقتاً.. ويربطهم ويقطع شرايينهم.. وكان بيكتب على دماغ كل اللي قتلهم رقم. وأشار لجبهته، وأكمل: -بس كان بيكتبه بالمعكوس.. وكان دايماً بيكسر مراية في بيت الضحية.. وعمي الله يرحمه اللي حل اللغز ده.. لما اكتشف أن الرقم ده بيكون معدول للي مكتوب على راسه الرقم لو شاف نفسه في مراية.. علشان كده كان بيكسر مراية وياخذ منها حطة يحطها قصاد عين ضحيته علشان يقرأ الرقم.. كان فاضل بس لغز الرقم ده المقصود بيه أيه.. لحد ماكتشف عمي الله

يرحمه أن واحد من ضحاياه كان عامل مزلقان.. ولما اتقتل
كان مكتوب على دماغه (١١٣). التقط ورقة وكتب عليها
الرقم.

ثم أضاف:

-الي لو قريت انعكاسها في المرآة هتكون (٤١١). قلب
الورقة ووظ على الرقم المكتوب على الصفحة العكسية.
وأكمل:

-ولو افترضنا إنه تاريخ هيكون (١١/٤) وفي نفس اليوم ده..
حصلت حادثة في المزلقان الي كان شغال فيه المقتول.. قطر
داس طفل.. وساعتها وضحت الصورة.. هو بيقتل ناس كنوع
من العقاب.. وقبل قتلهم بثواني بخليهم يشوفوا تاريخ
الغلطة الي بيعاقبهم عليها مكتوب على دماغهم.
وهنا تدخل هادي:

-وكل الضحايا الي اتقتلوا كانوا مكتوبلهم تواريخ على
راسهم؟؟

أجاب النقيب رامي وهو يفتح ملف كبير أمامه ويُخرج منه
بعض الصور، يناولها لهادي:

-كلهم يا سيادة الرائد.. بس مش كلهم المباحث ساعتها
قدرت توصل لسبب العقاب.. غالباً هو كان بيقتل أحياناً
بدافع شخصي.. أو هو كان عنده معلومات ما قدرناش نوصلها
ساعتها.. بس الأكيد.. من خلال تحقيقات الفريق الي
اشتغل القضية ساعتها.. ومن مُراجعتنا.. أنه مفيش حاجة

تربطه بأي ضحية.. وده اللي يخلي مهمة القبض عليه شبه مُستحيلة.

قال هادي وهو يُطالع الصور:

-مفيش حد ما بيغلطش.. ولا مجرم ما بيتمسكش في الآخر..
طالما بيقتل.. هيتمسك.

قال النقيب هشام:

-الخوف يا هادي بيه يرجع يغطس تاني.. انت لو تلاحظ
هو فضل تقريباً كام سنة ولا حس ولا خبر.. موضوع إنه
يرجع يقتل تاني ده مستمر؟ ولا جريمة فرداني؟ ده اللي
محدث يعرفه.

قال اللواء أشرف:

-فعلاً غريبة موضوع إنه يختفي كام سنة ويرجع.. أيه؟؟
جاله عقد عمل في الخليج؟؟

أعاد هادي الصور لرامي، وقال:

-مش يمكن يافندم مش هو اللي قتل أول امبارح؟؟

قال اللواء وهو ينظر لعصام:

-اممم وارد طبعا.. انت متأكد يا عصام أن هو القاتل؟

رد عصام وهو ينقل بصره بين اللواء وهادي:

-انا استبعدت الاحتمال ده.. ومتأكد إن هو ١٠٠٪ يافندم..

حضرتك عارف انا حافظ القضية دي.. انا تقريباً كنت عضو

في فريق البحث ساعتها مع عمي الله يرحمه بشكل غير

مباشر.. كنت حاضر معاه القضية خطوة بخطوة.. كنت دائماً

بسهر معاه وهو بيشتغلها.. الجريمة تمت نفس التفاصيل.. كل حاجة.. والصور تؤكد كلامي.. وكمان حكاية المراية مانزلتش جرايد ساعتها.. علشان كده لا يمكن يكون حد بيقلده.. وإلا كان مش هيبقى عارف المعلومة دي.

قال هادي:

-إلا لو حد عارف كل تفاصيل القضية من وسيلة غير الجرايد. قالها هادي ونظر لعصام، الذي ارتبك لثانية ساد فيها الصمت على المكان، حتى قطعه اللواء:
-والبنت اللي اتقتلت دي حكايتها أيه؟؟

قال رامي:

-اسمها داليا محمود.. بتشتغل سكرتارية في مستشفى «الكرامة» في مصر الجديدة.. شخصية عادية جداً.. تقرير الطب الشرعي بيقول أن في دم تحت ضوافرها مطرح ما كانت بتقاومه.. وانا متأكد إنه هيطلع دم مجدي ده أو تذاكر.. غالباً كانت محاولة اغتصاب.. أو سرقة.. لأنها مضروبة جامد.. ومالقيناش أي فلوس أو مجهرات في شقتها ولا تليفونها حتى.

قال اللواء:

-طب أيه يا عصام خطة الشغل من وجهة نظرك؟؟

قال عصام:

-انا شايف إننا محتاجين نقسم نفسنا يافندم.. الجزء الأصعب هيكون مراجعة القضايا القديمة.. والبحث عن أي حاجة ممكن تكون فاتت على فريق البحث اللي كان ماسكهم.

ثم نظر لهادي وقال:

-وانا شايف ان دي سُغلانة محتاجة حد دماغه صاحية..
ولمّاح جداً عشان يمكن يلاقي حاجة فاتت على فريق
البحث ساعتها.

تدخل هادي قبل أن يرُد اللواء:

-تمام يا عصام بيه.. انا هاخذ الموضوع ده.

ولكنه لاحظ تدخّله غير اللائق، فقال بصوت مرتبك:

-بصراحة يا سيادة اللواء.. انا معنديش معلومات كفاية عن
القضايا القديمة زي باقي فريق البحث.. يعني كده كده
هراجع القضايا القديمة علشان احصّل.. فبالمرّة امسك انا
الحكاية دي.

هز اللواء أشرف رأسه متفهّماً، ونظر لعصام، وقال:

-أيه رأيك يا عصام؟

قال عصام باقتناع:

-كلام منطقي.. يبقى هادي بيه يمسك القضايا القديمة
ويفحصهم.. ويكون معاه النقيب هشام يساعده.. وانا
همسك قضية تذاكر ومعايا النقيب رامي وخصوصاً إنها
في منطقتي.. وممكن حد من المرشدين بتوعنا يكون شاف
حاجة.. ويومياً هنجتمع وهبعت لسيادتك تقرير عن اللي
بيحصل.

قام اللواء أشرف، وقال:

-على بركة الله.. ربنا يوفقكم.

obseikan.com

عصر السبت ١٤ ديسمبر سنة ٢٠١٣

كان كربونة جالساً في غرفته الواقعة تحت سلم بيت قديم في حدائق القبة. التي عادة تكون مُخصصة للبواب، ولكن في مثل هذه المناطق، البواب نفسه يُعتبر رفاهية غير مُتاح مُجرد التفكير فيها. الغرفة تتكون من غرفة بها مرتبة على الأرض، بجوارها «سبرتاية» لإعداد الشاي والقهوة، وتجهيز الفحم للجوزة، الموجودة بجوارها، وحمام صغير. يسمع كربونة صوتاً قادمًا من الحمام، ينتفض مفزوعاً عندما يرى صديق عمره تذاكر قادمًا نحوّه من ناحية الحمام، والدماء تسيل من جبهته لتُغطي كل وجهه تقريباً. قبل أن يستوعب كربونة الموقف قال تذاكر:

-كده يا صاحبي؟؟ تسيبهم يموتوني يا صاحبي وتقف تتفرج؟؟

يقول كربونة بصوت مرتعش:

-انا رقتي فداك يا تذاكر.. انت اللي بيعتني يا صاحبي

ولعبت مع الكبار.. من إمتى واحنا بنلعب مع الكبار
يا تذاكر؟؟ مش كلامك ده؟؟ الحمار هو اللي يتعارك مع
الكبار؟؟

-انت محاولتش تمسك فيّ يوم ماسيبتك ومشيت.. كنت زعلان
على نفسك.. شُفت زعلك عمل فيّ أيه؟؟ احنا طول عمرنا
بنلحق بعض.. مالحقتنيش ليه؟؟ مالحقتنيش ليه؟؟
وبدأ تذاكر في خبط رأسه في باب الحمام مُحدثاً صوت دقات
عالية، وتاركاً بقعاً من الدماء على الباب. وهو يُكْرِر بصوت
عميق وكأنه قادماً من بئر:
-مالحقتنيش ليه؟؟ مالحقتنيش ليه؟؟

مازال صوت الخبط يتردد في الغرفة، حتى أفاق كربونة من
هلوسته على صوت دقات على باب الغرفة الخارجي وقد
اختلطت بالهلوسة في مزيج مُربك. فنظر مذهولاً ناحية
الحمام فلم يجد أثراً لهلوسته، ولا آثار دماء صديقه على
باب الحمام. فقعد في جلسته وأمسك رأسه بين يديه وكأنه
يحاول أن يحتضن بقايا ذكريات صديقه التي تقبع في ذاكرته
وتؤنّبهِ. عادت الدقات على الباب بإصرار، فقام من مكانه
وترنح حتى وصل للباب وفتحه. فوجد المهندس حسن
الشريف أمامه يبتسم، ثم قال:
-السلام عليكم يا حمدي.

-وعليكم السلام ورحمة الله.. مين سعادتك؟؟

-انا كنت عايزك في كلمتين بخصوص صاحبك جمال.
نظر كربونة ناحية الحمام بتلقائية وكأنه يتأكد من عدم وجود تذاكر، أو وجوده، ولما لم يجده، عاد ونظر لحسن قائلاً:
-عايز أيه يا بيه؟؟

-طب مش هتقولي اتفضل؟؟ مش هنتكلم ع الباب كده.
مد كربونة يده خلف الباب وسحب سيف طويل مُتسخ
وصدئ، لا يمكنك التمييز إن كان الإتساخ بسبب دماء من
ضُربت به رؤوسهم، أم هو صدأ بسبب قلة العناية به،
ورجع خطوة للوراء ودق الباب بجانب السيف، وقال:
-بقولك أيه يابا.. شوف انت جاي منين بدال ما ماترجعش.

نظر حسن للسيف في لأمبالاه، وقال:

-انت سُفت مني أيه علشان كل ده؟؟

-مش محتاج اشوف.. تذاكر اتلم على اللي شبهك جابوا
أجله.. أي حد من ناحيته في نظري هو اللي قتله.
ثم اقترب بحد السيف من كتف حسن ونغزه به في كتفه
نغزة لا تكفي لقطع قميصه، ولكن كافية -من وجهة نظر
كربونة- لقطع رابطة جأشه. ولكن حسن بقى لا مُبالياً
بالسيف، وقال بود:

-لا اتلميت على تذاكر ولا اعرف اللي قتله.. بس عايز اعرفه..
وأظن انت كمان عايز تعرف اللي قتل صاحبك.
ظهر الخوف على صوت كربونة وهو يقول:

-انت مباحث يا باشا؟؟ طب ماتقو...

قاطعہ حسن وقال:

-انا مش مباحث ولا خطر عليك.. انا واحد عايز يلاقي اللي قتل صاحبك يمكن اكثر منك كمان.. هستنى ربع ساعة في العريية عند الجامع اللي على الطريق برة.. علشان نروح نقعد في حته عشان مش هنعرف نقعد هنا. قالها وهو ينظر للغرفة خلف كربونة، وأكمل:

-لو عايز تعرف حكاييتي وتساعديني حصّلي.. مش عايز.. براحتك.. ماتجيش.. وانا مش هاجي تاني.. السلام عليكم. قالها ودار ليغادر العمارة. فقال كربونة بصوت متوتر:

-انا مش رايح في حته على فكرة.. ماتستناش.. عارفهم انا الشويتين دول.. ولو جيت هنا تاني مش هعمل حساب حاجة. وأغلق الباب بقوة.

بعد عشرة دقائق فتح كربونة باب سيارة حسن، وقال:

-مش قايلك مش جاي؟؟ استنيت ليه??

ابتسم حسن في سخرية وقال:

-وجودك نفسه إجابة سؤالك.. ولا تقصد عرفت منين انك جاي??

-أيه?? أيوة اقصد عرفت منين??

-مأعرفتش.. بس انا قلت هستنى ربع ساعة.. يبقى هستنى ربع ساعة.

قال كربونة وهو يعتدل في جلسته ويدور بنظره داخل

السيارة الفارهة:

-ماشي.. ممكن بقى يابيه تقولي أيه الحكاية؟؟

قال حسن وهو يضغط زر محرك السيارة:

-طب ممكن نمشي من هنا.. مشوار مش بعيد وهرجّعك تاني.. وبالمرة نتكلم في السكة.

نظر كربونة لباب السيارة، وكأنه يفكر في الهروب، لاحظ حسن قلقه فقال مطمئناً:

-لو عايز تنزل انزل يا حمدي.. انا مش خاطفك.. بس انا فعلاً محتاج مساعدتك.. وانت لو مش مصدقني ماكنتش

جيت من الأول.. قلت أيه؟؟

-ماشي يا بيه.. اتكل على الله.. أيه ياخذ الريح مالبلاط؟؟ وإعتدل في جلسته.

تحرك حسن بسيارته وسأل:

-تحب نتغدي؟؟ ولا تشرب قهوة.. مانت في حالتك دي ماتنفعش.. انا عايزك مصصح.

-يا بيه انا شارب سيجارة واحدة.. مش حاجة.. انا بس متاخذ من ساعة ما تذاكر الله يرحمه. وسكت ونظر

للشارع. احترم حسن ضيقه وسكت. بعد دقائق من الصمت الثقيل، تكلم كربونة:

-ممكن يا بيه ترسيني على الحكاية بقى؟

-ممكن طبعاً.. شوف يا حمدي... انا..

-قولي يا كربونة يا بيه.. حمدي دي بتلخبطني.. بحس إنك

بتكلم حد تاني.

ضحك حسن ضحكة سريعة وقال:

-حاضر.. شوف يا كربونة.. انا مش عايز الف وادور عليك..
كنت ناوي اقولك اني صحفي وبعمل موضوع عن تذاكر..
بس كنت هتشك في.. وكنت هتتعبنى.. وانا بصراحة عايزك
تساعدني.

-رقبتي يا بيه.. بس في أيه؟؟

-انت طبعاً سمعت عن السفاح اللي قتل تذاكر من الجرايد.

-ولا اعرف عنه حاجة.. كل اللي اعرفه أن حد قتله.. انا
مابقراش جرايد يا بيه.

-باختصار كده.. في سفاح كان بيقتل من سنين.. الراجل ده
قتل ٨ سنة ٢٠٠٥ واختفى.. وظهر تاني فجأة وقتل صاحبك.
بدأت علامات الإهتمام تظهر على ملامح كربونة:

-وهو كان فين الكام سنة دول؟؟ في السجن؟؟

-يا حمد.. قصدي كربونة.. بقولك اختفى.. ماتمسكش.

-لامؤاخذه يا بيه.. طب عرفت مين أن هو اللي قتل تذاكر؟؟

قال حسن وهو ينظر له بضيق:

-مممكن تستنى شوية انا هحكليك كل حاجة بالترتيب عشان

تفهم ؟

-اتفضل يا بيه.

-هو كان له طريقة معينة في القتل.. قتل بنفس الطريقة كل

مرة.. واختفى.. ماتقبضش عليه.. محدش يعرف هو مين..

وفجأة ظهر تاني لما قتل صاحبك.. بنفس الطريقة.. علشان كده عرفت إن هو.

-وانت عايز تمسكه ليه يا بيه؟؟

ركن حسن السيارة وملامحه تنطق بالغضب والحزن، وقال:

-انا اسمي حسن يا كربونة.. انا جوز الضحية التاسعة للسفاح ده.. آخر اللي ماتوا على أيده.

قال كربونة بتأثر:

-البقية في حياتك يا بيه.

نزل حسن وكربونة من السيارة، توجه حسن ناحية قهوة بلدي واسعة تحتل ناصيتين في منطقة الظاهر، وتبعه كربونة، جلسا في ركن بعيد منزوي، وطلب حسن قهوة سادة، وطلب كربونة مثله، وهو يُشعل سيجارة.

قال حسن وهو ينظر حوله:

-انا اتربيت هنا.. دي منطقتي.. مابعرفش اقعد على قهاوي غير في الظاهر.. قهاوي الظاهر ليها طعم مميز كده.. مايحسوش غير اللي اتربي وسطها.

نظر كربونة حوله، وكأنه يحاول أن يكتشف هذا الطعم الذي يتحدث عنه حسن، ولكنه لم يجد ما يُميز المكان، فأكمل حسن:

-كربونة.. انا محتاج اسألك كام سؤال عن تذاكر.

-اتفضل يا بيه.

-اللي عرفته أن انت وتذاكر كنتوا مع بعض في كل حاجة..

يعني سرّه معاك.. ياريت ماتخبيش عليّ حاجة.. علشان
تساعدني.. وبعدين مفيش حاجة ممكن تقولها تأذي تذاكر
مطرح ماهو موجود دالوقت.. فمن فضلك ماتخبيش حاجة.
قال كربونة وهو ينظر لحسن بشك واضح:

-يا بيه انا مش هخبي عليك حاجة.. بس الأول انت عرفت
كل ده عني وعن تذاكر منين??

ابتسم حسن وقد أدرك أن تأثير المُخدر بدأ يزول عن وعي
كربونة حيث بدأ أن يفكر، وقال:

-من القسم يا كربونة.. ورقة بميتين جنية عملتلي نسخة من
تقارير البحث الجنائي عن الجريمتين والمحاضر كلها في نُص
ساعة.. مفيش حاجة في الزمن ده مالهاش تمن.

رفع حسن فجان القهوة وارتشف منه رشفة سريعة بمجرد
أن وضعت أمامه، ونظر لكربونة وأكمل:

-ها؟؟ مركز معايا??

-معاك يا بيه.

-طبعاً مستحيل تفتكر تذاكر كان فين يوم ٢ الشهر الي
فات??

-يابيه انت جاي تهزر?? انا بفتكر اسمي بالعافية!!

-طب تذاكر قتل واحدة يوم الاتنين الي فات اسمها داليا..
داليا دي تذاكر يعرفها منين وقتلها ليه??

فكر ثواني، وقال:

-تذاكر مايعرفش حد بالإسم ده يا بيه.. وتذاكر عمره ما مدّ

أيداه على مرا لامؤاخذة.. انا مش بالحق حكاية أن تذاكر قتل البت دي.

هز حسن رأسه، فهو كان يتوقع دفاع كربونة عن صديقه، وقال:

-بلاش قتلها.. انت متأكد إنه مايعرفش داليا دي؟؟

-يا بيه لامؤاخذة يعني.. تذاكر عمره ما عَطَّ من غيري.. وعمره ما كان هيعرف واحدة من ورايا.. ده غير أن اسم داليا ده مش ببيجي في طريقنا.. البنات اللي أساميهما كده يا بيه.. سَكَّتْهَا إصلاح وتهذيب.. واحنا سَكَّنَّا خبط وتقليب.. لم يفهم حسن المصطلح الذي استخدمه كربونة، ولم يشعر بالرغبة في الاستفسار عن معناه:

-بس هما لقوا بصماته على علبة سجائر وقعت منه في شقتها.. وتليفونها كان في شقته.

-تلبس يا بيه.. هي جديد عليهم؟

قال حسن بنفاد صبر:

-يابني لو عايزين يلبسوه قضية.. هيقتلوه ليه؟ ويفتحوا قضية تانية؟ ما كانوا قبضوا عليه ونفخوه وخلّوه يعترف.. بلاش نظرية المؤامرة دي وركز معايا.

-مغامرة مين يا بيه؟؟

قال حسن بنفاد صبر:

-لا إله إلا الله.. يابني ركَز معايا.

-محمد رسول الله يا بيه.. كويس انك طلعت مسلم برضه..

كنت شاكك فيك.

-يابني مانا قايلك أن اسمي حسن.. هو في حسن مسيحي؟؟

سكت تذاكر لثواني، ثم قال:

-أيوة يا باشا.. عادل إمام كان اسمه حسن وكان مسيحي في فيلم حسن وبطرس.

ضحك حسن بصوت عالي، وكاد أن يفقد توازنه من كثرة الضحك، ثم قال:

-تصدق غلبتني؟ بس هي تفرق معاك مسلم من مسيحي؟؟
-لا خالص.

فسأل حسن باستغراب:

-أمال بتقول كنت شاكك فيّ ليه؟؟

-عادي يا باشا.. بنكشك. قالها وضحك.

ضحك حسن بدوره، ثم قال وقد عادت له الجدية:

-طيب تذاكر عمره راح مستشفى «الكرامة» اللي في مصر الجديدة؟؟

-يابيه تذاكر عمره ما راح مصر الجديدة أصلاً.

-افتكر كويس.. يكون راح يجبّس ايد.. يكشف.. أي حاجة.

-يا بيه تذاكر آخره لما كان يتعب.. ولّا دماغه تفتتح في خناقة.. كان يروح الصيدالية.. أو يكتمها بشويه بُنّ.

-طب تذاكر مقالکش أي حاجة عن حكاية الشغلانة اللي طلعتها من غير تليفونه دي؟؟

-والله ما عرف عنها غير أنها شغلانة هيطلعه من وراها

قرشين حلوين.. حلوين قوي زي ما قال.. غير كده مريضش
يقولي.

وفتح علبة السجائر فوجدها فارغة، ولاحظ حسن استيائه
فنادى عامل الشيشة الصغير وقال:

-خد يا سيكة.. روح هات علبتين سجاير. ثم نظر لكربونة
وسأله وهو ينظر لعلبة سجائه:

-بتشرب كيلوباترا على طول؟؟ ولا وانت مفلس بس؟؟
-لا يا بيه مابشر بش غيرها.

فالتفت حسن للصغير وقال:

-خليهم اربع علب كيلوباترا.. وهات لنفسك حاجة لو عايز.

وتابعه بنظره وهو يتتعد وهو يحمل ابتسامة حنونة، ثم
اعتدل وسأل:

-قولي يا كربونة.. هو تذاكر كان يشرب سجاير آيه؟؟
ابتسم بسخرية وقال:

-زي حالاتي يا بيه.. هو يعني اللي كان مدير بنك؟؟

-وانت عايش منين يا كربونة؟؟ سامحني في السؤال.

-لا يا بيه.. براحتك.. كنا ساعات نطلع نمسك شغلة نقاشة..
وساعات شيالين.. بس بقالنا فترة تذاكر بيجيلنا شغل.

-فين؟

-كل مرة في حته.. بلطجة بالأجرة.. خناقة.. مظاهرة.. اعتصام..

تأمين.. مابنقولش لا.. بتزق يا بيه.. ربك ماينساش حتى
الي مش فاكرينه.

oboiikan.com

الجمعة ٢٦ مايو سنة ٢٠٠٥

خبر في صفحة الحوادث:

«حل لُغز اختفاء أطفال الأقاليم بعد مقتل المُجرم سنارة النونو على يد سفاح الأرقام»
بقلم: مجدي كارم

تمكنت قوات الشرطة المصرية من العثور على أربعة عشر طفلاً، كان كل منهم في عداد المفقودين، بعد إرسال شخص مجهول لخطاب- يُعتقد إنه سفاح الألفية- أبلغ فيه الصحافة بمكانهم. وأثبتت التحقيقات أن المجرم الشهير «سنارة النونو» كان يقود عصابة احترفت خطف الأطفال الصغار من الأقاليم، وتهريبهم للقاهرة، للعمل في مجال الشحاة، والنشل.

هل ستشكر الداخلية في بيان رسمي هذا الملقب بسفاح الأرقام؟ أم ستكتفي بدعوات أمهات الأطفال الذين عادوا؟؟

غروب يوم السبت ١٤ ديسمبر ٢٠١٣

جلست عادة أمام مكتب مجدي كارم وأخرجت من حقيبتها،
كراسة كبيرة وعدة أقلام وجهاز تسجيل رقمي، وضعتهم
أمامها، وقالت:

-جاهز يا مستر مجدي؟؟

-جاهز. قالها وهو يبتسم بإعجاب، وهو يراها تخطو بثقة
في عالم الصحافة الشائك، فهو يعتبر نفسه والدها الروحي في
مهنة الصحافة، ويعتبرها خليفته.

وضعت الحقيبة بجوارها، ووضعت ساق فوق الأخرى،
وفتحت كراستها على صفحة كانت قد أعدت بها بعض
الأسئلة التي تريد أن تطرحها في الحوار. مدت يدها لتبدأ
التسجيل، ولكنها توقفت في نصف المسافة وقالت:

-الأول عايضة اتفق مع حضرتك على حاجة.. مفيش أسئلة
Off Limits انا هسأل براحتي.. ومفيناش من زعل.

-مش متوقع منك غير كده.. لكن طبعا انتي عارفة أن الحوار حاجة.. والنشر حاجة تانية.. الموضوع ده حساس.. ماتنسيش إني كنت هتحبس بسببه.. طبعي هنتفق على اللي هيتنشر. يا مستر مجدي مانت كده هتشيل الل...
قاطعها قائلاً:

-يا غادة.. بلاش استعجال.. ماتنسيش إن انا صاحب الجرنال ومن مصلحتي الحوار ينجح.. أما مش تنجحي انتي واتحبس انا.. يالا بلاش عطلة.

تنهدت بغضب، ونظرت له لثواني، ثم قالت:

-ماشي.. لما نشوف. ثم ضغطت زر التسجيل.

بدأت تتحدث غادة بلهجة احترافية، في محاولة منها لفصل العمل عن علاقة الصداقة التي تجمعها بمجدي:
-حضرتك الصحفي اللي سمى «سفاح الأرقام» بالإسم ده..
مش كده؟

-مضبوط.. هو كان بيستخدم الأرقام في التوقيع على ضحاياه..
كعلامة مميزة له.. فكان منطقي يتسمى كده.

-حضرتك اقترن اسمك بالقاتل ده.. عايزة اعرف السبب؟

-بصراحة الأسباب كتير.. مش عارف أيهم الحقيقي.. يمكن علشان انا اللي سمّيته الاسم اللي اتشهر بيه.. أو يمكن عشان هو بعثلي مرة جواب مكتوب فيه مكان أطفال مخطوفين.. أو عشان كتبت مقالة مرة اعتبرتها النيابة دفاع عنه وتحريض على القتل.. وكمان النيابة اتهمتني إني على

علاقة شخصية بالقاتل.. واتحولت للمحكمة.. واتحكم عليّ مع إيقاف التنفيذ.

كُتبت بعض الملاحظات في كراستها، وأكملت:-
التهمة كانت أيه تحديداً؟؟

-التهمة كانت كثير.. منهم القتل.. والمساعدة على القتل.. وإخفاء معلومات عن المباحث تفيد في القبض على المجرم.. وأخيراً التحريض على القتل.. اتحكم بالبراءة الحمد لله كل التهم.. ما عدا التحريض.. القاضي حكم عليّ مع إيقاف التنفيذ.. ومشووني من الجرنال طبعاً.

-أيه السبب في أن حضرتك تمشي من الجرنال؟

تتهد بغضب مكتوم، ونظر لها بلوم واضح، لأنه لا يفضل الحديث عن هذه المقالة، ولكنه أجاب:

-الحقيقة انا كتبت مقالة.. اعتبرها البعض دفاع عن القاتل.. وتعمدت نزلها المطبعة من ورا مديري المباشر.. علشان كنت عارف إنه هيرفضها.

-وحضرتك كرئيس تحرير دلوقتي.. هتعمل أيه لو حد من الصحفيين عمل كده معاك؟

نظر لها باستغراب لثواني، ثم تذكر إنه من علمها ما تفعل. وهي استراتيجية استفزاز الضيف ليقول ما يحاول إخفاءه، فأجاب بلهجة من قَبْلِ التحدي:

-همشي من عندي.. وهنشر ده في الجرنال علشان المؤسسات التانية ترفض تعينه.

شعرت بغضبه، فقررت أن تهدئ من حدة الحوار، قبل أن تعاود الهجوم، كما علمها. نظرت لملاحظة كانت كتبها منذ ثواني، وقالت:

-حضرتك قلت السفاح بعثلك جواب.. أياه حكاية الجواب دي؟؟

وضح نجاح خطتها على نبرة صوته، التي خرجت أكثر هدوءاً منها في الإجابة السابقة:

-انا جالي جواب في مكتي مرة.. اتسلم بالأيد على باب الجرنال للأمن.. مكتوب عليه اسمي.. لقيت فيه كذا خبر قديم من الجرنال.. عن خطف أطفال.. وورقة مكتوب عليها بالكمبيوتر مكان تواجدهم.. طبعاً بلّغت الشرطة.. واكتشفوا فعلاً وجود الأطفال في المكان ده.. وتاني يوم ظهرت جثة اللي كان بيخطفهم.. مقتولة بطريقة السفاح.. وطبعاً مفيش أي حاجة على الجواب ولا بصمات غير مئي وراجل الأمن.. والجواب ما وصلش الشرطة لحاجة.

-تفتكر ليه اختارك انت يا مستر مجدي؟

-السؤال ده هو اللي يجاوب عليه.. مش انا.. بس أعتقد أن يمكن السبب يكون إن انا اللي سمّيته سفاح الأرقام في مقالاتي.. وكنت سبب شهرته.

-شهرته؟؟ ودي حاجة تبسطه؟؟ القاتل أعتقد يجب إنه يستخبي.. مش يتشهر.. ولا حضرتك تقصد إنه كان بيعاقبك لما بعثلك الجواب.. علشان فضحته.. بإنه يجرّ رجلك معاه؟؟

-لا أبدأ.. هوَّ كان بيكافئني.. بطريقته طبعاً.. كان في دكتور علم نفس كتب مقال مرة في الجرنال عن السفاح.. بعد آخر جرایمه.. كتب في تحليل شخصيته إنه مغرور ويحب الشهرة.. وده اللي دفعه لقتل الضحية التاسعة.. والكلام ده طبعاً من وجهة نظر الدكتور.. عشان كده أعتقد أن السفاح كان مبسوط مني عشان عملته شهرة.. فقرر يكافئني بسبق صحفي.

-ازاي غروره وحبه للشهرة كانوا سبب قتل ضحيته التاسعة؟؟
وليه مش سبب الضحايا الثمانية اللي قبلها؟؟
-الضحية التاسعة ليها حالة خاصة.. ودي لو تلاحظي كانت آخر ضحاياه.. اللي حصل إن المباحث قبضت على مُشْتبه فيه بعد الجريمة الثامنة فعلاً.. واتحجز في القسم بيتحقق معاه.. قام القاتل كنوع من الإنتقام.. والكلام ده حسب رأي الدكتور.. راح قتل زوجة المُتهم ده في بيتها.. كعقاب للظابط اللي قبض على الشخص الغلط.. وانتقام من الشخص ده عشان كان بدأ يخطف منه الشهرة.. وكدليل دامغ إن اللي اتقبض عليه مش هو السفاح.

صمتت عادة بعد تخيلها لبشاعة الجريمة، برغم من علمها بأنه قاتل، ولكن تلك الجريمة كان وقعها عليها مُختلفاً، شعرت بغضب مكتوب يتصاعد داخلها، فنظرت لكراستها وبعد ثواني تمكنت من مواصلة الحوار، ولكن خرج صوتها

يحمل لهجة غضب واضحة:

-حضرتك قلت إن مقالتك شافها «البعض» دفاع عن القاتل..
مضبوط؟؟ قالتها وأشارت بأصابعها بعلامات الإقتباس.
-مضبوط.. لكن الحقيق....

بدون تفكير قاطعته بحدة، وكأنه لم يكن يتحدث، واندفعت
بسؤالها التالي:

-مش مُتفق معايا يا فندم أن المقالة أي حد يقرأها هيشوف
فيها دفاع عن المُجرم.. أي حد مش بس «البعض».. وجريمة
زي الأخيرة اللي حضرتك شرحتها دي مايرتكبهاش غير حيوان
بصراحة.. مش حد يتقال فيه جملة زي اللي حضرتك قولتها
في مقالك.

وقلبت الورقة التي أمامها، وقرأت من نسخة لمقالته:
«سيكرهه البعض، ويحبه آخرون. سيكون بطل في نظر البعض،
وخارج عن القانون في نظر غيرهم. سيوافق أحدهم على
مايفعله ويختلف على طريقة التنفيذ، سيوافق غيره على كل
شئ، وسيرفض غيرهم كل شئ.

ولهذا سيبقى في المنطقة الرمادية، شئتم أم أبيتم.»
سؤالي لحضرتك هو.. يا ترى حضرتك من البعض اللي بيحبه؟
ولا بيكرهه؟ وتصنيف حضرتك المهني أيه للمقال ده.. غير أنه
دفاع عن قاتل مفيش فيه ذرة إنسانية؟؟

نجح السؤال في استفزازه، فصاح بها، واندفع يتكلم بدون
تفكير:

-أولاً أنا كتبت المقالة دي بعد جريمتة الثامنة.. وارجعي للتاريخ لو مش مصدقة يا سيادة الصحفية.. واضح انك محتاجة تراجعى القضية اللي بتحققى فيها قبل ماتشتغلي عليها.. وواضح كمان أنى استعجلت لما سيبتك تشتغليها.. ثانياً هو لما قتل الضحية التاسعة كان تحت تأثير مرض نفسي.. ضعف.. كلنا عندنا نقطة ضعف.. اللي ضعيف قصاد الشهوة للجنس أو للسلطة أو للفلوس.. وهو نقطة ضعفه الغرور والنرجسية.. مين فينا مايبضعفش قصاد شهواته ومايبغلطش ولو مرة.. غروره عماه.. دفعه لارتكاب غلطة واحدة.. ولو تلاحظي بعدها اختفى.. واضح أن السبب كان ندمه على الغلطة دي.. ثالثاً كل اللي قتلهم قبل مقالتي الأخيرة عنه كانوا يستحقوا القتل.. لكن نظامنا الأعرج كان عاجز يرجع الحقوق لاصحابها.. ومحدث كان عنده الشجاعة يجيب حق الناس غيره.

كان صوت مجدي يعلو دون وعي منه، وملامحه تنطق بالغضب، ثم خبط بيده على مكتبه بقوة، وقال:
-طالما اللي المفروض يجيب حق الناس عاجز سواء عن قلة حيلة أو تواطوء.. ماتزعلوش بقى من اللي ياخذ حقه بدراعه.

ساد المكتب صمت ثقيل لدقائق، و كانت غادة غير قادرة على النطق، متسعة العينان، ناظرة لمجدي وكأنه شخص

غريب لا تعرفه، مأخوذة من ثورة غضبه الشديدة، الذي برغم عملها معه لسنوات طويلة لم ترى مثلها منه من قبل لأي سبب، وكانت شبه نادمة على استفزازه. كان مجدي ناظراً لها بنفس نظرة الغضب التي أنهى بها إجابته في الدفاع عن القاتل، وكأنه لم يفيق بعد من نوبة صرع مفاجئة أصابته.

قطع مجدي حالة الصمت، بصوت حاول أن يخفي منه انفعاله وبقياء غضب أفقده السيطرة على نفسه:
-عندك اسئلة تاني يا غادة؟؟

تنحنحت حتى يخرج صوتها واثقاً، صحيحاً، ولكنه خرج مبوحاً:

-اللا. فسكتت ونظرت للكراسة حيث يقبع آخر سؤال كانت أعدته لطرحة في نهاية اللقاء، قرأته سراً (ما ردك على الإشاعات التي انطلقت وقتها إنك انت شخصياً السفاح؟) ثم نقلت عينيها بين السؤال وبين مجدي، الذي كان ينظر لها، وهو في حالة سكون خادعة، كبركان على وشك الانفجار فجأة، وقالت بصوت مبوح:
-لا خلاص يا مستر مجدي.

رد بصوت جامد:

-طب بعد أذنك سيبيني دلوقتي.

استغرقت ثانيتين حتى استوعبت ما قال، فقامت ووضعت

كل أغراضها داخل حقيبتها الجلدية، دون عناية أو ترتيب، وغادرت المكتب.

تابعها هو بنظره حتى غابت، فأراح ظهره على كُرسيه، وأسند مرفقه اليمين على المسند الجانبي، وأمسك جبهته بيده اليمنى، وكأنه نادماً على ما قال. ثم قام ووقف أمام خزانة متوسطة الحجم بجوار مكتبه، أدخل أرقامها السرية وفتحها وأخرج من قاعها مظروف أصفر كبير يبدو عليه القِدَم، أمسكه برفق بكلتا يديه وكأنه يحمل مولود حديث الولادة. وضعه أمامه على المكتب وجلس، ثم نظر للمظروف نظرة من يتذكر ذكريات قديمة. فتحه وأخرج منه ملف يحوي العديد من الأوراق. كان المظروف الكبير مكتوب عليه من الخارج «جرائمى».

جلست عادة على مكتبها، متسارعة الأنفاس غير قادرة على التركيز، كمن خرج لتوّه من عملية جراحية و لا يزال عقله تحت تأثير المخدر. فتحت حقيبتها وأخرجت منها الكراسية التي أعدت بها أسئلتها ووضعتها أمامها. بعد دقائق من السكون تحركت بسرعة من اتخذ قرار ويحاول تنفيذه قبل أن يتردد ويغيّره، أخرجت هاتفها من الحقيبة، واختارت رقم عصام ناجي وتطلعت له لشواني، ثم تشجعت وضغطت زر الاتصال، وانتظرت لشواني ولكنها تراجع وأغلقت الخط.

oboiikan.com

ليل السبت ١٤ ديسمبر سنة ٢٠١٣

ضغط عصام زر استدعاء حسين، الذي دخل مُسرِعاً، فيقول
عصام:

-اعملي كوباية قهوة يا حسين.. مش فنجان.. كوباية.. سادة..
بن زيادة شوية.

قال حسين:

-تشرب حاجة يا رامي بيه.

فقال رامي دون أن ينظر له:

-زي عصام بيه.

غادر حسين ويغلق الباب. ينظر عصام لرامي وقال:

-عايزين نقسم القضية جزئين.. اللي نعرفه.. واللي مانعرفوش

وعايزين نعرفه.

فأوما رامي برأسه إيجاباً، وقال:

-نبتدي باللي نعرفه.

فقام عصام من خلف مكتبه، وجلس في مواجهة رامى، وقال:
-عايزين نجمع اكبر قدر من المعلومات عن داليا وتذاكر..
علشان نقدر نعرف أيه علاقة أي حد فيهم بالسفاح.. ونحاول
نعرف المصيبة اللي عملها تذاكر في التاريخ اللي اتكتب له.
نظر رامى لعصام بغير فهم، وقال:

-ماحنا قلنا السفاح مش على علاقة بضحاياه.
-مضبوط.. بس أكيد قدر يعرف معلومة من وسيلة خاصة..
لو لقينا المصيبة ومشينا وراها.. ممكن نوصل لحاجة.. صح؟
حاول رامى أن يجيب سؤال عصام، ولكنه عَجَز، فأكمل
عصام:

-أكيد يعرف حد يعرف حد فيهم.. أو اكتشف حاجة بطريقة
معينة ولما حقق فيها وصل لتذاكر.. وده معناه إن احنا لو
مشينا نفس خطواته.. ممكن نلاقيه.. ماهو أكيد مش بيشم
على ظهر أيده يعني.

فتح حسين الباب بعد طرقتين، ووضع القهوة أمامهم وغادر.
تناول عصام كوب القهوة الخاص به، وبدأ يحتسيها، ثم
تركها فجأة، وقال:

-طب نبتدي بالتليفونات.. هاتلي فاتورة تفصيلية عن أرقام
داليا وتذاكر للشهر اللي فات.. ونشوف هنوصل لأيه.
كتب رامى أرقام كل من داليا وتذاكر على تليفونه المحمول،

ثم نظر في ساعته وقال:

-في حاجة ثانية محتاجينها لحد بكرة؟

أدرك عصام أن الوقت قد تأخر، فقال:

-لا خلاص يا رامي.. بس ياريت الفواتير دي تكون معاك الصبح وانت جاي.

-حاضر. قالها رامي وغادر ليُجهز الخطابات المطلوبة لتقديمها لشركات المحمول.

جلس عصام خلف مكتبه، وحاول الاتصال بشريف، فوجد الهاتف مُغلق، فقام والتقط ستزته، وغادر المكتب.

وقف عصام ينظر للنيل في سكون، في نفس مكانه، على كوبري قصر النيل، وفي يده الكوب الحافظ للحرارة، يستمع لصوت مُنير في أذنيه، بعد تكرار روتينه الذي لا يملّه. حتى شعر بأحد يقف إلى جواره ينظر له في ثبات، فرفع عينه عن النيل، وأدار رأسه تجاهه، ليجد حسن الشريف بجواره، ينظر إليه مُبتسماً. شعر للحظة إنه رآه من قبل أو إنه يُذكره بشخص يعرفه. فنظر عصام حوله، ليتأكد من أن حسن يتسم له هو شخصياً، ولما تأكد من هذا، رفع يده وأخرج السماعة اليمنى من أذنه، واعتدل ليووجه حسن، الذي قال قبل عصام:

-عمر خيرت؟ ولا مُنير؟ وهو يُشير ناحية السماعة.

فابتسم عصام، وقال بسخرية:

-لا تأمر.

واجه حسن سور النيل، وسند مرفقيه على السور، وهو
ينظر لعصام وقال بإبتسامة مُتحديّة:

-لا.. عمر خيرت أو مُنير.

فقال عصام بجديّة:

-تراهن؟

نظر له حسن لثواني، ثم أخرج مفتاح سيارته من جيبه،
ورفعه في الهواء أمام عصام ليراه، ويعلم إنها تساوي الكثير،
وقال:

-عربيتي لعربيتك.

حافظ عصام على ملامحه الجامدة لثواني، ليرى إن كان سيتراجع
حسن أم لا، ولكن بعد تأكده من جديّة الأخير، واجه السور
مثله، وأسند مرفقيه عليه، ونظر لحسن بإعجاب، وقال:
-مُنير.

فابتسم حسن ونظر للنيل، فقال لعصام وهو مازال ينظر له:

-تراهن على الأغنية؟

فضحك حسن ضحكة سريعة، ونظر لعصام، وقال:

-بس المرة دي.. هحتاج مُساعدة.

-ازاي؟

نظر حسن للنيل وفكر لثواني، ثم نظر لعصام وقال:

-انا اسأل.. وانت تجاوب.. ونشوف هحتاج كام سؤال علشان

اعرف الغنوة.. وليك مقابل كل سؤال مني.. سؤال أجابوك عليه بصراحة.. مهما كان.

فكر عصام لثواني، وقال بلهجة مُتحدية:

-ولو ماعرفتهاش؟

-لا هعرفها.

-ولو ماعرفتهاش؟؟

فأخرج حسن مفتاح سيارته مرة أخرى وناول له لعصام. الذي ضحك بإستمتاع، وقال:

-اتفضل اسأل.

فاعتدل حسن ليواجه عصام، ونظر في عينيه مباشرة، وكأنه يستنطقها لإخباره، وقال:

-الأغنية دي دايماً اللي بتسمعها كل ماتيجي هنا؟ يعني مرتبطة بالوقفه دي؟ ولا هما كذا أغنية بتبدل فيهم مُنير؟

-مابسمعش غيرها وانا واقف هنا.

فابتسم حسن، ثم فكر ثواني، وقال:

-نزلت قبل سنة ٢٠٠٠؟ ولا بعدها؟

-قبلها.

فاعتدل حسن ليواجه السور والنيل، وهو ينظر لعصام ليرى وقع جملته القادمة عليه، وقال بثقة:

-الطول واللون والحُريرة.

سقط فك عصام الأسفل، واتسعت عيناه على آخرهما، وصمت لدقيقة كاملة، ثم قال مبهوراً:

-لا مش منطقي.

ثم اعتدل ليووجه السور، واسند مرفقيه عليه، وهو ينظر لحسن، الذي كان وجهه يحمل ابتسامة المنتصرين، وقال:
-لا عايز افهم.. عرفت ازاي؟؟

أدار حسن رأسه في اتجاه عصام، وقال:

-حظي حلو.. هما ٤ أغاني الي خمّنت انهم مرتبطين معاك بالمكان ده.. ٢ قبل ٢٠٠٠ وهما «برة الشبابيك» و «الطول واللون والحرية».. و ٢ بعد ٢٠٠٠ وهما «علشان يشبهلك» و «ولا بيوصل».. ولما عرفت إنها قبل ٢٠٠٠ قلت اجرب «الطول واللون والحرية» ولو كنت قلت لا.. كنت هقول «برة الشبابيك».. حظي حلو إنها طلعت صح من أول مرة.

انهى كلامه وأعاد رأسه في اتجاه النيل، على عكس عصام، الذي بقى لدقيقة كاملة ناظراً لحسن بانبهار لم يحاول إخفائه. حتى قطع حسن الصمت:

-كده ناقصلك سؤال في ذمّتي.

فأفاق عصام من انبهاره، وقال:

-لا انت جاوبت بعد سؤالين.

-مضبوط.. بس انت سألت عرفت ازاي.. كده اتخضم منهم سؤال.

فهزّ عصام رأسه متفهماً، واعتدل ليقف بجوار حسن، ونظر للنيل. بعد دقيقتان من الصمت، ضحك عصام ضحكة

سريعة، ولكن بصوت مسموع، ونظر لحسن، ثم نظر للنيل
مُجدداً. فابتسم حسن وقال:

-طب وانا ماليش نفس اضحك؟

-لا مفيش.. بس عجبتي حركة الأغنية دي بصراحة.

وبعد دقيقة من الصمت، أشار حسن لأحد المراكب الفخمة،
التي ترسو على شاطئ النيل، ناحية اليسار، وقال:

-لما بشوف المنظر ده مش بلاقي مصر فيه.

ثم أشار لمركب صغيرة خشبية، تمر من تحتهم، ينطلق
منها صوت أغاني، أشبه بصوت المعارك التي تدور في الأحياء
الشعبية، وقال:

-ولما بشوف المنظر ده.. برضه مش بلاقي مصر فيه.

ثم نظر لعصام، وقال:

-هي مصر راحت مننا فين؟

لم يتوقع عصام مثل هذا السؤال، ففكر لثواني، ثم قال:

-في صوت مُنير.

نظر حسن أمامه، وهزَّ رأسه موافقاً، وقال:

-هو ده اللي باقي منك يا مصر.

فقال عصام:

-وانت؟ بتلاقي مصر فين؟

تتهَّد حسن ونظر للنيل، وكأنه يستجديه ليساعده على إجابة
السؤال، ثم قال دون أن ينظر لعصام:

-مش لاقِيها.. وفقدت الأمل من زمان.. وبطلت أدور.. مش

باقي منها غير شوية ذكريات شايلها عنها.

بعد دقيقة من الصمت مرّ من خلفهم رجل فقير الهيئة
عزيز النفس وكان يحدث نفسه بصوت ملئ بالحُزن، تذكر
عصام بمجرد أن سمعه أنه قابله منذ ليلتين في نفس المكان،
وكان يتحدث بنفس الصوت. نظر له الرجل وكأنه يعرفه،
وقال وهو يشير لهم:

في الزمن ده الباشا لازم يكون بيهزّ..
يطلع برجله فوق رقاب الناس ويركب بينز..
ولا فيه تلاقي أيد بتسند ظهر..
صاحب حقيقي في الزمن ده كنز..

صمت لثنائي ثم نظر لأحد المراكب التي تخرج منها صوت
أغاني أشبه بصوت موتور جرار زراعي غير صالح للعمل،
وقال وهو يشير له:

ولا حد سامع صوت بُكاياء.. ضايع في وسط الخبط..
ولما بسأل مين معايا..
يلبّي ندايا الصمت..
أغاني مجنونة.. وأخلاقنا مدفونة.. عرفوا يسوقونا..
ويجيّبوا راسنا لتحت..

وشوّح بيده في اتجاه النيل، وظهر الإشمئزاز على ملامحه،

وتركهم وغادر مُستنداً إلى عصاه الضعيفة، فاستبطأه حسن
وسار بجواره وسأله:

-اسمك أيه يا راجل يا طيب؟

نظر الرجل لحسن بلامحه الطيبة قمحية اللون المليئة
بالتجاعيد، ووضع يده على كتف حسن وكأنه يترك له
وصيته، وابتسم وقال:

الأسامي كثير والأصل مش فاكره..

بس المهم تاريخينا، وده انا مذاكره..

لكن من اللي بشوفه خايف يتوه مني..

ويسألوني عليه ماقدرش افكره..

ثم ربّت على كتف حسن بؤد وابتسم له ابتسامة تحمل
كل طيبة الدنيا وسار متمهلاً كعادته. تابعه حسن بنظره
حتى ابتعد، وهمّ بالعودة لعصام ولكنه وجدّه إلى جانبه
ينظر للرجل نظرة طالب لأستاذه الذي يحبه. فقال حسن
وهو يتسم دون أن يرفع نظره عن الرجل الذي كان لا يزال
يحدث نفسه وهو يسير:

-أيه الراجل ده؟؟

قال عصام بصوت لا يقل انبهاراً عن صوت حسن:

-مش عارف.

-مصر لسة موجودة في الناس اللي زي دي.

خيّم الصمت عليهم لدقائق، ثم نظر عصام في الساعة، واعتدل ليوواجه حسن، الذي اعتدل بدوره ليوواجهه، مدّ عصام يده، وقال:
-انا...

فقاطععه حسن، وهو يمدّ يده ليُسلم عليه، وقال:
-عصام ناجي.. رئيس مباحث قسم حدايق القبة.. وانا حسن الشريف.. مهندس بتترول متقاعد.. لو في حاجة اسمها كده. عقد عصام حاجبيه، ونظر في لحسن بشك، وسأله:
-انت تعرفني؟

-دي حكاية طويلة.. تعالى نتمشى. قالها ودار ليسير في اتجاه التحرير، وعصام بجواره، صامت، ينتظر إجابته، فقال حسن:
-انا حسن الشريف.. زوج نادية عبد الرحيم.. الضحية الأخيرة للسفاح الي بتدور عليه. نظر له عصام نظرة تعاطف لثواني، وما لبثت أن تحوّلت لشك، وقال:

-وطبعاً مُقابلتنا دي مش صُدفة. لا.. انا فعلاً كنت محتاج اتعرف عليك.. وماحبتش اكذب.. ده غير إن انت أذكي من إني أصيح عليك.. طالع لعمك الله يرحمه.

تذكر عصام أن هذا الرجل كان المُشتبه به الذي قبض عليه عمه، وتسبب هذا الاشتباه في مقتل زوجته، فقال:
-عمي الله يرحمه كان بيعمل شغله.. وفضل لحد ما...

قاطعہ حسن قائلًا:

-مش محتاج تبرر حاجة يا عصام.. عمك كان واحد من الناس اللي اتشرفت بمعرفتهم.. وطبعاً مالوش ذنب في اللي حصل لنادية.. ولمعلوماتك.. هو جالي بعد وفاتها بشهرين.. واعتذرتلي.. مع أنه مكانش فيه داعي للإعتذار.. هو مكانش بيعمل غير اللي أي راجل شريف في مكانه كان هيعمله.

-انا برضه مش فاهم.. انت أيه اللي جابك في سكتي؟؟

قال حسن وهو ينظر لعصام:

-الحقيقة من غير لف ودوران.. إني بدور على اللي قتل تذاكر زيّك بالظبط.. ومفيش حاجة هتعملها أو هتقولها ممكن تمنعني من إني أحاول أمسكه.

نظر عصام لعينيه مباشرة، وسأله:

-انت اللي عايز تمسكه؟؟ ولا عايزه يتقبض عليه يعني؟

-لا يا عصام.. انا مش عايز أنتقم منه بأيدي.. انا مش طفل بسعى لانتقام ساذج.. انا عايزه يتقبض عليه.. ولو وصلت له قبلك.. هتكون انت أول حد يعرف.

قال عصام وهو يبتسم بسخرية:

-مش شايف إنها صعبة شوية دي.. لوحدك توصله قبلي وانا

معايا فريق بحث.. وموارد أكثر منك مليون مرة؟

-الكلام ده مظبوط في أي دولة في العالم.. في مصر الموضوع

مختلف.. الناس بترتاح في الكلام مع المدنيين أكثر بكتير من

الحكومة.. ده غير إن انا الناس بتثق فيّ بسرعة.

ابتسم عصام، وقال:

-د صحيح.. بس انا برضه مش فاهم.. انت عايز مني أيه؟؟

-مش عايز حاجة.. انا بس عايز أساعدك تمسكه.

-سامحني انا مش محتاج مساعدة.

-مش يمكن أوصل لحاجة قبلك؟؟ حظ مُبتدئين.

-ماعتقدش ده ممكن يحصل.

فقال حسن مُستسلماً:

-خلاص.. براحتك.. مش هساعدك.. بس ده مش معناه إني

مش مبسوط عشان إتعرفت عليك.

-وانا كمان مبسوط.. طب وانت عرفت منين إني هكون هنا؟

-انا كنت جايلك القسم.. ولما وصلت عند القسم شوفتك

خارج.. مشيت وراك لحد هنا.

قال عصام وهو يفتح باب سيارته، حيث كانا قد وصلا

لساحة الإنتظار، التي لم يكن بها سوى سيارته وسيارة حسن،

لتأخر الوقت:

-عموماً يا حسن.. انا إرتحت في الكلام معاك.. وتشرفني

معرفتك.. بس سيب موضوع القضية ده في حاله.. محدش

يضمن رد فعل مجرم زي ده أيه لو عرف إنك بتدور عليه.

-وانا عندي أيه أخاف عليه منه يا عصام؟ سيبها على الله..

دي ثمرة تليفوني.. لو جيت هنا وحسيت إنك محتاج حد

تتكلم معاه.. هكون سعيد لو اتصلت بيا. وأعطاه رقم

هاتفه المحمول، وسلّم عليه، ودار لیتجه لسيارته.

فتح عصام باب سيارته، ووقف ينظر لحسن، الذي التفت إليه، وقال:

-مش هتسألني السؤال الثاني اللي ليك عندي؟؟
ابتسم عصام، وفكر لثواني ثم قال:
-مش النهاردة.. بيقالي.

oboiikan.com

الأحد ١٥ ديسمبر ٢٠١٣

يقف حسن بجوار أحد الأعمدة المُغلّفة بالرُخام بُني اللون، ينظر لبوابة مشرحة زينهم المُغطاه تقريباً بشعارات وأسماء شباب مرّوا من هنا في طريقهم لثواهم الأخير. چيكا والجندي ومينا وغيرهم كُثُر، كتب ورسم رُفقاءهم أسماءهم، وكأنهم فراعنة يُخلّدون ذكرى ملوكهم. وإن كانت ذكراهم أوهن من أن تصمّد في مواجهة الزمن.

يخرُج أحد عُمال المشرحة، يحمل في يده مظروف أبيض كبير، ويتوجه لحسن ويناوله المظروف. فتحه حسن، ونظر على الأوراق بداخله، نظرة سريعة دون أن يُخرجها منه. ثم مدّ يده للعامل «بالمكافأة» المُتفق عليها سلفاً. أخذ العامل النقود، ونظر لها سريعاً وهي في طريقها لجيبه، ليتأكد من

المبلغ، وقال:

-ماشي يا بيه.. لو احتجت أي حاجة تانية انا في الخدمة.

-انا محتاج حاجة تانية.. ومستعد ادفع فيها ضعف اللي خدته.. بس مش عارف هتقدر عليها ولا هتخاف.

ردّ العامل طمعاً في المكافأة التي تقارب مرتبه الشهري:

-عيب عليك يا باشا.. نخاف مين بس.. تحب تاخذ جثة على

بعضها؟؟ قالها وهو يبتسم بفخر لأنه يمتلك «قلب ميت»

-لا.. انا مش عايز الجثة تخرج.. انا عايز انا أدخل.. محتاج

أشوفهم ٥ دقائق بالعدد.

-غالي يا باشا والطلب رخيص.. بس مش بالنهار.. ولا هتخاف

تدخل هنا بالليل.

ابتسم حسن، وقال:

-لا ماتقلقش عليّ.. تليفوني معاك.. هينفع الليلة دي؟

-ياذن الله.. هكلمك أقولك تيجي.

ركب حسن سيارته، واتجه لقهوته المفضلة في منطقة الظاهر،

طلب قهوة وأخرج من المظروف تقارير الطب الشرعي

الخاصة بتشريح جثة كل من داليا وتذاكر. وبدأ يفحصها

سريعاً، وكأنه يبحث عن معلومة مُحددة.

بعد أقل من دقيقة أخرج قلم أحمر من حقيبة صغيرة

ورسم دائرة حمراء حول أحد السطور في تقرير داليا وهكذا

فعل في تقرير تذاكر. ثم أخرج هاتفه المحمول والتقط صورة

لهما معاً، ثم دفع حسابه وغادر القهوة في اتجاه المنصورة.

وصلت غادة لمكتبها في الجريدة لتجد ورقة على شاشة جهاز الكمبيوتر الخاص بها تُخبرها أن تذهب لرؤية رئيس التحرير بمُجرد وصولها. جلست غادة تنظر للورقة وكأنها تُعاتبها على وجودها. تنهدت بعمق في محاولة يائسة لطرد التوتر من داخلها لتبدو طبيعية.

رفع مجدي عينه ليجد غادة أمامه بعد أن وجدت باب المكتب مفتوحاً، فقال دون مُقدمات:

-وصلنا لفين في تحقيقك يا غادة؟؟ مفيش جديد؟؟

قالت بطريقة رسمية وبصوت متوتر:

-لسة شغالة عليه يا مستر مجدي.. كان عندي امبارح كذا حاجة ما عرفتش أركز.. بس هحاول أخلص حاجة النهاردة.. وأجيبها تقول رأيك فيها.

-ماشي.. ياريت مش أكثر من كده.. علشان عايزين نشتغل على القضية وهي لسة سُخنة قبل ما تتنسي.

-حاضر يا فندم.

وهمّت بمغادرة المكتب، ولكنه قال:

-ثواني.. لما اخلص كلامي.. ولو فيه أي شغل تاني بتفكري فيه بخصوص القضية.. ياريت أسمع منك.

حاولت قدر إمكانها، أن تمنع صوتها من الإرتعاش، غضباً وتوتراً، لأنه لم يتحدث إليها أبداً بهذا الأسلوب الرسمي من

قبل:

-مفيش حاجة في دماغي لسة.. بس لو فكّرت في حاجة
هكلم حضرتك على طول.
-ماشي.. مش هعطلك.

وصل عصام مكتبه ليجد الرائد هادي والنقيب هشام في
انتظاره في مكتبه يشربان القهوة، وأمامهما عدة ملفات.
-صباح الخير يا هادي بيه.. أزيك يا هشام؟ أيه الجديد؟
قال هادي وهو يبتسم بسخرية:

-احنا شغالين على القديم يا عصام بيه.. الجديد عندك انت..
مش عارفين نوصل لعلاقة بين السفاح وأي قتيل.. ده حتى في
واحد من اللي اتقتلوا كان في أبو قير.. فعلاً حكاية غريبة.
قال عصام وهو يجلس خلف مكتبه:

-بالظبط.. اعتقد دي اصعب حاجة في القضية.. إنك تقدر
تلاقي العلاقة.. ولو لقيتها.. هتلاقي القاتل في ثواني.. بخصوص
الجديد.. انا مستني رامي بفواتير التليفونات التفصيلية لداليا
وتذاكر.. يمكن نلاقي بينهم علاقة.. أو نقدر نربطهم بشخص
تالت.. ونشتبه فيه.

قال هشام:

-القضية دي مش هتتحل على فكرة.. انا متشائم.

قال هادي:

-كده تبقى مش هتتحل.. يا أخي بقولك خليك متفائل

وخَلِّيْ عندك ثقة في ربنا وفي نفسك.

قام هادي من مكانه، وأكمل:

-عموماً احنا بنفحص ملفات القضية.. وهندور على أهالي الناس الي اتقتلت.. ونحاول نربطهم ببعض.. دعواتك يا عصام بيه.

قام عصام، ودار حول مكتبه، ومدّ يده لهادي وقال:

-ما بلاش بيه دي بقى.. القضية شكلها مطوّلة.. وانا زهقت منها بصراحة.. ربنا معاكم.. وأي جديد هنتقابل ونفكر فيه سوا.

-ماشي كلامك يا عصام.. ربنا معاك.

يصل حسن لمنزله بعد رحلة مُهلِكة للغاية. قبل أن يفتح باب شقته وجد ورقة تنتظره محشورة بين الباب وإطاره، التقطها وفضّها ليجد بها الجملة «برجاء الإتصالبغادةعثمانجريدةالملاحامصرية...» ومزيلة برقم هاتفها المحمول.

دلف لشقته، وتوجه مباشرة للغرفة الصغيرة التي لا يدخلها غيره. أضاء النور وأمسك القلم الأسود، وتوجه للوحة التي تحتل حائطاً كاملاً في الغرفة، مسح علامات الإستفهام من أمام اسم غادة وكتب رقم هاتفها، ثم أعاد كتابة علامات الإستفهام مُجدداً بجواره. مرّت دقيقتان، وهو غارق في

التفكير، في محاولة لتوقع ماذا تريد منه هذه الصحفية، وأي ربح حملتها لطريقه، قبل أن يحاول هو التواصل معها. أفاق من أفكاره مُتذكراً المعلومات الجديدة التي حصل عليها من المنصورة والتي كان واثقاً من عدم علم عصام بها على الأقل حتى الآن. لأنه يعتمد على أسلوب الداخلية في توزيع المهام، الذي طالما عرف حسن إنه غير فعال. إذا أردت أن تُنجز شيئاً، فعليك أن تقوم به بنفسك. هكذا اعتاد أن يقول لنفسه، ولزملاءه في العمل.

توجه للوحة مُجدداً، وبدأ يكتب المعلومات التي تحصّل عليها، بعد زيارة أكثر من خمسة بيوت، والتحدث لأكثر من رب أسرة مُتشكك:

داليا سافرت القاهرة في أغسطس ونزلت عند هبة صاحبها من الجامعة

هبة بتشتغل في مستشفى التكامل وجابت شغل لداليا في مستشفى الكرامة

هبة سابت الشغل ورجعت البلد فجأة بدون سبب في أول ديسمبر

٨ ديسمبر هبة اختفت واكتشفوا جثتها بعد يومين غرقانة في النيل ورفض أهلها تشريحها

٩ ديسمبر انتقلت داليا

ترك حسن القلم وعاد للوراء قليلاً، وجلس على المقعد الوحيد في الغرفة، وغرق في تفكير عميق.

قطع رنين هاتف حسن المحمول حالة التفكير العميق التي غرق فيها، لدرجة إنه نظر لهاتفه المحمول بإستغراب شديد لثواني وكأنه مسافر عبر الزمن ولا يعرف ما هذا الشئ الذي يزعجه. وفجأة أدرك أن عليه الرد، فمد يده سريعاً للهاتف، كمن يستيقظ من غفوة جاءت في غير موعدها فجأة:
-ألو.

-شكلي صحيتك من النوم.. عصام ناجي معاك.

-لا يا عصام مش نايم.. انا بس ساكت بقالي كتير.

-طب وراك حاجة الليلة دي؟

-لا خالص.. ولا بعمل أي حاجة.

-طب ماتيجي نتقابل على الكوبري.

-تمام.. مسافة السكة.♦

أخلت غادة جزء كبير من الحائط المواجه لمكتبها التي اعتادت أن تُذاكر عليه منذ أن كانت في المدرسة، وبدأت تُعلّق عليه مقالات تُخصّ جرائم «سفاح الأرقام». كان المكتب مُزدحمًا بالمقالات والتحقيقات التي جمعتها على مدى الساعات القليلة الماضية. تقوم هي بالتقاط المقالات، تلقي عليها نظرة سريعة، ثم تُثبّتها على الحائط في ترتيبها

الزمني دون كلل كالنملة.

انتفضت فجأة عندما رنّ هاتفها المحمول، وسقطت بعض المقالات منها أرضاً، نظرت للهاتف ولكنه نقل لها رقماً غير مُسجل في قائمة الأسماء، فردّت:

-ألو.

-ألو.. مساء الخير.. حسن الشريف معايكي.. كنتي سييتي مُمرتك على باب شقتي.

اعتدلت فجأة وبدأت تسير في الغرفة في علامة واضحة على التوتر، وقالت بصوت فضحه التوتر:

-أيوة يا فندم.. متشكرة إنك اتصلت.. وبعذر على إزعاجك.. أقدر أخذ من وقتك دقايق؟؟

-اتفضلي.

-شكراً قوي.. حضرتك انا غادة من جر... صمتت، واستمعت لمقاطعة حسن:

-جرنال الملامح المصرية.. عارف.

-بالظبط.. حضرتك لو مفيهاش مشكلة عندك.. انا عارفة إنه موضوع حساس.. بس كنت محتاجة اعمل مع حضرتك

Interview.. حضرتك عارف أن الس... صمتت مُجدداً لمقاطعته:

-مفيش أي مانع.. تحبي نتقابل إمتي؟

-بكرة لو يناسب حضرتك.

-كلميني أي وقت.. وممكن نشرب قهوة في النادي جنب البيت عندي.

-متشكرة جداً.. هكلم حضرتك الصبح وانا جاية.. مع السلامة.

أغلقت الخط، ونظرت للهاتف بسعادة غامرة لثواني، ثم بدأت تكمل عملها بنشاط جدده اعتدال المزاج ولو قليلاً.

يقود حسن سيارته بتمهل، وزجاج سيارته مُغلق في محاولة منه لتهيئة الجو ليصفو ذهنه، ويستطيع التفكير. يحاول أن يصل لحل اللغز الذي هو بصدده. يرنّ هاتفه المحمول، بصوت هادئ بالكاد مسموع، ينظر للهاتف ليجد رقم عامل المشرحة على الشاشة:
-ألو.

-جاهز يا باشا؟؟

ينظر في ساعته، ويفكر لثواني، ثم يقول:
-ماشى.. هجيلك حالاً.. مع السلامة.

oboiikan.com

منتصف ليل الإثنين ١٦ ديسمبر ٢٠١٣

يصل حسن لموقف السيارات الذي اعتاد عصام أن يترك فيه سيارته في وسط البلد، ليجد عصام مستنداً لسيارته يُدخن سيجارته وغارقاً في تفكير عميق، لدرجة إنه لم يلاحظ وصول حسن. نزل حسن وتوجه لعصام، الذي ابتسم عندما لمحّه، مدّ يده وسلّم عليه:

-ازيِّك يا حسن؟؟

-كويس.. بس انت مش كويس.. مالك؟؟ القضية معصلة.. صح؟؟

نظر له عصام لثواني، كان يُفكر في مدى صحة التحدث معه بخصوص القضية، ولكنه كان بالفعل يحتاج ليتحدث، شعر حسن بتردّده، فقال باسمًا:
-بلاش كلام عن القضية لو قلقان احلّها قبلك.

تحركاً في اتجاه النيل، وألقى عصام سيجارته، وهو يضحك ويهز رأسه يميناً ويساراً، ثم نظر لحسن وقال:
-تصدق.. لولا إنها أرواح ناس.. كنت راهنتك مين يحلها الأول.. بس مايصحش.
-عندك حق.. مايصحش نتراهن.. بس ده ما يمنعش إني هحلها قبلك .
-يووه.. برضه مش هتستفزني علشان اراهنك.

صمتوا قليلاً ونظر كل منهم أمامه في اتجاه النيل، البادي عليه انعكاس الأضواء التي تضيء البر المقابل، خلف السور الحديدي الأسود، وهم يعبرون الشارع في اتجاهه، ثم سارا بمحاذاة السور في اتجاه كوبري قصر النيل. ثم قال عصام فجأة بصوت عالي نسبياً، كمن كان يجاهد لمنع الكلام، ثم انهارت مقاومته:

-مفيش أي رابط بين داليا وتذاكر.. تليفوناتهم مالهاش أي علاقة ببعض.. مش عارف حتى إبدأ منين.
نظر له حسن لثواني، ثم نظر أمامه، وبقى صامتاً، فقال عصام:

-أكيد في طريقة.. غلطة.. بس لسة مش قادر اكتشفها. قالها ونظر لحسن الذي بقي صامتاً كالصنم، وقال:
-انت جاي تسمع بس؟؟

ابتسم حسن، ونظر له وقال:

-مش انت قولتلي آخر مرة مش عايز مُساعدة؟؟ انا احترمت ده.. انت شكلك محتاج تتكلم وانا بسمعك.

زفر عصام بضيق، فهو يعلم جيداً إنه لا يجب عليه أن يُشرك مدني في قضية، خاصة عندما تكون كبيرة كتلك التي يتحدث عنها، وخاصة أيضاً أن هذا الشخص أحد أطرافها بشكل أو بآخر، لأنه زوج أحد ضحايا السفاح، حتى وأن كانت الجريمة قد تمت منذ ثمان سنوات. ولكنه كان يرتاح لحسن، ويحتاج لصديق بشدة، منذ أن ترك شريف صديق عمره الخدمة، ويحتاج بشدة لأن يتحدث بصوت عالي عن القضية، ويسمع أفكار جديدة كما علمه عمه.

كانوا قد مرّوا بجوار (الفرشة) التي اعتاد أن يتوقف عندها عصام، ووصلوا عند المكان الذي اعتاد أن يقف فيه عصام في منتصف النيل، أعلى كوبري قصر النيل. قال عصام وهو ينظر للنيل، وكأنه لا يريد أن يرى حسن حاجته للمساعدة في عينيه، بعد فترة صمت طالت:

-انا مش محتاج مساعدة في القضية يا حسن.. انا محتاج حد اتكلم معاه.

قال حسن دون أن ينظر له بدوره:

-عارف.

-عرفت مينين؟

-باين عليك.

صمتوا قليلاً، ثم قطع حسن الصمت قائلاً:

-انت عادة في أي قضية بتبتدي منين؟؟

-دي مش أي قضية يا حسن.. القضية دي مُختلفة.. امتداد

لقضية قديمة.. وانت عارف كده.

-مش يمكن الغلطة أنك بتعاملها وكأنها قضية مُختلفة؟؟

ظهرت ملامح الاهتمام على وجه عصام، اعتدل ونظر لحسن،

الذي كان ينظر للنيل، وقال:

-تقصد أيه؟؟

-انا ماقُصُدش حاجة.. انا بحاول اساعدك تفكر.. بتناقش

معاك.. يمكن توصل لحاجة.. انت الظابط هنا مش انا يا

عصام.. وهو ده بالظبط اللي انت محتاجه.. تفكر بصوت

عالي وترد على نفسك.. هتوصل للحل.

فكّر عصام لدقائق، لم يقطعها سوى صوت الأغاني التي لا

رائحة فيها للفن، والتي أصبحت جُزء لا يتجزأ من الواقع

المصري للأسف. ثم قال:

-أول حاجة بدوّر عليها الدافع.. أيه اللي خلى اللي قتل

يقتل.. وفي حالتنا دي.. أيه الحاجة اللي عاقب عليها السفاح

تذاكر؟؟ وأيّه اللي خلى تذاكر يقتل داليا؟

-صحيح.. أيه اللي يخلي تذاكر يقتل داليا؟؟

مط عصام شفّتيه، وقال بصيغة السؤال:

-محاولة اغتصاب فاشلة مثلاً؟ سرقة؟؟ ماهو عيل بلطجي أصلاً.. وقليل لما يبقى فايق.

-منطقي.. طب وأيه تاني؟؟

قال عصام مُحبطاً:

-ومفيش أي معلومة قادر أوصلها في التاريخ اللي مكتوب على راسه.

فتح حسن فمه ليتحدث، ولكنه سمع صوت العجوز الفقير عزيز النفس قادماً من ناحية التحرير كالعادة يقول:

قالك هنبقى احسن من الغرب بمراحل..

داحنا حدانا في كل حاجة عباقرة وفطاحل..

فينك يا شوقي تقوم من تربتك تسأل؟؟

ازاي هنبني حضارة وأخلاقنا في النازل؟؟

اعتدل كل من حسن وعصام وأسندا ظهريهما للسور وتابعوه بإنصات، فابتسم لهما العجوز لما لاحظ اهتمامهما بكلامه، فهذا قلماً يحدث معه، فقال وهو يُبْطئ السير ليسمعه:

زمان كان اللي يغلط وشه كان يَحْمَر..

ومش بعيد ده من قفاه بزفة كان ينجَر..

دالوقت قولة عيب بقت عيبة وبجاجة..

وفي كل حنة المسخرة ما عاdash منها مَفَر..

قالها وتملّكته رغماً عنه ملامح الإشمئزاز من الحال الذي

وصل له شعبنا، ثم ابتسم ابتسامة جاهد لتبدو صافية،
وأكمل سيره متمهلاً كما اعتاد.

قال حسن وهو يتابعه بنظره:

-الراجل ده اعقل واحد في البلد.

-حكيم.. انا سمّيته عم حكيم.. وبحاول افكر كلامه علشان
كلامه يستحق...

قطع رنين هاتفه المحمول جملته، فمدّ يده والتقطه من
جيب سترته بضيق:
-أيوة.

-أيوة يا عصام بيه.. عندنا بلاغ حالة سرقة بالإكراه في سوبر
ماركت كبير.

نظر لساعته التي كانت تشير للثانية بعد منتصف الليل،
وقال:

-ابعتلي العنوان في رسالة.. هتحرك حالاً.

أغلق الخط، ونظر لحسن مُعتذراً الذي بدا عليه التفهّم.
بدأ حسن يتحرك في اتجاه موقف السيارات، ومعه عصام،
الذي قال بطريقة من وافته فكرة وقرر تنفيذها دون تفكير:

-ماتيجي معايا.. ولا عايز تنام؟؟

نظر له حسن وابتسم:

-لا انا مش عايز انام.. بس مش تقولي معايا فين الأول؟؟

-جرمة سرقة في المنطقة.. تعالى هتبتسط.

ابتسم حسن مُعلنا موافقته على الذهاب مع عصام، الذي ابتسم من قلبه. كان كل منهم يُدرك في تلك اللحظة أن ثمة علاقة صداقة بدأت بالفعل تتكوّن بينهم. فحسن الذي يعيش وحيداً منذ مقتل زوجته، في أشد الحاجة لصديق، وعصام الذي فقد صديقه شريف منذ أن تركه وتوجه للعمل الخاص، وأصبح شبه غريباً عنه، كان أيضاً في أشد الحاجة لصديق.

وصل عصام ومعه حسن للمكان الذي تمت فيه السرقة، كان سوبر ماركت كبير، قد تعرض للسرقة. قدّم عصام رفيقه حسن لزملائه على أنه صديق. بدأ عصام يحقق في أمر السرقة، ومعه حسن الذي كان هادئاً، وإن كان يتابع جيداً كل ما كان يحدث أمامه، وكانت ملامحه يبدو عليها الإنبهار والإستمتاع، وكأنه طفل يذهب لأول مرة مع والده لمكان عمله ليكتشف عالم جديد عليه.

بعد ساعة إلا قليل وبمجرد أن ركب حسن بجوار عصام السيارة، ليقله للموقف في وسط البلد حيث ترك سيارته، سأله عصام:

-ها؟؟ أيه رأيك؟؟

قال حسن وهو يفتح النافذة بجواره:
-الواد شلبي بتاع الأمن هو اللي سهّل سرقة الفلوس.. لناس
تبعه .
نظر له عصام بدهشة عارمة، وانفجر ضاحكاً بصوت عالي،
وقال والضحك يقطع كلامه:
-انا كنت بسألك أيه رأيك في الشغل.. تقوم تقولي مين
الحرامي؟؟ ياعم بالراحة علينا.
ضحك حسن وقال:
-معلش.. والله افتكرتك بتسألني عن القضية.. لا طبعاً كنت
مبسوط وعايز أكررها.
نظر له عصام مُجدداً، وقال بإستغراب:
-هو انت بتتكلم بجد؟؟
-بخصوص أيه؟؟
-إن الحرامي هو بتاع الأمن؟؟
قال حسن بثقة:
-انا متأكد.
نظر عصام أمامه لشواني وكست الجدية ملامحه، ثم نظر
لحسن وقال:
-انا كنت فاكرك بتخمن.. بهزار يعني.. طب ماتقولي ليه
متأكد بقى.. منك نستفيد.

اعتدل حسن، وقال بثقة بلهجة من كان يتوقع السؤال:

-أولاً.. مدير المكان قالك إن الإيداعات بتتعمل كل يوم أحد.. بس الإِسبوع ده الإيداعات اتأخرت علشان كان فيه مظاهرات قاطعة الطريق.. فضّلوا يستنوا لبكرة.. النقطة دي أكدت لي إن في حد من المكان متواطئ.. لأن السرقة لو تلاحظ تمت في أكثر ليلة المحل فيه كاش.. ثانياً.. وانت بتتكلم انا فتحت المواقع على التلفون.. محدش جاب سيرة مظاهرات في الحدايق.. مش معنى كده إنها محصلتش.. بس معنى كده إن حد قالهم عنها.. ولما سألت المدير عرف منين عن المظاهرات.. قال إن شلبي ساكن قريب من البنك وشافها وهو جاي الصبح.. يعني شلبي هو الي عطّل الإيداعات من النهاردة لبكرة.. ثالثاً.. لو لاحظت في حكاية المحاسب وهو بيحكي لك الي حصل.. قالك إن المُلثمين الي سرقوا المحل قالوا احنا هنولع في البلد طول ما الحكم العسكري موجود والإنقلاب والكلام الفارغ ده.. وده مش منطقي أبداً.. وده خلاني افكر أيه الي يخلي واحد حرامي يقول الكلام ده وهو داخل يسرق؟؟ التفسير المنطقي الوحيد إنه يبعد الشك عن حد هيكون في دايرة الشك.. لكن انقلاب مين وعسكر مين الي هيفكر فيهم حرامي جاي يسرق؟؟ رابعاً.. والمحاسب بيحكي طريقة السرقة قال وبعد ما أخذوا الفلوس من الخزنة.. وكانوا مثبتين شلبي والكاشير على الأرض.. واحد منهم ضرب شلبي بظهر السلاح على دماغه فتحها له.. وده برضه مش منطقي.. أيه الي يخليني كحرامي بعد

ماسرقت أفكر أضرب حد.. وماعرفش رد فعله هيكون أيه.. ماهو ممكن ياخدها على كرامته ويقوم يمسك فيّ وتبوظ الشغلانة.. المنطقي إن أول ما أخذ الفلوس.. مش هفكر غير في الهرب.. وده اللي أكد إن حركة ضرب شلبي كان متفق عليها علشان يبعدوا عنه الشك.. بس اتنفذت بغباء.. يمكن نسيوا ومافتكروش إلا وهما خارجين.. وسادساً.. احنا وصلنا خامساً ولا.. خامساً.. مش منطقي أبداً حرامية يدخلوا يسرقوا سوبر ماركت ومايفكروش يسرقوا درج الفلوس بتاع الكاشير.. ماهو ده اللي منطقياً بيكون فيه الفلوس.. إلا لو كانوا عارفين كويس إن الفلوس معظمها في الخزنة.. وكمان محدش ملّح إنهم سألوا على مكان الخزنة.. وأتحدك.. لما تشوف تسجيل كاميرات المراقبة.. هتلاقي الحرامية كانوا عارفين مكان الخزنة قبل ما يدخلوا.. وده برضه يثبت إن العملية فيها حد من المكان.. بس كده.

أنهى حسن كلامه وصمت انتظاراً لرأي عصام في نظريته. ولكن عصام كان في حالة ذهول غير عادية، كان ينظر له وكأنه يرى أمامه كائن خرافي قادماً من عالم آخر. وبعد فترة ليست بالقليلة من الصمت، قال عصام بصوت تملأه الدهشة:

-انت ازاي أخذت بالك من كل ده؟؟ انت ازاي مش ظابط
مباحث؟؟

ضحك حسن وقال:

-على فكرة انا ماخدتش بالي من أي حاجة اكر من الي
انت لاحظتها.. لكن انا عندي موهبة من وانا صغير إني
بعرف اربط كل حاجة ببعض أسرع شوية من الطبيعي..
ماعرفش بيسموها أيه.. قوة ملاحظة.. ولا ذكاء.. ولا عقلية
تحليلية.. بس انا عندي الموهبة دي فعلاً.. بشوف كل حاجة..
وبعرف اترجمها. صمت لثواني ثم أكمل:

-تصدق في الأول كنت بستغرب ازاى مش كل الناس بتلاحظ
الي انا بلاظه من غير مجهود.. بس بعد فترة أدركت إني
مُمَيِّز.

كانت دهشة عصام مازالت مُسيطرَة على ملامحه، وأضيفت
إليها ملامح الإنبهار، لتعلو وجهه ابتسامة إعجاب واضح بذكاء
صديقه الجديد، وأيضاً سعادة لمعرفته. فقال حسن مازحاً:

-أيه ياعم عصام؟؟ مش هتقفل بوقك ده بقى وترُد علي؟؟
أغلق عصام فمه، الذي كان فكه السُفلي -رغمًا عنه- مازال
ساقطاً، وقال:

-لا انت مش طبيعي.

-يعني اقتنعت بكلامي.

فتح عصام عيناه على آخرهما، وقال بدهشة:

-مقتنع؟؟ انت بتهزر؟؟ انت كلامك مسابش نقطة شك
جوايا.. هستنى بكرة الواد يبجي القسم وهخليه يعترف..
قال مقتنع قال.

ثم نظر لحسن، وقال وهو يقف بسيارته بجوار سيارة
حسن:

-الوقت اتأخر.. رُوْح وبكرة لازم نتقابل علشان افهم حكاية
شارلوك هولمز اللي لابسك ده.. ماتيجي اعزمك بكرة على
الغداء في البيت عندي؟؟ وتقابل نشوى ومَلِك.

-بكرة مش ضامن ظروفي.. خلينا على تليفون.. بس أكيد
عايز اتعرف عليهم.

-اتفقنا.

الأربعاء ٢٣ أغسطس سنة ٢٠٠٥

كشاهد قبر، تقبع رسالة الإنتحار على صدر جثة مراهقة،
فوق سريرها، صغيرة السن وإن كانت ملامحها الطفولية
تبدو وكأنها قد شاخت بفعل الحزن المطبوع عليها.
«سامحيني يا أمي.. انا غلطت.. ويارب ابن الحرام اللي في
بطني يسامحني»

oboiikan.com

صباح الثلاثاء ١٧ ديسمبر ٢٠١٣

حسن يقف بجوار سرير صغير، في غرفة تخلو من كل شئ ماعداه والسرير، ينظر لشاب مصلوباً فوق السرير، يدها مُقيدتان في قائمي السرير. وقدماه مقيدتان في بعضها البعض. كانت ملامح الشاب هي نفسها ملامح حسن ولكن زاد عليها الفزع الشديد، كان الضوء خافت شبه مُنعدم. قال حسن -الواقف- بصوت عميق، تردد في الغرفة وكأنه أَلْف صوت: -ماتسألش سؤال انت عارف إجابته.. انت الي قتلت نادية.. وانا مش محتاج دليل.. انا عارف إن كلامي صح.. انا دائماً كلامي صح.

ارتعد الشاب المصلوب بشدة، وحاول بقوة انتزاع يدها من الأربطة القوية التي تُقيدها، فتسببت الأربطة، أو بالأحرى

محاولة خلاصه منها، في جرح معصميه، وتاهت رعدة فزعه وسط محاولاته اليائسة للخلاص.

تحرك حسن ومد يده التي تحمل مشرط جراحة، وقام بقطع شرايين معصم الشاب الأيمن بثقة جرّاح متمرس. كان الفزع بادياً على ملامح الشاب المصلوب، الفزع كان حاضراً في أنفاسه المتسارعة، وتأوهاتة التي يطلقها كلما حاول تخليص يده من قيدها، فيؤلمها، ولا يقترب بها من خلاصها. دار حسن حول السرير، وقطع شرايين معصم الشاب المُقيّد اليُسرى بنفس الثقة والسلاسة. ثم وقف عند قدمي الشاب يشاهد جولة عذابه الأخيرة، في هذه الحياة على الأقل، بإستمتاع سادٍ.

انتفض حسن مفزوعاً من كابوسه المزعج، على صوت رنين هاتفه المُلح، كان يتصبب عرقاً وينهج، وكأنه يحاول ان يحصل على نصيبه من هواء الغرفة قبل أن ينفذ. نظر لهاتفه ليجد رقم هاتف الصحيفة عادة عثمان يُطالبه بالرد الفوري. فتح الخط وقال بصوت مسموع بالكاد:

-أ... لم يخرج صوته في المحاولة الأولى، فحاول مرة أخرى:
-الوو.. أيوة أيوة سامعك.. مع.... ثواني بس اسمعيني.. اديلي
١٠ دقائق بس وهكلمك.. سلام.

ألقى الهاتف بجواره على السرير، واستطاع بعد أكثر من

محاولة أن يقعد على طرف السرير. كان رأسه يؤلمه بشدة، ولا يعرف السبب تحديداً، إن كان بسبب السهر، أم بسبب الكابوس الذي أقلق نومه. أمسك رأسه بكفيه، وأسند مرفقيه على ركبتيه، وتنهّد تنهيدة طويلة، وكأنه يحاول طرد بقايا الكابوس من روحه.

بعد ساعة ونصف، كان حسن يقف أمام باب النادي الذي اعتاد أن يذهب إليه كل صباح، قبل أن يبدأ التحقيق في القضية التي انتزعت من روتين حياته انتزاعاً. يمسك الجريدة اليومية في يده، رنّ هاتفه المحمول برقم غادة، فنظر حوله، فراها قادمة في اتجاهه، جميلة كأحلام اليقظة، لم يرُد على مكالمتها، وتوجه إليها. نظرت له بتساؤل، فابتسم وقال:
-حسن الشريف. ومدّ يده ليصافحها.

ابتسمت، وصافحته، وقالت:

-معلش لو اتأخرت.. أصل الركنة هنا صعبة جداً.
قال هو يفسح لها الطريق لتتقدمه ليدخلوا النادي:

-هنا بس؟

ابتسمت وقالت:

-عندك حق.

جلسا على نفس الطاولة التي اعتاد أن يجلس عليها كل صباح، وبدأت غادة تحضّر للحوار الصحفي، كعادتها، بنفس

خطواتها، وكأنها طقوس مُقدسة. أخرجت المُسجلة ووضعتها أمامها، ثم الكراسة التي تحوي أسئلتها، ثم أقلامها، وحسن يتابعها باسمًا. جاء عم عفت بدون قهوته المعتادة، وسأل: -الهانم تشرب أيه؟

نظرت له غادة بشرود لثواني، بعدما قطع طقسها التي كانت منغمسة فيه بكل حواسها، وقالت بعد أن أدركت الموقف: -قهوة مطبوخة.. بس في كوباية من فضلك.. حبة كتير كده. وابتسمت بود ابتسامة عريضة.

نظر عم عفت لحسن، نظرة ذات مغزى، وقال: -العادي يا حسن بيه؟؟ ولا في جديد النهاردة؟؟
ابتسم حسن عندما أدرك ما يرمي إليه عم عفت بسؤاله، وقال:

-لا مفيش جديد يا عم عفت.. انت عارفي.
ذهب عم عفت، واعتدلت غادة ووضعت قدم فوق الأخرى كعادتها عند بداية أي حوار صحفي، وقالت: -من فضلك انا هسجل الحوار علشان ارجعله في الجرنان وأفرّغه.. يضايقك؟؟

قال حسن، وكأنه لم يسمع سؤالها:
-أيه رأيك في مقالة مجدي كارم النهاردة يا أنسة غادة؟؟
عقدت حاجبيها، فهي لم تتوقع السؤال، وقالت:
-انا ماقررتهاش للأسف.. جيت من البيت على حضرتك على طول.. ليه بتسأل؟؟

-مش عارف.. أصله بي طرح وجهة نظر جديدة خالص.. فكنت عايز أعرف رأيك.. بصفتك المُحققة الي ماسكة القضية في الجرنان.

لم تستطع غادة من كتمان فضولها، فمدّت يدها لهاتفها المحمول، وفتحت صفحة مقالات مجدي كارم، وبدأت تقرأ المقالة.

ليه لأ

بقلم مجدي كارم

منذ ظهور جثة البلطجي في حدائق القبة، وكل وسائل الإعلام، والبرامج المهتمة بالشأن الداخلي، وأكاد أجزم أن الداخلية أيضاً، تتحدث عن «عودة» سفاح الأرقام، الذي أطلقت انا عليه منذ سنوات لقب «سفاح الأرقام». وكأن السفاح كان في أجازة وضع، وعاد بعدها ليكمل ما بدأه.

في حقيقة الأمر، ليس من المنطقي أن نتحدث عن عودة من كان يقتل منذ ثمانية عاماً للقتل، لعدة أسباب. منها عامل السن، فالذي كان يقتل منذ ثمانية عاماً، ليس لائقاً بدنياً بالطبع كما كان وقتها، خاصة لو كان يأكل ويشرب «من نيلها».

كما أن دوافع القتل التي انعدمت عند القاتل لمدة ثمانية عاماً، كيف تعود فجأة لتدفعه للقتل بعد سبات أهلالكه فالذي أصابه؟؟ فليس من المنطقي أن يتوقف فجأة عن القتل طوال هذه المُدة، ويعود فجأة بعدها. فلا توقف فساد، ولا استيقظت ضمائر، ولا اعتدلت مائلة. فلماذا توقف في البداية؟؟ ولماذا يعود الآن??

كلما أحاول توصيله هنا، هو أن اعتبار السفاح مُجرد شخص، هو عين الخطأ.

لماذا لم تُطرح نظرية أن القاتل هذه المرة، هو رجل ألهمته تجربة السفاح، فقرر تكرارها. أو إنه شخص وجد أن المجتمع مازال في حاجة لمثل هذا السفاح الذي لا يقتل الأبرياء، ولكنه يُعاقب الذين أفلتوا من عقاب يستحقوه.

بالطبع لست ممن يؤيدون هذا الفكر، أو يعتقدون أن وجود مثل هذا السلوك شئ مطلوب. بالرغم من أن النظام القضائي مازال أمامها لكثير ليصبح قادراً على ردع وعقاب كل من يستحق. وبرغم من زيادة نسبة الفساد عما كان عليه عند ظهور السفاح، ولكن في النهاية، نحن كشعب لابد أن نقف خلف القانون ونطالب بتنفيذه، وأن نُجرّم مثل هذه الجرائم، حتى ولو كانت تُرتكب ضد من يستحقها.

هذا لأننا نحلم بوطن أفضل، وليس غابة وإن كانت عادلة.

أنهت عادة قراءة المقالة، وسرحت بعدها لدقائق، وعندما أفاقت نظرت لحسن بدهشة، ثم بخجل، لتركها أياه كل هذه المدة دون Interview أو اعتذار. ابتسم حسن وأشار للقهوة التي لم تلاحظ وصولها، وقال:
-قهوتك هتبرد.

ابتسمت بإرتباك، وأعدت خصلة من شعرها خلف أذنها اليمنى، وقالت:

-معلش يا أستاذ حسن.. سامحني.. بس القضية دي أصلها شغلاني جداً.

-شغلاني ازاي؟؟

مدت يدها للقهوة ورشفت منها رشفة سريعة، وقالت:
-مش عارفة.. بس مش متطمنة ومش فاهمة حاجة.

سألها حسن:

-أيه رأيك في وجهة نظر مجدي كارم؟؟

قالت بإندفاع:

-مش مقتنعة بيها طبعاً.. هو أيه اللي حد غيره هو اللي قتل؟؟ ده كده بيحاول ينفي التهمة عن السفاح ويعمم الإشتباه.

أدركت بعدما أنهت الجملة إنها ما كان يجب أن تندفع هكذا، خاصة أمام غريب تقابله للمرة الأولى، وخاصة أيضاً

إنها تهاجم مديرها ووالدها الروحي في مهنة الصحافة، فصمتت ونظرت لقهوتها وملاحها تحمل كل ضيق الدنيا. لاحظ حسن ضيقها، فاعتدل في جلسته، واقترب بوجهه منها وقال بصوت هادئ:

-ممكن ماتزعليش من نفسك كده؟؟ انتي ماقولتيش اكثر من وجهة نظرك.. وده حقك.. زي ما مجدي بيعمل بالظبط.. مالك بقى مخنوقة من نفسك كده ليه؟؟

نظرت له غادة لثواني، وكأنها تسأل نفسها عن إمكانية الفضفضة معه فيما تحمله من همّ، ثم هربت منه لقهوتها مُجدداً. أراح حسن ظهره على كرسيه، وهو ينظر لها بتركيز، وأعاد المشهد في باله منذ جلسا حتى هذه اللحظة، ثم ابتسم وقال:

-غادة.. اسمحيلي اقولك يا غادة. فأبتسمت وأومات برأسها إيجاباً، ورشفت رشفة من القهوة، فأكمل:
-انتى شاكة إن مجدي كارم على علاقة بالقاتل أو يعرفه وعلشان كده كتب مقالة النهاردة ينفي فيها عنه التهمة.. مش كده؟؟

نظرت له غادة بدهشة لثواني، وتجمّعت دموع داخل عيناها الجميلتين، وكأن شكواها ترفض أن تظل داخلها بعد أن شعر بها أحدهم. تأثر حسن بدموعها، فأقترب منها وقال بإهتمام:

- في أيه بس؟؟ مالك يا غادة؟؟

صمتت لثواني في محاولة يائسة للسيطرة على انفعالها، ثم اندفع منها الكلام، كخيل السباق عند سماعها رصاصة الانطلاق:

-أستاذ مجدي ده صاحب فضل كبير عليّ.. يمكن اكثر من أهلي.. بس من كام يوم وانا بعمل معاه Interview هاجمني بشدة لمجرد إني ملّحت لبشاعة السفاح.. غلط فيّ وشكك فيّ كصحفية.. ودافع عنه بإستماته كأنه اخوه أو يعرفه. مسحت دموعها التي خرجت بإندفاع اكثر من الكلام، بعد أن صمتت عن هذا الجمل منذ السبت، ولم تستطع تحمله اكثر من ذلك. أخرجت منديل من حقيبتها، ومسحت وجهها، وبدأت تعيد السيطرة على انفعالها، ثم نظرت لحسن بخجل، وقالت:
-مش عارفة اعتذر لك ازاي.. بس كنت مخنوقة.. من فضلك اعتبر الي حصل ده محصلش.

-مفيش داعي للإعتذار خالص.. احنا بشر.. على فكرة.. من وقت للتاني النبي آدم بيحتاج حد يشيل معاه شوية.. ده العادي.. مش حاجة نعتذر عنها.. ومن فضلك بقى اسمحيلي اشتكيلك انا كمان.. وانكد عليكي انا كمان زي ما نكدتي عليّ.. ممكن؟؟

ضحكت غادة ضحكة سريعة، بعد ما شعرت بإرتياح لأسلوب حسن، الذي أخرجها تماماً من حالة الضغط التي كانت بها منذ أيام، وقالت:

-ياريت.. علشان مافلش حاسة بالذنب.

-النهاردة شوفت كابوس كان بقالي سنين كثير مش بشوفه..
من بعد ما ماتت مرااتي وانا فضلت اشوف الكابوس ده.. إني
بقتل نفسي بنفس طريقة السفاح.. وبحمل نفسي مسئولية
موتها.. وبعد فترة روجت لدكتور نفساني فسّر ده بأني
حاسس بالتقصير لأني ماكنتش جنبها علشان احميها.. وأخذت
أدوية وبقيت تقريباً مُدمنها.. وبعد فترة وقفت مع نفسي
وبطّلت الأدوية وتدرجياً الكوايس اختفت.. النهاردة رجعت
شوفت الكابوس تاني لأول مرة من سنين.. غالباً علشان
القضية اتفتحت تاني.. شوفتي بقى إنك حالتك احسن كثير
من غيرك؟؟

ظهر التأثير على ملامح غادة جلياً، ولم تعرف ماذا تقول،
فأكمل حسن:

-انا قبلت الواقع الحمد لله يا غادة.. ومش محتاج تعاطف
ولا شفقة.. ربنا ما بيظلمش حد.. انا بس حبيت اشاركك زي
ما شاركتيني.

ابتسمت غادة له بصدق، وقالت:

-شكراً يا حسن.. اسمحلي أقولك حسن.

أوما برأسه موافقاً، وقال:

-شكراً على أيه؟؟

-علشان انت ماكنتش مضطر تعمل اللي عملته ده علشان
تخفف عني.. بس انت عملت كده علشان تحسني إن

احنا زي بعض.. فتخفف عني.. وفعلاً نجحت في كده.. بس
انا عندي سؤال مهم جداً.

ابتسم وقال:

-خير.

-انت عرفت منين إن انا بشك في مستر مجدي إنه يعرف
السفاح؟؟

-من ساعة ما شوفتك الصبح وباين عليكي القلق و قلة
النوم.. بس ده انا توقعت إن سببه القضية الكبيرة اللي انتي
شغالة عليها.. لكن لما سألتك رأيك في نظرية مجدي بافترض
إنك قريتي المقال.. لقيتك اتاخديتي.. ونسيتي أصلاً إني قاعد
قصادك.. وقريتها مرتين. اتسعت عينا غادة بدهشة رغماً
عنها. فأكمل حسن بعدما أدرك صحة تحليلاته كالعادة:

-ودي بصراحة غلطة ماتغلطهاش صحفية شاطرة زيك..
وانا عرفت إنك شاطرة لأنك لو مش شاطرة كان لا يمكن
مجدي يسبلك القضية دي تشتغلها.. التفسير الوحيد اللي
يفسر اهتمامك بكلام مجدي اكثر من حوارك معايا هو
إنك منتظرة منه حاجة مُحددة.. ولما سرحتي بعد المقالة..
كان باين جداً على ملامحك خيبة الأمل.. وبالتالي اتأكدت
إنك مالمقيتيش اللي كنتي مستنياه.. وفي الحالة دي انتي
كنتي مستنياه يهاجم السفاح ليطمئن قلبك.. بس بعد طرح
نظريته دي اتأكدت نظريتك وزاد شكك فيه.. وماحتاجتش انا
اكثر من سؤال «أيه رأيك؟» علشان تقولي انتي بنفسك إنه

بينفي التهمة عن السفاح.. بس كده.
كان الذهول مُتملكاً من غادة، تنظر لحسن بانبهار، وبعد
ثواني من الصمت، قالت:
-انا بعد كده اخبي وشي وانا بتكلم معاك بقى.
ضحك حسن وقال:

-هعرف برضه الي عايزه من صوتك.. وبعدين أصلاً تخبي
ليه؟؟ مفيش حاجة تستاهل تستخبي.. الكلام بيريح.. اسأليني
انا.

-عندك حق فعلاً.. متشكرة بجد.

اعتدل حسن ونظر لغادة في عينيها وسأل باهتمام:
-بس انتي مش شايفة إنه من الظلم إنك تشكّي في مجدي
لمُجرد إنه دافع عن السفاح؟؟
-انا مش مرتاحة من ساعة ال Interview.. من ساعتها وهو
بيعاملني رسمي.. وكأنه بيوصلي رسالة.. مش عارفة يقصد
أيه.. أو بيعمل كده ليه.

فكر حسن لثواني، ثم قال:

-عموماً.. احسن طريقة تحسمي بيها الشكّ ده.. علشان
تقدري ترجعي لطبيعتك تاني.. هي إنك تواجهي مجدي
بشكوكك.. وهو الي هيحدد برّد فعله إن كنتي هتتأكدي
إنها مُجرد شكوك.. ولا هييزيد اقتناعك إنه مش تمام.

ردّت غادة بإستنكار واضح:

-نعم!!! انت أكيد بتهرج.. بقولك كان هياكلني لمُجرد إني

قُلْتُ على السفاح كلمتين.. اروح أواجهه؟؟!! انا عمري ما شُفته كده.. ده بجد كان مش طبيعي.

-مش يمكن علشان هو مقتنع بتجربة السفاح.. وبيدافع عنها.. اقصد عن فكرة إن يكون عندنا Vigilante.. مش لازم يكون يعرف السفاح شخصياً.

نظرت له غادة ثواني لتقيّم تحليل حسن، ثم قالت:
-منطقي.. ممكن يكون بيدافع عن الفكرة.. مش الشخص.. ولا عن أساليبه.

سرحت غادة لثواني، في محاولة لإقناع نفسها بنظرية حسن، فهي تتمنى أن يكون على حق، وأن يكون اختلافها مع رئيسها في وجهات النظر، وليس أخلاقياً كما تظُن. ثم قالت فجأة:
-أيه ده؟؟!! الوقت سرقنا وماعملناش أي حاجة.. ينفع كده؟؟
ونظرت لحسن بابتسامة وهي عاقدة حاجبيها في تمثيل للغضب، مما زادها جمالاً. نظر لها حسن متسائلاً، فمدّت يدها للمُسجلة، ولكن سبقتها يد حسن إليها، بعدما أدرك نيّتها، فنظرت له بنظرة تساؤل، فقال بهدوء:
-عايز اصارك بحاجة.. بس ياريت ماتزعليش.
-خير. قالتها بتوجُّس.

-انا اصلاً مش موافق اعمل Interview مع الجرنان.. بس وافقت اقابلك علشان كنت عايز اتعرف عليكي.
نظرت له غادة وملامحها تجمع بين الإستغراب والتساؤل،

وقبل أن تتكلم، أكمل حسن:

-انتي زي القمر أه.. بس ماتفهميش غلط.. انا ماكنتش عايز
اقابلك عشان كده.. انا بصراحة يا غادة بدور على اللي
قتل تذاكر.. ومحتاج كل مساعدة ممكن اوصل لها علشان
اعرف مين هو.. وانتي صحفية وليكي مصادر.. وفي المقابل
كل حاجة هوصل لها انتي أول حد هيعرفها.. تبادل منفعة
يعني.. انتي مش خسرانة حاجة.

كانت غادة تنظر له وبوادر غضب تلوح على أفق ملامحها،
لاحظها حسن بالطبع، فقال:

-انا آسف لو ضايقتك.. بس صدقيني انا مبسوط إني كدبت
عليكي علشان اقابلك.. مش ندمان. قالها وابتسم لها، حاولت
هي أن تمنع نفسها من الابتسام ولكنها فشلت، فالتقطت
قهوتها لتداري ابتسامتها. لاحظ حسن محاولتها الفاشلة في
التماسك، وهروبها منه بإدعاء الإنشغال بقهوتها، فاحترم
خجلها ونظر بعيداً لثواني حتى تمر موجة الخجل دون إحراج.

بعد دقائق من الصمت، قالت غادة بصوت جاهدت لتجعله
طبيعياً في محاولة منها لتغيير الموضوع:

-طب ماشي.. انا مش زعلانة.. بس عندي كذا سؤال محتاجة
اعرفهم.. ومش علشان الجرنان.. ده ليّ انا. ثم تداركت نفسها،
وقالت:

-كمُحقة في القضية يعني.. لو... لو مفيش عندك مانع.

ابتسم حسن عندما لاحظ ارتباكها الواضح، وقال:

-اسألني اللي انتي عايزاه يا سيادة المحققة.

قالت بجدية مُصطنعة:

-ماشي.. اتريق اتريق.. س سؤال: هتعمل أيه لما تعرف إن

شاء الله القاتل؟؟؟

-ج جواب.. هقولك عليه.. وهبلغ الشرطة.

عقدت حاجباها وسألت بجدية و لكن غير مصطنعة هذه

المرة:

-اممم.. س سؤال: انت ليه اتقبض عليك زمان واشتبهوا

فيك إنك السفاح!!؟؟

كست الجدية ملامح حسن، واعتدل في جلسته، وظهر الضيق

على ملامحه، فلاحظت غادة، وقبل أن تنطق، لاحظ حسن

ضيقتها بسبب ضيقه، فقال وهو يشير بيده:

-انا ماتضايقتش من السؤال.. بالعكس.. كل الحكاية إن دي

فترة من أصعب الفترات اللي مرّيت بيها في حياتي.. وطبيعي

سيرتها بتجيب معاها ذكريات. ثم أخذ نفس طويل وأخرجه

بتنهيدة مماثلة، وأكمل بصوت حزين:

-ج جواب.. اللوء مصطفى ماشتهش فيّ إني السفاح على

فكرة.. هي بس الجرايد اللي كتبت كده ساعتها.. شغل

جرايد يعني.. الإشتباه كان إني قتلت دكتور.. بنفس طريقة

السفاح علشان السفاح اللي يلبسها.. وطبعاً حصل اللي

حصل.

كانت ملامح غادة تكسوها الشفقة، وقالت بصوت خرج منها ضعيف:

-وكان إليه سبب الإشتباه فيك من الأساس؟؟

-إني اتخانقت مع الدكتور ده ليلة ما اتقتل.. ماهو العيادة بتاعته في نفس العمارة عندي.. بس كده. قالها وأشاح بنظره بعيداً، وكأنه ينظر لأفق ذكرياته، ليخفي عن غادة ضيقه الشديد.

احترمت غادة صمته، وضيقة، وجلست صامتة، حتى قطع صمتهم عم عفت الذي جاء ليأخذ الأكواب الفارغة، وقال بؤد:

-تحب يا حسن بيه اجيب لسعادك منيو الغداء؟؟

نظر له كل من حسن وغادة، ثم نظر كل منهما لساعته، ثم نظر كل منهما للآخر بذهول، وكأنهم شخص واحد وانعكاسه في المرأة، ثم ضحكا بعدما لاحظا ما حدث. شعر عم عفت إنه لا وجود له في المشهد، فانسحب دون الحصول على رد، فقام حسن وناداه:

-عم عفت.. شكراً.. احنا مش هنتغدى.. كتر خيرك. واعطاه حساب القهوة.

اعتدل في اتجاه غادة، ليجدها تجمع أدواتها وتضعها بالترتيب داخل حقيبتها، فاقترب منها وقال:

-انا عزمتك على القهوة.. وموافق إنك تردّي لي العزومة

وتعزميني على الغداء علشان ميّت من الجوع.. هتعزميني
فين؟؟

نظرت له وعقدت حاجبيها وابتسمت، ثم نظرت لحقيبتها،
وأعدت خصلة من شعرها خلف أذنها اليمنى، وأكملت
ترتيبها حتى لا يلاحظ ملامحها، وقالت:

-أيه التديس ده؟؟

فضحك حسن، وقال:

-انتي لسة شوفتي حاجة؟؟

غادرا المكان، ونظرات عم عفت تلاحقهما، وهو مبتسم
بسعادة واضحة.

oboiikan.com

عصر الثلاثاء ١٧ ديسمبر ٢٠١٣

وصلا غادة وحسن إلى مطعمها المُفضل، المُطل على النيل.
 قالت غادة بمجرد جلوسهم في الشرفة الخارجية، غير المغلقة،
 بناءً على رغبة حسن:

-انت بتدخن.. صح؟؟

-لا الحمد لله.. اشمعني؟؟

-علشان اخترت تقعد برة يعني في البرد ده.

-لو بردانة تعالي ندخل جوا.. انا بس بحب البرد.. مش
 بيضايقني.. فلما سألتني نقعد فين.. قولت اللي بحبه.

ابتسمت وقالت:

-لا مش بردانة.. انا كويسة.

ابتسم حسن ونظر لها مُضيّقاً عيناه، وسأل:

-بتضحكي ليه؟؟

اتسعت ابتسامتها رغماً عنها، وأرجعت خصلة من شعرها
خلف أذنها اليمنى، ونظرت للمائدة، وقالت:
-أصل انا كمان بحب البرد.

ثم نظرت ناحية اليمين للنيل، الذي تعشقه، هرباً من عيناه،
حتى لا يلاحظ إعجابها به، الذي لا تجد له تفسيراً منطقياً،
فهي لا تعرفه على الإطلاق، والأدهى أن كل ما تعرفه عنه،
إنه كان مُتَهِماً في قضية قتل، وإنه مريض نفسياً، أو كان،
ولكن بالتأكيد ماتعرض له قادراً أن يجعل من أي شخص
سَوِيَّ مهماً كانت قوة تحمله مريضاً نفسياً، أو على الأقل،
مجروح جرح يصعب حتى على الزمن مداواته. ولكنها برغم
كل هذا، شعرت منذ قابلته إنه شخص سوي لأقصى درجة،
ذكي لدرجة مُبْهَرة، خفيف الدم، حنون، يحمل بداخله الدرجة
المثالية من الحزن والغموض، التي تجعل منه شخصية جذابة
غير كئيبة أو منطوية.

نظر لها حسن لشواني وهي تنظر للنيل، ثم توجه للنيل
هو الآخر في حالة اعتراف صامت، كان يشعر أن ما يدور
في عقل غادة في تلك اللحظات يتعلق به، حدسه في الغالب
على حق، لم يحاول إنكار سعادته بإنه مازال قادراً على لفت
نظر فتاة على قدر مُلْفِت من الجمال والذكاء والنجاح له،
ولكن هل لفتت هي نظره كما فعل معها؟ هو واثق أن
مشاعره أصبحت غير قابلة للتحييز، ولكن هناك احتمال أن

يكون غروره هو الذي يرفض الاعتراف بإعجاب بدأ ينمو بالفعل داخله، وإن كان هو فعلاً شخص غير قابل للشعور تجاه أي فتاة بأي شئ كما يدّعي سراً، فيما يُفسر تفكيره بها حالياً وهو ناظراً للنيل!!؟ صديقه الصامت.

قطع تفكيرهما ال Waiter، فألتفت كل منهم له وطلب ما يريد، ثم قال حسن، بجديّة، وكأنه ينفي عن نفسه تهمة الإعجاب بغادة:

-طب نتكلم في الشغل بقى؟؟

اعتدلت غادة وأخرجت من حقيبتها كراستها، وفتحتها على صفحة بيضاء، وكست الجديّة ملامحها من جديد، حيث أن عملها طالما كانت تعتبره الأهم في حياتها، وإعجابها غير المُفسر بحسن لم يستطع -بعد على الأقل- تغيير هذا المبدأ، وقالت:

-انت رأيك نبدأ منين؟؟

-لازم نكمّل معلومات بعض.. ها؟؟ انتي تعرفي أيه عن القضية غير اللي نزل في الجرنان؟؟
فكرت لثواني، ثم قالت:

-مفيش غير حكاية مستر مجدي.

-انا وصلت لمعلومات كثير مش موجودة حتى عند الداخلية.. ومحتاج اشتغل على كذا محور في نفس الوقت.. ودي انتي هتساعديني فيها بشكل كبير.. بس عايزك توعديني إنك

مانتشريش إلا الي نتفق عليه إنه ممكن يتنشر الأول..
علشان مش عايزين نكشف أوراقنا كلها للقاتل في الجرنان..
هنبقى كده بنشتغل لحسابه.. ممكن؟؟

صمتت لثواني، ثم قالت:

-أوعدك.. بس انت برضه تراعي إن انا أصلاً صحفية.
-الصحفي مش مجرد ناقل أخبار يا غادة.. انتي مُحققة
دلوقتي.. انتي ممكن تكوني السبب في حل قضية ممكن من
غيرنا ماتتخلص أو تتقفل زي الي قبلها ضد مجهول.. وبعدين
انا مش ممكن اكون شايف إن ليكي مصلحة في حاجة وارفض
تعملها.. اتظمني. قالها وابتسم ليُطمئنها، ونجح في ذلك.

جاء ال Waiter بالطعام، فقال حسن:

-سيبك من الشغل دلوقتي.. انا هموت من الجوع.. نخلص
أكل وبعدين احكيلك على الي وصلت له.
-ماشي كلامك.. انا كمان بصراحة نفسي مفتوحة النهاردة.
ابتسم لها حسن وقال:

-بالهنا.

ابتسمت له وقالت:

-انت صحيح بتشتغل ولا ايه نظامك؟؟

فنظر لها حسن صامتاً لثواني بوجه جامد، فتوقفت غادة
عن الأكل وهي تنظر له بقلق، وقالت:

-أسفة لو كنت بتطفل على حاجة شخصية.. انا بس مش

بعرف آكل وانا ساكتة.

فضحك حسن، وقال:

-انا بخُضك بس.. حبيت اشوف قلبك جامد ولا خفيفة..
طلعتي على نياتك خالص.

عقدت حاجبيها وهي تبتمس وظهرت ملامح الأرتياح على
ملامحها، وقالت:

-تصدق كده عيب؟؟ انا افتكرتك قفشت فعلاً.

-لا خُدي على كده.. انا غير متوقع بالمرة.. اتعوّدي لو ناوية
تكملي معايا.

قالت بدون تفكير:

-ناوية. قالتها ونظرت لطبقها وهي تبتمس.

ابتسم حسن، ثم قال دون أن ينظر لها:

-انا من يوم ما نادية الله يرحمها ما ماتت وانا بيعت كل
ما أملك وسيب الشغل.. عندي ورث وفلوس كثير ماعتقدش
هعيش لحد ماشوفها بتخلص.. وماعنديش أي نفس يزيدوا
بصراحة.

-بس الشغل مش بيكون علشان الفلوس وبس.. مش متفق
معايا في كده؟؟

-انا شخصياً شايف إن دي حاجة بتختلف من شخص لشخص..
وكل واحد ظروفه بتأثر في طموحاته وأحلامه.. انا كنت يوم
من الأيام زيك كده.. لحد ما حصل الي حصل وفقدت كل
رغبة في تحقيق أي حاجة.

توقفت عن الطعام، ونظرت له بحُزن وتعاطُف، فابتسم وقال:

-ماتزعليش قوي كده.. صدقيني يا غادة انا مرتاح كده.. مش من النوع الي خلاص فقد الأمل في الحياة وعاييز يموت وكده.. لا خالص.. بالعكس.. انا بس مفيش حد في حياتي يشاركني تحقيق أي حلم.. وبالتالي بطلت احلم.

هزّت غادة رأسها في علامة على فهمها لشعوره، وسألت وهي تحاول أن تتحاشى النظر له:

-يعني لو اتوجد شخص في حياتك يشاركك أحلامك.. هترجع تحلم؟؟

ابتسم هو الآخر، ونظر لها ولكنها لم تنظر له، فقال بهدوء:

-غادة. حتى تنظُر له.

ف نظرت إلى عيناه بنظرة ثابتة كلها تساؤل، فأكمل:

-أه.. هرجع احلم تاني.

تملك منها الخجل، ولكنها لم تحاول أن تتحاشى النظر له مثلما تفعل كل مرة، ربما بسبب نظرتة التي أجبرتها على مواصلة التحديق به، وربما بسبب إنها أرادت أن تتأكد من صدق كلامه، أو مشاعره، إن وُجدت. ولكن الحقيقي والثابت إنها أرادت أن ترى عيناه وهو يُحدثها عن نفسه.

بعد صمت طال لنصف دقيقة كاملة، وهي مازالت لا تستطيع أن تحوّل نظرها عنه، وهو كذلك، قالت بصوت

خرج ضعيف ملئ بالأنوثة رغماً عنها:
-طب مش هنتكلم في الشغل بقى؟؟ اليوم قرب يخلص.

قال وهو يمسخ يدها:

-يالاً بينا.. جاهزة تسمعي الشغل اللي بجد اللي عملته؟؟
أخرجت كراستها وقلم من الحقيبة مرة ثانية، وقالت بجدية:
-جاهزة.

قال بهدوء لا يتناسب مع المفاجأة التي ألقاها:
-سفاح الأرقام ماقتلش تذاكر.. ده حد بيقلده فعلاً زي ما
مجدي بيقول.

تركت القلم، ونظرت له في محاولة للتأكد من جدية كلامه،
وقالت:

-ده بجد ولا حركة من بتوعك؟؟
-لا بجد.. وطالما بنتكلم في الشغل مش ههزر.. اطميني.

ثم اعتدل وقال:

-ببساطة أي حد يشوف الموضوع بتركيز هيلاقى إن لا يمكن
يكون السفاح هو اللي قتل.. انا روحت المشرحة وشوفت
جُثث داليا وتذاكر بنفسي.. كان في دم على ضوافر داليا
المفترض إنه من تذاكر وهي بتقاومه.. لكن لما شفت جثة
تذاكر مالقيتش فيها أي علامة خربشة ضوافر خالص على
جسمه وده مش منطقي؟؟ وبعدين تاني حاجة.. المدخن
عموماً أول حاجة بيعملها بعد ما يتعرض لموقف صعب
بيولع سيجارة.. وعلبة السجاير اللي متحرزة كانت تقريباً

مليانة.. معقول تذاكر بعد ما خرج من بيت داليا بافتراض إنه قتلها.. دؤر على سجايه مالفهاش ومافترضش إنها وقعت منه عندها؟؟ معقول واحد بالذكاء اللي يخليه يدخل بيتها ومايسيبش بصمة واحدة بس عليها أو على أي حاجة في شقتها.. يكون بالغباء اللي يخليه يسبب احتمال إن سجايه تكون عندها وعليها بصماته؟؟

كانت داليا تكتب ملاحظات في كراستها وتتابع ما يقوله حسن بإنهار واضح، الذي أكمل:

-غير كل ده.. انا قابلت كربونة صديق عمر تذاكر.. وأكّد لي إن في حد كان عايز تذاكر في شغل.. ووعدّه بمبلغ كبير بعد ما يخلصه واشترط عليه إنه يسبب تليفونه وهو رايح يعمل الشغل ده.. وده من وجهة نظري كمين.. مش عقد عمل أبداً.. والدليل إنه اتقتل.

توقف ليشرب بعض الماء، فانتهزت غادة الفرصة وسألت:

-انت عندك معلومات كافية عن قضايا السفاح القديمة؟

-حافظها وعندي في البيت تفاصيل كل قضية بالحرف.

-لازم ابقى اشوفها.. علشان هتساعدني في التحقيق ومقالاتي..

لو تسمح يعني.

-مفيش مشكلة.

- طب بخصوص القضية دي.. كلامك منطقي فعلاً.. بس

دي كلها تحليلات تنفي التهمة عن السفاح.. مفيش عندك

نظرية مين اللي عمل كده أو ليه و نعرفه ازاي؟؟

-بالظبط.. هو ده اللي انا بعمله من أول يوم.. مين اللي له مصلحة في موت تذاكر؟؟ ووصلت إن محدش له مصلحة في موت واحد زي ده إلا بلطجي زيہ اتخانق معاه مرة.. وده ما عندوش العقلية ولا الإمكانيات اللي تسمحله يعمل كل ده.. وده وصلني لنتيجة إن الحكاية كلها اتعملت علشان موت داليا مش تذاكر.. داليا تتقتل والقضية بتاعتها تتقفل.. وفي نفس الوقت يحصل حدث كبير وهو «عودة السفاح» اللي يغطي على قضية داليا.. اللي الداخلية هتفترض إنها محلولة وتركز في البحث عن «السفاح».

قالت داليا بإنهار لم تُخفيه:

-ياولاد الصايعة.

ابتسم حسن، وأكمل:

-ومن هنا.. بقيت مركز في محاولة اكتشاف مين اللي وجود واحدة زي داليا بيهدده؟؟ وده اللي محتاج مساعدتك فيه. هزت رأسها في علامة على استعدادها، فأكمل:

-القصة ابتدت من عند واحدة صاحبة داليا.. وأظن هي مفتاح القضية أصلاً مش داليا.. اسمها هبة.. هبة كانت عايشة في القاهرة.. وداليا لجأت لها لما خالتها اللي كانت عايشة معاهها سافرت.. وهبة هي اللي جابت شغل لداليا في مستشفى الكرامة.. ودي تبع نفس المجموعة اللي تبعها مستشفى التكامل اللي بتشتغل فيها هبة.. وكانت صاحبتهما الوحيدة في القاهرة.. هبة فجأة وبدون سبب أو حتى استقالة..

سابت القاهرة ورجعت بلدها أول ديسمبر.. وبعدها تقريباً
بأسبوع غرقت في النيل.

اتسعت عينا عادة في خوف واضح، بغير قدرة على التعليق،
فهي لم تتوقع أن تتخذ القضية هذا الشكل فجأة. فأكمل
حسن:

-وطبعاً أهلها مافكروش في التشريح وبالتالي القضية اتقفلت
في ثواني بدون شوشرة.

قالت عادة بصوت خفيض، بعدما تملك منها شعور بأنها
مراقبة كما يحدث في الأفلام التي تتذكرها:
-مش ممكن تكون دي صدفة طبعاً.

ابتسم حسن من طبيبتها، وقال:

-لا طبعاً.. اعتقد إن التفسير المنطقي بيقول إن التهديد
الحقيقي للقاتل كان من هبة مش داليا.. وهي كانت خائفة
من حاجة علشان كده سافرت البلد.

-طب وقتل داليا ليه؟؟

-افتكر إن كونها صاحبها الوحيدة.. ده منطقياً معناه إنها
كان عندها معلومات من هبة تهدد حد.. أو هبة سابت لها
ورق.. ماعرفش.. بس اللي متأكد منه إن هبة رجعت البلد
فجأة علشان خائفة من حد.. والحد ده هو اللي قتلها وقتل
داليا وقتل تذاكر.

صمتت غادة لثواني، في محاولة منها لإستيعاب كل هذا الكمّ من المعلومات الخطيرة، ثم قالت:

-وليه ماتقولش إن الحد ده هو اللي خلى تذاكر يقتل داليا..
وبعدين قتله؟؟

-هو وارد طبعاً.. بس انا حاسس إن عملية قتل هبة وداليا اللي عملها محترف.. مش بلطجي وشمام.
-ودلوقتي احنا محتاجين نعرف هبة كانت خايفة من أيه..
أو من مين.

-بالظبط كده.. عايزك تنزلي مستشفى التكامل اللي هبة كانت شغالة فيها.. كأنك صاحبته.. وحاوي تعرفي أي حاجة..
أي حاجة يا غادة.. وانا من ناحيتي لو وصلت لأي حاجة هقولك.

-طب وبالنسبة للنشر؟؟
-انا شايف إنك تبتي تطرحي نظرية إن مش السفاح هو اللي عمل كده.. يمكن ده يكون سبب في خروج الطرف الثاني عن شعوره.. ويتسبب في إنه يغلط.. بس بلاش سيرة هبة خالص دالوقت.

فكرت لثواني ثم قالت:

-انت صح.

ثم أغلقت كراستها، ووضعتها داخل حقيبتها، ثم نظرت لساعتها وقالت:

-انا للأسف مضطرة امشي.

أشار حسن لل Waiter، ليحضر فاتورة الغداء، وقال:
-هنبقى على اتصال.. وياريت تخلي بالك من نفسك.. الناس
الي بندور وراهم قتلوا ثلاثة فعلاً علشان يخبوا حاجة احنا
بنحاول نكشفها.. مفيش هزار.
ابتسمت له وأومات برأسها أن «حاضر»، ثم قالت له وهو
يأخذ الفاتورة من ال Waiter:
-مش انت قلت انا الي عازمة؟؟
فقال وهو يضحك:
-وانتي بتصدقني أي حاجة بتتقالك كده؟؟ مش بقولك على
نياتك؟؟

الأربعاء ٢٠ سبتمبر سنة ٢٠٠٥

يجلس حلمي التهامي على القهوة التي اعتاد أن يقابل فيها صديقه منصور كلما سمحت ظروف عمل كل منهما أن يتقابلا. يصل منصور يحمل ابتسامته المعتادة. يقابله حلمي بابتسامة، ويترك الشيشة التي كان يدخن «حَجْرَهَا» الرابع ويُسلم على صديقه بـود، ويسأله:

-تشرب أية ياض يا صرصور؟؟

أجاب منصور بصوت عالي، لسمع عامل النصبه:

-شاي ثقيل يا سيكا يسهّرنى لبكرة.

ثم نظر لحلمي وقال بصوت خفيض، في رغبة منه ليداري

على شمعته حتى تقيد:

-جبت ورقة «بنج» ب٢٥ جنية يا حلمي.. شومة بنت الجزمة.

ملحوظة: «بنج» هي الإسم الحركي «للبناجو» المتفق عليه

بينهم.

قال حلمي بإستنكار واضح، وخرج صوته عالياً:

٢٥- جنيه يا خبوء؟؟ ده أجدعها ورقة فيكي يا بلد ب١٥ جنيه.

نظر حلمي حوله، ثم نظر لصديقه بلوم واضح:

-وغلاوة أمك عندي لولا انت صاحبي ما كنت دوّقتك منها..

يابن الغشيمة ده اسمه «الشبح».. الورق لونه اسود مش

اخضر زي اللي موجود.. انا جبتلك نُصّها معايا.. ومش عايز

منك فلوس إلا لما ترجع.. انت طالع فين الفجر؟؟

-عندي نقلة مطروح.. طريق طويل ومش عايز اجرّب حاجة

تفصلني .

-عيب عليك.. الشبح هيركبك طول السكة.

وضحكا بصوت عالي

خبر في صفحة الحوادث بتاريخ الجمعة ٢٢ سبتمبر سنة ٢٠٠٥

مقتل عائلة كاملة في حادثة سير، حيث خرجت سيارتهم من

الطريق الأسفلتي، وانقلبت على جانب الطريق عدّة مرات.

شهادات الشهود أكدت أن السبب كان خروج سيارة نقل من

الطريق العكسي، وقطعها الطريق أمام سيارة العائلة، مما

دفع السيارة للخروج عن الطريق في محاولة لتفادي سيارة

النقل، ولكن السيارة الصغيرة كانت أضعف من أن تقوم

بتلك المناورة المفاجئة فانقلبت.

تقوم الشرطة بالبحث عن سائق السيارة النقل المتسبب في الحادث، مُستعينة فقط بأوصاف السيارة غير المؤكدة، حيث أن الرؤية كانت صعبة في وقت الحادث، بسبب الظلام والضباب الكثيف.

oboiikan.com

غروب الثلاثاء ١٧ ديسمبر سنة ٢٠١٣

يقود حسن سيارته في اتجاه عبد المنعم رياض، كلما يقف به الطريق، يهرب من زحامه بالنظر للنيل. حالته المزاجية في أفضل حال، يبدو متفائل وسعيد، وهو الذي لم يعتاد تلك الحالة منذ سنوات عديدة. فمنذ تعرّفه على عصام، ومقابلاتهم التي تكررت، وهو بدأ تدريجياً في الخروج من حالة التوقُّع التي لازمته منذ مقتل زوجته، وها هو اليوم يقابل فتاة جميلة وذكية وناجحة، ويشعر إنها مُعجبة به، وبالتأكيد هذا كفيل بإضافة بعض من البهجة وألوان الفرح إلى نظرته للحياة، ولو لبعض الوقت، حتى وإن كان مازال مُصِراً على اعتبار نفسه خارج نطاق الخدمة، فيما يَخُص العلاقات العاطفية بعد رحيل زوجته التي كان يعشقها وتعشقه.

أمسك حسن هاتفه وطلب رقم عصام، وقال بعد سماع
صوته:

-انا فاضي النهاردة.. كالعادة يعني.. ماتيجي نتقابل.. لو
فاضي.. أو مزنوق في قضية احلهاالك.

-هاهاهاها.. لا انا تقريباً مفيش ورايا غير السفاح الي مش
هيتمسك أصلاً.. باين كده.

-زي الفل.. انت فين؟؟

-في القسم.. نُص ساعة وهكون مخلص.

-خلاص اديني ساعة هكون عندك إن شاء الله.. علشان
الشارع زحمة شوية.. يمكن في شوية قلق في الجامعات أو
حاجة.. سلام.

مدّت غادة يدها للمقعد المجاور لها، فتحت حقيبتها
وعبثت بمحتوياتها للوصول للهاتف دون أن تضطر لأن تحوّل
نظرها عن الطريق. وجدت هاتفها أخيراً، أخرجته واتصلت
بصديقتها الوحيدة نورهان:

-نونو.. تقدري تعدي عليّ في البيت النهاردة؟؟

-أقدر.. بس اشمعي؟؟

-لما نتقابل بقى.. هكلمك لما اقرب.. هحاول ماتأخرش.

-بعد ما سمعت صوتك ده مش هنام ولو جاية الفجر.. بس

وحياي عندك تقولي لي الموضوع عن أيه؟؟

-يابنتي مفيش حاجة.. عايزة اتكلم معاكي شوية.

-كده انا اتأكدت.. اسمه أيه طيب؟؟

-اقفلي يا مصيبة.. مش عايزة منك حاجة.. نامي.

-خلاص هستناكي هستناكي.. هتوصلي البيت تلاقيني مع طنط
أصلاً.

-سلام. قالتها وأغلقت الخط وهي تبتسم بسعادة.

يقفنا حسن وعصام حيث اعتادا، في منتصف كوبري قصر
النيل، ينظران للنيل في صمت، وكل منهم يخوض حوار
الخاص مع النيل، الذي يتسع صدره للكل، ولا يكل من
شكواهم.

يقطع عصام الصمت بصوت خفيض، وكأنه يحاول ألا يُخرج
حسن من حالة التواصل التي تبدو عليه:

-مش هتقولي مالك النهاردة؟؟

نظر له حسن لثواني بلامح شاردة، وقال:

-مالي؟؟

-مش هنا خالص من ساعة ماتقابلنا.

-لا انا هنا.. بس متلخبط شوية.

اعتدل عصام وواجه حسن، وقال:

-أيه ياعم القضية ثقيلة عليك؟؟ ما قُلت سيبها في حالها.

ابتسم حسن ونظر لعصام لثواني، ثم أعاد نظره للنيل وقال
بصوت مهموم وكأنه يعترف بذنب:

-حاسس بنفسي بتغيّر ومش متطمئن. صمت لثواني ثم قال:

-مش هتفهمني يا عصام.. ماتتعبش نفسك.

قال عصام وهو يعتدل مُجدداً ليووجه النيل:

-جرّب.. مش انت بس اللي عندك مشاكل على فكرة.

نظر حسن لعصام لثواني، وكأنه يقيس مدى قدرته على فهم كلامه الذي يريد أن يبوح به:

-انا زمان يا عصام في سنتين خسرت كل اللي كنت عايش عشانه.. ومن ساعتها حلفت مايكونش عندي حاجة غالية تاني علشان مايجيش عليا يوم واجرب شعور فقدانها تاني.
-تمام.

-الموضوع ده استمر كذا سنة.. بس بدأت احس إنه بيتغيّر.

-ازاي؟؟ بدأت تكون علاقات تاني؟؟

-بالظبط كده.. وده مخوّفني.. انا مش حمل الشعور ده تاني.. المرة دي لو لاقدر الله حصل حاجة زي دي تاني.. هتكرس ومش هرجع سليم تاني.

نظر عصام لحسن، ثم وضع يده على كتفه القريب منه، وقال:

-الإنسان مايقدرش يعيش معزول يا حسن.. ولو قدر لفترة.. مش هيقدر على طول.. ولو فاكر إنك كنت عايش الكام سنة اللي فاتوا تبقى غلطان.

ثم أشار للنيل وقال:

-هي دي العيشة.. إنك تشارك حاجة بتحبها مع صاحب.. إنك تحب وتخاف على اللي بتحبه.. وأحياناً تتجرح.. هي دي

الحياة.. غير كده يبقى موت.

نظر له حسن وقال بصوت مبحوح:

-بس الموت مايوجعش زي الحياة.

-بس الحياة تستاهل نستحمل وجعها. قالها وابتسم لحسن،

الذي ابتسم بدوره ونظر للنيل من جديد، وكأنه يستشيره

فيما قال عصام. ومرّت دقائق من الصمت لم يقطعها سوى

الإزعاج الصادر عن المراكب، الذي أصبح سِمة من المكان

للأسف.

مر في تلك اللحظات من خلفهما عم حكيم وكان كعادته

يتحدث دون توجيه الكلام لأحد:

صحيح بتاخذ الدنيا.. لكن بتديلك..

قدّم عشانها خطوتين.. وهي هتجيلك..

لكن تسيب نفسك وتفضل محلّك سرّ..

لما هتتعب يوم.. ولا حد هيشيلك..

وصلت غادة للعمارة التي تسكنها مع والدتها منذ وفاة

والدها. صعدت درجات السلم الواسعة، حيث أن العمارة

قديمة، يعود تاريخ بناءها الي أيام التصميمات الأوروبية ذات

الزخارف على الواجهات، والسلام الواسعة، والسقف العالي،

والشقق ذات الأربعة والخمسة عُرف. صعدت للدور الأول،

وقبل أن تصل يدها الممسكة بالمفتاح لباب الشقة، فتحت

نورها صديقتها الباب. فزعت غادة وكادت تصرخ، ولكنها

أدرکت فی اللحظة الأخيرة إنها نورهان، فقالت بحدة:

-يخربيتك.. قلبي كان هيقف يا جزمة.

ضحكت نورهان بمرح، واحتضنت غادة وقبّلتها، وقالت:

-اللي واخذ عقلك.

لكزتها غادة في كتفها، وقالت بشراسة مُصطنعة:

-اهبطي.. استني في الأوضة.. هجيلك.

توجهت للمطبخ حيث توجد والدتها، التي كرّست حياتها

كلها لرعاية أبنيتها الوحيدة، بعد وفاة زوجها. قالت غادة

وهي تدخل المطبخ:

-يا هدى حرام عليكي مش كده.. ريحة الملوخية جايبه

الشارع.. الناس هتبص لنا في اللقمة. ضحكت وهي تحتضن

والدتها وتقبّلها.

قالت هدى:

-قلقت عليكي يابنتي.. كلمتك في الجرنان ماكنتيش هناك..

وموبايلك غير متاح.

قالت غادة وهي تغادر المطبخ:

-الموبايل ساعات بيسقط شبكة.. مستتية اقبض واجيب

واحد جديد.. وبعدين ماتخافيش على بنتك يا هدى.. انتي

مربية راجل.

-ربنا يحميكي يابنتي.. أصل في التلفزيون جايبين حرق في

الشوارع وضرب وقنابل الله يخرب بيوتهم ويحرق قلوبهم

كلهم.

-اللهم آمين.. هغيّر هدمي وأحضرّ السفره.
دخلت غاده لغرفتها، وألقت حقيبتها على السرير في أهمال.
قالت لها نورهان التي كانت تقرأ بعضاً من المقالات المعلقة
على الحائط:

-انتي اشتغلتني في المباحث يابت؟؟ أيه ده؟؟ ثم ضحكت
بجُث وأكملت:

-بس وّشك منورّ وخدودك حمرا وحالتك صعبة.. أيه؟؟
وضحكت وهي تنظر لغاده بنظرة متفحصة.
ألقت غاده بجسدها كله على السرير، ونظرت للسقف
وقالت دون وعي:

-مش طبيعي يا نور.. مش طبيعي.. مش عارفة ماله!!
قالت نورهان وقد زالت الإبتسامة من على ملامحها، وحلّ
محلها الحماس الممزوج باللهفة لمعرفة التفاصيل:
-انتي الي مالك؟؟ اجمدي يابت مش كده.. الله يرحم
زمان كنتي بتقولي أيه.. الي يشوفك دالوقت تصعبي عليه..
أيه احكي لي.

قامت غاده وقد أفاقَت نسبياً من حالة الإنتشاء التي
أصابتها، وقالت:

-الموضوع طويل.. تعالي ناكل الأول وهحكليك كل حاجة.. بس
باختصار كده.. الراجل الي قابلته النهاردة مالوش زيّ أبداً.

قطع عصام حالة الصمت التي امتدت لدقائق قائلاً:

-بس موودك ده فيه «إتة».

نظر له حسن وعقد حاجبيه في تساؤل، فأكمل عصام:

-انت فيك حاجة جديدة.. الكلام ده مش عليّ لوحدي.. في

حد تاني.. اعترف يا حسن.

ضحك حسن وتجنب النظر لعصام وقال:

-هتعملي فيها انت هولمز النهاردة.

قال عصام بهرح:

-ماتغيرش الموضوع.. انطق.. أياه؟؟

نظر له حسن، ثم اعتدل وقال:

-هو مفيش حاجة.. علشان بس ماتعملش شغل الأطفال

ده.. كل الحكاية إني قابلت بنت صحفية النهاردة اللي ماسكة

القضية في جرنان الملا...

قاطعها عصام وقال مندفعاً:

-غادة عثمان؟!

-انت تعرفها؟!

-يابن اللعيبة.. دي حته سُكر.

-ياعم لاعيبة مين وبتاع أياه؟؟ محصلش حاجة.. كل الحكاية

إن احنا الاتنين شغالين على القضية.. فقررنا نساعد بعض.

-طب وأياه؟؟ وغمز له بخُبث.

-ياعم عصام مفيش حاجة.. هي زي مانت قلت فعلاً.. حته

سكر .

-صح كده. قالها واعتدل لمواجهة النيل، ثم قال بعد صمت

دقائق:

-غادة دي انا بعتبرها اختي.. من كام سنة كان صديق عمري شريف نفسه يتعرف عليها.. ورفضت بشدة.. مع إنه صاحبي من أيام ثانوي.. وكان دفعتي في الكلية.. واسمه شريف ناجي.. الناس كانوا بيفتكروننا توأم أصلاً من كتر ما كنا دائماً مع بعض.. بس مارضيتش اعرفه عليها.. علشان هو مش هيخاف عليها.. شريف طول عمره لِعَبي ومش بتاع مسئولية والتزام.

نظر له حسن وقال:

-كلامك ده مالوش غير معنى من اتنين.. يا بتوصيني عليها.. يا متظمن عليها لو بقت معايا.

-الاتنين. قالها وابتسم. ثم قال بلهجة من تذكر شيئاً:

-صحيح.. اعمل حسابك يوم ٢٦ عيد ميلاد مَلَك بنتي.. في البيت عندي.. لازم تيجي.

-أكيد.. ربنا يخليهاك.

ثم سأل حسن:

-إنما شريف صاحبك ده فين؟؟ مش بتقول توأمك؟؟

-من ساعة ما مشي من الداخلية وهو بقى واحد تاني.

-مشي ليه؟؟

-اتعرض عليّ انا شغل عند الدكتور حازم البدري.. راجل أعمال كبير وشغال في كل حاجة.. اكيد سمعت عنه.. اترشح يكون وزير صحة قبل كده.. بس رفضت الشغل مع إني مش

مرتاح في الداخلية.

-باين عليك إنك مش مرتاح فيها.

أكمل عصام:

-بس هو طلب مني ارشحه وراح بدالي.

-وبيشغل أيه؟؟

-مدير أمن لمجموعة استثمارات الدكتور حازم كلها.. مكتب

أد كده وسكرتيرة وشقة جديدة.. ومابقاش بيفضى خالص.

-ولما انت يا عصام مش مرتاح في الداخلية.. ليه ماروحتش؟

تنهّد عصام بضيق، وكأن هذا السؤال ثقيل على قلبه، وقال:

-انا عدم راحتني في الداخلية سببه إننا مش دايماً بنكون

في صف العدالة.. أحياناً بسبب ضعف الإمكانيات.. وأحياناً

الفساد.. وأحياناً بسبب فقر أو ضعف وخوف المجني عليه

وافترا الجاني فبيتسحب البلاغ.. أو بيتم تصالح ظالم.. وإني اروح

مكان اشتغل فيه بلطجي بس شيك مش هيحل المشكلة.

صمت قليلاً ثم أكمل:

-لو بلدنا فيها داخلية قوية.. مالهاش أيد ضعيفة تتمسك

منها.. مكانتش الشركات جابت اللي زي شريف علشان

يعملوا شغلنا لصالحهم.

-عندك حق.. الظلم بقى الطبيعي في البلد للأسف.

أخرج عصام سيجارة وأشعلها وقال:

-عارف يا حسن؟ انا جه عليّ وقت كنت مقتنع إن لازم

يكون عندنا حد بيشغل للعدالة خارج نطاق القانون.. من

كثر الظلم الي بشوفه بحكم شغلي.

نظر له حسن، وقال:

-زي سفاح الأرقام كده؟؟

نظر له عصام وقد أدركه الخجل مما قال، لأنه يتحدث عن

نموذج قاتل زوجته:

-انا آسف يا حسن.. ماقصدش طبعاً.. ده مجرم.. انا بتكلم

عن حاجة تانية خالص.

-مفيش داعي للأسف.. انا عارف إنك ماتقصدش.. وماتنساش

إن القاتل بإستثناء نادية.. كان زي مانت بتقول كده.

اعتدل عصام وقال لحسن بحماس دعمه اتفاق حسن مع

وجهة نظره:

-ده الي اقصده.. إن الناس تبدأ تخاف من عقاب جاي

جاي.. ولا ثغرة في إجراءات تمنعه.. ولا محامي شاطر يحميك

منه.. احنا محتاجين كده.

ابتسم حسن وقال:

-مش غريبة إنك تكون ظابط وتقول كده؟؟

-كوني ظابط بيخليني أشوف حاجات اكرت بكتير منك مثلاً..

بس انت عندك حق.. انا المفروض اكون في الطرف الثاني من

المعادلة. صمت لثواني وأخذ نفس من سيجارته وأكمل:

-زمان كان دائماً عمي الله يرحمه يقولي كده.. وفاكر مرة

كنت انا وشريف في مكتبه في بيته وزعق في جامد لما قولتله

إن الي اتقتل كان يستاهل وإني لو مكان السفاح كنت قتلتة..

ويومها لولا شريف أخذني ومشي كان ضربني بالنار من كتر
ما كان متنفز. قالها وابتسم، ثم قال:
-الله يرحمه.. كان شخصية مالهاش زيّ.
اعتدل حسن وقال:

-وانت وشريف كنتوا...

قاطع كلامه رنين هاتف عصام، الذي نظر في ساعته وهو
يرُد:

-ألو. صمت لثواني ليستمع للطرف الآخر بلامح جامدة، ثم
تحوّلت ملامحه للإنفعال الشديد الممزوج بالغضب، وأغلق
الخط وقال لحسن بصوت مُرتجف، انفعالاً:
-السفاح قتل ثاني يا حسن.

لم يقوم حسن بأي رد فعل لثواني، حتى تحرك عصام في اتجاه
التحرير ليركب سيارته ويذهب لمسرح الجريمة، فتحرك حسن
خلفه بصمت لم يمنع كلاً منهما من التفكير في المنحنى الجديد
الذي اتخذته القضية فجأة.

ليل الثلاثاء ١٧ ديسمبر سنة ٢٠١٣

تجلس غادة على سريرها وأمامها نورهان صديقتها، التي كانت تنظر لها وهي تحكي لها تفاصيل لقاءها بهذا الشخص الذي استطاع أن يهز ثوابت غادة صديقتها منذ الطفولة. فغادة كما تعرفها نورهان، لم يتمكن أي شاب ممن قابلتهم في حياتها أن يجعلها ترى فيه أكثر من صديق. كانت دائماً القول أن الحُب اكبر من أن يُطلب أو يُهدى، الحب يُنتزع، الحب يُنتزع من عَشق انتزاعاً من حياته، لِيُلقي به في عالم جديد عليه، ليعود طفلاً يتعلم المشي من جديد، ولكن بمساعدة من أحب، بدلاً من أمه. وكانت نورهان دائماً تُردُّ إنها ستعيش وحيدة طوال عمرها في رحلة البحث عن فتى أحلام ولن تجده، لأنه يعيش فقط في خيالها وفي الروايات الكلاسيكية. ولكن هاهي ترى صديقتها تعود طفلة، تتحدث

بحماسة طفل اشترى له والده لتوه ملابس العيد. تتعلم المشي، حيث تراها لا تعلم كيف تتعامل مع هذا الإعجاب الذي اقتحمها دون إذن أو إنذار.

-عارفة يا نور.. في رجالة كده لما يفتحولك باب المطعم أو العربية.. تحسي إنه بيعمل كده بس علشان يبهرك.. بس دي مش طبيعته.. فاهمة حاجة؟ ولم تنتظر رد من نورهان، حيث إنها -غادة- في الحقيقة كانت تُحدث نفسها من خلال صديقتها، فهي تشعر بلذة غريبة حين تتحدث عنه، فأكملت:

-حسن حاجة تانية.. بيعمل كل حاجة كأنه هو اللي اكتشفها.. له طريقة خاصة في كل حاجة.. بتاعته لوحده.. بيعمل كل حاجة زي ما كتبه الخاص بيقول.. مش زي أي حد.. ساعات تلاقيه خجول بيتهرب بنظراته.. وفجأة تلاقيه بيفتحمك بقوة.. يفهم انا بفكر في أيه قبل حتى مافهمه انا شخصياً.. بيعس بيا وبضيقى وبيقدر من غير مجهود يخرّجني من المود الوحش وكأنها حرفة هو ابتكرها ومُسجلة بإسمه.. راجل بس مش خشن.. ناعم بس مش ملزّق.. هادي بس مش بارد.. حسّاس بس مش طري.. فاهمة حاجة؟؟

صمتت لثواني وتنهّدت وهي تنظر للأشئ تحديداً في محاولة منها لإسترجاع دقائقها معه، فقالت نورهان وهي مُتسعة

العينان:

-بصراحة انا مش فاهمة حاجة.. ازاي عمل فيكي كل ده وانتوا
أصلاً ماتكلمتوش غير في شغل وبس.

تنهدت عادة مُجدداً وقالت:

-تبقي مش فاهمة حاجة.

قالت نورهان وهي تضرب كَفَّ على كَفَّ:

-إذا كنتي انتي مش فاهمة.. هفهم انا؟؟

-تصدقي عندك حق.. انا فعلاً مش فاهمة.. ازاي...

رَنُّ هاتف غادة، فنظرت لساعتها، ولكن نورهان قفزت من
على السرير في اتجاه المكتب، وهنا أدركت غادة ما يحدث،
فقفزت بدورها في محاولة للوصول للهاتف قبل نورهان،
ولكنها تعثرت في طرف السرير وسقطت بدوي مثير للضحك
على الأرض. وصلت نورهان وهي تضحك للهاتف لتجد اسم
حسن يحتل شاشة هاتف غادة كما يحتل تفكيرها، فردت
دون تردد:

-ألوو.

-أيوة يا غا.. ألو؟؟

-أيوة؟؟

-مساء الخير.. انا حسن أقدر اكلم غادة من فضلك؟؟

-أه طبعاً طبعاً يا حسن ثواني؟؟

قالتها وهي تبعد يد غادة عن الهاتف، فوصل لحسن صوت
جلبة غير مُفسرة فانتظر صامتاً. استطاعت غادة أن تُخَلِّص

الهاتف من يد نورهان، وقالت بصوت حاولت عبثاً أن يبدو طبيعياً في ظل «بحلقة» نورهان فيها:

-أيوة يا حسن.. معلش دي نورهان صاحبتني كانت جنب التليفون.

قال حسن بصوت جامد:

-ولا يهمك.. انا متصل اقولك إن السفاح قتل تاني.

-نعم؟!!

-انا كنت مع عصام ناجي.. وجاله تليفون بكده.

-انت تعرف عصام؟!!

-أه من كام يوم.. المهم بس انا قلت ابلّغك.

-كتر خيرك.. انا بس لازم انزل اعطي الجريمة دي قبل عدد الصبح.

-ماشي.. بس خلي بالك من نفسك.. وحاولي تعرفي كل حاجة عن جريمة النهاردة دي.

-أكيد.. سلام.

بعد أقل من ساعة كانت غادة تطرق باب مكتب مجدي كارم، الذي كان مفتوحاً، فدخلت، لم تجده بالداخل. ولكن أنفها التقطت رائحة دخان سجائر في المكان. كان غادة تعلم جيداً أن مجدي كارم قد أفلح عن التدخين منذ فترة طويلة، ولكنه يحتفظ بعلبة سجائر في مكتبه للطوارئ، ليلجأ لها في حالات الضغط العصبي أو التوتر، وكأن الإضرار بالصحة هو

علاج التوتر والعصبية. ولطالما -بحكم صداقتها له وخوفها عليه- حاولت أن تقنعه ألا يحتفظ بسجائر إلى جواره حتى لا يستسهل التدخين، ولكنه أصر، فقررت وأعلمته إنها ستتخلص من أي سجائر تجدها معه كلما تراها حتى يقتنع أو يُفلس أيهما أقرب، ومنذ ذلك الحين وهو يحتفظ بها في خزانته، حتى لا تصل لها. وعندما لاحظت وجود دخان سجائر في هواء غرفة مكتبه، اتجهت بتلقائية لمكتبه فلم تجد السجائر في أدراجها، فاتجهت للخزينة، وأدارت ذراعها، فاستجابت لها الخزينة، حيث أن مجدي كان في عجلة من أمره، فلم يغلقها عندما الطقت سيجارته منها منذ دقائق، ولم يتوقع أن يتجرأ أحداً على فتحها، وخاصة إنها لا تحوي نقود أو متعلقات ذات قيمة مادية. فتحت غادة الخزينة، فوجدت علبة السجائر أعلى كومة من الأوراق، فلم تهتم في البداية سوى بالسجائر، فمدّت يدها لتلتقطها، ولكنها ملحت أطراف مظروف كبير يبدو عليه القدم، فساقها فضولها، مدت يدها ورفعت الأوراق التي تعلوه، لتجد كلمة واحدة مكتوبة عليه بجهاز كمبيوتر؛ «جرائمى».

تملّك منها خوف شديد، وعاد لذاكرتها دفاعه عن السفاح منذ أيام، ارتعشت يدها رغماً عنها، ولكن كونها صحفية، ففضولها لم يعطيها فرصة التقاط الأنفاس، ولم يتهاون معاها، نظرت خلفها لباب المكتب، فكان كل شئ هادئ هدوء

مُغري لأي صحفي يتميِّز بالفضول، وجدت نفسها تحت تأثير الفضول تزيح طرف المظروف بيد مرتعشة، لتحاول أن تُلقِي نظرة سريعة بداخله، وبالفعل تمكنت، حيث رأت صورة مطبوعة على ورقة جريدة قديمة لوجه قتيل، بالأرقام محفورة على جبهته التي تميِّز ضحايا سفاح الأرقام. شهقت عادة بصوت مكتوم، وتحركت بسرعة البرق بدافع الخوف أكثر من الحيلة، وأعدت كل شئ لمكانه، وتحركت في خطوات سريعة ناحية الباب، في اللحظة التي دخل فيها مجدي للمكتب مُسرِعاً. أجفل مجدي لأنه لم يتوقع أن يجد أحداً في مكتبه، توقف عند الباب للحظات، ونظر لغادة بدهشة، ثم نقل بصره بينها وبين الخزانة عدة مرات، ثم تحرك بإتجاه المكتب وأطفأ سيجارته، وهو يقول:

-بقالك أد أبيه؟؟

تلعثمت لثانية، ثم تماسكت وقالت بصوت مرتعش:

-لسة جاية حالاً.. كنت بشوف حضرتك فين.

نظر لها وقال وهو يتجه للخزانة ويفتحها:

-بالليل كده؟؟ ليه؟؟ في حاجة؟؟

ارتعشت عادة كمن يتعرض لتيار كهربائي وهي تراه يفتح الخزانة، وكادت أن تفقد توازنها، ولم تستطع أن تُجيب. نظر مجدي للخزانة، وعلت ملامحه نظرة ارتياح عندما وجد كل شئ في مكانه، فأغلق الخزانة وعاد لمكتبه وقال بشك:

-مالك يا غادة؟

بذلت هي مجهود خرافي لتسيطر على نفسها ولو قليلاً
لتقول:

-السف.. السفاح قتل واحد تاني يا مستر مجدي.

قام مجدي من خلف مكتبه وتوجه لها، والدهشة تكسو
ملامحه، وقال منفِعلاً:

-معقول؟!

وقبل أن يصل حيث تقف، عادت هي تلقائياً للخلف وهي
تنظر له بخوف، فلاحظ هو فزعها، فنسي ما كان ينوي قوله
وقال مُطمئناً، وهو يقترب منها بود:

-ماتخافيش يا غادة.. مالك؟؟ لو شايفة القضية ثقيلة عليكي
مممكن نادر يمسكها.. مالك يا بنتي؟؟ انتي بنترعشي!!

قالت بخوف:

-لا انا كويسة.. ماتديش القضية لنادر.. انا بس مخضوضة
شوية.. أول مرة احقق في جريمة زي كده.. بعد أذنك.

ودارت لتغادر المكتب، ولكنها توقفت لتشرح له موقفها
حتى لا يشك بها، فأضافت:

-انا هروح احاول اوصل لعصام علشان ينزل الخبر في عدد
بكرة.. وهشوف لو عرفت اجيب صور.. بعد أذنك. وغادرت
مُسرة.

لم يتحرك من مكانه لثواني ونظره مُعلقاً على باب مكتبه

الذي أغلقته عادة خلفها، ثم نقل بصره صوب المقالة
المعلقة على الحائط بجوار مكتبه وتنهّد بضيق.

ساعات الأربعاء الأولى ١٨ ديسمبر سنة ٢٠١٣

كانت عادة ترتعد وهي تخرج من سيارتها، والسبب كان بعيد كل البعد عن برودة القاهرة في ديسمبر. كانت بحكم عملها مُعرضة لمُقابلة مجرمين وبلطجية، وبرغم من إنها فتاة جميلة، وتبدو من النوع السطحي للبعض الذي لا يهتم سوى بالموضة والمظهر، كانت هي في الحقيقة ذات شخصية قوية جداً، وعنيدة على مستوى العمل. كانت ترفض تماماً أي محاولة من «ولاد الحلال» لمساعدتها في عمل يظنّوا إنها أضعف من أن تقوم به، مثل دخول المشرحة، أو مُجالسة مجرمين ومحاورتهم إذا اقتضى العمل ذلك، فكانت تقوم بكل شئ بنفسها، وعلى الوجه الأكمل ما استطاعت. ولهذا تمكنت من أن تحتل مكانة خاصة في جريدة لها اسمها في

الشارع المصري، في وقت قصير.

ولكنها اليوم لم تقابل مُجرم، أو قاتل متسلسل، أو حتى سفاح فحسب. اليوم اكتشفت إن رئيسها في العمل الذي عملت معه سنوات طويلة لم يكن هو هذا الرجل الذي تظَّنه. أن تكون قاتل فهو شئ مُقزز بالطبع، ولكن أن تستطيع إخفاء هذه الحقيقة بكل هذا الذكاء والبراعة، حتى على أقرب الناس إليك في العمل، الذي تقضي فيه معظم ساعات يومك هو شئ مرعب بالتأكيد.

كانت فكرة قدرته على التلوّن والتمثيل هي التي هزّت ثقة عادة في كل شئ، كل شئ تقريباً، فمجدي كارم كان يُعد أحد المُسلّمات في حياتها. وحدة قياس، تقيس عليه الكفاءة في العمل، والإخلاص، والمروءة، وها هي ترى كل لحظاتها معه أمام عينيها كأنها شريط سينمائي ولكن يدها مُلطخة بالدماء في كل المشاهد.

كانت ترتعد في انتظار حسن الذي لم يفهم منها عبر الهاتف حرف واحد وسط دموعها، وما أن اطمئن إنها بخير حتى طلب منها أن تنتظره حيث هي، فطلبت منه أن يقابلها بعيداً عن الجريدة، فاتفقا على الكوربة.

برغم من مرور ما يزيد عن ثلث الساعة على وقوفها وحيدة، وبرغم من إنها تمكنت من السيطرة على دموعها وانفعالتها بشكل كبير، ولكنها في اللحظة التي رأت فيها حسن ينزل من سيارته وعلامات الخوف عليها تنطق بها ملامحه، انهارت، وشعرت لثواني أن رجليها لا تستطيعان حملها، وكأنها كانت تنتظره ليحمل عنها ماتحمل من همٌّ ثقيل.

ولكنها في اللحظة التي تصوّرت إنها ستسقط، شعرت بحسن يلتقطها بين ذراعيه، وبرغم دقّة الموقف، وصعوبته، شعّرت بالأمان. فجأة اختفى الخوف، وحل محله الاطمئنان، هذا لم يوقف دموعها، دموعها زادت في الحقيقة، ولكنها كانت أشبه بدموع طالب كان واثق من رسوبه، في لحظة سماع خبر نجاحه، دموع ارتياح. اختبأت بداخله، احتواها، شعر من ضعفها إنها لا تملك غيره، فأراد أن يطمئنها، ولم يشعر بنفسه إلا وهو يحتويها.

بغت بصوت عالي، ضمّهما بقوة، فبغت أكثر. لم يحاول أن يفهم منها سبب كل هذا، كان كل اهتمامه مُنصب على هذه اللحظة، وهذا الشعور الذي يتملّكه، تلك اللذة التي تأتي مع عودة الروح لجسد جفّت مشاعره منذ سنوات. شعر بقلبه يخفق وكأنها أول مرة، شعر بروحه وهي تتسائل عما يحدث لهما. احتضنها وكأنها الدنيا، واختبأت فيه من الدنيا.

ولم يجروء أحداً منهم على إيقاف تلك المقطوعة الصامتة التي تُعزف، حتى بعد أن بدأت الأمطار في الهطول، وكأنها أرادت أن تشارك في تلك اللحظة بما تستطيع، لم يتحرك، ولم تتحرك، وكأنهم خارج الزمن.

ساعات الأربعاء الأولى ١٨ ديسمبر
سنة ٢٠١٣

يصل عصام ناجي لمسرح الجريمة الذي شهد الجريمة الثانية للسفاح بعد عودته من رحلة غياب استمرت لثمان سنوات. كانت المنطقة تشبه كثيراً منطقة مسرح الجريمة السابق، وإن كانت الشوارع أوسع نسبياً. كان المنزل يقع في أحد الشوارع المتفرعة من شارع مصر والسودان.

لم يكن أيّاً من فريق البحث الجنائي أو الطب الشرعي قد وصل لمكان الجريمة بعد، حيث وصل هو سريعاً لقرب المكان من وسط البلد. طلب عصام من الأمين رأفت أن

يَخلي له مدخل الشقة من أقارب الضحية الذين يسكنون على بُعد دقائق سيراً من منزله، حتى يتمكن من فحص مسرح الجريمة بهدوء.

وقف عصام كعادته بعد أول خطوة له داخل الشقة، ونظر حوله في كل الإتجاهات، بحثاً عن أي شئ في غير موضعه، فلم يجد. كانت الشقة متوسطة المساحة، بمجرد أن تدخل تكون مائدة طعام في مواجهتك، عليها طبقة رقيقة من الأتربة، التي لم تُمس، مما يشير لعدم وجود ربّة منزل غالباً، وأيضاً إلى أن القاتل لم يلمسها، وإلا كان ترك علامة في وسط الأتربة. إلى اليسار توجد ردهة طويلة تصل بعد خطوات للحمام والمطبخ، الذي لم يجد فيهم عصام أي دليل على دخول القاتل إليهما.

في مواجهة باب الشقة يوجد باب كبير خشبي، فتحه ليجد نفسه في غرفة الضيوف، ليجد أول دليل على وجود القاتل، فقد كانت الطاولة التي في منتصف الغرفة في غير مكانها المعتاد، حيث أن الطاولات بعد بقائها لفترة طويلة في نفس المكان، تحفر كل قدم مكانها في السجادة تحتها، وهي علامة يصعب إزالتها كالذنب. وكانت الطاولة تبعد مسافة نصف قدم عن موقعها التي اعتادت أن تكون فيه، رفع عصام بقبضة يده وهي مُغطاه بمنديل ورقي الطاولة، ليتأكد أن

ظنه كان في محله، حيث أن أقدام الطاولة بالكاد تركت علامة سطحية على السجادة، مما يؤكد إنها -الطاولة- في هذا المكان منذ ساعات فقط. دار بصره في الغرفة فلاحظ أن ثمة عدم انتظام في وضع أحد الكراسي أيضاً.

خرج عصام ودخل الردهة الطويلة الأخرى التي تقود لغرفة النوم، كانت الغرفة الرئيسية هي الوحيدة مفتوحة الباب، فدخل ليرى نفس المشهد الذي أصبح يراه في كوايسه ليلاً. صاحب المنزل شاحب الوجه، في نفس وضع ضحايا السفاح الذين سبقوه، وقد كُسرت مرآة الغرفة، وجزء منها مُلقى بلا عناية على صدره، وبالطبع محفور على جبهته، انعكاس تاريخ (١/١٢)

خرج عصام من الشقة بعد نصف ساعة من الفحص، ليجد مُعاوني المباحث في انتظار انتهائه من جولته، ومعهم الرائد هادي، الذي تبدو عليه علامات الجديّة والانفعال، حيث إنها أول مرة يعاين مسرح جريمة من جرائم هذا السفاح على الحقيقة، فلقد قرأ عنه كثيراً، ولكن التجربة الحية شئ آخر.

أشار عصام لرأفت الذي كان يقوم بدور المُنظّم للمكان، وسأله:

-أيه يا رأفت؟؟ احكي.

قرأ رأفت من ورقة في يده عدة معلومات تحصل عليها:
-قناوي الشيخ.. ٥١ سنة.. تاجر فاكهة.. عنده محل كبير
تحت البيت هنا.. بس هو في الحقيقة تاجر صنف.. حشيش
وبانجو وأفيون وأقراص والذي منه.. متجوز وعنده ٧ عيال..
محدث منهم قاعد معاه.. ومراته في السجن.. واخدة ٣ سنين
في حيازة مخدرات.. اللي ماسك شغله وبيراعيه سعيد ابن
اخوه.

قال هادي:

-بعد أذنك يا عصام بيه هدخل أعين الجثة.
أوما عصام برأسه إيجاباً، وهو يسأل رأفت:
-مين اللي لقي الجثة؟
-سعيد ابن اخو القتيل.. كان القتيل موصي...
قاطع عصام بإشارة من يده قائلاً:
-خلاص يا رأفت.. ابعتهولي أسمع منه.. وهاتي كوباية الشاي
التقيل بتاعة كل مرة.

جلس عصام وتابع رأفت بنظره ليعرف من هو سعيد،
تعرف عليه عندما وجه له رأفت كلامه وهو يشير في اتجاه
عصام، فحسه عصام جيداً وهو يقترب منه، ولاحظ ارتبائه
وخوفه الشديد من عصام، فتذكر مقولة حسن «الكلام ده
منطقي في أي دولة في العالم.. في مصر الموضوع مختلف..
الناس بترتاح في الكلام مع المدنيين اكرت بكتير من الحكومة..

ده غير إن انا الناس بتثق فيّ بسرعة»، فابتسم، وتمنى أن يكون صديقه حسن معه في التحقيق ليحلّ له القضية كما حلّ قضية السرقة في ثواني. أشار عصام لسعيد أن يجلس قبالته في الردهة المواجهة لباب شقة القتل على كرسي خشبي من النوع المُستخدم في القهاوي في تلك المناطق، فجلس، اعتدل عصام وهو يشعل سيجارته، ونظر لسعيد باسمًا، وقال:

-مساء الفل يا سعيد.. أيه ياعم مالك مخشّب كده؟؟

قال سعيد بصوت حزين مرتجف:

-يا بيه ولا مخشّب ولا حاجة.. الله يرحمه بس كان أبويا الثاني.

سأله عصام بهدوء وهو ينظر له بشك:

-وهتورث فيه طبعاً.

لم يرد سعيد، وإن ظهرت علامات الغضب على ملامحه،

وتسارعت أنفاسه، فأكمل عصام:

-احكي لي بقي.. أيه اللي جابك هنا بالليل كده؟؟

-الحاج كان موصيني اجيله شوية حاجات بعد الشغل على

هنا.

-حاجات زي أيه؟؟

-أدوية سكر يا بيه.. والكيس مع الواد ابني. قالها وأشار

لطفل يقف بعيداً مع بعض رجال الحي المتطفلين.

نظر عصام للطفل لثواني، ثم قال لسعيد وهو يلتقط كوب

الشاي من رأفت:

-عايزك تحاول تفكر كده أي حاجة غريبة حصلت يوم ١ الشهر ده.. كان... ورفح عينه لأعلى لثواني، ثم أكمل:
-كان يوم الأحد من ٣ أسابيع.

عقد سعيد حاجبيه وكأنه يحاول أن يتذكر، ثم قال:
-لا والله يا بيه مش فاكّر حاجة.

-أي حاجة يا سعيد.. حاول تساعدني.. افكر.

ظهرت علامات التفكير على سعيد لثواني، ثم قال مُستسلماً:

-والله يا بيه الكذب خيبة.. انا بالعافية بفكر يومين فاتوا..
ليه يا بيه بتسأل ع اليوم ده بالذات؟؟

أكمل عصام دون أن يلتفت لسؤال سعيد في إشارة غير مباشرة
لأنه هو الوحيد الذي يطرح الأسئلة:

-شوف يا سعيد.. انا هنا بحقق في جريمة قتل.. ما بهمينيش
أي حاجة تانية.. دالوقت على الأقل.. ممكن تقولي مين من
مصلحته يقتل عمك؟؟ حد اشترى منه بضاعة مش تمام..
اختلفوا على فلوس.. حد علّموا عليه وسلّموا للمخبرين
بحاجة وهو خارج من عندكم.. أي حاجة.. افكر.

نظر سعيد للأرض لثواني، وقد وصلتته رسالة عصام، فقال
بصدق:

-والله العظيم يا بيه الحاج كان في المنطقة هنا.. وفي الكار..
زي الجنية الذهب.. عمره مازعل حد منه لدرجة القتل.. ولا
حصلت حاجة من دي قريب خالص.

-ماشي يا سعيد.. روح شوف اللي وراك وعدّي علينا في القسم

بكرة علشان نكتب المحاضر.. وعاييز معاك كل اللي شغالين
في المحل معاك.. وقرابيك اللي ساكنين قريب من هنا مبدئياً.
كان هادي ومعاوني المباحث قد انتهوا من فحص مسرح
الجريمة، فقام عصام وقال لهادي:

-وصلتوا لحاجة؟؟

-واضح أن في خناقة حصلت في الصالون.

قال عصام مؤكداً:

-ده صحيح.. وده معناه إن اللي قتل يعرف القتل.. علشان
يدخله الصالون.

قال هشام:

-تفتكر إن اللي عمل كده بيقلّد السفاح واستغل ظهوره تاني
عشان يخلص من القتل ده؟؟

قال عصام بضيق:

-انا ما فتكرش حاجة.. القضية كده بتقل كل جريمة..
والمفروض العكس.

ثم زفر بضيق وقال:

-بس احنا مبدئياً زي ما حنا.. انا ورامي شغالين على الجديد
بما فيهم قضية الليلة دي.. وانت وهادي شغالين على القديم
يمكن توصلوا لحاجة.

ثم وجه كلامه لرامي وقال:

-عايز القضية دي يتحسم فيها الكلام في خلال يومين يا
رامي.. لو حد من معارف القتل بيقلّد السفاح لازم نجيبه

في يومين علشان نرجع نشتغل على القضية الكبيرة.. أو نتأكد
إنه السفاح وبكده يبقى لقينا أول الخيط للقبض عليه.

سأل رامي:

-ازاي؟؟

-لو السفاح هو الي قتل الليلة دي يبقى أخيراً قتل حد
يعرفه.. وهتبقى مسئوليتنا نعرف هو مين من معارفه.. ودي
حاجة ماحصلتش قبل كده.

ثم نظر في اتجاه الشقة وقال وكأنه يُحدث نفسه:

-يمكن تكون دي الغلطة الي هتوقَّعه.

ساعات الأربعاء الأولى ١٨ ديسمبر سنة ٢٠١٣

كانت الأمطار قد بدأت تهطل بشدة، وبدء صوتها يطغى على صوت بُكاء غادة، التي كانت لاتزال متشبثة بحسن وكأنه القشة التي ستنقذها من غرق مؤكد ووشيك.

تراجع حسن بلطف، ونظر في عيني غادة، ومسح بيده اليمنى خصلات شعرها التي كانت تغطي جبهتها وجزء من عيناها الجميلتان. فرفعت يدها وأزاحت خصلة من شعرها خلف أذنها اليمنى، ونظرت لعيناه، وكأنها تطلب منها أن تحتويها، ليزول خوفها من كل شيء. كانت يدها خلف ظهرها، ويداها على كتفيه، والبكاء هو الثابت الوحيد منذ قابلته حتى اللحظة، هو وتلك النظرة التي استمرت لدقيقة كاملة،

برغم البرودة والأمطار.

فكل شئٍ تغيّر في تلك الدقائق للأبد؛ شعورها به، وشعوره بها، وخوفها الذي زال بين يديه، وروحه التي عادت معها، فهو لم يشعر منذ زمن بعيد بحاجة أحد له لهذه الدرجة، أن تعتمد عليه فتاة لهذه الدرجة، وأن يشعر بضعفها، وإنه مصدر قوّتها، وهو شعور أجمل من أن يوصف في كلمات. وهي لم تشعر بكل هذا القدر من الأمان منذ توفي والدها، وكانت ترى في مجدي البديل المؤقت، حتى انهار كل شئٍ أمامها منذ ساعة، فلم تجد إلا حسن، الذي لم يتأخر. ابتعد حسن خطوة للوراء، فتشبّث به تلقائياً خوفاً من أن يضيع -إحساس الأمان- بعد أن استعادته، ولكنه ابتسم مطمئناً، ودفعها بلطف بيّمنه في اتجاه سيارته، فسارت معه كالمسحورة.

فتح باب سيارته، وأجلسها وأخذ منها مفاتيح سيارتها، وذهب إليها، ركبها وصفّها بجوار الرصيف، وأخذ منها حقيبتها وهاتفها وأغلقها وعاد لسيارته، وضع مُتعلقاتها على الكنبة الخلفية، وأدار السيارة، وقال بصوت حنون وهو يتحرك:
-الوقت اتأخر قوي.. انتي لازم تروّحي.

أومأت برأسها إيجاباً وهي تنظر له في محاولة منها لفهم ما حدث منذ ثواني، وهل يشعُر هو بمثل ماتشعر به. ابتسم

لها حسن بحنان، وقال:

-قادرة تتكلمي؟؟

قالت بصوت ضعيف:

-انا آسفة لو ك...

قاطعها بإشارة من يده وقال:

-ماتقوليش كده تاني.. أبداً.

-حاضر. قالتها وهي تمسح دموعها، وسألت:

-انت رايح فين؟؟

فضحك وقال:

-مانا مش عارف انتي ساكنة فين.. فبتمشى على ماتقولي.

ابتسمت وقالت:

-في الضاهر.

فابتسم لأنها تسكن في المنطقة التي تربى وعاش بها طفولته.

وقال:

-مممكن بقى تطميني وتقوليلي مالك؟؟

تذكرت ما كانت نسيته لثواني، فعقدت حاجبيها، وكسى

الحزن ملامحها، وقالت:

-مستر مجدي هو السفاح يا حسن. ولم تتمالك نفسها،

فبغت مُجدداً، وقالت وهي تبكي بحرقة:

-مستر مجدي هو اللي قتل مراتك يا حسن.

نظر لها حسن بلامح تكسوها الدهشة والإستغراب، ولم

يستطع التفوه بأي شئ للحظات وهي تبكي. وبعد لحظات من الصمت تمالك نفسه وقال بشك:
-ممكن تهدي شوية وتفهميني أيه الحكاية؟؟
قالت وهي تحاول السيطرة على دموعها:
-النهاردة بالصدفة فتحت خزنته وهو برة.. لاقيت ظرف مكتوب عليه جرائمى فى خزنته.. بصيت فيه بسرعة قبل ما يرجع المكتب لاقيت صورة واحد من اللي قتلهم السفاح.. وكان ميان صور وورق.. بس مالحقش اشوف حاجة تانية. نظر حسن أمامه، وظل جامداً كالحجر، وهو يستمع إليها، وبعد أن انتهت وصمت لترى ردة فعله، أغمض عيناه لثواني وكأنه يحاول أن يهرب من شئ رآه أمامه، أو شعور انتابه، ثم تنهد بضيق واكتفى بالصمت.

بعد دقائق مرّت بطيئة، كحركة المرور فى القاهرة وقت الذروة، أوقف حسن سيارته عند منزل غادة، وقطع الصمت الثقيل وهو يعتدل بتهيئة طويلة تحمل همماً ثقيلاً، وقال:
-الى انتى شوفتية مش معناه إن مجدى هو السفاح.. انتى نفسك قولتى إن الظرف كان ميان.. وانتى ماشوفتيش منه غير صورة واحدة.. ازاي ده دليل كافي؟؟
قالت وكانت قد توقفت عن البكاء تماماً:

-مش الصورة بس يا حسن.. يوم ال Interview كان بيقول حاجات مافهمتهاش إلا النهاردة.. قال إن السفاح ضعف اودام

نرجسيته.. وإنه توقف عن القتل ندماً على خطيئته الي
هي الضعف ده.. وكان بيتكلم كأنه عارف السفاح ومذاكره.
أغمض حسن عيناه لشعوره بالمرارة وهي تتحدث عن مقتل
زوجته، فأدركت عادة مشاعره، فقالت وهي تمد يدها للباب:
-انا آسفة يا حسن.. انا مكانش المفروض اكلمك انت خالص
في الحكاية دي.. سامحني.. واعتبر الل...

قاطعها حسن بنظرة لوم واضح، فقطعت كلامها ونظرت له
بتأنيب ضمير، فقال:

-انا مش قلتك ماتقوليش كده تاني؟؟

-انا آس... ولكنها قطعت كلمة الآسف ونظرت لجهة الباب
المجاور لها هرباً من لومه. فقال:

-انا فكّرت كويس.. وإن بعض الظن إثم يا عادة.. ماينفعلش
نتّهم راجل زي ده بحاجة زي دي إلا لما نتأكد.

-وهنتأكد ازاي؟

-انا فكّرت في الحكاية دي واحنا في السّكة.. ومفيش غير
طريقة واحدة.

قالها وصمت، فنظرت له بتساؤل، فأكمل بطريقة من اتخذ
قراره بالفعل:

-هنسرق الظرف.

oboiikan.com

صباح الجمعة ١٧ نوفمبر سنة ٢٠٠٥

الدكتور وسام حجازي، أخصائي أمراض النساء والتوليد، يدخل المستشفى الذي إعتاد أن يجري فيها عمليات الولادة صباحاً، يتسم بـود لعائلة سهام، التي حدد لها تاريخ اليوم لتلد قيصريةاً، تجنباً لمتاعب حمل متوقعة في حالة إنتظارها حتى تحدث الولادة طبيعياً.

غاب لفترة ليست بالقصيرة داخل غرفة العمليات، لتخرج ممرضة تدفع الجنين على عربة مُتحركة، وهي تطلب من أهل سهام أن يسمحوا لها بالمرور سريعاً، لحاجة الجنين الدخول فوراً للحضانة، لعدم اكتمال رئتيه بعد.

السبت ١٨ نوفمبر سنة ٢٠٠٥

سفر الدكتور وسام لفرنسا، لحضور حفل زفاف ابنته.

الأحد ١٩ نوفمبر سنة ٢٠٠٥

وفاة طفلة سِهام، بسبب عدم اكتمال رتبتها. الطفلة التي كانت اختارت لها سِهام اسم سما، الذي استغرقها إقناع زوجها به، ٣ شهور كاملة من الزمن.

الأربعاء ١٨ ديسمبر سنة ٢٠١٣

-صحّ النوم يا أستاذ. قالتها عادة لحسن بمرح، بمُجرد أن
أجاب اتصالها.

فابتسم وقعد على طرف السرير، وقال بصوتٍ مازال نائماً:

-ربنا يسامح بقى الي سهّرنى للصبح.

قالت بصوتٍ ملئ بالحنان:

-انا مش عارفة انت ازاي كده.. مش قادرة افهم بجد.. أيه

الي خلاك تجيبلي العربية تحت البيت؟؟ وأيه الي انت

عملته في ماما ده؟

-عملت أيه؟!!

-ماعرفش.. بس هي الصبح وهي بتديلي مفاتيح العربية..

كانت بتديلك.. انت سحرت لها؟؟ وضحكت بسعادة

واضحة.

قال حسن وهو يبتسم:

-سحر أياه بس؟؟ انا استنيت الصبح جه وطلعت سيبتلك المفاتيح واتطمنت عليكي منها.. وشربت كوباية شاي زي العسل من أيديها ونزلت.. بس كده.

ابتسمت غادة بسعادة لم تعهدها منذ فترة، وقالت:

-مش عارفة اشكرك ازاي بجد.

-بطلي تقولي شكراً وانتي تبقي كويسة.

-ربنا يخليك ليّ. قالتها وابتسمت بخجل برغم إنه لا يراها.

فابتسم كأنه يراها ولم يُجيب، فقالت للهروب من الخجل:

-انا عملت اللي اتفقنا عليه.. كلمت عصام كتر خيره بعثلي صورتين لجريمة امبارح.. وكتبت موضوع نزل صفحة أولى.. ولمحت فيه زي ماتفقنا إن اللي بيقتل ممكن يكون مش هو نفسه قاتل زمان.

-واضح أن فاتني كتير فعلاً.. طب وأيه أخبار مجدي؟؟

-النهاردة كنت طبيعية جداً وناقشته في كل حاجة ومفيش

حاجة بانتي عليّ خالص الحمد لله.. ودالوقت لسة خارجة

من مستشفى التكامل بتاعة هبة.

انتبه حسن وأنصت بكل حواسه وهي تكمل:

-مش عارفة يا حسن.. بس مش مرتاحة.

-ازاي؟؟

-كل زميلاتنا مايعرفوش عنها حاجة.. كلهم بيقولوا إن أول

الشهر مشيت بدون سبب.. في ال HR المدير قال إنها طلبت

تمشي بعد قبض شهر نوفمبر.. سألته كتبت استقالة قاللي لا.

-طب وبتقولي مش مرتاحة ليه؟؟

-أصل تحسهم واخدين تعليمات مايتكلموش في الموضوع.

-مممم يبقى غالباً شكوي في محلها.

-اللي هي أيه؟؟

-اصبري عليّ بس اتأكد وهقولك.. بلاش نتسرّع.

فكّر لثواني ثم قال:

-عندك تفاصيل جريمة امبارح؟؟

-كلها في الجرنان.

-تمام.. هشوفه.

قالت عادة بلهفة وقد أدركت إنه أوشك أن يُغلق الخط:

-هتعمل حاجة النهاردة؟؟

صمت لثواني، فتداركت:

-اقصد علشان القضية يعني.

ابتسم وقال:

-انا هنزل كمان شوية اشرب القهوة في النادي.. وبعدين

هحاول اوصل لمعلومات بخصوص جريمة امبارح. ثم أكمل:

-انتي هتعملي أيه دالوقت؟

-مش عارفة.

قال مازحاً:

-انا عارف.

بعد ساعتين كان حسن ينتظر عادة أمام باب النادي، قابلها بإبتسامة مختلفة تحمل من اللفتة والإعجاب الكثير بغير مواراة. وما أن اقتربت حتى تقدم منها وقال:

-انتي احلويتي كده إمتي؟؟

ضحكت بخجل ورفعت خصلة خلف أذنها اليمنى، وقالت:

-متشكرة.. بس مش قوي كده.

أفسح لها الطريق لتقدمه، وقال:

-هو قوي.. بس الي تشوفيه.

ابتسمت بخجل، وصمتت، حتى لمحتة يتأمل ملامحها وهو يسير بجوارها، فنظرت له لترى ابتسامة تكسو ملامحه، لم تراها منه قبل اللحظة. كانت ابتسامته عذبة كصوت الطيور بعد الفجر، وعيناه كانتا تتأملها بشغف، كان كأنه لا يرى سواها. لم تجرؤ على أن تحوّل نظرها عن عيناه ولو لثانية، مما أجبرهم على التوقف تلقائياً دون اتفاق، حتى لا يصطدموا بشئ يقطع تلك اللحظة، التي تمّنوا أن تستمر للأبد.

وكان الزمن استجاب؛ توقف كل شئ حولهم لثواني، خفتت أصوات كل شئ، غابت التفاصيل حولهما وبقي كل منهم فقط أمام عين الآخر. بدء قلب عادة رغماً عنها يدق بقوة، وتسارعت أنفاسها، وكانت تتمنى أن ترمي في حزن هذا الرجل، الذي قالت عيناه كل الكلام دون أن يتحدث. ولكنه

لم يكتفي بكلام عيناه، وقطع الصمت الجميل بصوت أجمل
قائلاً:

-اسمحي لي. ومدّ يده وأمسك يدها اليسرى، فمدّت يدها
بتلقائية، كعادتها عندما تخجل، لترفع خصلة من شعرها
خلف أذنها اليمنى، ولكنه أمسك يدها اليمنى وأعادها إلى
جانبها، ونظر في عينيها ورفع هو بيده الخصلة التي تهرب
منه إليها كل مرة، فسألت بلهفة طفل ينتظر قرار النزهة
من والده:

-انا مش عارفة انت ازاي كده.. مش عارفة اقولك أيه.

صمتت ولكن تكلمت عينها، سألته دون صوت إذا ما كان
يشعر نحوها بأي شيء، وصله تساؤلها فابتسم وقال بكل
حنان الدنيا:

-ماتقوليش حاجة يا غادة.. ماتقوليش حاجة.

بعد دقيقة كاملة من صمت الكلام، الذي لا يعني بالضرورة
الصمت الكامل، سحبها من يدها وسار بها في اتجاه مائدته
المفضلة ليجد أن أحداً سبقه إليها. عقد حاجبيه في محاولة
تذكر متى كانت آخر مرة حدث هذا الموقف، فلم يستطع.
هل هي إشارة أن حان وقت تخطي الماضي؟ هل تأتي
الصدف بهذه الدقة؟ قال مُحدثاً نفسه.

جلس حسن بعد أن اختارت غادة مائدة أخرى، وقال وهو

يبتسم:

-عايز اتفق معاكي على حاجة.

-ها؟؟

-مش عايز اشوفك خايفة تاني زي امبارح بالليل.

تنهدت عندما تذكّرت ما رأّت، وقالت:

-انت ماتعرفش مستر مجدي بالنسبة لي أيه يا حسن.. لو

تعرف هتُعدّرني.

-انا عارف.. وعاذرك.. بس ماتنسيش إنك مستعجلة في

حُكمك.. وكمان مهما كان الي مخوِّفك مش عايزك تخافي..

طول مانا موجود مش عايزك تخافي.. انا مش هسمح لأي

حد يأذيكي طول مانا عايش.. أوعدك.

قالت بصوت خافت:

-حاضر.. مش هخاف.

ابتسم وقال:

-جاهزة؟؟

عقدت حاجبيها بإستغراب وقالت:

-لأيه بالظبط؟؟

-نسرق الظرف.

اعتدلت واقتربت منه وقالت:

-انت مش ملاحظ إنك بتتكلم على موضوع سرقة الظرف ده

كأنك بتعزمني ع السينما؟؟

ابتسم واقترب منها بدوره وقال:

-عايزاني اعزمك على السينما؟؟
ضحكت وهزّت رأسها يميناً ويساراً في تعجب واضح:
-يا عم انا بتكلم في آيه وانت بتتكلم في آيه؟؟
-انتي مكبرة الموضوع على فكرة.

جاء عم عفت حاملاً صينية عليها ما طلباه في مرّتهم السابقة
دون أن يطلبوه اليوم، وقال مخاطباً عادة:
-انا جيت قهوة لسعادتك في كوباية زي المرة اللي فاتت..
تمام كده؟؟

-تسلم ايديك يا راجل يا طيب. قالتها بود.
فقال عم عفت:
-عم عفت يا بنتي.. اسمي عم عفت.. حسن بيه ده تربيتي
على فكرة.

-ربنا يديك الصحة يا عم عفت ويخليك ليّ. قالها حسن
وهو يقف ويضع يده حول كتف عم عفت، وقال لعادة:
-النادي ده كان لا يمكن اعتبه لو الراجل ده مش فيه.
-ربنا يديم المحبة يابني. قالها عم عفت وغادر ونظارتها
المُحبة تطارده.

اعتدل لها حسن وقال:

-جاهزة؟؟

قالت وهي تعيد كوب القهوة مكانه:

-جاهزة.. ممكن تقولي مطلوب مني آيه؟؟

-توصيفي مكان مكتب مجدي بالتفصيل.. وتخليه يسيب
المكتب نص ساعة بس.
-طب وانت هتعمل أيه؟؟ دي خزنة مقفولة ومكتب
وسكرتيرة وصحفيين.
قاطعها وقال:
-خليكي في الي مطلوب منك.. لو عرفتي تبعديه عن مكتبه
نص ساعة.. انا هعرف اجيب الظرف.
-اتفقنا.. بس أمانة تخلي بالك من نفسك.
-ماتقلقيش عليا.. يالا بينا.

الأربعاء ١٨ ديسمبر سنة ٢٠١٣

وصلت غادة عند المبني الذي يحوي في طابقه السابع المكتب الرئيسي لجريدة الملامح المصرية في منطقة وسط البلد. تركت سيارتها للرجل الذي يتولى المهمة المستحيلة؛ وهي البحث عن مكان للسيارة، كما هي العادة في تلك المنطقة المتكدسة بكل شئ.

كان حسن يتبعها في سيارة أجرة طوال الطريق من النادي للجريدة، نظرت له وهي تعبر الطريق، ولم تمنع نفسها من الابتسام للشخص الذي شعرت تجاهه بمشاعر لم تصدق وجودها سوى في الروايات الرومانسية. ابتسم لها بدوره وطلب من السائق أن يتوقف بعد ثواني من مروره أمام المبني، وتابعها بنظره وهي تدخل المبني. وقف مكانه

لدقائق ثم توجه للمبني بدوره.

كان نبض غادة متسارعاً للغاية، وكانت تجاهد حتى لا يبدو عليها التوتر الشديد الذي تعانیه. خرجت من المصعد واتجهت مباشرة لمكتبها وتركت عليه حقيبتها، وتوجهت لمكتب مجدي كارم وأطرافها ترتعش من التوتر، وكأنه سيُدرِك ما تنتويه بمُجرد رؤيتها.

كان باب المكتب مفتوحاً، فدخلت دون استئذان، كان ينهي مكالمة هاتفية، وقابلها بابتسامة ودودة وقال:
-الموضوع بتاعك ممتاز يا غادة.. وكمان عجبني تبنيكي لفكرة إنه حد بيقلد السفاح.
قالت وقد ساعدها تشجيعه لها على التماسك، فخرج صوتها متماسكاً:

-مبسوطة إنه عجبك يا مستر مجدي.. انا معطلاك عن حاجة؟؟
أشار لها أن تجلس وقال:
-لا أبدأ.. انفضلي.

-انا كنت عايزاك من فضلك تيجي معايا على مكتبي عايزاك تشوف حاجة مهمة.. ومش عارفة اجيبها لك هنا.. دقائق بس.

تعجّب لثواني، ثم قام قائلاً:

-ماشي يالا بينا.

سبقت مجدي في اتجاه مكتبها، ونظرت في ساعتها لتبدأ حساب النصف ساعة التي طلبها منها حسن، ثم توقفت في وسط الطريق وقالت له بصوت خفيض:

-انا عرفت معلومات جديدة عن القضية يا مستر مجدي..
وكنت عايزة اسأل حضرتك رأيك أيه.

-رأبي في أيه بالظبط؟؟

-يعني تنصحني اعمل أيه؟؟ اسلمها للشرطة؟؟ ولا اعمل بيها
سَبق عندنا الأول؟؟
عقد حاجبيه، وسأل:

-وانتي متأكدة إن الشرطة ماتعرفهاش؟؟
-بنسبة ٩٠٪ متأكدة.

-طب هي أيه المعلومات دي؟؟ مدى خطورتها وتأثيرها على
القضية؟؟

قالت وهي تكمل السير في اتجاه مكتبها:
-هتقلب القضية كلها.

-لدرجة دي؟؟ قالها متعجباً

وصلت لمكتبها وفتحت حقيبتها، وأخرجت منها كراستها التي تستخدمها باستمرار، وقلبت صفحاتها، ثم افسحت له المكان وطلبت منه الجلوس، فانصاع. وبعد أن أصبحت تسد عليه

طريق الخروج، قالت بإنفعال مفتعل:

-في واحدة تانية اتقتلت قبل داليا.. بس اللي قتلها محترف.. غالباً هو اللي قتل داليا.. وخلى الحادثة تبان إنها وقعت في النيل وغرقت.. اسمها هبة.. اللي قتل هبة هو اللي قتل داليا هو اللي قتل تذاكر.. ولبس تذاكر قضية داليا.. والسفاح قضية تذاكر وخرج منها زي الشعرة من العجين.

كان مجدي كارم مذهولاً من كم المعلومات الخطيرة التي تعرفها غادة، ومُشتتاً من كثرتها، فقال:

-واحدة واحدة بس.. انتي عرفتي كل ده مين؟؟

ردت غادة وقد اندمجت مع انفعالها المفتعل، وزاد من اندماجها انبهار مجدي بعملها، فأكملت بانفعال حقيقي: انا اتعرفت على مصدر خطير في القضية دي.. وكل ده عرفته منه في قاعدة واحدة. ورفعت خصلة خلف أذنها اليمنى عندما ورد ذكر حسن.

فسأل مجدي:

-واتأكدتي من المعلومات دي.. لا يكون بيضلك.

ابتسمت بثقة وقالت:

-عيب عليك يا مستر مجدي.. دانا تربيتك.

فقال وهو يقف:

-طب ما...

قاطعته حتى لا يغادر قائلة:

-ماقولتش اعمل أيه من وجهة نظرك؟؟ ابلخ عصام بالي

عرفته؟؟ ولا أيه؟؟

رَنُّ هاتف مجدي المحمول، فنظر له، وقال:

-تعالى معايا يا غادة نكمّل كلام فى المكتب.. علشان لازم اخذ التليفون ده فى مكبتي.

قالها وتخطاها وهو يرُدّ على المكالمة دون أن تجد أي فرصة لتعطيله، هرولت خلفه ونظرت للساعة لتجد إنها اعطت حسن أقل من نصف المهلة التي طلبها، ولكنها لم تستطع التدخل ومجدي يتحدث عبر الهاتف وهو يسير بخطوات سريعة في اتجاه مكتبه. فقررت الذهاب خلفه للتدخل بأي شكل كان عندما يجد مجدي أن هناك غريباً يعبث بخزينته.

وصل مجدي لباب مكتبه، ومد يده ليفتح الباب، أو شك قلب غادة أن يتوقف من التوتر والخوف.

دخل مجدي كارم لمكتبه، وجلس على كرسيه، وهو لا يزال يتحدث عبر الهاتف، قلب بعض الأوراق أمامه على مكتبه، لها علاقة بالمكالمة المهمة، التي منعتة من أن يلاحظ شحوب وجه غادة، وتلفتها يميناً ويساراً في المكتب بحثاً عن حسن، الذي كان لا أثر له في المكتب، فنظرت للخزينة لتجدها مغلقة كما هي في الظروف الطبيعية.

غادة في الحقيقة كانت تقف على بُعد متر واحد تقريباً عن مجدي، ولكنها لا تسمع أي شيء يقوله، لا تسمع سوى دقات قلبها الذي يكاد أن يصرُخ رفضاً لكل هذا الكمّ من الأدرينالين الذي اندفع عبر عروقهها.

فَزَعَت غادة وسقطت منها كراستها، عندما أنهى مجدي مكالمته ونادى عليها بصوت عادي لا يتناسب مع ردة فعلها، فقام مجدي ودار حول مكتبه مُتجهاً إليها، وقال:
-مالك يا غادة؟؟

نظرت له وهي تتحني لتلتقط الكراسية، وقالت بصوت مُرتعش:

-ما ما مافيش يا مستر مجدي.. القضية دي بس موتراني.

-طب اقعدني طب واهدي.

قالت وهي واقفة، لأنها في الحقيقة تريد المغادرة لتحاول أن تطمئن على حسن:

-انا ورايا شوية حاجات.. وهاجيلك تاني على طول.

فسأل مُتعباً:

-طب وأيه اللي كنتي عايزاني اشوفه على مكتبك؟؟

-حاجات ع الإيميل.. بس مش مهم دلوقتي.. بعد أذنك. ثم

خرجت وتركته مُشفقاً عليها من الضغط الذي تتعرض له

بسبب القضية التي تعمل عليها.

اتصلت عادة بحسن وهي تُسرِع الخُطى في اتجاه مكتبها، ولكنها توقفت قبل مكتبها بخطوات عندما رأته واقفاً بكل هدوء أمام مكتبها، يبدو عليه الملل من طول انتظارها.

اتسعت عيناها وهي تتجه إليه وتنظر حولها في حركة لا إرادية، حيث يشعر المرء وهو يقوم بأي عمل خاطئ أن كل من حوله يعرفون ما يخفيه وينظرون له. قال هو بمجرد أن أصبحت أمامه:

-امسكي نفسك شوية علشان انتي ناقص تعترفي.. بس تصدقي إنك بتحلوي زيادة لما بتتوتري؟
تتهدت عندما اطمانت من كلامه ومظهره إنه لم يتعرض لأي مشكلة، وقالت:

-انا آسفة مالحقتش اعطله.. جاله تليفون ونط من اودامي.. بس كويس إنك مادخلتش.. كنا لبسنا مصيبة.
سأل بإستغراب:

-مادخلتش فين؟؟
قالت بصوت أقرب للهمس، وهي يجمع أشياءها داخل حقيبتها لتغادر معه:

-مالك يا حسن؟ مادخلتش مكتب مستر مجدي.

قال بهرح:

-مش بقولك حمارة؟؟ ثم أخرج هاتفه المحمول، وفتح الصور وأدار لها الهاتف وأكمل:

-انا صوّرت كل الورق اللي في الملف خلاص.. الموضوع ماخذش وقت.. مكانوش كتير.. وبعدين الخزنة دي أغلب من الغُلب.. فكَرّتي بيكي.

عصر الأربعاء ١٨ ديسمبر سنة ٢٠١٣

تركت عادة قيادة سيارتها لحسن، لأنها كانت لاتزال تحت تأثير الصدمة. كان مظهر حسن الهادئ لا يوحي أبداً إنه انتهى لتوه من السطو على خزانة مالك ورئيس تحرير جريدة مشهورة، في وضح النهار، وفي حضور تقريباً كل موظفين الجريدة، والخروج من الجريدة بما أراد ودون خوف أو استعجال. كانت تتأمله وهو يقود السيارة في انبهار ممزوج بالريبة.

وبعد دقائق من الصمت والتأمل، قالت:

-انت عملت كده ازاى؟؟ وإمتى؟؟ واتعلمت السرقة فىين؟؟
 انت متخيل انت عملت أيه من دقائق؟؟ وشكلك أيه دلوقتى؟؟ كأنك خارج من السينما؟؟ مش فاهمك!!!

نظر لها باسمًا وقال:

-مش واحدة بالك إن دي تاني مرة تجيبي سيرة السينما النهاردة؟؟ ده تلميح واضح إنك عايزاني أعزمك على السينما.. كده انا اتأكدت.

نظرت له بغضب حقيقي، وقالت منفعة:

-انت أكيد بتهزر!!!!

قال بهدوء لا يتناسب مع غضبها:

-بالظبط كده.. بهزر.. فيها أيه؟؟ ممكن تهدي شوية علشان مش هنستفيد حاجة من توتُّرك ده؟؟ فنظرت له ولم تُعلِّق، فوقف بالسيارة فجأة، واعتدل ليوواجهها بصره، وقال بجدية:

-انا كنت متوتر فعلاً وانا بفتح الخزنة.. وأيدي كانت بتترعش وانا بصوّر الورق.. بس بمجرد ما خرجت من المكتب من غير ما حد يشوفني هديت.. ولا انتي عايزاني افضل متوتر اليوم كله؟؟ قالها واعتدل وتحرك بالسيارة مرة أخرى.

بعد دقيقة قالت غادة بصوت حنون، حيث كانت قد اقتنعت بوجهة نظره، ومبالغتها في الأمر:
-أول مرة أشوفك متعصب.. انت كمان بتحلو لما بتتعصب على فكرة.

نظر لها نظرة جانبية ولم يُعقب، فأكملت:

-يعني انا غلطانة إني خيفة عليك؟؟ تصدق إنك فعلاً

ماتستاهلش. وضربته بقوة في كتفه الأيمن.

فنظر لها وقال باسمًا:

-بذمتك ماستاهلش؟؟

قالت بعناد:

-اه ماتستاهلش. ونظرت أمامها.

-خلاص يا غادة.. ماتزعليش.. بس مش عايزك تخافي عليّ كده.

نظرت له بلوم، ثم قالت بلهجة وكيل نيابة:

-ماجبتش الظرف ليه؟؟

أعجبه تأديتها لدور المحقق، فتجاوب معها وأجاب بلهجة المتهم:

-علشان مش عايزه يلاحظ إنه اتسرق يا ناصحة.. ويشك قبل مانعرف احنا بنتعامل مع مين.

-اممم.. فتحت الخزنة ازاي؟؟

-الحقيقة إني آخر ٨ سنين من عمري كنت فاضي فيهم..

فاضي بمعناها الممل.. ٨ سنين فراغ ممكن يعلّموا الواحد اكر

من كده بكتير صدقيني.. فبطلي تتفاجئي.

-يعني انت اتعلمت الحكاية دي من زهقك؟؟

نظر لها حسن وسأل بمرح:

-انتي شاكة فيّ إني كنت بشتغل حرامي يا بت؟؟

ضحكت وقالت:

-حمارة وبت.. يابني انت بهدلتنني خالص.. وبعدين طبعا

مش شاكّة إنك حرامي.. بس مستغرباك.

-لاما تستغربيش.. انا غريب أصلاً.

-طب ممكن بقى نقعد في حته علشان نشوف الي لقيته في
الظرف ده يا عم الغريب؟

بعد ساعة جلسا حسن وغادة في ركن منزوي في كافيته كبير
من طابقيين في شارع من شوارع مصر الجديدة، بعد أن
عرجا على مكتبة وقاموا بطباعة الصور التي التقطها حسن
في مكتب مجدي، بعد التأكد من أن الفتاة التي تعمل في
المكتبة لن تستطيع أن تلمح ما في الصور، حيث قامت غادة
بتوصيل الهاتف والطباعة، وحسن كان يقف بجوار الطابعة
لإلتقاط الأوراق.

طلب كل منهما قهوته كما يحبها، انتظرا حتى تصل القهوة،
حتى لا يقاطعهما شيئاً، وأخرجت غادة الأوراق من حقيبتها،
وشرعت في ترتيبها، حيث أن الأوراق كانت مُرقّمة.

كانت تسعة أوراق فقط، كل الكتابات عليها كانت مطبوعة
بالكمبيوتر. كان مطبوع أعلى كل ورقة رقم، وتحت صورة
القتيل محفور على جبهته انعكاس نفس الرقم المطبوع
أعلى الصورة. وتحت كل صورة مطبوع تاريخ ارتكاب السفاح
جريمته، التي سمّاها «العقاب»، ثم تفاصيل جريمة القتل

التي ارتكبها في التاريخ المطبوع في أعلى الصفحة، والتي عاقبه عليها السفاح بقتله، وذكّره بها قبل مقتله، بأن أجبره على أن يكون آخر شئ يراه قبل أن تغادره الروح هو تاريخ جريمته محفور على جبهته، ولذلك كان دائماً يستخدم مرآة من بيت القتل، ليضعها أمام عين من يقتل، وهي تفقد بريق الحياة تدريجياً.

الجريمة ١١١ (١١ يناير)

العقاب: ٢١ يناير

الشاب سامح نصّار ٣٠ سنة، يقتل بسيّارته الفتاة رانيا غالي ٢٦ سنة، ويتركها جثة هامدة في وسط الطريق ويهرب.

الجريمة ٢١٢ (١٢ فبراير)

العقاب: ١٩ مارس

صاحب معرض سيارات يتسبب في انهيار عقار ومقتل ستة أفراد تحت أنقاضه، وحصل على البراءة بعد رشوة بعد السّكان غير المتضررين، الذين مكّنوه من توجيه الإتهام لمتوفي، وهو المالك السابق للمعرض.

أسماء الضحايا:

-مصطفى الشيخ ٣٩ سنة

-فاطمة كارم ٣١ سنة

-ذكروري السيد ٥٤ سنة

-قناوي عبد الله ٤٩ سنة

-نجاة عفيفي ٣٨ سنة

-ايمان قناوي ١١ سنة

الجريمة ٣٢١ (٢١ مارس)

العقاب: ١٥ أبريل

صياد يقبض ثمن تهريب خمسة شباب لإيطاليا ويلقي بهم

في عرض البحر ليلقوا حتفهم غرقاً.

الشباب:

-محمود شعبان ٢٢ سنة

-أحمد سامح ٢٣ سنة

-حسين شلبي ٢١ سنة

-هاني محروس ٢٠ سنة

-هيثم تحسين ٢١ سنة

الجريمة ٤١١ (١١ أبريل)

العقاب: ٣٠ أبريل

عامل المزلقان سيد شعيب ٣٩ سنة، يترك مكان خدمته

ليذهب ليقابل الخادمة تهاني فهيم ٣٣ سنة، في المنزل التي

تعمل به، حيث يغيب أهل المنزل عنه في هذا الوقت من

النهار. علماً بأن كل منهما متزوج من آخر.

الضحية:

-الطفل مازن السمري ٩ سنوات

الجريمة ٥١٧ (١٧ مايو)

العقاب: ٢٤ مايو

تمكنت الداخلية من إثبات تهمة قتل أربعة أطفال على سنارة النونو بعد القبض عليه، حيث كان يقوم بتعذيبهم حتى يعملوا تحت قيادته في مجال النشل والشحاة. وهذا بخلاف تهمة الخطف لأكثر من ١٤ طفلاً. لم يستدل على أسماء الضحايا حيث كانت الجثث قد بدأت في التحلل، ولم تفيد التحقيقات مع المقبوض عليهم في التعرف على أيّاً منهم.

الجريمة ٧٢٩ (٢٩ يوليو)

العقاب: ١٥ سبتمبر

مدرس الدرجة الإعدادية طلعت نجيب ٣٨ سنة، متزوج، اعتاد أن يستغل سداجة طالباته، وأن يشبع بهم رغباته المريضة أثناء حصص الدروس الخصوصية، حتى حَمَلت منه الطالبة هبة ياسر ١٦ سنة وقامت بالإنتحار خوفاً من الفضيحة.

الجريمة ٩٢١ (٢١ سبتمبر)

العقاب: ١٣ أكتوبر

قتل سائق سيارة النقل حلمي التهامي ٤٩ سنة، وهو تحت

تأثير المخدر، عائلة كاملة، حيث تسبب فقدانه السيطرة على السيارة، في خروج سيارة العائلة عن الطريق، وانقلابها عدة مرات ومقتل ركابها.

الضحايا:

-مصطفى محمد ٤٣ سنة

-سهام درويش ٣٥ سنة

-فرح مصطفى ١٢ سنة

-هشام مصطفى ٩ سنوات

الجريمة ١١١٧ (١٧ نوفمبر)

العقاب: ٢٩ نوفمبر

حدد الدكتور وسام حجازي ٤٢ سنة، موعد ولادة للسيدة سهام ٢٥ سنة، قبل موعد اكتمال نمو رثتا الجنين بأسبوع، حتى يلحق بموعد زفاف أبنته في فرنسا، وأيضاً لأن أجره يزيد عندما تكون الولادة قيصرية، كما إنه شريك في المستشفى وبقاء الجنين داخل الحضانة لمدة أسبوع يعود عليه بالنفع.

الضحية:

-سما هاشم

العمر: بضعة دقائق

الصفحة التاسعة كان مطبوع بها:

يا من يحكم علىّ دون علم، حاكم من يستحق، فهو أولى بسوطك.

هذا إرثي، لست فخور به، ولكنها الحقيقة. لا أدعي إني على حق، ولا أظن إني أستحق مصير أفضل ممن قتلت، فأنا قاتل. ولا أنكر مُنتعتي بمشاهدة بريق الحياة يخبو في عيون من قتلت، ولا أعلم يقيناً -بعد- السبب في تلك اللذة، هل هو ميلي للقتل وسفك الدماء وحصاد الأرواح عموماً؟ أم هي لذّة تحقيق العدالة الغائبة؟ لا أعرف، ولن أعرف، لأنني لم أقتل سوى القتلة. وهذا فقط ما أعرفه يقيناً.

بعد مدة ليست بالقصيرة من الصمت الثقيل، تحركت غادة في محاولة منها لكسر هذا الصمت، وجمعت الأوراق ووضعتها بعناية داخل مظروف كبير اشترته من المكتبة، ونظرت لحسن الذي كانت ملامحه جامدة كالصخر، فلم تتمكن من تخمين ما يدور في باله في تلك اللحظة.

وبعد أن تأكدت أن لا نيّة لديه للحديث، قالت بصوت مبجوح:

-حسن.. الكلام اللي مكتوب ده مالوش غير معنى واحد.

فنظر لها بتساؤل، فأكملت:

-إن مستر مجدي هو القاتل بتاع زمان.. أنا آسفة يا حسن..

عارفة إنه مش سهل إنك تعرف مين اللي... ولم تكمل جملتها، لتتجنب ذكر مقتل زوجته، حتى لا تؤلمه.

بقيت ملامحه جامدة كما هي، وقال بصوت هادئ:

-مش ملاحظة إن دول ٨ جرايم بس؟؟ وإن جريمة نادية مش موجودة؟

أومات غادة برأسها إيجاباً، وقالت:

-لاحظت.. بس انا اعتقد إني عارفة ليه.

عقد حسن حاجبيه وسأل مستغرباً:

-ليه؟؟

-يوم ال Interview مع مستر مجدي.. هو قال حاجة مهمة

جداً أخذت بالي من معناها دالوقت.. ثواني اسمّعها لك.

ومدت يدها لحقيبتها وأخرجت المُسجِلة، وبدأت تظبطها

على ما أرادت أن يسمعه حسن.

انطلق صوت غادة من المُسجِلة:

«سؤالي لحضرتك هو.. ياترى حضرتك من البعض اللي بيحبه؟

ولا بيكرهه؟ وتصنيف حضرتك أيه للمقال ده.. غير إنه دفاع

عن قاتل.. مفيش فيه ذرة إنسانية؟؟

مجدي:

-أولاً أنا كتبت المقالة دي بعد جريمة الثامنة.. وارجعني

للتاريخ لو مش مصدقة يا سيادة الصحفية.. واضح إنك

محتاجة تراجعى القضية اللي بتحققى فيها قبل ما تشتغلي عليها.. وواضح كمان إني استعجلت إني سيبتك تشتغليها.. ثانياً هو لما قتل الضحية التاسعة كان تحت تأثير مرض نفسي.. ضعف.. كلنا عندنا نقطة ضعف.. اللي ضعيف قصاد الشهوة للجنس أو للسلطة أو للفلوس.. هو نقطة ضعفها لغرور والزجسية.. مين فينا ما بيضعفش قصاد شهوات هو ما بيغلطش ولو مرة.. غروره عماه.. دفعه لإرتكاب غلطة واحدة.. ولو تلاحظي إنه بعدها اختفى.. واضح إن السبب كان ندمه على الغلطة دي.. ثالثاً كل اللي قتلهم قبل مقاتلي الأخيرة عنه كانوا يستحقوا القتل.. لكن نظامنا الأعرج كان عاجز عن إنه يرجع الحقوق لأصحابها.. ومحدش كان عنده الشجاعة يجيب حق الناس غيره.

صوت خبطة قوية، ثم مجدي مُجدداً:

-طالما اللي المفروض يجيب حق الناس عاجز سواء عن قلة حيلة أو تواطوء.. ماتزعلوش بقى من اللي ياخذ حقه بدراعه»

أغلقت غادة المُسجلة، وقالت:

-واضح جداً من رد فعله إنه ندمان على جريمته التاسعة.. ومش عايز يعترف بيها.. وبيعتبرها غلطة المفروض نسامحه عليها مقابل خدماته للمجتمع.. وخصوصاً لما قال إن ندمه

عليها هو السبب في إنه يبطل يقتل.. وكمان لو تلاحظ إنه تقريباً قال نفس الكلام اللي مكتوب في الصفحة الأخيرة. ونظرت لحسن في محاولة لاكتشاف من ملامحه مدى اقتناعه بتحليلها، ولكن ملامحه الجامدة حالت دون ذلك، وبعد دقائق من الصمت، قال بهدوء:

-تحليلك منطقي.. بس انا لازم اسمعه بنفسي منه.
ثم تنهّد بغضب مكتوم، وقال بطريقة من عقد النيّة على فعل شئ، ولن يوقفه عن فعله مخلوق:
-انا قررت أواجهه شخصياً.

اتسعت عينا غادة خوفاً على حسن، من مواجهة من اكتشفت لتوّها إنه قاتل لا يعرف الرحمة، ولكن ملامح حسن كانت في تلك اللحظة لا تُعطي غير انطباعاً واحداً، أن ذلك القاتل هو من عليه أن يخشاه.

قبل غروب الأربعاء ١٨ ديسمبر سنة ٢٠١٣

كان مظهر عصام ناجي لا يدل إلا على أن هذا الرجل لم يغادر مكتبه منذ يومين على الأقل. والحقيقة إنه لم يغادر مكتبه منذ فجر الأربعاء بالفعل، منذ عاد من مسرح الجريمة الثانية للسفاح بعد عودته الغربية. كان قميصه مفتوحاً لنصف صدره على غير عادته، وكان الإجهاد واضحاً على ملامحه، والهالات السوداء تحت عيناه تؤكد إنه لم يذق النوم منذ فترة ليست بالقصيرة، وذقنه كانت غير حليقة بالطبع.

لم ينتبه لرنين هاتفه في بادئ الأمر، بسبب انغماسه في قراءة محاضر وأقوال القضية التي هو بصددتها. ولكنه تنبه لرنين الهاتف فجأة، كمن يصحو من نومه فجأة دون سبب. ألتقط

الهاتف وأجاب دون وعي، ودون النظر لإسم المتصل:
-نعم.

فجاءه صوت غادة عثمان منفعلًا:

-انت في مكتبك يا عصام؟؟

قال بحدة:

-مين معايا؟؟

-غادة معاك يا عصام.

نظر للهاتف بتلقائية وقد أدرك إنه لم يتأكد من المتصل قبل

أن يرُد، فأعاد الهاتف لأذنه وقال مُبررًا:

-معلش يا غادة.. مش شايف أودامي اليومين دول.. اصبري

عليا شوية.. وانا هكلم...

قاطعته بقولها:

-لا انا مش بتصل علشان عايضة معلومات.. انا عندي

معلومات عايضة ابْلُغك بيها.. ومعايا حسن.

عقد عصام حاجبيه وأجاب:

-أيه يا غادة خير؟؟

-مش هينفع في التليفون يا عصام.. انت فين نجيلك؟؟

-في المكتب.. مستنيكي. وأغلق الخط ورن جرس استدعاء

حسين، فجاءه مهرولًا، ولكن ملامحه كانت تحمل همٌ ثقيل،

لم تتمكن مشاغل عصام من ان تُخفيه عنه. فقال عصام:

-مالك يا بني انت كمان؟؟

فقال حسين وهو ينظر للأرض هربًا من تحديق عصام:

-ولا حاجة يا عصام بيه.. الحمد لله.
-اقفل الباب وتعالى. فنقذ حسين، فأشار له عصام بأن
يجلس وقال:
-انا مسحول ومش فايق لشغل العيال ده يا حسين.. أمك
تعبت تاني؟؟
نظر له حسين وجاهد دموعه حتى لا تظهر، ولكن كفاحه
كان أضعف منها، فظهرت كحبات الندى داخل مقلتيه،
فأضاف عصام:
-طب قوم أعملي القهوة بتاعتي في كوباية وسيبها على الله.

بعد دقائق دخل مكتبه كل من غادة وحسن بعد ان طرقا
الباب، فقام عصام من مكانه ودار حول مكتبه ورحب
بهما، وطلب منهما الجلوس، وقال وهو يجلس خلف مكتبه
مُجدداً:

-أول مرة تدخل مكنتي يا حسن.. منور.
-منور بصاحبه.. انت ماروحتش من أول امبارح؟؟
قال عصام:
-باين عليا؟؟
-جداً.
دخل حسين وترك قهوة عصام على مكتبه، وسأل:
-البهوات يشربوا حاجة؟؟
طلب حسن وغادة قهوتهم، وانتظرا حتى خرج حسين،

وبدأت عادة الحديث وقالت:

-انا وحسن عندنا معلومات مهمة جداً بخصوص القضية
اللي بتحقق فيها.

سأل عصام:

-أي قضية بالظبط؟؟ بتاعة تذاكر؟؟ ولا قناوي؟؟
قالت:

-قضايا سفاح الأرقام القديمة.. احنا تقريباً عرفنا مين السفاح.

ترك عصام قهوته وأعادها على المكتب قبل ان يرشف منها
كما كان ينوي، وقال بإستغراب:

-السفاح؟؟ عرفتوا السفاح!!!؟؟

قال حسن مُصِحِحاً:

-تقريباً.

قال عصام:

-انا مش فاهم حاجة.. يعني أيه تقريباً؟؟

دخل حسين بالقهوة لغادة وحسن، فقالت غادة بعد
انصرافه:

-الموضوع ابتدى من كام يوم.. عملت Interview مع مستر

مجدي قال فيه كلام غريب عن السفاح دون وعي وهو

متعصب.. وبعدها شكّيت في ظرف في الخزنة اللي في مكتبه..

ولما فتحناه لقينا فيه الأوراق دي.

ناولت عصام المظروف، ثم ضغطت زر التشغيل في المُسجَلة

ليسمع عصام المقطع الذي أعادته على حسن قبل ساعات.
أنصت عصام جيداً لما يُقال، ثم فتح المظروف وبدأ يقرأ
الأوراق بترتيبها. بعد ما فرغ عصام من قراءة الأوراق، نظر
لحسن وغادة، وقال:

-انا مش فاهم.. انتوا وصلتوا للحاجة ازاي؟؟

قالت غادة:

-مش مهم وصلنا لها ازاي.. المهم ان النسخة الأصلية موجودة
في خزنة مجدي كارم دلوقتي.

-متأكدة؟؟

-طبعاً يا عصام.. مش هقول حاجة بالخطورة دي الا لو
متأكدة طبعاً.

نقل بصره بين غادة وحسن والأوراق أمامه، وقال:

-معقول؟؟ مجدي كارم الصحفي المشهور يكون هو السفاح؟؟

قال حسن الذي بدا هادئاً قليل الكلام:

-مش شايف ان الحكاية منطقية جداً؟؟

-ازاي؟؟

أكمل حسن:

-هو الوحيد اللي كان بيدافع عن السفاح وقت ظهوره..
ومعلق المقالة اللي اتسببت في طرده وكانت هتسبب في
حبسه على الحيط في مكتبه اللي دافع فيها عن السفاح..
ودافع عن السفاح بضراوة لما غادة هاجمته.. وهو اللي
السفاح بعث له معلومات عن اللي بيخطف الأطفال.. وهو

اللي اختار اسمه.. معقول كل ده صدفة؟؟

صمت عصام لدقائق، كان يدرس فيهم الأمر من كل جوانبه، وقال أخيراً:

-الورق ده لوحده مش كفاية.. لازم اعتراف منه.. وياريت يا غادة مفيش حاجة من الكلام ده تنزل جرايد خالص.. الورق ده لو اتسرّب هيبقى مجدي ده بطل.. ومش بعيد تنزله مظاهرات تقولك «Free Magdy» البطل اللي كافح ضد مبارك وفساده.

ثم لفت انتباهه عدم وجود الجريمة التاسعة، فقال وهو ينظر لحسن:

-وبعدين دول ٨ بس!!

أجاب حسن:

-مانا لاحظت.. علشان كده جيت مع غادة. صمت لثانيتين ثم أكمل:

-انا عايز اكون موجود وانت بتواجهه بالكلام ده.

كان عصام يعلم مدى احتياج حسن لمواجهة مجدي، على الأقل حتى يتأكد من أن قاتل زوجته سيدفع الثمن أخيراً. ولهذا لم يرفض طلبه فوراً، ولكنه أيضاً لا يستطيع تنفيذ طلبه بهذه البساطة. بماذا سيُبرر وجود مدني معه أثناء القبض

على رجل بقوة وشهرة مجدي كارم، وخاصة ان القبض على شخص بهذا السيط والشهرة لن يكون بالأمر الهين، فبالأكيد سيتم تصوير الواقعة، وهناك إمكانية انها ستُذاع على الهواء أيضاً.

فقال عصام بعد صمت استمر دقيقة كاملة:

-مش عارف هقدر اعمل كده ولا مش هقدر يا حسن.

قال حسن بتصميم:

-هتقدر.

فنظر عصام لغادة التي بدت واثقة من كلام حسن، ثم أعاد

نظره لحسن الذي أكمل:

-لو عملت بالظبط زي ماهقولك.. هتقدر.

oboeikan.com

بعد غروب الأربعاء ١٨ ديسمبر سنة
٢٠١٣

التقط عصام سترته من على الحامل الخشبي في ركن مكتبه،
بعد موافقته -بعد إلحاح شديد من غادة- على الخطة
الذي وضعها حسن لمواجهة مجدي قبل القبض عليه. كان
يعلم جيداً أن ما يوشك على القيام به يُعتبر خطأ مهني
جسيم، ولكن شعوره بحاجة صديقه لهذه المواجهة سهّل
قبوله لارتكاب الخطأ طواعية.

قال عصام لحسن همساً على باب مكتبه حتى لا تصل
كلماته لغادة:

-معاك فلوس يا حسن؟؟

قال حسن دون تردّد ولكنه لم يمنع نفسه من الإستغراب:

-اللي انت عايزه.

فقال عصام وهو يشير برأسه ناحية حسين الجالس في نهاية الممر الضيق:

-حسين أمه تعبانة.. وأنا مش...

لم ينتظر حسن ليسمع باقي جملة عصام، أعطاه مفاتيح السيارة وقاطعه قائلاً:

-خلاص فهمتكم.. روح أنت وغادة على العريية.. وأنا ثواني وهبقي معاكم.

تابع عصام بنظره حسن وهو يُسَلِّم بوجّه على حسين الذي قام من على كُرسيه باحترام زائد وسلّم على حسن وهو يحني رأسه قليلاً للأمام وعيناه تحاول أن تفهم سبب الزيارة، فالطبيعي أن يستدعيه عصام في مكتبه إذا أراد ضيفه منه شيئاً.

وصل حسن للسيارة بعد دقائق من وصول غادة وعصام، واتخذ مكانه خلف عجلة القيادة، وانطلق في صمت في اتجاه منزل مجدي كارم.

بعد ساعة من الصمت الثقيل، وصلت سيارة حسن أمام منزل مجدي كارم في التجمع الخامس. كان بيته مكوّن من طابقين، ذات تصميم عصري، يغلب عليه اللون الأبيض من الخارج. يحيط به سور أسود عالي، وكانت البوابة الحديدية

السوداء مفتوحة على مصراعيها، والكابينة المُخصصة للحارس خالية.

تقدّمت عادة وصعدت الدرجات السبع الخارجية وخلفها يميناً ويساراً كلٌّ من حسن وعصام وكأنهما حارسين شخصيين. وقفت لثواني أمام الباب لتلتقط أنفاسها. كانت تعلم جيداً أن بمجرد ضغطها على جرس الباب ستتغيّر حياتها -مهنيّاً على الأقل- للأبد، فكأنها كانت تحاول أن تستعد لهذا التغيّر بلحظة من الاسترخاء. احترما حسن وعصام وقفتهما بصمت، وكأنها دقيقة حداد صامتة انفقوا على وقوفها مع عادة حداداً على علاقتها بمجدي كارم الذي ظنّت أنها تعرفه.

بعد ثواني استجمعت شجاعتها وضغطت على جرس الباب، الذي أطلق صوتاً عالياً داخل المنزل مُعلنًا عن وصول زائر غير متوقع. مرّت ثواني الانتظار بطيئة كالزمن وقت المِحَن، وغادة تجاهد لتبدو طبيعية لمن سيُجيب نداء جرس الباب.

فتح مجدي الباب مُرتدياً ملابس رياضية غالباً تُستخدم كملابس منزل لا علاقة لها بالرياضة. ابتسم عندما رأى عادة ولكنه ما لبث أن عقد حاجبيه عندما لاحظ توترها التي جاهدت لتخفيه. ثم نقل بصره بينها وبين عصام وحسن، وعاد بنظره إليها مُستفسراً دون كلام عما يحدث. ابتسمت

هي وقالت بصوت متوتر حاولت عبثاً أن يبدو مَرِحاً:
-كنت قريبة قلت اعدّي اشرب معاك قهوة.. ممكن؟؟

تنحى جانباً وأشار لهم بالدخول ولكن ملامح الإستغراب رفضت أن تنتحى عن وجهه، فهو كان واثقاً من أن الزيارة تحمل أكثر مما قالت هي. قادهم مجدي للصالون، ورحّب بهم وقدّم نفسه وهو يمدّ يده لعصام قائلاً:
-مجدي كارم.. شَرَفَت بيتي.
فأجاب عصام:

-عصام ناجي.. رئيس مباحث قسم الحدايق.. ورئيس فريق البحث الي ماسك قضية السفاح. قال كلمة السفاح بتأني وهو ينظر مباشرة في عيني مجدي، الذي لاحظ كيف أن طريقة عصام غير وديّة في الحقيقة كما يجب أن تكون في الحالات العادية، ولكنه تغاضى عن تلك الملاحظة حتى لا يستبق الأحداث، فهو مازال يجهل ما يحدث تحديداً، ولكنه كان واثقاً أن الزيارة تحمل سبباً غير سار. نظر لحسن ومدّ يده قائلاً:
-ماتشرفتش بحضرتك.

سَلّم عليه حسن بلامح لم يتبيّن مجدي تحديداً ما تخفيه، وقال:

-حسن الشريف. واكتفى بالإسم.
طلب مجدي منهم الجلوس، وسأل ماذا يُريد كل منهم

ليشرب كما تقتضي أصول الضيافة، ولكن عادة طلبت منه أن يجلس قائلة:

-مستر مجدي.. من فضلك أقعد علشان عصام بيه عايزك في موضوع خطير لا يحتمل التأجيل.

جلس مجدي وكّست ملامحه علامات الحيرة، ونظر لعصام تلقائياً، الذي اعتدل في جلسته واقترب بجسده من حافة الكنبه التي يجلس عليها ليبدو وكأنه أسد على وشك الهجوم على فريسته. أخرج من داخل سترته مطروف الأوراق التي تحوي خزينة مكتب مجدي نُسخها الأصلية وألقاها على الطاولة التي تقع في منتصف الغرفة بينهما ولكن أمام مجدي. نظر مجدي للمطروف ثم عاد بنظره لعصام، الذي قال وهو ينظر لعينيه مباشرة:

-ده الورق اللي احنا جايين هنا بسببه.

ثم أخرج من جيب سترته ورقة مطوية وضعها أمامه هو وقال وهو يشير لها:

-وده إذن النيابة اللي هنفتش بيه مكتبك وبيتك الجميل ده.

عقد مجدي حاجبيه في توثر ونظر لغادة حتى يتبين إن كانت موافقة على ما يُقال، ولكنها راوغت عيناه ونظرت لعصام الذي انتزع من حزامه الكلابشات ووضعها أمامه، ثم أخرج سلاحه الميري وأغلق زر الأمان وسحب طلقة لماسورة السلاح

في تهديد واضح لا تُخطئه عين، وقال وهو يضع السلاح فوق
إذن النيابة ويشير له:

-وده سلاحه الميري.. اللي مش هحتاجه النهاردة علشان
أنت مش هتعمل شوشرة.

تنحج مجدي وقال بصوتٍ بحته الصدمة حيث وصلتته
رسالة التهديد واضحة:

-ممکن أعرف أيه الحكاية؟؟

ردّ عصام بإشارة من يده صوب المظروف الذي ألقاه أمامه
منذ ثواني، وقال:

-أنا اللي جاي هنا افهم الحكاية.

مدّ مجدي يده للمظروف وفتح وسحب الأوراق من داخله.
وهُجرد أن وقعت عيناه على أول ورقة حتى توقف ونظر

لضيوفه نظرة تحمل شعور بالدهشة واضح، وقال:

-أنا لسة مش فاهم.

قال عصام:

-واضح انك عارف الورق ده جاي منين.. ده انت حتى ما
فكرتش تشوف كل الورق.

قال مجدي:

-واضح انك عارف كل حاجة انت كمان.. ليه إذن النيابة ده
مش في أيد قوة بتفتش المكتب والبيت؟؟ ولية الكلابشات

دي مش في أيدي؟؟

ابتسم عصام إعجاباً بذكاء مجدي، وقال:

-غادة عثمان عزيزة عليا جداً.. وانت عزيز عليها جداً..
طلبت مني انك تاخذ فرصة تفسّر بيها كل ده.

-وممكن اعرف انا المفروض مُتهم بأيه؟

عصام:

-بقتل على الأقل ٨ أشخاص. وأشار للورق.

أجفل مجدي لثواني ثم نظر لحسن وقال:

-ومين الأستاذ؟؟

قال عصام:

-انت مش في موقف يسمح لك تسأل يا أستاذ مجدي..

أظن واضح.

رد مجدي:

-ماتنساش انك في بيتي يا عصام بيه.. وأني لحد اللحظة دي

مش مُتهم بحاجة رسمي.. على الأقل من حقي أعرف بتكلم

أودام مين.

تكلم حسن لأول مرة منذ دخل بيت مجدي، وقال:

-انا حسن الشريف.. نادية مراقي الضحية التاسعة.. الجريمة

اللي مش موجودة وسط الورق ده.

خفق قلب مجدي لثواني، ثم نقل بصره بين الثلاثة وجوه

بتأني، ثم تنحنح وبلع ريقه وقال:

-السر اللي هقوله دلوقت فضلت محتفظ بيه سنين.. بس

واضح أن حتى الأسرار ليها تاريخ صلاحية وبتختار تكشف

نفسها بنفسها بعده.

oboiikan.com

ليل الأربعاء ١٨ ديسمبر سنة ٢٠١٣

-الحكاية مش زي واحد فيكم شاكِك خالص. قالها مجدي ونظر لغادة بلوم واضح، وأكمل:

-معقول يا غادة شاكَّة أن انا السفاح؟؟ انتي؟؟!!!

قالت غادة بصوتٍ مبحوح حزين:

-أرجوك يا مستر مجدي وضِّح الموقف الأول وبعدين اعمل فيّ اللي انت عايزه.. ارفدني.. احبسني.. أي حاجة مش هقولك لأ.. بس أرجوك اثبت لي انك مش قاتل.. علشان ارتاح.

ثبَّت مجدي عينه عليها لثواني، ثم أراح ظهره وتنهَّد بضيق وونقل بصره بين ثلاثتهم، ثم نظر لعصام مباشرة وبدأ يتكلم

بهدهوء:

-الظرف ده يا عصام بيه وصلني الجرنان يوم القبض على المشتبه فيه اللي... قطع كلامه فجأة ونظر لحسن؛ حيث

أدرك أنه يتحدث عنه، فأشار له وقال:
-الأستاذ. سكت لثواني ليرى رد فعل أيّاً منهم، ثم أكمل
عندما لم يتلقى أي شئ:
-وموجود معايها من يومها لحد النهاردة.. وماعرفش النسخ
دي وصلت لكم إزاي!!
عصام:

-ومابلغتشر الشرطة ليه؟؟
-انت لو تعرف أنا حصل فيّ أيه بعد ما كتبت المقالة اللي
اتسببت في رفدي وتحويللي للمحكمة كنت هتعرف إجابة
سؤالك.. دي كانت أصعب فترة مرّت عليّ في حياتي.. انا كنت
متحوّل للتحقيق في الجرنان.. وجالي استدعاء للنيابة بقائمة
تُهّم تليق بإرهابي.. ولو الظرف ده كان ظهر وقتها ماعرفش
كان هيكون في مصلحتي ولا إثبات للتُهّم.
رَفَع كتفيه لأعلى وأضاف:
-خبّيته.

عصام بشك:
-ماخُفتشر يُقع في أيد الداخلية بأي طريقة وتروح فيها
رسمي؟؟
-خُفت طبعاً.. وعلشان كده الظرف مكانش معايها.. كنت
شايله عن المحامي بتاعي.. وبالمناسبة.. هو يعرف محتوياته..
وحيّ يُرزق.. ممكن تسألُه بنفسك.

خيّم الصمت على المكان لدقيقة كاملة، حتى قطعت غادة

الصمت قائلة:

-يعني حضرتك فعلاً ماتعرفش أي حاجة عن السفاح ده؟؟

نظر لها مجدي بلوم غاضب ولم يرد. فقالت بإصرار:

-حضرتك ماشوفتش نفسك دافعت عنه ازاي يوم ال

!!Interview

قال بغضب:

-وحضرتك ماشوفتيش نفسك هاجمتيني ازاي.. برضه يوم ال

Interview.. انتي يا غادة؟؟ كلامك كان فيه اتهام واضح اني

موافق على قتل أبرياء.. فرقتي أيه انتي عن اللي رفدني

واللي كان هيحبسني؟؟

-حضرتك لما شرحت لي تفاصيل الجريمة التاسعة اتحرق دمي

بصراحة.. كنت مُستَفزة جداً.

قال مجدي مُندفعاً:

-وتفتكري أن انا كمان مش محروق دمي من يومها لحد

النهاردة؟؟ ليه؟؟ مش بني آدم؟؟ انتي مش واخدة بالك

أني ممكن اكون شريك ولو بنسبة ١٪ في الجريمة دي؟؟ مش

واخدة بالك طبعاً.. محدش فاهم.. ومحدش هيفهم.

قال حسن الذي كان قليل الكلام بصوت هادئ لا يتناسب

مع حدة المناقشة بين مجدي وغادة:

-انا هفهم.. ازاي ممكن تكون شريك في الجريمة؟؟

زفر مجدي بضيق، وعاد الهدوء لصوته مُجدداً ولكنه خرج

حزيناً يحمل شعور واضح بالذنب وهو يقول:

-يا سيّد حسن.. انا كنت السبب الرئيسي في شهرة المجرم ده..
ومش هخبي عليكم انا كنت سعيد بيه في البداية.. كنت
فاكره مُختلف.. مش مُجرد قاتل بدم بارد.. اختارت له أسم..
ونشرت خبر مساعدته في القبض على المجرم بتاع الأطفال..
وكنت مهتم بكل جريمه.. واكتشفت بتحقيقات كنت بعملها
خارج شغلي أكثر من حاجة.. عرفت سبب قتله لصاحب
معرض السيارات.. وللدكتور.. وكنت متأكد أنه بيوجب حق
ضايع.. كنت متحمس له جداً.

صمت لثواني، وأكمل بكل حُزن الدنيا:

-وبسبب الشهرة الي انا عملتها له فقد هو السيطرة على
نفسه لما شَعر إن غيره بدأ يخطف منه الأضواء. قالها وأشار
لحسن، وأكمل:

-فارتكب جريمته الأخيرة.. ومن يومها وانا عايش بالذنب..
ومش قادر اسامح نفسي على الذنب ده.. يمكن لو كنت
هاجمته زي ما كان بيتطلب منّي كان ارتدع.. يمكن.. الله
أعلم.. بس الي اعرفه عن يقين أني لو كنت هاجمته من
أول يوم كنت هبقى مرتاح الضمير الكام سنة الي فاتوا.
دخلت غرفة الصالون زوجة مجدي تحمل على وجهها
ابتسامة صافية، تحوّلت لترحاب شديد عندما رأت غادة:
-كده يا مجدي؟؟ غادة هنا بقالها شوية وماتقوليش؟؟ ازيك
يا بنتي؟؟ منورين.

قامت غادة واحتضنتها وقالت:

-الحمد لله يا ماما.. وحشاني والله.

نظرت مدام سامية زوجة مجدي للضيوف وقالت بابتسامة صادقة:

-ساقع؟؟ ولا سُخن؟؟

نظر لها حسن بوّد وابتسم وقال:

-اللي غادة هتشرب منه.

وقال عصام وهو يخفي سلاحه خلف سترته، الذي التقطه لحظة دخول زوجة مجدي حتى لا تلاحظ وجوده:

-وانا زيّهم.. شكراً.

نظرت سامية لزوجها وأدركت من ابتسامته المُصطنعة -كأي زوجة مُحبّة عاشرت زوجها لسنوات عِدّة- أن عليها المغادرة فوراً، فغادرت بهدوء.

ساد الغرفة صمت كئيب لدقيقة، ثم قطعها عصام قائلاً:

-المقالة القديمة اللي كتبتها كانت قبل ماتستلم الظرف ده..

صح؟؟

-مضبوط.. بكام يوم.

-وايه اللي كان مأكّد لك أنه مُختلف حتى قبل ما بيعت لك التفاصيل؟

مجدي:

-بعد أكثر من جريمة بدأت اهتم بحكاية السفاح ده.. وبقيت أحاول أحلّ لغز الجريمة مع الشرطة بس بشكل منفصل عنها طبعاً.. زي ما غادة بتحاول تعمل دلوقت في الجرائم الأخيرة..

وتحقيقي وصلني للربط بين حوادث بتحصل وبتتقيّد ضد مجهول وجرائم السفاح.. على سبيل المثال: الجريمة الثالثة. بحث في الأوراق التي أمامه والتقط منها ورقة الجريمة (٣٢١) وأعطاهها اعصام. ثم أكمل:

-اكتشفت أن فيه ٥ شباب غرقوا في البحر في نفس اليوم اللي مكتوب على جبهة القتييل.. في نفس المنطقة.. طبعاً مفيش دليل يربط بين الجريمةين.. بس انا كنت واثق أن دي الجريمة اللي بيتعاقب عليها.

مدّ يده لعصام بالورقة التي تحمل تفاصيل الجريمة (١١١٧)، وأكمل:

-الدكتور ده عمل عملية ولادة في التاريخ ده.. والجنين مات بسبب عدم اكتمال الرئة.. مش ممكن تكون صدفة. صمت لثواني يُعطي فرصة لعصام أن يراجع الورق، ثم أكمل:

-ساعتها كنت اتأكدت بالدليل أنه مُختلف.. وده اللي شجّعني أي اكتب المقالة.. علشان كنت عايزه يعرف أن في حد فاهمه وعارف هو بيعمل أيه.. وبعدين حصل اللي حصل للأسف. قالها ونظر جانباً حتى يتجنب النظر لأيّ منهم. فقالت غادة بصوت ضعيف:

-ولما المقالة دي بتسبب لك كل تأنيب الضمير ده.. والألم ده.. ليه معلّقها على حيطه مكتبك.. وكأنك فخور بيها. ضحك مجدي ضحكة قصيرة بسخرية، وقال:

-انا معلّقتها أودامي علشان دائماً تفكّرني أني لازم افكّر ألف مرة قبل ما اغلط الغلطة دي تاني.. مش فخور بحاجة.. ده اختيار غلط مش هنكره.. بس سايبه قُصادي علشان اتعلم منه.

دخلت مدام سامية بالقهوة للجميع، تركتها على الطاولة في المنتصف، وقالت وهي تُغادر مُسرعة:
-خلّصوا شغل براحتكم علشان نجهّز العشاء.
انتظر مجدي حتى أغلقت الباب خلفها وأكمل وهو ينظر لغادة:

-وده يا غادة اللي خلّاني في أول أيام ثورة يناير امتنع عن تأييدها برغم الهجوم الشديد اللي طالني وقتها.. مع أني كنت واحد من أشدّ مُعارضى مبارك.. بس الغلطة اللي غلّطتها زمان خلّيتني افكر قبل ماندفع.. ولو تفتكري كلامي ليكي أيامها وانتي منفعله.. قولتلك هيبجي يوم هيبان فيه كل شئ.. ويمكن اطلع غلطان.. لكن مش هندم على موقفي.. «عدم الوقوف مع الحق، أخف وطأة من الوقوف مع الباطل» وده كان عنوان مقالي اللي عمل ضجة يومها وخسرت بسببه أصدقاء.. لكني مش ندمان عليه.

مدّ حسن يده والتقط فنجان قهوته في إشارة واضحة على استرخاءه وتصديقه لمجدي، فقال عصام بعد أن وصلته رسالة

حسن الصامته:

-ياريت يا مجدي بيه تعترف انك غلطان في اللي حصل زمان
وتكون فعلاً اتعلمت من غلطك.. حد غيرنا مكانش هيبجي
بشكل ودي.

قال مجدي:

-انت تقريباً رفعت عليّ السلاح يا عصام بيه.. ومعاك إذن
نيابة بتفتيش بيتي.. ودي مين بس؟؟
ابتسم عصام وقال وهو يدفع إذن النيابة بسبابته في اتجاه
مجدي:

-ماتنساش أن قبل ماندخل هنا كان في احتمال وارد انك تكون
قاتل.. كان لازم تكون رسالتني واضحة اني مش جاي اهزر.

مدّ مجدي يده وتناول إذن النيابة وفضّها، ليكتشف أنها
إعلان عن افتتاح محل جديد قُرب منزله. ضحك على
سذاجته، ونظر لعصام وأوما برأسه مُبدياً إعجابه بالخدعة.
ثم نظر لغادة وقال:

-مممكن بقى حد يجاوب على سؤالي؟؟ الورق ده وقع في
أيديك ازاي؟؟

-يوم ما دخلت مكتبك وكان فاضي.. فتحت الخزنة اشوف
علبة السجاير شوفته.
سأل مجدي مُستغرباً:

-بس انا يومها غيبت دقيقة بالظبط.

قالت غادة في محاولة لتغيير الموضوع، وكأنها تذكرت شيئاً.
لتوها:

-بس حضرتك يومها لما دخلت المكتب جريت فتحت الخزنة
وكان شكلك بيتطمئن على حاجة.
أوما برأسه مؤكداً:

-بالظبط.. علبه السجاير.

خبطت جبهتها وقالت وكأنها تُحدث نفسها:

-وانا اللي فسّرت خوفك أنه على الظرف.

رد مجدي:

-حسابك معايا بعدين.

ثم اعتدل ونظر لحسن وقال:

-يا سيد حسن.. مفيش كلام ممكن يوصف أسفي على
خسارتك.. انا من يومها مش بعرف أنام وبالي مرتاح لحد
النهاردة.. وعارف أن ده مش كفاية.. ومش هطلب منك
تسامحني.

قال حسن وهو يتتسم:

-مش المفروض حد يشيل ذنب غيره.. مش انت اللي قتلت
نادية.. ولا ساعدت في ده.. ماتحمّلتش نفسك همّ وذنب
مش بتاعك.. انا عملت زيّك لفترة بس قدرت اتعامل مع
الواقع وارضى بالقدر.. الحمد لله على كل شئ.. وصدقني
مفيش حاجة علشان اسامحك عليها.. ولو كانت غلطتك
انك صدّقت أن القاتل نواياه طيبة وانه مُختلف.. فانا كمان

مُذنب زيّك بالظبط.. لأني كنت مقتنع بيه ومتحمس له زيّك
بالظبط.. وعلى فكرة؛ قلت كده في التحقيق معايا.. مع أن
عمّك الله يرحمه يا عصام نصحني اني ماقولش كده لأنه
مش في صالحى بعد ما حس انى برئ.

قال مجدى:

-غريبة الدنيا دي بشكل!!

نظر له ضيوفه بحيرة، فأكمل:

-حاجة حصلت من كام سنة هتكون سبب في أننا نتعشى
سوا النهاردة وممكن تكون سبب في اكثر من كده. قالها
ونقل بصره بين غادة وحسن، فراوغت غادة نظراته، ولكنها
رفعت خُصلة من شعرها خلف أذنها اليمنى، فتأكدت
شكوك مجدى.

يسير الفقير العجوز على كوبري قصر النيل دون أن يلحظ وجوده أحد، وكأنه جُزءاً من جماد الكوبري. بالرغم من إنه لا يصمت أبداً، إلا أن أحداً لا يسمعه، ولكن هذا لم يمنعه يوماً من الكلام، وكأن هذا هو ما خُلِقَ من أجله.

حسن الشريف جالساً في غرفته الخاصة، التي لا يدخلها غيره، يتطلع بثبات للوحته التي أضاف إليها الجريمة الأخيرة التي ارتكبها السفاح، تبدو عليه علامات التفكير العميق.

للقدر تصاريـف.. فينا بيتحكم..

يقلب ربيعنا خريف.. وياويل من اتعشم..

وساعات نقول سلّمنا ورضينا بالتكشيرة..

نلاقيه بيضحك لنا.. والفرحة بتقدّم..

يرشف عصام ناجي من قهوته رشفة سريعة وهو يراجع ملف قضية السفاح، يُريح ظهره على كُرسیه وينظر بضيق

للورق أمامه، وكأنه يلومه على ألغازه. تبدو على ملامحه خيبة أمل وكأنه على وشك الإستسلام لأمر واقع يرفضه.

مفروض عليّ الاختيار..

وإنيّ اغزل برجل حمار..

لو ضاع في يوم مني الأمل..

هيبوخ الجد ويبقى هِزار..

تشرب غادة من «مج النسكافية» الخاص بها، الذي تحتفظ به منذ كانت طفلة. يحمل رسمة طفلة في ملابس النوم رافعة يداها في الهواء «تتمطّح» في محاولة لطرد النعس و الكسل من جسدها. تجلس نورهان أمامها على السرير عاقدة ساقيها تحتها مثل غادة، وتحدث لغادة بحماس. وبالرغم من أن غادة كانت تنظر لها مباشرة إلا أنها كانت لا تراها حيث كانت غارقة في أفكارها التي كانت تتخبط كسفينة تائهة وسط العاصفة. لحظات تتخيّل نفسها مع حسن في مكان جميل كالحلم، ثم فجأة يختفي أمامها كالسراب. منذ اليوم الأول الذي قابلته فيه وهي لم تتمكن يوماً أن تعرف يقيناً حقيقة مشاعره تجاهها، وهل يشعر نحوها بأي شئ أم لا؟؟ ولا تعرف أيضاً كيف استطاع دون جهد منه أن يسكن روحها بهذا الإستقرار؟؟ وهل سيأتي يوماً ويشعر بما تشعر به تجاهه؟؟

الدنيا رحلة والصديق مطلوب..
يا سلام بقى لو كان صديق محبوب..
صاحب حبيبك قبل ما تمّله..
أصعب ملل.. ملل القلوب..

يشعل مجدي كارم سيجارته وينفث دخانها إلى السماء، ينظر من فوق سطح العمارة التي يوجد بها المكتب الرئيسي لجريدته، يرى وسط البلد كلها تقريباً. ينظر لميدان التحرير ويتذكر أحداث الثورة المصرية، وهي على وشك إتمام عامها الثالث، وكيف كانت ومازالت مثاراً للجدل. يشعر بحجم المسؤولية التي يحملها جيله، وخاصة في مجال عمله، وهي توصيل الصورة الحقيقية عما حدث في مصر في تلك الفترة. تنهّد وهو يحدث نفسه صامتاً: «كيف ننقل صورة حقيقية عما حدث ونحن لا نعرف الحقيقة كاملة؟ عندما تكون ممثلاً على مسرح الأحداث، لن تتمكن أبداً من أن تحكم على الحدث ككل. الوحيد القادر على الحكم هو من لم يشارك، حيث يرى الصورة كاملة... هل ظلمنا الثورة بالمشاركة فيها؟؟ هل كان يجب علينا أن نتفرغ للتوثيق؟؟ هل كان يجب علينا أن نقف موقف المحايد حتى يتثنى لنا الحكم عليها بموضوعية؟؟ هل كانت ثورة أم مؤامرة كما يؤكد البعض الآن؟؟ هل كان النظام فاسد ويستحق أن يثور عليه الشعب؟؟ أم أن فساد هذا النظام هو جزء لا يتجزأ من

فساد الشعب الذي لن يزول بثورة؛ وإنما بسنوات من العمل الجاد المدعوم بالإرادة على مستوى الشعب والدولة على حد سواء؟؟ هل نستحق كشعب نظام أفضل مما سبق؟؟ ومن يتحمل الجزء الأكبر من ذنب الفساد؟؟ الراشي أم المرْتشي؟؟ أم أن كلاهما فاسد بنفس الدرجة؟؟ هل يجب أن يكون من يقف في مواجهة الفساد قاتلاً مثل سفاح الأرقام؟؟ ولماذا أشعر بالسعادة عندما ينتصر القاتل على القاتل؟؟ أو عندما يقتل القاتل من أفسد؟؟ أليس كلاهما مُخطئ؟؟ أم أن اليأس يمكن أن يتلاعب بالقيَم على نحو لا نشعر به ولكن ندرك تأثيره فجأة؟؟ هل هذا هو ما حدث أثناء الثورة؟؟ هل نستطيع مواجهة الظلم بالعدل؟؟ ومواجهة القتل والفساد بالقانون؟؟ ومواجهة الجهل بالتنوير؟؟ وإن كُنَّا لا نستطيع، هل سنستطيع يوماً؟؟ وإن كُنَّا لا نستطيع سِوا أن نخوض الحرب بقذارة، فلماذا ندّعي الشرف والمثالية والسلمية كما نفعل؟؟ ولماذا ننكر أفعال نعلم يقيناً إنها حدثت؟؟ هل كانت ثورة سلمية كما ندّعي؟؟ إذن فمن حرق كل ما تم حرقه؟؟ وهل كانت ستنتج الثورة دون حرق أو تدمير؟؟ وهل نجحت بهما؟؟ هل رحيل رئيس يعني نجاح الثورة؟؟ هل سأتمكن يوماً من الإجابة على أيّاً من تلك التساؤلات بضمير مُستريح؟؟»

ازاي يكون الصح سايب شعور بالذنب..

وعشان تعيش مرتاح لازم يموت القلب..
مقلوبة يا موازين والمخلصين خائنين..
قول للضمير لو نطق.. اخرس يا ابن الكلب..

oboiikan.com

الخميس ٢٦ ديسمبر سنة ٢٠١٣

خرج مجدي كارم مرتدياً حلّة أنيقة دون رابطة عُق من مصعد العمارة التي يسكنها عصام، ولم يحتاج أكثر من ثانية واحدة ليعرف إلى أين يتجه حيث سمع صوت الأغاني تنطلق من خلف باب الشقة المواجهة للمصعد، نقل هدية عيد ميلاد مَلَك وحيدة عصام ليده اليسرى وضغط الجرس بيمينه.

فتحت مَلَك باب الشقة بوجه سعيد، ما أجمل الطفولة؛ حيث لا شئ يعكّر المزاج، فتلك الطفلة السعيدة بحلول ليلة عيد ميلادها سعادة من امتلك الدنيا، ستتحوّل بتقدم العمر لسيدة تذكّرها تلك الليلة بالشعرة البيضاء التي ستظهر عما قريب وسط شعرها الأسود الجميل، لتتحوّل تلك السعادة لابتسامة مصطنعة ثم لاكتئاب مؤقت بعد رحيل المدعوّين.

قال مجدي لنفسه سِرّاً وهو يُسلم عليها ويناولها هديّتها
«ياليتني ما تمنيت أن اتقدم في العمر عندما كنت في مثل
عمرك» وكأن عدم التمني كان ليوقف تقدم الزمن.

مال عليها مجدي وسألها بـود:

-بابا فين يا مَلَك؟؟

فأشارت للخلف دون أن تنظر له، حيث كانت عيناها متعلقة
بتلك العلبة المغلقة التي ناولها إياها. رفع عينه للدخل
ليرى عدد غير قليل من الأطفال يتحركون في كل اتجاه، منهم
من يرقص ومنهم من يبتسم ابتسامة مصطنعة ليلتقط
صورة لنفسه مع أصدقاء يُحيطون به. ولمح بعض السيدات
يتحدثن مع بعضهن البعض دون اكتراث لصوت الأغاني العالي.
ثم أخيراً رأى عصام قادماً نحوه مرتدياً قميصاً أبيض مفتوح
الأزرار وبنطلون جينز وعلى وجهه ابتسامة سعيدة، قال عصام
فاتحاً ذراعيه:

-كده انا اتأكدت إنك مش زعلان مني علشان زيارة البيت..
بجد تشريفك النهاردة فرّحني.

-مفيش زعل ولا حاجة.. انا اللي متشكر على العزومة..
والمدام بتعتذر علشان ماقدرتش تيجي.

أغلق عصام الباب وأشار لمجدي ناحية الصالون، وقال:

-خسارة.. كان نفسي تشرفنا.. بس تتعوّض إن شاء الله.

تحرك مجدي خلف عصام في اتجاه الصالون، متفادياً العديد

من البالونات والأطفال الذين يطاردونها في سعادة، واضطر
لرفع صوته ليصل لعصام بسبب الأغاني التي تملأ المكان:

-غادة لسة مجاتش؟؟

التفت له عصام وأفسح له الطريق ليتقدمه وقال:

-ولا حسن كمان.. شكلهم جاينين سوا.

ثم أكمل وهو يشير للجالسين معه في الصالون تباعاً:

-الأستاذ راشد غريب.. حمايا.. شريف ناجي.. صديق عمري..

هاني محفوظ.. مهندس وصديق.

حيًا مجدي كل منهم، وقبل أن يقدمه عصام، قام راشد وقال:

-الأستاذ مجدي كارم شخصياً؟؟ ماكنتش اعرف إنك تعرف

عصام!!

مجدي:

-اتشرفت بمعرفته قبل إسبوع لحسن الحظ.. وماعرفش إنه

نسيب رجل الأعمال المشهور راشد غريب.. تشرفت.

راشد:

-الشرف لي يا مجدي بيه.. ده حضرتك شخصية وطنية نادرة

حقيقي.

مجدي:

-ده من ذوق سعادتك.

أشار عصام لهم بالجلوس قائلاً:

-اتفضلوا.. تشرب أيه يا استاذ مجدي.. احنا سبقناك.

مجدي:

-مِيّة بس.. كتر خيرك.

جاءت ريم راشد أخت رضوى ونظرت لمجدي نظرة لوم واضحة وجلست قبالته وقالت قبل أن يستفسر عن نظرتها: -أستاذ مجدي كارم المعارض الكبير لمبارك واللي باع الثورة في ثانية.. يادي الهنا يادي الهنا.. ماكنتش اعرف إنك صاحب عصام.

أدرك مجدي بذكاه أن ريم من الشابات التي تراه خائناً للثورة بعد انتقاده لسليباتها، وبحكم عمله فقد تعود على هذا النوع من السخرية منه، فابتسم وقال وهو ينظر لها: -ماشرفتش بحضرتك.. واضح إنك عارفاني.
ريم:

-وهو في حد في مصر مايعرفش حضرتك؟؟
فقال راشد:

-دي بنتي.. ثورجية من النوع اللي دماغه أنشف من الحديد.
قال شريف ناجي:

-شايف يا مجدي بيه؟؟ أدي اللي خدناه من نكسة يناير.. الناس في مكان زي ده بتخون بعض. وأشاح بنظره بعيداً ليتفادى نظرة ريم الغاضبة.
فقال مجدي:

-اسمح لي اختلف معاك على تسميتها نكسة.. ماهو ده برضه استفزاز في غير محله.

شريف:

-كل الأرقام اللي لا يمكن تزويرها مش بتقول غير إنها
نكسة.. سياحة.. احتياطي.. جرايم.. اقتصاد.. سوق العمل..
أمن قومي.

أوما مجدي برأسه متفهماً، وأضاف:

-دي سليات محدش يقدر ينكرها.. لكن إغفال إن تغيير نظام
مبارك كان ضرورة لمجرد إن التغيير تم بطريقة غلط هو عين
الظلم برضه يا شريف بيه.. نظام مبارك كان فقد كل شعبية
له في الشارع وكل تعاطف وخاصة بين الشباب.. وده اللي
سهل مهمة إسقاطه.

ريم:

-دلوقت حضرتك بتدافع عن الثورة؟؟ انا مستغربة حضرتك
بصراحة!!

ابتسم مجدي وقال:

-الغريب فعلاً إنك تفتري إن انتقادي للشئ هو هجوم
وتشويه.. يا أنسة ريم.. الدفاع عن الغلط هو عين الغلط..
انتي وكل الشباب اللي تحمّس لفكرة الثورة غلطتوا غلطة
عمركم يوم ما اتجريتوا للدفاع عن أخطاءها.. فأصبحتم في
الجانب الغلط من المعادلة.

ريم:

-المعادلة ما فيهاش غير مع الثورة أو ضدها.. بلاش تحاول
تقنعني بالكلام اللي بتكتبه في مقالاتك إن في مكان في النص..

لأنه مفيش.

مجدي:

-انا ماقولتش أبداً إن في مكان في النص.. الحقيقة إني طول عمري كان عندي هدف من الوقوف في وش الفساد والظلم.. وهو إني اشوف مصر أحسن.. المصيبة يا ريم إني شايف ناس كتير أصبحت الثورة عندهم هي الهدف مش وسيلة لتحسين الوضع.. وبالتالي لما وصل الحال للحظة اللي تعارضت فيها مصلحة مصر مع مصلحة الثورة.. وقفوا دون وعي منهم ضد مصلحة مصر.. مع إنهم فاكرين نفسهم بيخدموا مصر عن طريق الثورة.

ريم:

-وهو مصلحة مصر مش مصلحة الثورة؟؟ ماهي الثورة كانت علشان مصر.

مجدي:

-بكل تأكيد.. الخطر الحقيقي اللي كان بيهدد مصر قبل يناير كان الفساد.. لكن دلوقت الخطر الأول على مصر هو أمنها القومي.. الظروف اتغيّرت وبالتالي لازم تتغيّر الأولويات.. الثبات على الموقف في الظروف المتغيّرة هو عين الغلط.. ولا هنبقى عاملين زي الراجل اللي عايز يغيّر ستاير البيت.. بس في وسط تغيير الستاير باب الشقة اتكسر.. فيقول انا طالما شغال في الستاير لازم اخلصها الأول.. ونقعد من غير باب شوية مش مشكلة.. هو ده اللي اقصد بالأولويات.

ريم:

-وليه ماتعملش الأتئين؟؟

مجدي:

-ماهو ده اللي بيحصل.. شغالين في الخطة اللي المفروض كانت تحصل بعد ١١ فبراير.. بس ربنا ينتقم من اللي منع تنفيذها.

ريم:

-يعني انت موافق بييجي راجل عسكري تاني؟؟

مجدي:

-انا موقفي ثابت.. فين معيار الحكم على الرئيس؟؟ انا شخصياً شايف إن معيار الكفاءة هو اللي المفروض نستخدمه.. ماهو مش كل عسكري فاسد ولا كلهم ملايكة.. ولا كل مدني ملاك.. مانتي جربتي المدني.. والتجربة الفاشلة دي تسببت في وصم كل من هو مدني بالعار عند غالبية الشعب.. ليه؟؟ علشان انتوا فضلتوا تدافعوا عن الثورة في الصح وفي الغلط لحد ما حفرتوا قبرها.. يا ريم الموقف سهل وواضح.. هديلك مثال سهل.. أتوبيس فيه ركاب كثير.. واحد سايق بقاله كثير.. قام كام واحد من الركاب طلبوا تغيير السواق.. وبعد شد وجذب اتغير السواق فعلاً.. الجديد كان هيقع بالأتوبيس في الترعة.. الطبيعي إن غالبية الركاب يطلبوا من اللي كان سايق يرجع يكمل الطريق.. مش معنى كده إنهم عبيد.. معنى كده إنكم فشلتوا.. وبتكرروا نفس الغلطة تاني.. عايزين تجيبوا

واحد غير مؤهل تاني يسوق.. ماتتعلموا من الغلط علشان
كلنا نستفيد وتجهّزوا واحد شاطر الأول ومتعلم السواعة
كويس.. علشان لما تيجي الفرصة يكون على قدر المسؤولية.

ريم:

-موت يا حمار على ما تيجي الفرصة.

مجدي:

-وارد إن الفرصة تتأخر.. بس تغيير البلد مش بيبجي في يوم
وليلة.. ولكن اللي اتسبب في تأخير الفرصة هو انتوا.. وكل
ماتعترفوا بده بسرعة.. كل ما هترجعوا تشتغلوا صح بدري.. لو
عايزة تعملي تغيير النهاردة وبيان نتيجته بكرة تبقى أنانية..
سامحيني بس هي دي الحقيقة.. لو فعلاً عايزة مصلحة
البلد.. بتبدي النهاردة بتغيير بسيط وتأثيره مش هيبان في
عمرِك.. بس على المدى البعيد.. كل حاجة هتتحسن في وقتها.
شرب كوب الماء أمامه وأكمل:

-يا ريم.. انتي والدولة في فريق واحد.. إياي حد يجرك
وتقفى ضد الدولة.. انتوا بقيتوا عاملين زي الفريق اللي
بيموت لاعيبته بعضهم في التدريب.. ونص نجوم الفريق
تتصاب في التدريب وساعة الماتش بيستغربوا لما بيتغلبوا..
انتقدوا الدولة بهدف الإصلاح.. انتقدوا المؤسسة بهدف
تقويتها.. مش بهدف إنهاكها وإسقاطها.. وماتغلطوش غلطة
يناير تاني.. لأن النتيجة هتكون هي هي أو لا قدر الله أسوء.
تدخل عصام في الحديث قائلاً:

-على فكرة يا ريم.. دي أول مرة أستاذ مجدي يشرفني في بيتي.. ابوس أيدك بلاش تبقى آخر مرة.

ضحكت ريم وقالت:

-ده نقاش هادي.. انا مش بعصّ يا عصام.

مجدي:

-يا عصام.. ريم من أكثر الشباب اللي مختلف معايا أدباً واحتراماً.. انت لو تشوف بيعملوا فيّ أيه ع ال Social Networks هتعرف قصدي.

راشد:

-دي ضريبة إنك تكون مشهور في بلدنا للأسف.

مجدي:

-في كل حتة مش مصر بس.. دي ضريبة الشهرة عموماً.

فتح حسن في تلك اللحظات باب سيارة غادة، التي وجدت مكان مناسب لتترك به السيارة بأعجوبة بقرب العمارة التي يسكنها عصام، وقال:

-مستينيكي بقالي ربع ساعة في الشارع.

اتسعت عيناها وقالت:

-والله ماعرف.. وبعدين بقالي إسبوع مش عارفة أوصلك.. تستاهل أصلاً.

-حقك عموماً تزعلي.. بس انا كنت شغال في القضية.. وعازيك في حاجة مهمة قبل ما نطلع.

غادرت السيارة، فاقتربت منه رغماً عنها حيث إنه كان يقف بجوار بابها، فنظرت إلى عينيه مباشرة وقالت بهمس:
-عيني.

فقال بجدية لا تتناسب مع توقعاتها:

-انا شاكك في حد.. شبه متأكد إن هو الي قتل هبة وداليا وتذاكر أو له علاقة بقتلهم على الأقل.
قالت بلهفة:

-بجد؟؟ مين؟؟!!

أشار لأعلى وقال بقلق:

-موجود فوق.

نظرت بتلقائية دون وعي لأعلى، ثم عقدت حاجبيها وقالت مستنكرة:

-فوق فين بالضبط؟؟

-في عيد ميلاد مَلَك يا غادة.. هيكون فوق فين يعني؟؟

-نعم؟؟!!

-يارب يطلع شَيِّ مش في محله. قالها بضيق.

-مين يا حسن؟؟

أسند ظهره إلى جانب السيارة وقال:

-مين الي يعرف كل تفاصيل قضية السفاح وله علاقة بالضحايا؟؟ هو ده السؤال الي كنت بسأله لنفسي من أول يوم.. لحد ماوصلت للإجابة من كام يوم.. ومن ساعتها بفكر في طريقة اتأكد منها ومش لاقى.

صمت لثواني ثم أكمل:

-انتي عارفة إن المستشفيات الي كانت بتشتغل فيها هبة
وداليا تابعة للمجموعة الاستثمارية الي بيملكها رجل

الأعمال حازم البدري؟؟

قالت دون فهم ولكن بتوجس:

-لا.

-الراجل ده شريك راشد غريب في مشاريع كثير في مصر.

اسندت غادة ظهرها على السيارة، كمن تحاول منع انهيار

متوقع، وقالت:

-معقول؟؟

-معقول أيه؟؟

-يكون عصام؟؟

هز حسن رأسه نافيةً، وقال:

-انا كنت شاكك في ده من أول ماعرفت إن حازم البدري

يملك مجموعة المستشفيات دي وغيرها.. لكن معرفتي

بعصام أكدت لي إن مش هو القاتل.. لو هو كنت هعرف..

لكن اكتشفت إن في حد تاني كان عارف كل تفاصيل قضايا

السفاح.. وكمان تربطه علاقة مباشرة بحازم البدري.. الي

يملك المجموعة الإستثمارية الي تملك المستشفيات الي كانت

بتشتغل فيها هبة وداليا.. وده لا يمكن يكون صدفة.

قالت غادة بنفاذ صبر:

-ما تقول يا حسن مين؟؟ انا واقفة بالعافية.

-شريف ناجي.

قالت بذهول:

-شريف؟!

أوماً حسن برأسه إيجاباً، ولم يرُد. وبعد دقيقة كاملة من الصمت، تركها حسن لغادة حتى تستوعب الأمر، قال:

-مش عايز حاجة خالص تبان عليكي لما تقابليه.. انا بس حبيت أحذرك منه لحد ما اتأكد.

قالت وهي تزفر بحرقة:

-هحاول يا حسن.. هحاول.. بس خليك جنبي أرجوك. قالتها وأمسكت كف يده وضغطت عليه كأنها طفلة خائفة أن تضيع وتتعلق بكف والدها وسط زحام السوق.

فقال حسن وهو يضغط كفها لطمأنتها:

-لا يمكن اسمح إن حاجة تحصلك وانا عايش.. لا يمكن.. ماتخافيش وانا جنبك.. أبداً.

قالت بصوت مرتجف:

-حاضر.

فتح عصام باب شقته بلهفة بعد تأكده من «العين السحرية» أن الطارق هو صديقه حسن ومعه غادة، وقال بفرحة:

-أخيراً؟! مصر كلها وصلت وانتوا لسة.

قال حسن بابتسامته المعتادة:

-انا تحت من بدري.. مستني غادة.. ماحبتش اطلع لوحدي.

عصام:

-ليه؟؟ هناكك؟؟ ادخل ادخل.. وانتي يا غادة.. قالبة الدنيا

بمقالاتك.. ومحدش هيعرف يكلمك بعد كده.

ابتسمت ابتسامة متوترة وعيناها تبحث خلف عصام رغماً

عنها:

-لا مانتقلقش.. مش هستغنى عنك.. مانت مصدر أساسي

برضه.

أغلق عصام باب الشقة وقال:

-على فكرة.. رضوى عايزة تتعرف عليكي.

ولكن غادة لم ترد، حيث كانت قد لمحت شريف وهو

يتحدث منفجلاً مع ريم، ولكنه بمجرد أن لمحها هو حتى

لمعت عيناه، وابتسم لها ابتسامة بدت لها مختلفة عما تعرفه

عنه من قبل، غالباً بسبب ما قاله لها حسن، فحتى إذا كانت

الابتسامة عادية، سترها هي مختلفة، بسبب ألعيب العقل،

حيث يجعلها تظن أن شريف يعرف ما تخفيه، فتوترت رغماً

عنها.

-غادة.. عصام بيكلمك.

أفاقت غادة على صوت حسن، الذي لاحظ توترها، فحاول

أن يلهيها عنه، فقالت بابتسامة جاهدت لتجعلها طبيعية:

-ياريت يا عصام.. وفين ملكك علشان تاخذ هديتها؟؟

ترك حسن هديّة مَلَك في يد عصام، وقال:

-وَصَلَّ دِي مَلَك.. وروح انت وَصَلَّ غادة.. وانا هقععد مع
أستاذ مجدي لحد ماتفضي.

-على فكرة يا حسن.. حسين قالي على اللي عملته مع
والدته.. معقول يا حسن تعملها العملية كلها على حسابك؟؟
قال حسن بضيق:

-انا كنت قايله مايجيبش سيرة.

-عارف بس انا اللي ضغطت عليه بسؤالى.. ربنا يجازيك خير
يا حسن. قالها وابتسم لحسن ثم دار ليعطي مَلَك هديّتها.

عاد عصام لحسن بعد دقائق ليجده يخاطب شريف قائلاً:

-بس مش شايف إن الشرطة كانت مزوداها شوية قبل
؟؟٢٠١١

-يا حسن بيه الشعب ده واطي ماينفesch معاه غير العصاية..
سعادتك محتاج تقضّي وردية واحدة بس في قسم وانت
تعرف إن الشعب ده يستاهل ضرب الجزم.. ولا تعالى شرفني في
مكتبي يومين.. تلاقى اللي بيقولك انا لا يمكن اسمح يتعمل
برج اتصالات في المنطقة ده بيجيب سرطان.. ياخذ قرشين..
وتلاقيه ساكت زي الكلب.. هو ده الشعب اللي عايزه يعيش
في ديموقراطية؟؟

ابتسم حسن وقال:

-الموضوع ده يطول فيه الكلام.. ماهو قيادات الشرطة نفسها

ياما تورطت في قضايا فساد مالي.. مالها دي ومال وعي الشعب؟؟ الشعب مهما كان وحش فهو ضعيف.. لكن لما يكون جهاز أمني صاحب سلطة ومفتري دي تبقى مصيبة.. ونتيجتها اللي شوفناه في يناير.
تدخل عصام قائلاً:

-مابلاش شريف يا حسن.. تقريباً هو أكثر واحد في العالم بيكره ثورة يناير.. وشعب مصر كله تقريباً.
قال شريف:

-مش كلهم.. في يبجي خمسة ولا ستة بحبهم. قالها وضحك بصوت عالي.

نظر شريف في اتجاه الشرفة بحثاً عن غادة، التي كان وما زال معجباً بها، وكان ينتظر تلك الليلة ليقابلها ويحاول أن يصل لما فشل في الوصول له من قبل، ظناً منه إن حالته المادية كانت السبب، فكان على يقين إنها ستنبهر بعد أن تراه في ثوبه الجديد، حرفياً ومجازياً، فقد اشترى حلة جديدة يفوق سعرها مرتبها في الجريدة عن شهرين على الأقل لهذه المناسبة.

لما لمحها، التقت عينه بعينها لثانية، ثم لاحظ ارتباكها الواضح، وتهرّبها من سلامه الذي احبطته مراوغتها. كان واثقاً مما رأى ولكنه لم يكن واثقاً من السبب، فأرجع غروره في

نفسه ارتباكها لحالة الخجل التي تنتاب أي فتاة عند لقاء شاب وسيم مثله، فاستأذن من حسن وعصام، وتحرك في اتجاهها بثقة وابتسامة تبدو ساحرة مع حلتها الجديدة. وقف أمامها، ومدّ يده قائلاً:

-أمال لو مكانش بينا عيش وملح.

ارتبكت بشكل واضح، وابتسمت ابتسامة كانت كفيلة بتأكيد شكوك شريف إنها ليست في حالتها الطبيعية، وقالت:

-شششش.. شريف.. مش واحدة بالي خالص.. ازيك؟؟

-مالك يا غادة؟؟ انتي زي ماتكوني شوفتي عفريت!!

ضحكت رضوى زوجة عصام مازحة التي كانت واقفة مع غادة:

-انت فيك من العفريت بصراحة يا شريف بالتسريحة الجديدة دي.

فضحك شريف وجاهدت غادة عبثاً لتبدو ضحكتها طبيعية وقالت:

-فينك يا شريف؟؟ مش بتسأل يعني!!

-انا كلمتك اكر من مرة.. وبعثلك ع الواتساب.. بس شكل القضية وخداكي من الدنيا.. انا متابع كل تحقيقاتك.. براقو عليكي بجد.

-القضية؟؟ اه.. دانا مابنامش.. والأرقام كلها ضاعت من عندي.. معلش يمكن ماعرفش إن انت.. ابقى رنلي وانا هسجل نمرك.. عن إذنك.

وسألت رضوى عن مكان الحمام، وتركته وسط شكوك لا
ترحم. كان أسلوبها معه يترك انطباع إنها تخشاه، لا يمكن أن
يخلط الخوف بالخجل، هي تخشاه، ولكن لماذا؟؟

تلقي هاتف شريف رسالة، فأخرجه الأخير ليقراءها، وما أن
ظهر فحواها على الشاشة حتى تغيرت ملامحه من الحيرة
من تصرف غادة معه، لغضب شديد وتوتر وانفعال، ودار
برأسه في الشقة وكأنه يبحث عن شئ ما، ولكنه وجد عصام
أمامه يقول له:

-ماتيجي يا بني تقعد معنا بدل مانت عامل زي التايه في
المولد كده.

احتاج شريف لثانيتين حتى يدرك أن عصام يكلمه، ومثلهم
حتى يدرك ما قال له، ثم قال والتوتر يعصف به:
-معلش يا عصام.. مشكلة في الشغل.. لازم انزل حالاً..
سامحني.. يالا سلام. قالها وغادر الشقة دون تأخير.

عاد عصام لحسن الذي لاحظ ما حدث، فقال:

-صاحبك ماله؟؟ شكله في حاجة مضايقاه.

-مش عارف يا حسن والله.. بس فجأة جات له رسالة
واضطر ينزل.. ربنا يستر تكون حاجة بسيطة.

-ربنا يستر.

oboiikan.com

٤.

قبل منتصف ليل الخميس ٢٦
ديسمبر سنة ٢٠١٣

فتح حسن باب سيارة غادة لها لتركبها بعد مغادرتهم سوياً
عيد ميلاد مَلَك، نظرت هي له وقالت:
-انا عايزة اتكلم معاك شوية يا حسن.. مش عارفة اتم
عليك بقالي إسبوع.

-بلاش اليومين دول.. هانت.. نخلص بس من القضية الي في
أيدينا وبعدها عندنا العمر كله.
ألقت حقيبتها بغضب على المقعد المجاور لمقعد السائق
وقالت بضيق:

-انا مش قادرة أفهمك يا حسن.. شوية بتكون أحنّ حد في
الدنيا.. وشوية بتكون غامض لدرجة بتحسني كأني ما عرفش
انت مين.. خليك براحتك.. سلام. قالتها وركبت السيارة

وأغلقت بابها بعنف وأدارت المحرك، فانحنى حسن عند
النافذة وابتسم ابتسامة من جرحه الكلام ولكنه لم يستاء
من قائله، وقال بصوت حنون:

-انا ما طلبتش منك غير شوية وقت أقفل فيه صفحة لازم
تتقفل.. ليه بتلوميني وكأن انا اللي اخترت افتحها؟؟ انتي
عارفة ظروفي من أول يوم.

صمت لثواني ثم أكمل:

-انا آسف لو ضايقتك بأي شكل.. حقيقي مش قصدي..
خلي بالك من نفسك. قالها وسار في اتجاه سيارته.

شعرت عادة بقدر كبير من الإشفاق على حسن بعد جملته
الأخيرة، ولكنها لم تنطق، فهي امرأة أولاً وأخيراً، يمكن أن تفهم
انشغال حبيبها عنها نظراً لظروفه، ولكن مستحيل أن تعترف
بذلك، فهي قد تُخطئ بطلب بعض من الاهتمام الزائد في
وقت غير مناسب، ولكنها تعتبر هذا الطلب يأتي بدافع
الحب، إذن فهو مُبرر، وبالتالي فهو لا يعتبر خطأً في الحقيقة،
بل اهتمام زائد يجب مراعاته وتستحق الشكر عليه أيضاً.
زفرت بضيق وهي تُحدث نفسها قائلة:

-براحتك يا حسن.. لما تبقى تقلب الصفحة ابقى كلمني.

قطع أفكارها صوت حشجرة صدر من السيارة، تبعه عدم
استجابة السيارة لدواسة البنزين التي ضغطت عليها أكثر

من مرة بقوة، ثم تباطؤها تمهيداً لتوقف إجباري وشيك. نظرت عادة لمؤشرات السيارة لتكتشف أن مؤشر البنزين يشير لنفاذه من السيارة، استغربت هذا بشدة لأنها توقفت في طريقها من منزلها لمنزل عصام لتملاً السيارة بالبنزين. أوقفت السيارة بجوار السيارات المتراصة على جانب الطريق، وأخرجت هاتفها لتتصل بحسن، ولكنها امرأة، فألقت بالهاتف على المقعد المجاور لها بعنف وكأنه المسئول عن تسرُّب البنزين أو المسئول عن جفاء حسن المزعوم.

بعد دقيقة من الصمت الغاضب، قررت أن تترك السيارة وتوقف سيارة أجرة وتطلب من السائق أن يتولى إحضار القليل من البنزين لسيارتها. التقطت حقيبتها وهاتفها، وغادرت السيارة وتأكدت من إغلاقها، ووقفت وحيدة تنظر للشارع انتظاراً لمُرور سيارة أجرة في تلك الساعة المتأخرة. مرّت الدقائق بطيئة عليها، ومع كل ثانية تُمر كانت تفقد جزءاً من قدرتها على مقاومة اتصالها بحسن لطلب المساعدة، وقبل أن تنهار مقاومتها وينتصر ضعفها وقلة حيلتها على كبرياء المرأة العنيد الذي يسيطر عليها مؤقتاً، توقفت سيارة باهظة الثمن ذات زجاج أسود أمامها، فلم تتبيّن سائقها حتى فتح باب سيارته وغادرها بثقة وبملامح جامدة، لتكتشف إنه شريف ناجي، نزل من سيارته ودار حولها في اتجاه عادة قائلاً:

-البنزين خلص مش كده؟

توترت عادة كما لم تتوتر من قبل، فهي الآن تقف في شارع متوسط الإضاءة، في منتصف الليل، وحيدة، مع قاتل محتمل، بدون أي حماية على الإطلاق، وبدون أن يفحص السيارة أو أن تخبره بأي شيء علم بنفاذ البنزين من سيارتها، كيف حدث ذلك؟؟ فجأة نسيّت كبرياءها وأخرجت هاتفها لتتصل بحسن، ولكن شريف كان قد وصل لها بالفعل، نظرت له بخوف واضح وقالت بصوت مرتجف:

-انت عرفت مينين؟

ابتسم شريف وقال بهدوء:

-واضح إن تنك البنزين مخروم.. البنزين باين في الأرض.

التفتت بتلقائية لتتأكد من كلامه، ولكن قبل أن ترى ما أرادت شعرت بيد شريف اليسرى تحيط برقبتها من الخلف، وسمعت صوت أزيز عالي، تبعه ألم فوق احتمالها انطلق من جانبها الأيمن في شكل تيار كهربائي عنيف اجتاح جسدها كله، الذي انتفض لثانيتين ثم همد تماماً. فقدت الوعي بين ذراعي شريف الذي ألقى الصاعق الكهربائي فوق سقف سيارته وفتح شنطتها الخلفية باستخدام «الريموت كنترول» وحمل عادة الفاقدة الوعي ووضعها بحذر داخلها حتى لا تصطدم بحواف السيارة الحديدية، وأغلق عليها باب الشنطة.

فجر الجمعة ٢٧ ديسمبر سنة ٢٠١٣

بدأت عادة تستعيد الوعي تدريجيًا، ألم شديد يعتصر جانبها الأيمن يمنعها من التركيز فيما حولها، تسمع أصوات حولها، ولكنها لا تستطيع تمييزها، أو المكان حولها، وإن كانت شبه متأكدة إنها داخل سيارة تتحرك، صداع رهيب احتل رأسها يمنعها من التفكير، أي حركة تقوم بها تزيد من ألم جانبها الأيمن وصداعها الذي يفوق قدرتها على الاحتمال كما هو دون زيادة. بدأت في استعادة وعيها وتذكرت جدالها مع حسن، ثم تعطل سيارتها، ثم تذكرت دفعة واحدة هجوم شريف عليها من الخلف، وما قاله لها حسن قبل عيد الميلاد، فأصابها ذعر أقوى من ألمها مما جعلها تنتفض وتفتح عيناها على اتساعهما، وتصرخ بأسم حسن.

وجدت نفسها على المقعد المجاور لحسن داخل سيارته، وهو بجانبها. وقف بالسيارة ومال نحوها ليطمئنهما إنها في الأمان، لا تعلم كيف وصل لها ولا كيف وصلت هي لسيارته ولا أين ذهب شريف. ولكنها لم تستطع أن تتفوه بأي شيء، بمجرد أن رأت حسن بجوارها أغمضت عيناها وبكت كما لم تبكي من قبل، لا تعلم إن كانت دموع الفرح بعد اطمئنانها على نفسها، أم هي دموع بسبب الألم الذي يعتصر جسدها في مواقع عدة، ولكنها كانت تعلم أن البكاء بجوار من تحب سيريحها، فبكت.

نظر لها حسن بإشفاق شديد وشعور بالذنب، فهو الذي سمح لكل هذا أن يحدث، هي لا تعرف بعد أن هو الذي استخدمها كطعم يستدرج به شريف لمصيده، ليتأكد من جريمته دون أن تعلم.

ربت على كتفها لتهدأ، ولم يحاول أن يتحدث معها قبل أن تتوقف عن البكاء ليعترف لها بكل شيء. أخرج هاتفه واتصل بعصام، وقال بمجرد أن سمع صوته:

-اسمعي كويس يا عصام عشان مفيش وقت.. شريف صاحبك هو اللي دبر أو قتل داليا وتذاكر وقبلهم واحدة اسمها هبة في المنصورة.. انا اتأكدت...

قاطعته عصام:

-انت بتقول أيه يا حسن؟؟ انت فاهم انت بتقول أيه؟؟
-أيوة فاهم للأسف.. بس هي دي الحقيقة.. انزل دالوقت
لصاحبك وواجهه بالحقيقة وهو هيعترف.. شريف خطف
غادة في شنطة عربيته ولولا كنت وراها كانت راحت زيهم..
وسايبه في الشارع الرئيسي عند بيتك جوا شنطة عربيته..
انزل وانت تشوف.

-خطف غادة؟؟ هي فين؟؟
-ماتقلقش عليها.. هي معايا بخير.. بس عايزك تلحق
شريف.. ولو اتحرك هقولك.. انزل بس وانا هفهمك بعدين.
-حاضر يا حسن.. سلام.

سمعت غادة مكاملة حسن لعصام، وتمكنت دهشتها من أن
تُسيها ماحدث معها وحتى الأم الذي يجتاح جسدها دون
رحمة، واعتدلت لحسن وقالت بصوت ضعيف:
-انت اتأكدت ازاي إن شريف هو اللي قتل يا حسن؟؟
نظر لها حسن لثواني، ثم نظر أمامه ليتابع الطريق وقال:
-انا هحكملك كل حاجة.

بدأ كل شئ عندما عَلِمَ حسن من عصام أن له صديق شاركه
معظم أوقاته، وخاصة جلساته مع عمه للتحدث بخصوص
قضية السفاح، فبدأ يبحث خلف الشخص الثاني الذي يعرف
كل تفاصيل قضية السفاح القديمة ومن ثم يستطيع تكرارها

كما حدثت، ليقتل دون أن يثير الشكوك حوله، لأن كل الأنظار ستتجه حتماً في اتجاه القاتل القديم. بعد يومين من البحث توصل حسن لمعلومات تؤكد أن حازم البدري يملك المجموعة الاستثمارية التي تملك المستشفيات التي عملت بها كل من هبة وداليا. وبما أن حازم البدري هو رئيس شريف في العمل، بدأت تتضح العلاقة بين كل الأطراف لحسن، وإن كان لا يعلم سبب الجرائم، ولكنه كان يحتاج للحصول على دليل يؤكد له ولعصام أن شريف صديق عمره هو نفسه القاتل الذي يبحث عنه، وهي مهمة ليست باليسيرة.

قرر أن يتعقب شريف لمدة خمسة أيام، فثبتت جهاز تعقب في سيارة شريف ليعلم كل تحركاته، ولكنه لم يتوصل لما يثير الشكوك أو ينفبها، فقرر أن يلجأ لحيلة تمكّنه من كشف شريف له هو شخصياً على الأقل ثم بعدها يحاول إقناع عصام بأي طريقة. فاشترى حسن رقم محمول جديد، وحفظ هذا الرقم على هاتفه المحمول بأسم غادة عثمان، وأبلغ غادة بشكوكه قبل عيد الميلاد مباشرة حتى تبدو لشريف مرتبكة، برغم تأكده عليها ألا تبدي أي توتر أو قلق من ناحية شريف، ولكنه كان يعلم إنها لن تستطيع وسيظهر عليها، وقد كان. ثم استخدم هذا الرقم أثناء عيد ميلاد مَلَك في الدقائق التي استأذنت فيها غادة لتذهب للحمام وأرسل منه رسالة لرقم شريف، قال فيها:

(هبة وداليا بيسلموا عليك يا شريف بيه)

تعتمد عدم ذكر إسم تذاكر لأنه الإسم الوحيد الذي ظهر في الجرائد ولكن داليا كانت قد ذُكرت بحروفها الأولى فقط، ولم تذكر هبة مطلقاً، وهذا حتى يتأكد من خلال رد فعل شريف من مدى معرفته بالقضية، حيث إنه إذا كان لا يعلم أي شئ عن القضية سوى ما قرأه في الجرائد لن تثيره الرسالة، ووارد أن يعتبرها كأن لم تُكُن. ولكن جاء رد فعل شريف ليثبت لحسن إنه من دبر أو نفذ الجرائم كلها، حين غادر شريف عيد الميلاد على عجل وكانت ملامحه تبدو وكأنه في أعلى درجات الغضب والتوتر. وبالطبع عندما بحث شريف عن رقم الهاتف في البرنامج الذي يعطيك اسم صاحب أي رقم تكتبه فيه وجد أن الهاتف مُسجل بإسم غادة عثمان، فقام شريف عندما غادر عيد الميلاد بتخريب سيارة غادة حتى لا تبعد بها، وحتى يتمكن من اصطيادها أثناء طريق عودتها بعد نزولها من عند عصام ليستجوبها ويتأكد أولاً من أن أحداً سواها لا يعلم ما توصلت له من معلومات عن تورطه في الجريمة. ولكن حسن كان متابعاً لموقع سيارة شريف من خلال جهاز التعقب الذي ثبته في سيارته ويتابعه عبر هاتفه الذي، فعلم أن شريف مازال في الشارع الرئيسي بجوار بيت عصام منتظراً نزول غادة، فاتبعتها حسن ليقبى قريباً.

وعندما وضعها شريف داخل شنطة سيارته، قام حسن بصعق شريف في رقبتة من الخلف باستخدام الصاعق الذي تركه على سقف سيارته، ووضعه مكان غادة بعد فقدانه الوعي، دون أن يعرف شريف من هاجمه، ورحل وغادة معه داخل سيارته.

لم تستطع غادة أن تصدق أن يستخدمها حسن كطعم يستدرج به قاتل لمصدية أعدّها دون تحذيرها على الأقل من الخطر الذي هي بصدد، صمتت بعد أن فرغ من شرح خطته لدقيقتين ثم قالت بهدوء غريب:

-مبروك يا سيادة المحقق حسن.. حلّيت القضية وقفلت الصفحة.. ممكن توصلني البيت من فضلك؟؟

قال حسن دون أن ينظر لها:

-حاضر.

وبعد دقائق وقف حسن عند باب العمارة التي تسكنها غادة فغادرت هي السيارة وأغلقت الباب خلفها دون أن تقول أي شيء، اعتصر الألم قلبه، والندم أيضاً، هو يعلم إنه أخطأ، لم يحاول الدفاع عن نفسه لأنه يعلم إن الوقت غير مناسب، وربما تسامحه بعد أيام وربما لا، ولن يلومها وقتها، لأن هو نفسه لا يعلم إن كان سيسامح نفسه عما عرضها له أم لا.

فجر الجمعة ٢٧ ديسمبر سنة ٢٠١٣

غادر عصام عمارته وهو يتصل بحسن، وقف بجوار سيارته
ينتظر رد حسن عليه، وقال بمجرد أن سمع صوته:

-انا تحت البيت عندي اتحرك ازاي؟؟

-اطلع على الشارع الرئيسي هتلاقي عربية غادة واقفة
قاطعة بنزين.. ومش هتلاقي عربية شريف واضح إنه فاق
وعرف يطلع من الشنطة واتحرك على مصر الجديدة.. هو
ساكن في مصر الجديدة؟؟

كان عصام قد تحرك بسيارته بالفعل تنفيذاً لتعليمات حسن،
ومرّ بجوار سيارة غادة التي تقف على جانب الطريق كما
قال حسن، وقال:

-اه ساكن هناك.. شقته الجديدة.. انا عارفها هروح على

هناك.. بس ممكن تفهمني أيه اللي بيحصل؟؟
شرح له حسن باختصار حيلته التي نجح من خلالها في إيقاع
شريف والتأكد من أن له علاقة بجرائم القتل، وبعد أن فرغ
من شرحه قال عصام بصوت مصدوم:
-سلام انت دلوقت يا حسن. وأنهى الاتصال.

تأكد عصام من وجود سيارة شريف في الشارع الذي انتقل
ليسكن به حديثاً، استقل المصعد، وضغط الدور الذي يسكنه
شريف، أخرج سلاحه الميري وتأكد من تلقيمه بخزينة
الرصاص، ولكنه ترك رز الأمان في وضعه، يتمنى ألا يضطر
لاستخدام السلاح، ولكن ما قاله حسن خطيراً جداً، لا يمكن
أن يصدّقه، ولكن في نفس الوقت لا يمكن أن يكذب حسن
ويخترع قصة مثل هذه.

وقف عصام خارج باب شقة شريف صديق عمره، وشعر
وكأن دقائق قلبه كافية لإعلان وصوله بدون الحاجة لأن يدق
الباب، كان يتنفس بصعوبة، يشعر بلهيب يخرج من جسده
يكاد يحرق ملابسه، يتصبب عرقاً برغم البرودة، لا يذكر
موقف مرّ عليه في حياته كلها أصعب من هذا. استجمع
شجاعته أخيراً وضغط الجرس معلناً عن وصوله، بعد ثواني
لمح من خلال العين السحرية ظل شخص حجب عنها الضوء،
فقال بصوت جامد:

-انا عصام يا شريف.. افتح يابني ماتقلقنيش عليك.

فتحت ميار الباب وسألت:

-في حاجة مهمة أقدر ابليها لشريف علشان هو تعبنا
وناييم؟؟

قال عصام وهو يدفع الباب بخشونة:

-ناييم أيه بس؟؟ ده كان لسة معايا من نص ساعة.. هو
فين؟؟

دفع عصام جسده ودخل الشقة وأغلق بابها خلفه وقال
بحزم من لن يقبل نقاش:

-اندهي لشريف وياريت تسيبنا لوحنا كمان.. قوليله
صاحبك عصام.

قبل أن تتمكن من الرد سمعت صوت شريف من خلفها:

-خلاص يا ميار.. انزلي انتي.. انا كويس.. ده عصام صاحبي
مش حد غريب.

قالت وهي تلتقط حقيبتها من خلف باب الشقة:

-حاضر. قالتها ونظرت لعصام بشك واضح وثم غادرت.

وقف كل منهما يحاول أن يخترق عقل الآخر ليعلم فيما
يفكر وماذا يخفي، وبعد ثواني قال شريف:

-ما تقعد يا عصام.. ولا اقولك يا عصام بيه؟؟

-من إمتى بتقولي كده؟؟

-مش جاي تقبض علي؟؟ صحيح.. هو انت اللي حبستني في

شنطة العربية؟؟

قال عصام بنفاذ صبر:

-انا مش جاي أجابو على أسئلة.. قولي إن اللي وصلني
غلط وكذب يا شريف وانا هصدّقك انت.. انت ليك علاقة
بجرايم السفاح دي يا شريف؟

لم يرُد شريف، ولكن ملامحه نطقت بدلاً منه، نطقت
بالغضب والذنب والندم. انهار عصام على أقرب مقعد له
وأمسك رأسه بكفيه كمن لا يعرف كيف يتصرف، كان يتمنى
أن ينكر صديقه كل هذه الاتهامات، وأن يعنّفه بل ويسبّه
بأفظح الألفاظ لمجرد اتهامه بالقتل، كان يتمنى حتى أن
يؤجل المواجهة لوقت آخر حتى يستعد، وكأن الزمن كله
كافياً ليستعد للقبض على صديق عمره. بعد دقائق من
الصمت جلس شريف على المقعد المواجه لمقعد عصام،
وقال:

-الناس دي كانت ميّنة ميّنة يا عصام.. انا كل اللي عملته إني
استفدت من الموقف.

تسارعت أنفاس عصام وخفق قلبه مع بداية اعتراف شريف
بجرميته أمامه، مازال في حالة إنكار، مازال غير مُستعداً، ولن
يكون. أكمل شريف:

-انا ماتولدتش في عيلة متنغنخة زيّك يا عصام.. حاول
ماتحكّمش على ظروفي من وجهة نظرك.. فرصة وجت لحد

عندي اكون زي ما طول عمري بحلم.. وعلى فكرة انت كده
كده مش هتعرف تلمس المجرم الحقيقي.. مش هتطول
غيري.. غلبان بيجري ورا غلبان.. والغيلان بتتفرج وتستفيد.

سلط عصام نظرتة على شريف غير مُصدّقاً، ولكن شريف
كان عنده المزيد:

-ومش هتستفيد حاجة لما تقبض عليّ.. حتى لو اعترفت
على حازم البدري.. تفتكر حد هيعرف يلمسه؟؟ انت أكثر
حد عارف إن اللي زي ده فوق القانون.. في البلد دي الفلوس
هي القانون.. هي الحماية.. انا مش هقولك تعمل أيه.. بس
بحمّلك المسؤولية.. لو عايز تقبض على القاتل.. انا قصادك
أهو.. لو عايز تقبض على المجرم الحقيقي.. مش هتعرف..
يبقى من الظلم إنك تقبض عليّ لأنك هتعيش عمرك كله
حاسس بالذنب.

مايزال عصام غير قادراً على التحدث، حازم البدري؟؟ هل
قال حازم البدري؟؟ هل حازم البدري صديق حماه هو من
دفع شريف للقتل؟؟ ولكن شريف يعرف ماذا يريد عصام
أن يسأل وكأنه يستطيع أن يسمع صوت أفكاره، فأجاب:

-حازم البدري طلبها مني صراحة.. عايز يخلص من بنتين
وهيدخلني جنته على الأرض.. وقالها لي زي ما بقولها لك
كده.. البنيتين دول ماتوا من اللحظة اللي قرروا يبتزوا فيها

حازم البدري.. السؤال يا شريف بيه.. عايز تطلع من الحكاية دي كسبان؟؟ ولا خسران؟؟ وافقت.. وطبعاً حازم البدري كان عارف إن واحد بخبرتي يقدر ينفذ الجرائم من غير ما يتمسك. صمت لثواني ليلتقط أنفاسه، وأكمل وكأنه كان ينتظر لحظة اعترافه ليستريح فهو يعترف حتى دون أن يسأل عصام:
- قتلت هبة في النيل بعد ما أخذت منها الأوراق اللي كانت معاها اللي هدّدت بيها حازم وبيّنت الحادثة إنها غرقت.. دي كانت الأصعب علشان أول مرة.. بس بعد كده الحكاية بقت أسهل.. خصوصاً بعد ما استلمت الشقة والعريية.. وبعدها فكّرت في السفاح اللي اختفى.. قتلت داليا وبعدين قتلت البلطجي ولبستها له.. أخذت منه علبة سجايه وهو مش داري بعد ما وعدته بشُغلانة فيها قرشين حلوين ورميتها في شقتها.. الحكاية كانت سهلة ولا يمكن تتكشف.. ما عرفش انت كشفتها ازاي!!

قال عصام بصوت مرتجف:
- وقناوي؟؟

قال شريف غاضباً:

- ده كمان زعلان عليه؟؟ ده تاجر مخدرات يا عصام.. المفروض تشكرني إني خلّصتك منه.. مش تزعل عليه!!

- انا مش زعلان على حد غيرك.. انا كنت بسأل انت اللي قتلته ولا مش انت.. وقتلته ليه طالما مالوش دعوة بيك ولا

بحازم؟؟

-قتلته عشان اكمل التمثيلية بتاعة السفاح اللي رجح يقتل..
هو يعرفني من ساعة ما كان شغال معايا مرشد.. كان سهل
إني ادخل بيته وأخلص عليه.

-وطبعاً كل التواريخ اللي على راس اللي قتلتهم مالهاش أساس.
أوماً شريف برأسه، وقال:

-علشان الداخلية تتوه في متاهات وماتوصلش لحاجة..
فتزهق.. بس انت طلعت زي ما عمك الله يرحمه قال..
«بكرة الداخلية كلها تتكلم عنك» فأكّر؟؟ وابتسم بمرارة.
أطبق عليهم الصمت، ثقيلًا مشحونًا مشوبًا بالترقب والتخبط،
يكاد كل منهما أن يسمع دقات قلب الآخر معلنة عن طلب
القلب للراحة، وقت مستقطع، ليهدأ قليلاً قبل مواصلة
السباق.

قطع شريف الصمت وقال:

-ها يا عصام بيه؟؟ نويت على أيه؟؟

تنهد عصام بحرقة، وحاول جاهداً أن يخرج صوته حازماً
قاطعاً، وقال:

-انت قاتل يا شريف.. لازم اقبض عليك.. مش هسامح نفسي
أبدأ لو ماعملتش ده.

نظر شريف للأرض خجلاً ولم يعترض، وكأنه استراح عندما
علم بقرب نهايته، ولكن عصام أكمل:

-بس في نفس الوقت.. زي مانت قلت.. مش هسامح نفسي
لو قبضت عليك وسييت المجرم الحقيقي.. انت قُلت إنك

أخذت الورق اللي هبة كانت بتهدد بيه حازم البديري.. فين الورق ده؟

أدرك شريف ما يسعى خلفه عصام فقال بصوت خائف:
-بلاش يا عصام.. الراجل ده مش هيغلب فيك.. انت حشرة في نظره.. انا اتعاملت معاه وعارف.
-انا مش هعمل حاجة.. انت اللي هتعمل.. هتاخذ كل الأدلة وتروح للنائب العام.. وتعتزف مقابل صفقة تخفف عنك الحكم.. وربنا أكيد هيسامحك لو توبت بجد.. وكلنا في الداخلية هنكون في ضهرك.. لسة في فرصة يا شريف.. وحتى لو مفيش فرصة وهتتعدم.. اعمل لأخرتك يا أخي.

بكي شريف ونزلت دموعه لتغرق وجهه، بكي لأنه فقد احترام أكثر شخص أحبّه في الدنيا، أخوه الذي عاش عمره كله يحترمه. بكي لأن برغم اعترافه بجرائم قتل متعددة، إلا أن عصام لم يتخلّى عنه، لأنه صديق بحق، رجل بحق. بكي لأنه ضعف أمام وعد بالجنة من الشيطان، الذي لا يملك إلا النار. بكي لأنه رأى نفسه بعيون صديقه في تلك اللحظة، ولم تفلح الحلة الجديدة في تغطيته، بل رأى نفسه عارياً أمام نفسه.

لم يتمكن عصام من التحكم في نفسه أكثر من ذلك، فبكي هو الآخر، بكي على صديق خطفه منه الشيطان في لحظة

ضعف. بكى ندماً لأنه من سلّم صديق عمره للشيطان. بكى لإضطراره القبض على شريف، ولأنه لن يستطيع أن يحتفل معه بحلّ القضية، فهو لم يحقق أي نجاح في حياته إلا واحتفل به مع صديقه، الآن هو مُطالب بتحقيق النجاح على حساب صديقه.

قام عصام من مكانه ووضع يده على كتف صديقه، فقام شريف واحتضن عصام وكأنه يودّعه، وكأنها المرة الأخيرة التي سيراه بها، ثم قال عصام:

-يالاً بينا يا شريف نجيب الورق.. ومش هتبات هنا النهاردة.. هنطبق سوا.. والصبح بدري هنروح النائب العام.. وانا معاك مش هسيبك ثانية.

نظر شريف بكل ضعف الدنيا في عيني عصام وقال بصوت خافت يغلبه البكاء:

-توعدي يا عصام تنتقم من حازم البدري واللي زيّه؟؟

سقطت دموع عصام من جديد بعد أن كانت توقفت، وقال وقلبه يخفق:

-أوعدك يا صاحبي.

بعد دقائق غادر عصام وشريف العمارة، كان شريف في المقدمة، نظر خلفه لعصام وقال:

-هجيب سجائري من العر...

ولكن في تلك اللحظات توقفت دراجة بخارية تحمل شخصان مُلثَّمان أمام العمارة مباشرة، يحمل أحدهم بندقية آلية، رفع فوّهتها في اتجاه الصديقيان وأطلق الرصاص بكل سخاء، لمح عصام البندقية قبل الضرب بثانية واحدة، ولكنه لم يتمكن من دفع صديقه بعيداً عن مرمي النيران التي سبقت كل شئ، اندفع جسد شريف في اتجاه عصام، ودماؤه في الاتجاه المقابل، سقط عصام على ظهره وفوقه جسد شريف دون روحه، تأكد عصام من هذا عندما لمح بريق الحياة يغادر عيناه، ونظرته متعلقة بعصام تُحمّله مسؤولية الانتقام لدماءه.

نزل حامل السلاح من على الدراجة ومر بين السيارات المتراصة على جانب الطريق ليتأكد من مقتل كل من عصام وشريف. تمكن عصام في تلك اللحظة من استعادة توازنه، سحب سلاحه الميري، ودفع جسد شريف جانباً، وفي اللحظة التي رفع فيها القاتل سلاحه ليقتله ضغط عصام الزناد ليكتشف أن زر الأمان يمنع انطلاق رصاصه التي تمنى ألا تكون رصاصته الأخيرة، ولكنه أدرك متأخراً أن وقته في هذه الحياة انتهى، تذكر إبنته مَلَك وفرحتها بحفلة عيد ميلادها، وتذكرها وهي تقفز فرحاً عندما رأت هديّتها التي فاجئها بها، وتذكر قلق رضوى وهي تودّعه قبل أن ينزل من البيت عندما لمحت توتره بعد مكاملة حسن، تذكر عمه الشهيد،

وتذكر عندما تمنى أن يموت شهيداً مثله، فابتسم عندما أدرك أن الله عز وجل قد منّ عليه بنعمة الشهادة.

ولكنه في تلك اللحظة وقبل انطلاق رصاصات الغدر، رأى مشهداً لن ينساه طوال حياته؛ رأى سيارة حسن تندفع بكل قوة لتصدم بالدراجة البخارية وتقتل سائقها بينها وبين السيارة التي تقف أمام العمارة، ثم تدفع تلك السيارة لتصدم جسد حامل السلاح، الذي فقد توازنه وسقط أرضاً لثانيتين، كانتا كافيتان لعصام لأن يعدل وضع زر الأمان ويطلق الرصاص على قاتل صديق عمره ليقتله قبل أن يستعيد توازنه.

oboiikan.com

السبت ٢٨ ديسمبر سنة ٢٠١٣

يجلس حسن في النادي في مكانه الذي اعتاد الجلوس فيه، يشرب قهوته في صمت حزين، لم يكن توقع أن يشعر بكل هذا الحزن بعد القبض على القاتل الذي انتحل شخصية قاتل زوجته ليفلت من العقاب، ولكن بعد أن رأى كيف أن مقتل شريف صديق عصام أثار في الأخير، وبعد أن رأى الألم والحزن والقهر في عين صديقه عصام، شعر بالألم لصديقه، ومني لو كان تغاضي عن القضية ولم يحاول من البداية أن يطارد القاتل.

غريبة هي الدنيا، كان حسن منذ مقتل زوجته يعيش دون أن يملك أي شيئاً ليخسره، وتعهد أن يبتعد عن الناس وألا يكون أي صداقات حتى لا يشعر بألم الفراق مرة أخرى، ولكن الدنيا

لم ترضى، واستدرجته مرة أخرى، وكأنها ساحرة أعادت الحياة
قصرًا لجنّة همدت وذهبت روحها للجنة، فلا الروح طلبت
العودة، ولا تستطيع الرفض. عاد حسن ليشعر نحو عصام
بحب الصديق، عاد ليشعر نحو غادة بمشاعر ظنّها تركته بلا
طريق للعودة، عاد يقلق، ويخاف، ويسهر، ويضحك، عادت
روحه، وهاهو الآن يشعر بألم الفراق مجددًا.

لا يعلم إن كانت غادة على استعداد أن تقبل اعتذاره الذي
لم يقدمه بعد أم لا، ولا يعلم إن كان عصام سيعود كما كان
قبل مقتل صديق عمره أم لا، لا يعلم متى ينتهي هذا الألم
الناتج عن حالة انتظار البلاء. ياليتهم يجيبوه على أسئلته،
حتى يرتاح ولو قليلاً، ياليتهم يستطيع أن يعجل بالعذاب بدلاً
من انتظاره.

لم يصدق نفسه في بداية الأمر عندما جلست بجواره غادة
وهي تنظر له بلوم واضح وبقايا الغضب ماتزال تظهر على
ملامحها، ولكنها هنا. نظر لها في صمت لثواني، حتى تأكد
من وجودها بجواره، وقبل أن يتحدث سبقته قائلة:
-يعني عامل مصيبة.. وبقالك يومين مختفي.. وحصل اللي
حصل مع عصام.. وكمان قافل تليفونك؟؟

ابتسم لها ابتسامة عذبة أجبرتها على الابتسام، ولكنها

أشاحت بوجهها بعيداً حتى لا تعطيه ما يريد كاملاً، ليس بعد، لابد من أن يعتذر أولاً، ثم ترفض الاعتذار ثانياً، ثم يعتذر مجدداً، ثم تقبل اعتذاره على مضض. كان يكفيه وجودها، فها هو أول أسئلته يُجاب بالإجابة التي يتمناها، حتى لو اضطر للاعتذار ألف مرة فلن يمل، قال بصوت غلبه الارتياح لعودتها:

-تليفوني من ساعة الحادثة وهو ساعات بيقفل لوحده أو الشبكة بتقع.

تذكرت الحادثة بعد أن كانت قد نسيتها عندما رآته، فقالت بلهفة :

-صحيح أيه حكاية الحادثة دي؟؟ مافهمتش من رضوى غير إنك أنقذت عصام.. مقالهاش غير كده.. ومش عارفة اتلم عليه من ساعتها.

-انا بلّغت عصام بموضوع شريف.. وكان معايا على التليفون جهاز تتبع عربية شريف.. روحت وراه علشان اكون مع عصام بس ماكنتش اعرف البيت.. سمعت ضرب نار.. ولما قرّبت شفت اتنين هيقتلوا عصام.. دخلت فيهم بالعربية.. قتلت واحد والتاني عصام قتله.. بس كانوا قتلوا شريف. قالت بحزن شديد:

-تفتكر مين اللي عمل كده؟؟

-أكيد حازم البدري.. شريف اعترف لعصام إن البنات اللي اتقتلوا كان معاهم ورق عليه.. وشريف كان معاه نسخة من

الورق ده.. ولما شريف اتكشف كان لازم يخلص منه قبل ما يعترف.

-بس حازم عرف منين إن شريف اتكشف؟؟

-سألت عصام امبارح.. قال أكيد البنت اللي كانت عند شريف في البيت سمعتهم من ورا الباب وبلّغت عنه.. اتاريها كانت بتراقب شريف مش بس مصاحباها.
جاء عم عفت بقهوة غادة، كعادته دون أن تطلبها، شكرته وقالت لحسن بعد أن غادر:

-تعرف حاجة عن عصام؟؟ رضوى كلمتني وقلقانة عليه.
عقد حاجبيه وسأل:

-ماله؟؟ كنت معاه امبارح في الدفن.

-كلمتني الصبح قالت إنه قرأ مقالة في جرنان «حكاية اليوم»الصبح.. نزل بعدها وقالها ماتقلقيش عليّ.. تليفونه مقفول.. وفي القسم قالولها جه دقايق وخرج.

انتقلت عدوى القلق لملاح حسن، قال:

-وأيه اللي في المقال يضايق؟؟

زفرت غادة بضيق وقالت:

-الجرنان ده بتاع حازم البدري.. الصحفي كاتب تحقيق نص صفحة عن الحادثة.. وبيقول إنها عملية إرهابية.. استهداف ضابطين شرطة.. ومطّلع شريف البطل الشهيد.. وعصام هكذا بس مش شهيد.. وكمان حد من القناة الفضائية بتاعة حازم البدري اتصل بعصام علشان يطلع معاهم على الهواء يحيي

عن بطولة شريف.. لعبة قذرة بيلعبها علشان يبعد الشك عنه.. ويتأكد لو كان عصام عارف حاجة.

تملك الغضب من حسن، وشعر بما شعر به عصام عندما قرأ هذا الكذب في التحقيق. أل هذه الدرجة تمكّن الفساد في الدولة، لدرجة تسمح للمجرم الحقيقي أن يجعل من القاتل بطلاً؟ موقف عصام لا يُحسد عليه، حيث إنه حتى يقول الحقيقة لابد من أن يشوّه صورة صديق عمره الذي تحوّل لبطل بفعل الإعلام الموجه.

سأل حسن نفسه، ماذا سيفعل لو كان في موقف عصام؟؟ ولكنه عجز عن الوصول لإجابة تريحه. من الممكن أن يسعى خلف حازم البدري ويبحث عن الأوراق التي تدينه والتي كانت بحوزة شريف، ولكنه لا يأمن على حياته، فقد أعلن حازم صراحة الحرب على كل من يُفكر في أن يمثل أي تهديد على بقاءه. وفي نفس الوقت لا يريد عصام أن يشوّه الصورة الجميلة التي رسمها الإعلام لصديقه، مراعاة لمشاعر أهله على الأقل. موقف أصعب من أن يوصف بكلام. قام حسن بعد دقيقتان من التفكير وترك حساب القهوة على المائدة وغادر مع غادة مسرعاً.

بعد عدة ساعات كان حسن يقف بسيارته في ساحة انتظار

عبد المنعم رياض، حيث اعتاد عصام أن يترك سيارته عندما يأتي لتقضية وقته على كوبري قصر النيل، ارتاح قليلاً عندما وجد سيارة عصام، فتأكد أن توقعه كان في محله. اتصل بغادة وهو في طريقه سيراً للكوبري حيث سيجد عصام:
-انا لقيت عصام يا غادة.. لسة مقابلتوش بس لقيته.. طمّني رضوى.. وانا هوصله البيت بنفسي.
-طب خلي بالك من نفسك ومنه يا حسن.. محدش ضامن ممكن يحصل أياه.
-ماتخافيش.. سلام.

وصل حسن للمكان الذي اعتاد أن يجد فيه عصام، ليجده واقفاً في مواجهة النيل لا يتحرك، وكأنه قدّ من حجر، اقترب منه حسن دون أن يتكلم احتراماً لصمته، لاحظ عصام وقوف حسن بجانبه دون أن يحتاج لينظر إليه، شعر به، وكأنه توأمه الذي وُلد متصلاً به اتصالاً خفي. لم يتحدث أيّاً منهم لدقائق، ولكن كان كل منهم يشعر بالآخر ومعاناته.

علم حسن من حسين في قسم الحداثق عندما ذهب إلى هناك ليسأل عن صديقه إنه ذهب لمكتبه وجمع أشياءه وغادر دون أن يتحدث مع أحد، فأدرك حسن أن عصام قرر أن يستقيل من الداخلية، برغم تمسّكه بعمله بها في أصعب الأوقات التي مرّت على البلد والوزارة، ولكنه يتخلى اليوم

عنها. لذلك كان يشعر حسن بمدى معاناة وألم صديقه، فقد فقد عزيزين في وقت قصير للغاية، أحدهما فقدته قصراً للشيطان، والآخر طواعية وهو عمله، ويعلم جيداً أن قرار عصام يمتد لما هو أكثر من مجرد استقالته، ولكنه لن يسأل، فهذا وقت الدعم، وليس المراجعة والتصحيح، فها هو يقف بجوار صديقه ليعلن دون كلام عن دعمه المطلق له.

مرّ خلفهم الحكيم الذي لا يصمت، ولأول مرة يقف ويعتدل ويرفع رأسه قليلاً لينظر لعصام، الذي دار عندما سمع صوته وكأنه كان ينتظره، قال الحكيم بصوت حزين:

الهم لابسٍ وش.. ومداري بيه وشك..

حملك ثقيلٍ معلش.. وجرحك غويطٍ مفتوح..

لو حد قال الحق.. والعدل هنا مسموح..

صدقني يا بني لا.. كدابٍ وبيغشك.

صمت لثواني مدّ يده فيها وربّت على كتف عصام الذي ابتسم في مرارة، وكأنه يشكر الحكيم دون كلام على مواساته. أكمل الحكيم طريقه، وكعاداته استمر في كلامه الذي لا يسمعه أحد في الغالب:

للعدل ألف طريق.. احنا اللي بنكسل..

وولا وجعنا غريق.. بس احنا بنمثل..

نشوف الظلم ونسيبه.. طالما ع الغلبان..

ونزعل لما يركبنا.. ورجله تتدلدل..

وكأن كلامه قد مس جرح عصام فأطلق تنهيدة أم طويلة مصحوبة بكلمة أه واهنة بالكاد سمعها حسن، الذي اعتدل ليووجه عصام، ونظر له بكل حزن الدنيا. قال عصام وهو مايزال ينظر للحكيم الذي يبتعد:

-للعدل ألف طريق.. احنا اللي بنكسل.

ثم نظر لحسن وقال بصوت ضعيف:

-انت عرفت منين إنه شريف يا حسن؟؟

-يوم ما اتكلمنا عن غادة عرفت منك إن شريف كان معاك خطوة بخطوة مع عمك.. وده يخليه عارف كل تفاصيل قضايا القاتل.. ولما قربت منه اكتشفت إن حازم البدري رئيسه هو صاحب المستشفيات اللي بتشتغل فيها هبة وداليا.. ودي لا يمكن تكون صدفة.. المعلومة الوحيدة اللي كانت نقصاني هي ليه عمل كده ولصالح مين.. لحد ما اعترف لك بكل شئ.

-وليه ما صورتش إنه يكون سفاح الأرقام الحقيقي؟؟

فكر حسن لثواني وكأنه متردد ثم قال:

-من لحظة ما سمعت عن عودة القاتل وانا مش مقتنع..

سفاح مين اللي يعتزل سنين ويرجع يقتل تاني فجأة؟؟

اعتدل عصام ليووجه حسن وقال بصوت كله تصميم:

-انا استقلت يا حسن.. ومش هسكت.. بس مش هينفع

اشتغل في البلد دي بالقانون طالما المجرمين فوق القانون.. اللي

عايز يخلص من المجرمين لازم يشتغل برة حدود القانون.

-مش شايف إنك استعجلت شوية؟؟ خد وقتك وفكر قبل...

قاطعہ عصام وقال:

-انا مش طفل بسعى ورا انتقام ساذج.. انا وعدت شريف

إني أخذ حقه من اللي غواه.. شريف غلط وهو بين أيدين

ربنا.. هيحاسبه على كل حاجة عملها.. بس انا عليّ وعد

وهنفذه.. ومش هقدر أنفذه بالقانون.. يبقى لازمتها أيه

الشغلانة؟؟

-يعني هتقتله يا عصام وتبقى قاتل انت كمان؟؟

-بالرغم من إنه يستحق القتل.. لكن انا مش قاتل ومش

هكون.. بس مش هسيبه.

قال حسن وهو يستند بجانبه على سور الكوبري:

-بتفكر في أيه؟؟

-لا يا حسن.. مش عايزك معايا.. المواجهة دي خطيرة وانا

متحمل مسئوليتها لوحدي.. كفاية اللي عملته عشاني لحد

كده.. انا مفيش في عمري وقت كفاية علشان أردلك

جمايلك.. مش عايز اعرضك للخطر.

ابتسم حسن بسخرية:

-تبقى عبيط لو فاكر إني هسيبك لوحدي.. ماتضيّعش وقت..

بتفكر في أيه؟؟

ابتسم عصام لصديقه ابتسامه حملت كل شكر الدنيا. ثم

نظر للأفق وقال وكأنه يُشهد على نفسه النيل والسماء:

-مش هرتاح إلا لما اشوف حازم البدري في السجن واعمل منه عبرة لكل شيطان فاكر إن الدنيا مافيهاش حد يقدر عليه.

-يبقى نوصل للورق الي كان مع شريف وساعتها هنشوف نعمل بيه أيه.. طالما مستعد يقتل مرة واتنين وتلاتة علشان الورق ده مايطلعش.. يبقى الي في الورق ده بيهدد بقاءه هو شخصياً.

هز عصام رأسه بهمارة وقال:

-للأسف شريف مقاليش فين الورق ده.

-يبقى تدور انت على الورق الي كان مع شريف.. وانا ادور ورا حازم البدري نفسه يمكن أوصل للسر.. بس حالياً لازم ننيّم حازم البدري علشان نتقي شره مؤقتاً.

-ازاي؟؟

-إنك تطلع في البرنامج وتحكي بطولات صاحبك وتقنع حازم إن شريف ماعترفش بحاجة وانت بتقبض عليه وأن زيارتك كانت مجرد اشتباه.. وبكده يبقى اشترينا شوية وقت.

الخميس ٢ يناير سنة ٢٠١٤

يخرج حازم البدري من فيلته في التجمع الخامس الساعة الثامنة صباحاً كعادته، يركب سيارته ويغلق بابها خلفه، يلقي الصباح على سائقه الشخصي، الذي يرُد التحية بأدب ووجه بشوش، ويتحرك بالسيارة في اتجاه مكتبه، قاطعاً ذات الطريق الذي يقطعه يومياً.

عند الدوران الذي يدور حوله السائق يومياً تصطدم شاحنة نقل كبيرة بسيارة حازم البدري بقوة من الخلف، وقبل أن يستوعب السائق أو حازم البدري ما حدث، ينزل ملثمان من الشاحنة وهما سائق النقل ورفيقه -الذي لم يكن سوى كربونة- وفي يد كل منهما سيف طويل، يتجه كربونة كما هو محدد مسبقاً ناحية حازم البدري، ويتجه سائق النقل

-الذي لم يكن سوى عصام ناجي شخصياً- في اتجاه سائق حازم الشخصي. يفتح كربونة الباب المجاور لحازم، وينتشله من السيارة بكل قوة ويخنقه بقوة ويصرخ:
-العربية دي عليها اقساط يابن الجزمة.. هتدفع ولا نخلص عليك؟؟ قالها وخبّط بسيفه بقوة على سقف السيارة ليثير هلع حازم البدري، وقد نجح تماماً، حيث فقد حازم البدري السيطرة على أعصابه في تلك اللحظة وصرخ كالطفل:
-هديلك اللي انت عايزه يا مجنون.. اللي انت عايزه.

كان في تلك اللحظات عصام قد صعق السائق الشخصي لحازم ففقد الوعي مؤقتاً، وفتح الباب الخلفي للسيارة.

نظر كربونة لعصام فأشار له بانتهاء المهمة بنجاح، فدفع حازم البدري بكل قوة داخل السيارة، وأشار لعصام الذي ألقى له الصاعق، ثم صعق به حازم البدري في جانبه لثواني حتى تأكد من فقدانه الوعي تماماً، ولحق بعصام الذي أخذ حقيبة حازم البدري الشخصية وركب الشاحنة وغادروا المكان وسط ذهول المارة، الذين لم يفهموا شيئاً مما حدث.

ليل الخميس ٢ يناير سنة ٢٠١٤

يفتح عصام باب شقته لحسن الذي يُسَلِّم عليه بفخر وسعادة، وكأنه جندي عائد لتوه من تنفيذ مهمة خطيرة خلف خطوط العدو. ناول حسن اسطوانة مدمجة لعصام وقال:

-ال CD دي تووڭي حازم البدري وكام راجل معاه في ستين داهية.. براقو عليك.

قال عصام وهو يغلق الباب خلف حسن:

-براقو علىّ أيه بس؟؟ دانت طلعت كارثة يا حسن.

دخل حسن وسلِّم على غادة التي كانت بانتظاره بناءً على طلبه، وسلِّم على رضوى، وجلس.

قال عصام وهي يضع جهاز الكمبيوتر المحمول الخاص به على الطاولة أمامه:

-التليفون أخذ وقت طويل؟؟

رد حسن:

٧- دقائق تقريباً.. والمحضر عرفت عنه حاجة؟؟

-اتقيّد ضد مجهول.. سرقة بالإكراه.

قالت غادة بلهفة:

-مش ناويين تفهّموني أيه اللي بيحصل؟ بدل مانا قاعدة زي

الاطرش في الزفة كده؟؟

قال حسن بسعادة:

-حازم البدري.. قدرنا نوصل لكل اللي يوديه في داهية مدى

الحياة على الأقل.. تجارة في الأعضاء واختبارات لعقاقير

أجنبية على أبرياء مُعدمين.. ومخدرات.. وبلطجة.. ماسابش

مصيبة ماعملهاش.

اتسعت عينها بلهفة وقالت:

-معقول؟؟ أوعى تقولوا إن انتوا اللي سرقتموا شنتته الصبح؟؟

دي حكايته مغرقة المواقع والصُحف.

ضحك عصام وقال:

-أحلى حاجة إن كل الأخبار بتتكلم عن الشنطة.. ومحدث

عارف الخطة العبقرية اللي حطها الداهية اللي قصادك ده.

وأشار على حسن.

نظرت غادة لحسن وسألت:

-خطة أيه؟؟ يعني مش انتوا اللي سرقتموا الشنطة؟؟

حسن:

-احنا اللي سرقنا الشنطة.. بس كنا متأكدين إن الشنطة مش

هيكون فيها حاجة تدينه.. محدش بيشيل ورق يسجنه معاه
اليومين دول.. سرقة الشنطة كانت بهدف تحويل نظر كل
الناس عن الهدف الحقيقي.

عقدت حاجبيها وهي تنصت له، فأكمل:

-الهدف الحقيقي كان تليفون حازم البدري.. ال Smart
Phones دلوقتي بقت عاملة زي الصندوق الأسود.. فيها كل
حاجة.. لأنها سهلة الاستخدام وفي نفس الوقت لو حصلت
مشكلة سهل جداً تمسحي كل بياناتها في ثواني.

-يعني سرقتموا تليفونه؟؟ سألت رضوى.

فأكمل:

-لا طبعاً.. احنا ماكناش عايزينه يشك في إن العملية ليها علاقة
بغير سرقة الشنطة.. كل اللي عملنا إننا لقينا Hacker عنده
برنامج يقدر ينقل كل البيانات والإيميلات وسجل المكالمات
والرسائل والصور وكروت الائتمان من تليفون لأي تليفون
تاني زيّه بالظبط.. بس العملية دي تحتم قبول التليفون
المنسوخ للربط بالتليفون التاني اللي عليه الفيروس.. وده كان
الهدف.. في الوقت اللي كان كربونة بيهدد فيه حازم.. عصام
صعق السواق وفتح الباب الخلفي وأخذ تليفون حازم اللي
وقع منه لحظة الحادثة سمح بقبول الاتصال.. والربط تم
بين تليفون حازم وتليفون زيّه بالظبط مع حسن.. اللي كان
واقف في الشارع عند الدوران من قبل الحادثة ووسط الناس
بيتفرج على الحادثة بعد ما حصلت والتليفون في جيبه..

وبعد ما عصام وكربونة مشيوا.. حسن فضل واقف كمشاهد
زيّه زي كل الناس لحد ما تأكد من نقل كل بيانات التليفون
الأول للتاني.

الانهار كان سيد الموقف، لم تستطع رضوى الكلام أو التعليق،
وقالت غادة وملامح السعادة والفخر والإعجاب والحب تملأ
ملامحها لحسن:

-انت المفروض تشتغل حاجة تقدر تطلع فيها إمكانياتك
دي.. بجد انت خسارة تكون مش بتشتغل.
قال عصام:

-هوّ ده الي انا طلبتكم عشانه النهاردة.. اعملي لنا حاجة
نشربها يا رضوى من فضلك.

أكمل عصام كلامه وهو يغلق جهازه المحمول بعد التأكد
من سلامة الاسطوانة وخطورة المعلومات التي تحويها، وبعد
ذهاب رضوى للمطبخ:

-انا عرضت على حسن إننا نشتغل كده فعلاً.. وهو طلب
وقت يفكر.. والنهاردة يا غادة هو قالي إنه هيبألغنا بقراره
النهائي بس طلب إنك تكوني موجودة معانا.. وانا كمان
كنت عايزكم في موضوع مهم.. بس نسמע حسن الأول.

انهى جملته وحوّل نظره صوب حسن، وكذا فعلت غادة.

اعتدل حسن في جلسته وقال:

-شوفي يا غادة.. عصام بيفكر يفتح مكتب محاماه يكون

واجهت لتحقيق العدالة الغاية.. باختصار هتجرب كل ظالم
استغل ماله أو ثغرة في القانون علشان يهرب من العدالة.
سألت غادة بتوجس:

-هتجربوه ازاي يعني؟؟ مش فاهمة!

-زي ما عملنا مع حازم البدري كده.. هنلعب معاه خارج
نطاق القانون ونفضحه.. ماتخافيش مش هنقتل ولا هنرتكب
جرائم.. كل الحكاية إننا هنستغل إمكانياتنا ضد الفاسدين..
ونستغل ميزة إن محدش يعرف احنا مين ولا هيشك فينا.

-وانتوا الاتنين هتقدروا تعملوا ده لوحكم؟؟

قال عصام:

-لا طبعاً.. علشان كده بنسألك.. هتكون زي جماعة سرية
ومش هنضم غير اللي واثقين فيه جداً.. ممكن نستعين بحد
يعمل لنا خدمة ويأخذ مقابل زي كربونة النهاردة مثلاً.. أياه
رأيك؟؟

قالت غادة دون تردد:

-ودي فيها رأي؟؟ معاكم طبعاً.. بس لازم نخلي بالناس كويس
من اللي بنعمله.

قال حسن باسمًا:

-علشان كده انتي موجودة.. علشان تلحقي اللي يتهور منا.

ضحكت غادة وقالت:

-يعني انا شغلتي ال Safety Manager

قال عصام باسمًا:

-حاجة زي كده.

قال حسن بصوت متوتر:

-انا موافق.. ومفيش حاجة في الدنيا ممكن اكون عايزها اكر من إني اكون جزء من المشروع ده.

صمت لثواني وكأنه يزن كلامه الذي سيقوله لآخر مرة ثم قال بعد أن حسم أمره بصوت مرتعش:

-انا مخبي عليكم سر كبير.. ومش هقدر بعد النهاردة أفضل مخبيه.. ومش عارف رد فعلكم ممكن يكون أيه بعد ما تعرفوه.. لكن مش هقدر أشوفك يا عصام بتأمني على حياتك.. وانتي يا غادة بتسلميني قلبك وانا مخبي عنكم حاجة زي كده.

قالت غادة بصوت مرتعش بعد انتقال عدوى التوتر لها من حسن:

-في أيه يا حسن؟؟ ماتقول في أيه؟؟ قلقتني.

نظر لها حسن لثواني وابتلع ريقه الجاف، ثم نظر لعصام وكأنه يحاول أن يتنبأ برد فعل كل منهم قبل أن يقول، ثم قال:

-انا عدت عليّ في حياتي فترة صعبة جداً.. كان اللي بيحركني فيها مشاعر الكره والغضب والانتقام.. مش فخور بأي شئ عملته.. بالعكس انا ندمان عليه.. لكن دي حاجة انا ارتكبتها ومش هقدر امسحها.. ياريت اقدر امسحها وكأني مارتكبتهاش.. بس مش هقدر.

صمت مُجدداً وكأن الكلام يأتي أن يعينه على اعترافه، نظر لغادة فكانت صامتة تراقبه بعيون يملأها الخوف، نظراتها لم تساعده على الكلام بل العكس، فإن كانت خائفة كل هذا الخوف قبل أن تعرف ما يريد أن يقول، فكيف ستكون بعد أن تعرف.

اعتدل عصام وقال:

-هو ده الموضوع اللي انا كنت عايزكم فيه.. لو تفتكر يا حسن أول يوم اتقابلنا كان ليّ في ذمتك سؤال تجاوبني عليه بصراحة أيّاً كان.. كنت ناوي اسأله النهاردة.. بس انت سبقتني وجاوبت قبل ما اسأله.. أو بمعنى أدق حاولت تجاوب.

نقلت غادة نظرها بين عصام وحسن دون فهم، وثبتت حسن نظره على عصام، هل حقاً يعلم ماذا أريد أن أقول؟
أكمل عصام بثقة أكدتها نظرة حسن المتوجسة:

-الموضوع أخذ مني وقت على ما ربط كل الخيوط ببعض.. بس كنت مستني انت اللي تقول.. كنت عايز اتأكد من ثقتك فيّ واثبت لِنفسي إنك جدير بالثقة.
غادة بجدة:

-مممكن حد فيكم يفهمني في أيه؟؟

ونقلت نظرها بين حسن الذي راوغه بالنظر للأرض، وعصام الذي أكمل:

-أول حاجة إنك مرة يا حسن حاولت تقنعني اتعامل مع

قضية داليا وتذاكر كأنها أي قضية تانية.. كنت بتحاول
توجّهني للطريق الصح برغم إني طلبت منك عدم المساعدة
في القضية.. كنت بتحاول تخليني اشوف القضية بعيد عن
قصة عودة سفاح الأرقام.. بس انا مافهمتش ده منك.
التقط نفسه ثم أكمل:

-تاني حاجة إنك مشيت في القضية من أول يوم وكأنك
متأكد من عدم عودة سفاح الأرقام.. وده اللي خلاك تحقق
في قضية داليا.. على عكس الداخلية اللي افترضت إن قضية
داليا مقفولة وفضلت تدور على شبح القاتل اللي في الحقيقة
مش موجود.. وده اللي خلاك تحل القضية قبل الداخلية..
وده لأنك عارف ومتأكد إن سفاح الأرقام مش هو اللي قتل
تذاكر من أول يوم.

توقف عن الكلام لثواني نظر فيها لحسن ليتأكد من صدق
تحليله، وقد كان له ما أراد.
قالت غادة:

-انا مش فاهمة حاجة.
أكمل عصام وكأنه لم يسمعها:
-آخر ضحايا القاتل كانت نادية يا غادة.. اجمعي كل اللي
قلته ده مع بعض هتوصلي لحقيقة واحدة لا تقبل التشكيك..
واعتقد إن ده السر اللي حسن كان هيقوله وماقدرش.
قالت غادة والخوف يملأ كيانه:
-حقيقة أيه؟؟

هَمَّ حَسَنٌ أَنْ يُجِيبَ وَلَكِنْ عَصَامٌ سَبَقَهُ قَائِلًا:
-إِنْ حَسَنٌ دَوَّرَ عَلَى الْيَلِيِّ قَتْلَ مَرَاتِهِ بَعْدَ مَا عَمِيَ أَفْرَجَ عَنْهُ..
وَوَصَلَ لِمَعْلُومَاتٍ مَاتُوفَرْتَشَ لِعَمِّي.. وَعَرَفَ مِينَ الْقَاتِلِ...
صَمْتُ لَثْوَانِي ثُمَّ أَكْمَلُ:
-وَقَتْلَهُ.

هنا رفع حسن رأسه في دهشة في اتجاه عصام، الذي كان وجهه يحمل ابتسامة المنتصر. نقل حسن نظره لغادة التي كانت تبادلته نظرة تساؤل واضحة، وقالت بصوت مبسوح:
-انت قتلت يا حسن.

نظر حسن للأرض هرباً من نظرات حبيبته، وقال بصوت يملأ الشعور بالذنب:

-مش فخور باللي عملته.. ومش بقول مُبررات.. لكن دفاعي الوحيد هو إني لم اقتل إلا اللي يستحق القتل لكن القانون كان أضعف من إنه يقتص منه.

صمت لثواني ثم رفع رأسه وتنهد بقوة وقال:

-النهاردة انتوا عرفتوا عنِّي اخطر سر كنت مخيبه.. اللي منكم مستعد يقبل حسن في حياته وهو عارف إنه ارتكب الغلط ده وندم عليه يكلمني.. واللي مش هيقدر يسامحني مش هلومه على أي شئ.. بعذر له على كل دقيقة خبيت فيها عليه حقيقتي.

قالها حسن وقام ليغادر المكان، فقام عصام واعترض طريقه

وابتسم قائلاً:

-انا عارف الحكاية دي بقالي إسبوع.. وكنت عايزك انت اللي تصارحني عشان نفتح صفحة جديدة.. كان ممكن اسيبك تمشي له انا اللي واجهتك.. لكن بمصارحتك ليّ أثبت إنك فعلاً صادق معايا.. وده يكفيني.. ده غير إن انا مديون لك بحياتي بالفعل.

ملأت الدموع مُقلتي حسن ولم يستطع الرد، ولكنه أوماً برأسه لعصام شاكرًا، الذي أكمل:

-السؤال اللي ليّ عندك محتاج إجابته حالاً.. انت متأكد إن اللي قتلته هو القاتل؟؟

صمت حسن لثواني ثم قال موجهاً كلامه لكل من عصام وغادة:

-زي ما قتللك يا عصام.. اللي قتلته قاتل بدم بارد هرب من العدالة.. وربنا يشهد على كلامي.

-يبقى انا مسامحك يا حسن بس ليّ شرط واحد.

قال حسن:

-من غير ما تقول يا عصام.. أوعدك إن ده لا يمكن يتكرر..

انا ندمت على تصرفي ده وفعلاً اتغيرت حتى قبل ما يبقى في حياتي صديق يخاف عليّ.. وحبى...

قطع كلامه في تلك اللحظة عندما نظر لغادة، التي رواغت نظرتة لها وأشاحت بوجهها إليّ الجهة الأخرى، فلم يكمل

كلمة «حبيبة» لأنه في تلك اللحظة شعر إنه خسرهما، فهي لا تبدو على استعداد لمسامحته، أو لتبدأ علاقة مع قاتل، حتى لو كانت تحبه.

نظر حسن لعصام الذي كان صامتاً، فسلم عليه وغادر الشقة تاركاً وراءه صمت لا يتخلله سوى صوت بكاء غادة.

oboiikan.com

ليل الخميس ٣١ ديسمبر سنة ٢٠٠٣

تعبر رؤى الشريف الطريق وهي تضحك بعد عودتها من الكوافير استعداداً ليلية رأس السنة الميلادية. يراها شقيقها الأكبر حسن وهي تسير على الرصيف؛ جميلة، بريئة، تتحرك كالفراشة. الليلة كلها تبدو كأمنية جميلة تتحقق. يقف خلف النافذة يشاهدها، مبتسماً. وفجأة بدأت السماء تمطر بغزارة، وكأن كان للسماء سداً وانكسر لتوه. انقبض قلبه، شعر وكأنه دون قصد، حسد الليلة فأفسدها.

خافت رؤى أن تُفسد الأمطار شعرها، فقررت أن تعبر الطريق بسرعة. نزلت من على الرصيف مُسرعة، أسرع الخُطى لتعبر الطريق قبل السيارة القادمة، ولكنها أدركت خطورة ما تفعله، فتملكها الرعب، وقررت العودة للرصيف.

ولكن تصرفها كان كفيل بخروج سائق السيارة غير الواعي -بسبب ما تجرعه من خمر احتفالاً بالسنة الجديدة- عن ثباته، فحاول أن يتفادها، ولكن استجابته البطيئة، والأسفلت المبتل، لم يساعده، فلم يستطع السيطرة على نفسه أو السيارة، فاتجه مباشرة لرؤى قبل أن تصل للرصيف، اصطدم بها وطار جسدها في الهواء، تحت سمع وبصر حسن الذي شعر وكأن روحها تغادر جسده هو. وقفت السيارة وخيم الصمت على الموقف كله، ثواني كانت ثقيلة كالكابوس. نزل شابين في قمة الشحوب، من أثر المخدرات والخمر، وأخيراً الحادثة.

تحرك الأخ أخيراً في محاولة إنقاذ أخته الوحيدة والتي لم يتبقى له من أهله سواها من الموت، ولكن ما رآه كان أكثر مما يمكن لأعصابه أن تحتمل، فانهار في مكانه، بجوار النافذة، غيبوبة مؤقتة أصابته ولم يفيق منها إلا بعد دفن أخته. فلم تحرمه الحادثة من أخته فحسب، ولكنها حرمته أيضاً من الوداع الأخير.

ليل الخميس ٢ يناير سنة ٢٠١٤

يدخل حسن مكتب مجدي كارم بعد سماح له مجدي بالدخول، يدور مجدي حول مكتبه ويُسلم على حسن بوذّ، ويطلب منه الجلوس. يدور حسن ببصره في المكتب، وتتوقف عينه عند المقالة التي كادت أن تتسبب في دخول مجدي السجن، وقف حسن أمامها لثواني يتأملها وكأنه يسترجع ذكريات بعيدة، حتى قال مجدي:

-تشرب أيه يا حسن بيه؟؟

-كتر خيرك.. ولا حاجة.

جلس حسن أمام مكتب مجدي الذي جلس أمامه، ولم يجلس خلف مكتبه، قال حسن:

-حضرتك كنت طول عمرك الصحفي المفضل بالنسبة لي..

ومازلت.

-الله يخليك.. يارب افضل عن حُسن ظنِّك.

-أُكيد إن شاء الله.

صمت حسن لثواني، كان التساؤل خلالها بادياً على ملامح

مجدي عن سبب الزيارة المُتأخرة، فقال حسن:

-انا جاي النهاردة علشان أريِّح بالك وضميرك من همّ انت

شايه بالغلط.. ومالكش ذنب فيه.

-خير؟؟ وعقد حاجبيه.

-يوم ما كنّا عندك في البيت قلت إنك شايِل ذنب مقتل

نادية وحاسس إنك ممكن تكون ساعدت القاتل على

جريمته.. ده مش صحيح.

ظهر الاهتمام على ملامح مجدي، وقال:

-وأيه اللي مخليك متأكد كده؟؟

لم يجيبه حسن وكأنه لا يريد أن يقاطع استرساله أي شئ،

وأكمل:

-ده غير إن وقوفك في صف السفاح من أول ظهوره مُبرر

ومنطقي.

صمت لثواني لم يُعلّق فيهم مجدي، فأكمل حسن:

-فاطمة.. فاطمة كارم أخت سعادتك كانت واحدة من ضحايا

انهيار عقار في إمبابة يوم ١٧ فبراير ٢٠٠٥.. وصاحب المعرض

في الدور الأرضي هو كان الضحية الثانية للسفاح.. طبيعي تميل

ناحية تأييده بعد ما حقق عدالة غايية.

ظهر التأثّر على ملامح مجدي وعقد حاجبيه وقال:

-وانت عرفت منين كل ده؟؟

-انا عارف كل حاجة تخص السفاح.. سيبي احكيلك من الأول.. الحكاية بدأت من يوم ٣١ ديسمبر سنة ٢٠٠٣.
تسارعت أنفاس حسن وهو يتذكر ليلة مقتل أخته الوحيدة،
وأكمل:

-الليلة دي اتقتلت فيها أختي في حادثة سير.. والقاتل هرب..
بعدها فقدت كل هدف في الحياة.. خاصة إن نادية كانت
مش بتخلف.. وكانت رؤى تعتبر بنتنا اللي كنا عايشين
عشانها.. بعدها بفترة قصيرة نادية اكتشفت إن عندها سرطان
في الرئة.. حاولت الانتحار مرتين ولكنها فشلت لأنى كنت
دايماً جنبها.. ولكن بعد ماتقبض علي نادية انتحرت علشان
تحميني من السجن.. وزوّرت مسرح الجريمة ليبدو إنه من
فعل السفاح.. بس محدش أخذ باله من التفاصيل الصغيرة
الي كانت مختلفة عن السفاح.. وده معناه إن السفاح زي ما
حضرتك كنت فاكراه.. ماقتلش أبرياء.

صمت حسن في محاولة منه لمنع دموعه التي كانت تجاهد
لتسقط، فاستغل مجدي صمته وسأله بصوت متأثر:

-وانت ليه مش شاكك إن السفاح الي قتلها؟؟

نظر له حسن نظرة طويلة وكأنه يعيد التفكير لأخر مرة في
قرار اتخذه، ثم نطق بلهجة حاسمة:

-لأن نادية ليها محاولتين انتحار بعد معرفتها بمرضها.. ولأن
التاريخ الي كان على راسها كان تاريخ أول يوم قابلتها فيه

وده محدش غيرنا يعرفه.. وأخيراً لأن السفاح...
صمت لثواني ليمنع ارتجاف صوته بسبب التوتر، وأكمل
بنفس الصوت بعدما فشلت محاولات السيطرة على توتره:
-لأن السفاح يومها كان مقبوض عليه في الحجز.. وأُطلق
سراحه بعد انتحارها.

نظر له مجدي دون فهم لثواني، ثم استوعب فجأة ما يعنيه
حسن، فتسارعت أنفاسه وتضاربت المشاعر بداخله. ها هو
يجلس وجهاً لوجه مع سفاح الأرقام الذي تمنى كثيراً أن
يقابله، لم يتوقع أبداً أن تتحقق أمنية لقاءه به، ولهذا لم
يستعد لها. لا يعرف ماذا يقول، المعلومات التي تحصل
عليها لتوّه أكبر من قدرته على الإستيعاب.

قال مجدي بصوت مرتجف:

-انت يا حسن؟؟

أوماً حسن برأسه إيجاباً وقال بصوت هادئ، وكأن اعترافه
لأحد بحقيقة ما قام به قد أراحه من همّ ثقيل كان يحمله
وحده لمدة طويلة:

-كنت راكن عربيّتي في ليلة شتاء مستني نادية تنزل من
عند صاحبته.. يوم ١١ يناير سنة ٢٠٠٥ من البرد والمطر
مكانش ممكن حد يلاحظ إني جوّا العربية.. حصلت قصادي
حادثة ماتت فيها بنت أكبر من رؤى بحاجة بسيطة.. كان
بقالي سنتين فاقد الأمل في الحياة وبدّعي قبولي للأمر الواقع..

والحقيقة إن غضبي كان فوق حد الاحتمال.. كل اللي شفته لحظتها هو رؤي بتقتل قصادي تاني.. قررت يومها إني هنتقم من قاتل البنت بنفسي.. مش هقدمه للعدالة وابقى تحت رحمة محامي يشكك في نظري وظروف الرؤية.. تتبعته وراقبته وقتلته وكتبت على راسه يومها تاريخ جريمته علشان سألني بعمل كده ليه.. بس الغضب والكره جوايا كانوا أقوى مني.. كنت بكره الدنيا كلها.. بعد فترة حصل انهيار العقار في إمبابة ولقيتها فرصة اطلع فيها غضبي.

كان حسن يتحدث بصوت وملامح يتملكهما الغضب، صوت أنفاسه يكاد يطغى على صوته المبحوح من فرط التأثر، لا يعلو صوته ولكنه كان غاضب بشدة، وكأنه كان يستحضر مشاعره في تلك الفترة وليست مجرد الذكريات، ومجدي كان مذهولاً مما يسمع.

-الحقيقة إن بعد الجريمة الثانية الموضوع بقى أسهل كثير.. مابقتش خايف ولا أيدي بتترعش.. وكأن كان بيموت في جزء مع كل شخص بقتله.. مش هدّعي الفضيلة ولا البراءة.. انا قاتل.. هقف بين أيدين ربنا وهيحاسبني.. وكان جزء مني بيستمع بقتل الخونة دول.. لكن دفاعي الوحيد إني ماقتلتش إلا اللي يستحق القتل.. ولكن بعد غلطتي الوحيدة وهي قتل شخص قريب من بيتي وبعد خناقة بيني وبينه بكام يوم.. برغم إني قتلته علشان سبب تاني خالص غير الخناقة

لكن اتقبض عليّ.. خذلت نادية.. ماكنتش موجود جنبها وقت ضعفها فاتحرت علشان تنقذي من تهمة هي نفسها ماتعرفش إنها حقيقية.
صمت لثواني وظهر شبح ابتسامة ساخرة على فمه:
-غريبة الدنيا صحيح.

صمت حسن وتنهّد وكأنه يستريح بعد اعترافه، ثم قال:
-حاولت اعترف لعصام وغادة لكن عصام توقع إني قتلت السفاح وانا سكت كأن كلامه صح.. وسامحني.. لسة ماعرفش غادة هتسامحني ولا مش هتقدر.. كنت محتاج اعترف لها عشان تبقى عارفة هي بتتعامل مع مين.. أو كنت مين.. لكن ضعفت.. عشان كده جيت هنا.. طالما مش قادر اعترف لها غير بنص الحقيقة بس.. جيت لك لأنك زي والدها.. لو غادة بنتك هترضى إنها تكون معايا بعد اللي سمعته مني؟؟ انا معترف بجرائمي.. وبالفعل عاقبت نفسي سنين عليها.. لكن كل اللي بطلبه اطلاق سراح بشهادة حُسن سير لأني شايف نفسي استحقها.

لم يتوقع مجدي السؤال، فأجفل عند سماعه، ولكن جديّة حسن وملامحه المُصرّة على الحصول على إجابة أجبرته على الرد، فقال:

-ليه انا يا حسن؟؟

-أولاً أنت الشخص الوحيد اللي عارف عني كل شئ في الحقيقة من زمان وده سهّل مهمة الاعتراف.. ثانياً وانت الشخص الوحيد اللي بيخاف على غادة ومش هيجاملني على حسابها.

-محتاج الأول اعرف.. ليه بطّلت تقتل؟؟ برغم إن الفساد والظلم بيزيد؟؟

قال حسن بصوت مُتعب ومُنقل بالهَمَم:

-موت نادية كسرتني يا أستاذ مجدي.. انا بعد رؤى مكانش في حياتي غير نادية.. بعد انتحارها وعجزني عن حمايتها من نفسها فقدت كل رغبة في الحياة.. وسألت نفسي أيه فايده تحقيق عدالة لغيري وانا مش قادر احمي بيتي من الظلم ومن نفسي؟؟ انتحار نادية فتّح عيني على حقيقة إن كل شخص اتخلق في الدنيا مسئول عن نفسه.. ومش مُهمته إنه يغيّر الناس.. ولو حاولت تشغل نفسك بغيرك هينتهي بيك المطاف بإنك مش هتعدل حال غيرك.. ومش هتلاقي نفسك.. لأنك شغلت نفسك عن دورك الحقيقي في الدنيا وهو نفسك.. لو تقدر تعمل الاتنين سوا يبقى كويس.. بس ده مستحيل حد يقدر يعمل لوحده.. ده اللي وصلته بعد التجربة الصعبة اللي مريت بيها.. لو فعلاً عايز تحسّن الوضع السيء.. ماتعملش انت الغلط.. ولو حاولت تمنع غيرك عن الغلط ماينفعش تمنعه بغلط اكبر منه.. غلط الغير عمره ما كان مُبرر لغلطك.

صمت حسن لثواني ثم أكمل:

- كل جزء مات فيّ مع حد قتلته رجع يشعر بالحياة من جديد بعد ظهور عصام وغادة في حياتي.. ويومها تأكدت إني ظلمت نفسي مرة يوم ما سمحت لمشاعر الانتقام والكُره والغضب تتحكم فيّ.. وتاني لما حبست نفسي في شرنقة عذاب مغلقة وكأني رجل اتدفن وهو عايش.. ولا عارف يموت وولا قادر يخرج من قبره.. وأخذت عهد على نفسي إني لا يمكن اعمل كده في نفسي ولا في اللي يهمني أمرهم تاني أبداً.. وبدعي كل يوم ربنا يسامحني على اللي عملته.. ويسامح نادية.

سقطت دموع حسن في صمت مؤلم، ولم يحاول أن يداريها، في الحقيقة؛ حسن كان يشعر بدموعه تقوم بعمل المُطهر للجرح، مؤلمة ولكنها ضرورية، كان يشعر بروحه تغتسل بدموع ندمه، بعد اعترافه شعر أخيراً ولأول مرة منذ سنوات عديدة بالحرية، بخروجه من قبر اختاره ولكن لم يعد يحتمل البقاء فيه بعد اليوم، هل هذا يعني شفاءه من تلك المشاعر السيئة؟ هو لا يعلم يقيناً، ولكنه يعلم إنه لن يعود له أبداً، فقد تعلم من تجربته.

صمت مجدي لدقيقة كاملة كان ينظر خلالها لحسن، وكأنه يتخلله بنظراته، الصحفي داخله كان يجيد التفريق

بين الحقيقة والكذب، بين الصدق والادعاء، فكان يُسخر كل خبراته لكشف ستر حسن في تلك اللحظة، لأن إجابته سيتحدد عليها مصير غادة التي يعتبرها إبنته، قال بعدها: -ربنا وحده اللي بيحاسب ويغفر.. بس انا مصدقك يا حسن.. والسبب إنك كان ممكن تداري.. بس جيت النهاردة عشان خايف على غادة من نفسك وطلبت شهادة حد من طرفها.. وده حب مش سهل يتكرر.. انا شخصياً موافق.. لكن موضوع غادة ده محتاج مني شوية تفكير.

شعر حسن بالسعادة لأنه أخيراً وبعد سنوات من الوحدة استطاع أن يخرج من شرنقة القتل، وأن يستعيد احترامه لنفسه من خلال قبول الآخرين له. هاهو يعترف بكل ما اقترفه من جرائم لشخص هو يحترمه منذ سنوات، ويقبل توبته بل ويقبل أن يكون طرفاً في علاقة مع شخصية عزيزة عليه، وهذا لا يعني سوى إنه أصبح رجلاً شريفاً على الأقل في نظر رجل يثق في نزاهته وحكمه ولن يجامله. استعاد حسن في تلك اللحظة بالتحديد شعوره بالدينا بشكل كامل، بدون أقنعة تحجب عن الآخرين جزء منه وتؤرقه، شعر وكأن مجدي في تلك اللحظة وقّع شهادة حياة عليها اسمه، لتلغي تأثير شهادة الوفاة التي استخرجها لنفسه يوم دفن زوجته.

قال مجدي بعد احترامه لصمت حسن لثواني:
-واسمح لي انتهز الفرصة واشكرك على انتقامك من قاتل
فاطمة.. اللي انت عملته كان غلط ولا يمكن اشجعك عليه..
ولكن يوم قراءتي لخبر مقتل المهدي بردت نار كانت ممكن
تحولني لأكون قاتل.. انت ممكن تكون ارتكبت جرائم..
لكنك في نفس الوقت أنقذت ناس كثير من طاقة كره وانتقام
وغضب كانت ممكن تحرقهم.. شكراً يا حسن.. بس ده لا
يمكن يتكرر تاني.. توعدي؟

هز حسن رأسه شاكراً لمجدي وقال:

-أوعدك.. وبكرة هتسمع أخبار جديدة عن المجرم الحقيقي
ورا مقتل هبة وداليا وتذاكر وقناوي.. أول عملية نشتغل
عليها انا وعصام في الانتقام من الفاسدين والمجرمين بس من
غير قتل.

-شو قنتني.. مين؟؟

ابتسم حسن وقام ومدّ يده ليُسَلِّم على مجدي وقال:
-خليها مفاجئة.

دار حسن واتجه ناحية الباب ولكن مجدي سأله:
-عندي كام سؤال محتاج عنهم إجابة.

اعتدل حسن ليواجهه وقال:

-اتفضل.. دي آخر مرة هكون فيها القاتل بتاع زمان.. بعد
ماخرج من الباب ده مش هيبقى في فرصة تسأل عن أي
شئ يخصه.

-اتفقنا.. انت ازاي فتحت الخزنة وصوّرت الورق اللي في
الظرف؟؟

ابتسم حسن وقال:

-والسؤال الثاني؟؟

-ليه لما انت عارف إني برئ.. جيت مع عصام وغادة يقبضوا
عليّ؟؟

قال حسن:

-غادة كانت مصدومة بعد الInterview.. وحاولت إبعد
تفكيرها عنك.. ولكن بعد حكاية الظرف كانت شبه متأكدة
إن انت القاتل أو على الأقل على علاقة به.. وخصوصاً إنك
اتحاكمت بسبب نفس القضية قبل كده.. وطبعاً كانت ناوية
تبلّغ عنك.. ووقتها موقفك كان هيكون وحش لما يلاقوا الظرف
ده في الخزنة.. كنت هتطلع منها لكن دي كانت هتكون تاني
مرة يتقبض عليك بتهمة مساعدة أو بتهمة القاتل.. وطبعاً
الموقف كان هيكون صعب جداً لشخصية عامة زيّك.. ففكرت
ازاي امنع الفضيحة وفي نفس الوقت أريّح غادة.. فأقنعتها
نسمع منك الأول وعلشان تطمّن عرضت عصام يبجي معنا.
ابتسم مجدي وقال:

-فتحت الخزنة ازاي بقي؟؟

ضحك حسن وقال:

-السؤال الثالث؟؟

-ليه بعثلي الظرف زمان؟؟

تنهد حسن وقال:

-لو سألتني السؤال ده قبل النهاردة كنت هقول عشان عايز الناس تعرف إني مش مجرد قاتل زي ما هما فاكرين.. لكن بعد لقاءنا النهاردة عرفت السبب الحقيقي؛ هو إني كنت محتاج اعترف بشكل أو بآخر.. كنت محتاج اتكلم مع حد يعرف عني كل شئ.. ودي كانت طريقتي في الاعتراف.. وانت كنت انسب شخص احكيه عن نفسي.

ابتسم مجدي وهمّ بقول شئ ما، ولكن أكمل حسن:

-بخصوص الخزنة بقى؛ انا ولا فتحت خزنة ولا دخلت مكتبك من أساسه يومها.. انت نسيت إن انا اللي باعتلك الظرف ده؟؟ وعندي نسخة من كل اللي عندك؟؟ كل اللي عملته إني صوّرت منهم نسخ قبل ما أجي مع غادة واتمشيت شوية في الدور ورجعت قتلها إني خلّصت.

ابتسم مجدي وهزّ رأسه متفهماً، ثم مدّ يده وصافح حسن بؤد وقال له:

-متشكر على صراحتك.. واستنى مني تليفون بخصوص موضوع غادة.. سامحني بس ده مستقبل بنتي.

يغادر حسن المكتب بعد أن يُسلم على مجدي الذي لم يستطع منع نفسه من الضحك على خدعة حسن البسيطة والعبقرية. جلس مجدي كارم أمام مكتبه في مواجهة المقالة المعلقة على الحائط يُفكر، وكأنه يتحدث معها حديثاً صامتاً.

لقد تأكد إنه برئ مما كان يتصور إنه فعل، تأكد إنه لم يساعد أو يُشجع قاتل على قتل أبرياء، بل تأكد أن القاتل لم يقتل أبرياء من الأساس. شعر وكأن وقت رفع المقالة عن الحائط قد حان؛ تلك المقالة كانت هنا لتذكيره بخطأ تأكد اليوم إنه لم يرتكبه، فلا معنى لوجودها أمامه بعد اليوم.

قام من مكانه وتوجه للحائط، مدّ يده والتقط الإطار الذي يُحيط بمقالته بكل حذر، وكأنه يحمل طفل رضيع، نظر للمقالة وملامحه تحمل ابتسامة حزينة تليق بلحظات الوداع، ودار ليضعها داخل الخزانة، ولكن قبل أن يخطو خطوة واحدة في اتجاه الخزانة، دار وأعادها لمكانها.

نظر لها مجدي وكأنها صديق عائد بعد غيبة، وظهرت علامات السعادة على ملامحه من جديد. في الحقيقة تلك المقالة لم تكن هنا لمجرد تذكيره بخطأ، ولكنها جزء منه، جزء كان يخجل منه قبل الليلة، وأصبح فخور به، بعدما تأكد من إنه كان على حق عندما ظنّ أن القاتل، لم يكن مُجرد قاتل.

عاد إلي مكتبه وهو يفكر فيما حدث، لماذا لم يُبقي حسن ليتحدث معه أكثر، فهو طالما كان يعتبر القاتل صديقه الذي لم يقابله، تلك العلاقة التي نشأت بينهما في مقالات مجدي

وعلى جباه ضحايا حسن لم تكُن مُجرد علاقة مُحقق وقاتل بالنسبة لمجدي، وزيارة حسن اليوم لمجدي تُشير إلى إنها على نفس القدر من الأهمية بالنسبة لحسن أيضاً. ولهذا السبب وافق مجدي على الفكير في ارتباط حسن بغادة لو قبلت أن تسامحه، مجدي أراد أن يكون حسن قريباً منه لأنه يعتبره صديق غائب وعاد لتوّه، ويعتبر نفسه مديناً له لأنه انتقم لأخته، ولأنه صادق في توبته. ابتسم مجدي في تلك اللحظة وتمنى أن تسامح غادة هذا الرجل الذي تحمّل الكثير ومازال يحمل الخير بداخله.

فجر الجمعة ٣ يناير سنة ٢٠١٤

يسير حسن بمفرده على كوبري قصر النيل، يكاد لا يرى سوى النيل، غارقاً في أفكاره المتخبطة، وكأنه على وشك الموت حيث مرّ شريط حياته كله تقريباً أمام عينه. تذكر رؤى أخته الوحيدة، ونادية، حتى تذكر بعض ذكريات الطفولة. وقف حيث اعتاد أن يقف مع صديقه عصام الذي يشعر وكأن النيل حزين على غيابه الليلة، ولكنه في تلك الليلة كان يريد أن يختلي بالنيل، وكأنه لا يريد أن يعترف بحبه لغادة أمام صديقه.

نظر حسن للنيل وملاحه تستنطقه، هل ستسامحه غادة وتقبله؟ وهل إذا قبلته يستطيع هو الحفاظ عليها؟ أم سينتهي بها الأمر مثل نادية؟ مازال يعتبر نفسه مسئولاً

عن سوء تصرفها -نادية- بشكل أو بآخر. يخشى ألا تسامحه عادة، فهو لا يستطيع تحمل ألم الفراق للمرة الثانية، وفي نفس الوقت يخشى عليها من نفسه.

قال له صديقه عصام في نفس المكان يوماً أن الحياة مؤلمة ولكن لحظاتها الجميلة تستحق المجازفة، وقد جازف حسن ووقع في الحب، برغم إنه أراد ألا يعشق وحدث هذا رغماً عنه ولكنه حدث في النهاية، فلماذا إذن بدأت العلاقة بالألم؟؟ أين تلك اللحظات السعيدة التي نتحمل من أجلها ألم الفراق المتوقع لاحقاً؟؟ لا أحد يعيش أبداً، هذا يعلمه حسن يقيناً، ولكنه أراد أن يشعر بعودة الروح لجسده ولو للحظات قبل أن تغادره مرة ثانية، ولكن أن يشعر بألم خروج الروح منه دون أن يعيش لذة عودتها أولاً، فهذا هو الظلم بعينه.

آن الأوان ترتاح يا ضهري يا مَحني..
وطالما ديني اندفع واجب تسامحي..
حُسن سيرتي شفيح.. والحق مش هيزيع..
كل اللي طالبه انا مِنْكَ تَرِيحني.

أراد حسن عند سماعه صوت عم حكيم أن يدور ليُسَلِّم عليه، ولكن كلماته اخترقت كل خطوط الدفاع التي يحيط بها مشاعره منذ زمن، فسقطت دموعه في خيانة مشينة

لكل محاولات التماسك. شعر حسن في تلك اللحظات أن عم حكيم كان يخاطبه هو وحده.

للدنيا لعبة مُحكمة.. واحنا قواشيظها..
الخطة دي بقى مُلزِمة.. وولا مين يلخبظها..
ومهما حاولت تحيد بعيد عنها..
هتفوق تلاقي نفسك.. ماشي في سِكتها.

صدق عم حكيم في كلامه، فبرغم كل محاولات حسن ألا يشعر بالألم مُجدداً، وحالة العُزلة التي أُجبر نفسه عليها، استطاعت الدنيا رغم أنفه أن تنتزعه انتزاعاً من شرنقته وتُلقي به في طريق عصام وغادة حتى يتذكر كيف تبدو الحياة وكيف تؤلم تجربتها.

دار حسن في تلك اللحظة متجاهلاً دموعه التي كانت لاتزال تبلل وجهه، نظر حوله بحثاً عن عم حكيم، فلم يجده. شك حسن في نفسه لثواني، هل سمع صوت عم حكيم منذ ثواني حقاً؟ أم لا؟ أم أنه مرّ منذ دقائق عديدة ولكن حسن لم يشعر بالوقت الذي قضاه يبكي رغماً عنه حتى ابتعد؟ نظر حسن في كل الاتجاهات ولكنه لم يلمح أي أثر لعم حكيم.

خطى خطوات قصيرة في اتجاه دار الأوبرا وسأل بائع

جالس هنا يدخن في استمتاع واضح على أنغام أغنية مليئة بالإسفاف، ولكنه أنكر رؤيته لرجل بتلك المواصفات الليلة، ولما استوضح حسن منه أكد الرجل عدم رؤيته لعم حكيم أبداً بالرغم من وجوده كل ليلة في نفس المكان منذ أكثر من عام ونصف.

صباح السبت ٤ يناير سنة ٢٠١٤

استيقظ حسن مبكراً وفتح مواقع الانترنت والأخبار ليجد فضائح حازم البدري «على كل لسان»، بداية من بلاغات عديدة للنائب العام، وحتى صفحات مستخدمي الانترنت العاديين على مواقع التواصل الاجتماعي. كانت ضربة قاضية لفاسد ظنّ أن ملياراته كفيّلة بتحويله لإله يقول للشئ كُن فيكون.

كانت نهاية حازم البدري هي الخطوة الأولى لمشروع لا يهدف للربح بقدر ما يهدف للعدالة، سيجمع حسن وعصام، تمنى حسن في تلك اللحظات أن يقابل عادة ليحتفل معها بنجاح أول عملية انتقامية -لا تتضمن قتل المجرم- يقوم بها مع عصام. لم تستطع الأخبار والصور، بل وصورة القبض على حازم البدري شخصياً التي انتشرت لتوها على مواقع الانترنت

في أن تدخل البهجة لقلب حسن الذي فقد حبيبه.

دخل حسن الغرفة الصغيرة التي لا يدخلها سواه، وقف أمام اللوحة التي بقيت على حالها لثمان سنوات حتى أضاف لها جريمة داليا وتذاكر، بقى صامتاً ينظر لها وكأنه يودع صديق عزيز قبل هجرة لن يعود منها، ثم دار ليلتقط قطعة قماش من على المكتب الصغير واتجه للوحة وبدأ يمحي كل ما تحمله، انتزع الصور الباهتة بفعل الزمن، ولم يتوقف حتى عادت اللوحة بيضاء وكأنها جديدة، وقف يشاهد اللوحة، تبدو تماماً مثل الصفحة التي انتوى أن يفتحها في حياته بداية من اليوم، تمنى لو كان يستطيع مسح أفعاله السيئة كما فعل لتوه مع اللوحة، ولكنه كان يدرك أن مسح أفعاله ليس ببساطة مسح اللوحة، فالأفعال التي ارتكبها لا يمحيها سوى أفعال أقوى منها على الطريق الصحيح، وقد عقد العزم على أن يفعل. شعر حسن براحة وهدوء وسكينة وكأنه بالفعل تمكن من مسح أخطاءه مع الكلمات التي مسحها من على اللوحة، وأدرك أن اليوم هو بالفعل أول يوم في حياته الجديدة، ولكن لم ينقصه سوى وجود غادة إلى جواره لتعينه على رحلته التي لا يريد أن يكملها بدونها، وليكتمل بها؛ فمهما شعر بالسعادة أو الفخر أو النجاح فلن يكتمل حسن بدونها أبداً.

كان حسن غارقاً في أفكاره، عندما قطعها صوت رنين هاتفه
ليعلن عن اتصال مجدي به، رد بصوت غلبه الحزن:

-أيوة يا أستاذ مجدي.. مبروك.

-تسلم أيديكم بجد.. مالك صوتك متضايق ليه؟؟

-لا أبداً مفيش.. انا مبسوط والله.

-مش باين إنك مبسوط.. عموماً أنا فكرت في موضوع غادة..

سامحني يا حسن الوحيد اللي من حقه ياخذ القرار ده؛

هو غادة شخصياً.. لازم تصارحها بكل حاجة عشان هي اللي

تقرر.. دي حياتها.

هز حسن رأسه بأسى، فهو كان يحاول تجنّب مصارحة غادة،

ولكنه الآن مضطر أن يصارحها.

دق جرس الباب مقاطعاً المكالمة، فاعتذر لمجدي -الذي كان

يتحرك بسيارته في تلك الثانية من أمام منزل حسن بعد أن

أوصل غادة بنفسه- قائلاً:

-طب ثواني افتح الباب وهجيلك.

ترك الهاتف على الطاولة وذهب ليفتح الباب، فقال مجدي:

-لا مش هتيجي. قالها وابتسم وأنهى الاتصال لثقته أن حسن

لن يتذكر أن يعود لهاتفه بعد أن يفتح الباب.

فتح حسن الباب ليجد غادة في انتظاره، برغم دموعها

والإجهاد الواضح بسبب السهر، ابتسمت عندما رأته.

تمت بحمد الله

oboiikan.com